

明太祖實錄

卷二二至二五七

洪武二十五年十月至三十一年閏五月



明太祖實錄

卷二二二至二五七

洪武二十五年十月至三十一年閏五月

中華民國五十七年六月二版

史料
叢書：明實錄附校勘記

太祖實錄（全八冊）附校勘記（二冊）

校勘者：中央研究院歷史語言研究所
刊行者：中央研究院歷史語言研究所
印刷者：永勝彩色印製有限公司



本所校印本明太祖實錄初版係據國立北平圖書館
紅格鈔本之 Positive 微捲影印。此係第二版，改據該
鈔本之 Ozaphane Negative 微捲影印。據 Ozaphane

Negative 微捲放大之照片，不需塗描，故未於照片正
文右側，加注圓圈，此二版與初版不同處。

民國五十七年七月十六日黃彰健謹識。

明太祖高皇帝實錄卷之二百二十二

洪武二十五年冬十月己酉朔享太廟○改建欽天監于五府

之後之令先是已以天下都司衛所分番命五軍都督府申諭校試軍士有不中者其將校往往

不去其職謫令從征至是又恐其玩法怠於訓練命自今軍士

校試不中者指揮千百戶必罰無貸○賜建昌衛指揮張顯等

鈔錠有差先是蠻寇作耗顯等與蘇州衛官軍守城有功至是

顯以公事至京命禮部驗其功績循例賞賜之於是賜顯鈔一

百四十錠永一藥百戶籍鑑鈔九十錠尋命給賞蘇州建昌二

衛守城將士四千九百餘人鈔十八萬六百餘錠白金七千二

百兩文綺帛各三百三十六疋○旌表魏敏孝行敏河南鞏縣

人登武武辰進士授吏科給事中以母病謁告歸省未至而母

卒敏即之墓所哀慟水漿不入口者五日廬墓三年旦夕衰服

哭奠如初表鄉里稱其孝事聞詔旌表之○癸丑戶部言運解

州池鹽計其路程自河口揚壺站至淮安白茱站每站一百里

共二十七站

當用船二百七十艘次第接運至京倉收貯宜令工部造船刑

部都察院發囚夫往運從之○乙卯以唐鑑為散騎舍人隨直

宿衛鑑尚書鐸之弟也○戊午 上遣使諭總兵官涼國公藍

玉曰月魯帖木兒完顏無識生死輕重殊無顧藉其用事者揚

其事達達千戶二人而已若大軍厭境或有使來恐是此人宜

即竊之勿令復去昔寇恂斬皇甫文而降高峻用此計也且月

魯帖木兒其出也或詭詐以覘我軍不可信之若知其所存即

遣兵進攻若來降密為之防所謂事起手所忽不可不慎其也

舟建昌土軍三千人宜收入營諸將校亡者捕送京師又蘇州

去西蕃甚適宜早定之其栢興州賈哈利境內摩步等部亦須

除其允渠然後宥其餘衆俾耕牧以供賦稅允節制軍務惟此
最當留意賈哈喇者摩訶洞土豪也初王師克建昌授以指揮
之職至是從月魯帖木兒叛○唐申水西宣慰使奢香遣其子
婦奢助及其把事頭目允別隴任等來朝貢馬謝恩詔賜奢香
銀四百兩錦綺各十足鈔五十錠奢助允別隴任等錦綺鈔有
差○辛酉發河南開封等府民丁及安吉等十七衛軍士修築
陽武縣河防○賞浙江盤石等衛造防倭海船將士八千七百
餘人鈔有差○壬戌陞錦衣衛指揮僉事謝貴為河南都指揮
僉事○癸亥命戶部於正湯門外距板橋五里度地自牛首山
接方山西傍河崖為上林苑戶部因為圖以進上以苑中之
地民人已種二麥俱俟明年收成後令勿再種其占及民田者
給官田償之官田或不敷令民徙居江北倍數給田償之永為

世業民庶墳塋有在苑內者令勿徙聽其以時祭掃尋以妨民業遂止○乙丑西河中護衛秦軍旗牧馬踐梁國公家奴麥苗奴妻擲鎌傷馬足與孺駒俱斃請治其罪上曰縱馬踐麥苗非也擲鎌傷馬此一時之忿婦人之愚也勿問但掌馬官杖失約束不得無責命杖之○夜大陰犯五車○己巳追封西平侯沐英為黔寧昭靖王英用王者明器諡曰嗚呼爾英昔幼孤於援攘之秋若尋嘗視之豈知有今日者耶古語云吉人天相所以天使爾于我依當依朕之時爾我皆不知有今日之勢及爾日長朕之王業漸昌皇天眷命遂一字內即以西境之號封爾開國輔運推誠宣力武臣榮祿大夫柱國西平侯復爾本姓繼爾宗祀天下之廣四維之間皆勇智者也西南諸夷非仁勇者難以控馭自爾鎮後于今十有一年矣朕無西南之憂所以

屢加恩眷廣錫其產冀朕之後及爾子孫共享富貴以保全終始相遇之恩何期天假年一疾長逝不勝哀悼今遣封爾為黔寧王謚昭靖爾其有知服茲寵命○乙亥陞刑部員外郎吳斌為都察院左副都御史○命故黔寧昭靖王沐英子春襲封西平侯往鎮雲南誥曰世人早失怙恃而撫育存恤者恩亦父母也昔者爾父沐英當天下擾攘之秋孤而且幼無所依歸朕特憐之撫以為子從渡江左至于長成朕後有子命復本姓歸繼宗祀因有勤勞封為西平侯重祿厚賞冀為巨家與國同久曩命征雲南留鎮其地能布恩威蠻夷率服朕無西南之憂者十有一年邇者因疾令終特越爵錫以王封慰之於冥冥今命爾春襲封西平侯呼朕視爾父猶子思昔提携猶動首育之心爾當思爾父相從之幸毋忘釋難之恩忠誠為國寧寐存心則

鬼神有鑒福祿永昌矣敬哉○命鎮守雲南都督竇正署雲南都指揮使司事召都督僉事何福等還京○常州府知府李得善奏獄囚有鬻私鹽者二十餘人因為首者未獲久淹囚禁耕獲既廢供饋難苦乞暫釋各人還家以畢農路且令告諭為首者俱至理之奏至 上從其言後所縱囚果與未獲者如期皆至得善復以聞詔並釋之

十一月戊寅朔夜有大星青白色有光起自天船西南行至卷舌沒○賜在京致仕武官文綺人一表裏 乙酉山東都指揮使周房言所屬寧海萊州二衛東瀕巨海途岸紆遠難於防禦近者需擇萊州要害之處當置八總寨以轄四十八小寨其禦衛亦宜置五總寨以備倭夷詔從之○丙戌景川侯曹震遣鎮撫甘信入奏五事一曰四川所屬地方鹽井五十七處俱用竹

筒皮囊汲水煎辦歲額四萬五千一百七十五引以給各衛軍士月鹽不敷夔州雲陽有上温下温東西等五井大寧縣鹽井泉湧易為煎辦已有竈丁九百六十人歲辦一萬六百二十三引請依普安例召商輸粟以備軍儲而給鹽償之二曰四川鹽課司言今商人於雲南建昌烏撒諸處輸粟給以川鹽數支不敷乞令以重慶府綦江縣買馬官鹽八千一百餘引給之三曰馬湖等府秋糧逋征並以四川之民自國初勅置貴州黃平松茂等衛營造蜀府征討雲南祿肇諸處積年勞役請從末減四曰施州衛官軍歲用糧儲皆湖廣郢縣所運川江至險湍汎艱難重慶府歲儲糧三十三萬八千石有奇既無他用可具舟順沅至巫山俾施州衛發軍與民兼運甚便五曰建昌蘇州新制之衛控禦羗戎凡弓矢火攻之具四川都司布政司足以造之惟

盛甲不易成請於工部支給 上皆從之 翰林院編修唐震
卒^于泗州命禮部遣人往祭之仍命還其喪于京師 戊子改建
大內金水橋成 己丑命罷開封府原武縣治河之後時工費
浩繁又值天寒故罷之 庚寅改會川軍民千戶所為會川衛
軍民指揮使司 癸巳夜太陰犯司恆 甲午總兵官涼國公
藍玉兵次栢興州玉間遣百戶毛海以計誘致月魯帖木兒并
其子胖伯遂降其衆遣人送月魯帖木兒至京師伏誅玉因奏
四川之境地曠山險控扼西蕃連歲蠻夷梗化盖由軍衛少而
備禦寡也宜增置屯衛順慶府鎮禦巴梁大竹諸縣其保寧千
戶所北通連雲棧宜改為衛漢州灌縣邛縣西連松茂邛黎當
土番出入之地眉州控制馬湖建昌嘉定接山都長九寨俱為
要道皆宜置增軍衛下群臣議行之玉又奏四川軍士少請籍

民丁為兵其長河西朶甘百夷地相連屬恃其險遠久不入貢請兵致討 上報玉曰籍民為兵甚不可其民連年供輸煩擾文以壯者為兵其何以堪况完渠已殄人知順命雖獷悍者漸革其習戍守軍士皆有成規何用增益重困吾民乎其長河西朶甘百夷之事朕惟兵久在外不可重勞但養銳蓄威徐議大舉此非四十萬眾不可行也今爾所統之兵選留守禦餘令回衛爾即還京玉遂班師既而都指揮使瞿能同知徐凱亦還成都○高麗權知國事李成桂聞皇太子薨率其臣削服行喪禮遣其三司左使李居仁進表奉慰并貢白金二錠白黑布各百疋致祭○琉球國中山王察度遣使察都等表賀冬至貢方物○戊戌賜致仕輩昌衛百戶陳日新等四十六人鈔百五十錠○北平行都司奏大寧左等七衛及寬河百戶所今歲屯種所

收教麥凡八十四萬五百七十餘石。○庚子置江東宣課司大
 使一人從九品副使二人雜職。○陞刑部郎中汪勳為本部左
 侍郎司務所著為右侍郎大理寺副張恭為本寺右寺丞馬文
 或為左寺丞。○辛丑賜遼王二護衛軍士綿布有妻子者
 人四疋無者半之凡八十餘人布二萬八千九百餘疋。○陞殿
 廷儀禮司序班曹養志為廣東按察使僉事賜鈔及襲衣。上
 以養志典禮儀周旋殿廷未嘗有失又自司正而下皆言養志
 有行義故遷賞之。○壬寅詔鳳陽滁州廬州和州等處民戶種
 桑枣柿各二百株。○癸卯復以少詹事李文吉為右僉都御史
貴州宣慰使安的罕來朝賞馬六十二匹賜以綺帛鈔錠
 貴州宣慰司儒學設教授一員訓導四員。○甲辰河南開封
 府祥符縣民詣闕言昔河決浸沒田土至今不可樹藝而徵稅
 如故。上命免其賦凡萬一千二百餘石絲五千四百餘斤。○

丙午冬至 上御奉天殿受朝賀賜國子監祭酒胡季安以下
及監生節餼○是月 上以中外交文武百司職名之沿革品秩
之崇卑勲階之陞轉俸祿之損益歷年茲久屢有不同無以示
成憲於後世迺命儒臣重定其品階勲祿之制以示天下正一
品宗人府宗人令左右宗正左右宗人都督府左右都督文武
勲俱左右柱國階俱初授特進榮祿大夫陞授特進光祿大夫
祿月米八十七石從一品都督同知勲柱國階初授榮祿大夫
陞授光祿大夫祿月米七十四石正二品六部尚書都察院左
右都御史襲封行聖公真人都督僉事留守司正留守都指揮
使文勲正治上卿階初授善寔大夫陞授資政大夫加授資德
大夫武勲上護軍階初授驃騎將軍陞授金吾將軍加授龍虎
將軍祿月米六十一石從二品左右布政使都指揮同知文勲

正治卿階初授中奉大夫陞授通奉大夫加授正奉大夫武勳
護軍階初授鎮國將軍陞授定國將軍加授奉國將軍祿月米
四十八石正三品六部左右侍郎都察院左右副都御史通政
使大理寺卿太常司卿詹事府詹事應天府尹按察使副留守
都指揮僉事各衛指揮使文勳資治尹階初授嘉議大夫陞授
通議大夫加授正議大夫武勳上輕車都尉階初授昭勇將軍
陞授昭毅將軍加授昭武將軍祿月米三十五石從三品光祿
司卿太僕寺卿布政司叅政鹽運使宣慰使留守司指揮同知
各衛指揮同知文勳資治少尹階初授亞中大夫陞授中大夫
加授太中大夫武勳輕車都尉階初授懷遠將軍陞授定遠將
軍加授安遠將軍祿月米二十六石正四品都察院左右
僉都御史通政司左右通政大理太常太僕各少卿詹事府少

唐事應天府丞宣慰同司知按察司副使各府知府各衛指揮
僉事文勳贊治尹階初授中順大夫陞授中憲大夫加授中議
大夫武勳上騎都尉階初授明威將軍陞授宣威將軍加授廣
威將軍祿月米二十四石從四品國子中都二監祭酒布政司
左右叅議鹽運司同知宣慰司副使宣撫司宣撫文勳贊治少
尹階初授朝列大夫陞授朝議大夫加授朝請大夫武勳騎都
尉階初授宣武將軍陞授顯武將軍加授信武將軍祿月米二
十一石正五品翰林院學士華蓋武英文華殿東閣文淵閣左
右春坊大學士左右庶子尚寶司卿六部郎中應天府治中欽
天監回回監正道政司左右叅謀光祿司少卿太醫院使理
寺左右寺丞五軍都督府斷事官各府同知王府左右長史宗
人府經歷按察司宣慰司僉事宣撫司同知儀衛正正十戶文

勲修政庶尹階初授奉議大夫陞授奉政大夫武勲驍騎衛尉
階初授武德將軍陞授武節將軍祿月米一十六石從五品翰
林院侍讀侍講學士左右春坊左右諭德司經局洗馬五軍都
督^府經歷左右衛事官六部員外郎尚寶司少卿各州知州鹽運
司副使鹽課提舉司提舉招討司招討宣撫司副使安撫司安
撫衛鎮撫副千戶儀衛副文勲協正庶尹階初授奉訓大夫陞
授奉直大夫武勲飛騎尉階初授武畧將軍陞授武毅將軍祿
月米一十四石正六品翰林院侍讀侍講國子中都二監司業
左右春坊左右中允詹事府丞尚寶司丞六部主事太常司丞
欽天監回回監副五官正太僕寺丞京縣知縣太醫院判閣門
使兵馬司指揮王府審理正大理寺左右寺正都察院經歷神
樂觀提點僧錄司左右善世道錄司左右正一中都留守司并

都司經歷斷事各府通判長官司長官副招討宣撫司僉事安撫司同知典仗百戶文階初授承直郎陞授承德郎武勳雲騎尉階初授昭信校尉陞授承信校尉祿月米一十石從六品大理寺左右寺副左右春坊左右贊善左右司直郎翰林院修撰光祿寺丞應天府推官光祿司各署正僧錄司左右闡教道錄司左右演法監運司判官布政司經歷理問所理問各州同知鹽課提舉司同提舉女撫司副使長官司副長官所鎮撫文階初授承務郎儒陞授儒林郎吏材幹宣德郎武勳武騎尉階初授忠顯校尉陞授忠武校尉祿月米八石正七品監察御史五軍都督府都事太常司博士典簿京縣丞道政司經歷大理寺左右評事兵馬副指揮都察院都事翰林院編修營善所正按察司經歷五軍斷事官五司稽仁稽義稽禮稽智稽信王府審

理副煎鹽提舉司提舉各府推官各縣知縣中都留守司并都
司都事副斷事安撫司僉事蠻夷長官司長官文階初授承事
郎儒陞授文林郎吏材幹宣義郎祿月米七石五斗從七品中
書舍人太僕寺主簿應天府經歷光祿司典簿各署丞翰林院
檢討太常司各祠祭等署奉祀各州判官欽天監回回監五官
靈臺郎詹事府主簿鹽運司經歷鹽課提舉司副提舉布政司
都事宣慰司經歷理問所副理問蠻夷長官司副長官階初授
從仕郎陞授徵仕郎祿月米七石正八品六科都給事中翰林
院五經博士通政司并各衛知事京縣主簿國子中都二監丞
戶部刑部照磨寶鈔龍江提舉司提舉欽天監回回監主簿五
官保章正太常司協律郎典牧所提領太醫院御醫僧錄司左
右講經道錄司左右至靈煎鹽提舉司同提舉王府典寶正奉

祠正良醫正典膳正紀善无符宮崇真宮靈官營繕所副各府
經歷各縣丞按察司知事宣慰司都事階初授迪功卽陞授修
職卽祿月未六石五斗從八品六科左右給事中監運司應天
府知事欽天監回回監五官挈壺正光祿司錄事各署監事儀
禮司正翰林院典籍神樂觀知觀僧錄司左右覺義道錄司左
右玄義王府典膳副奉祠副典寶副良醫副國子監博士助教
典簿宣撫司經歷太常司各祠祭等署祀丞布政司照磨崇真
宮副靈官階初授迪功佐卽陞授修職佐卽祿月未六石正九
品六科給事中儀禮司左右司副左右司丞太常司贊禮卽詹
事錄府事各府知事各縣主簿國子監學正行人司正戶部刑
部檢校司經局校書翰林院侍書典牧所大使各牧監正欽天
監回回監五官司曆五官監候龍江寶鈔提舉司副提舉王府

長史司典簿典儀正奉祠所典樂會同館茶監馬司承運庫寶
鈔廣惠廣積贖罰甲乙丙丁戊字庫皮作鞍轡寶源顏料局應
天府織染局文思院等大使煎鹽提舉司副提舉教坊司奉鑾
宣撫安撫司知事營繕所丞階初授將仕郎陞授登仕郎祿月
米五石五斗從九品翰林院承天門待詔都稅司大使國子監
學錄典籍司經局正字欽天監五官司辰漏刻博士各牧監副
儀禮司鳴贊序班軍儲倉大使茶監馬司副提舉鈔廣惠廣積
贖罰甲乙丙丁戊字庫副使宣課司大使太常司司樂典牧所
副使府學教授行人司副會同館副使布政司庫寶泉軍器各
府造織染局稅課司并倉大使王府典儀副司牧司太使承運
庫皮作鞍轡寶源局文思院副使觀察使太醫院千戶所鹽課
提舉司各州吏目五軍漸事官提控茶贖巡檢司獄陰陽學正

術醫學正科僧綱司都綱道紀司都紀應天府織染局副使教
坊司左右詔舞左右司樂階初授將仕佐郎陞授登仕佐郎祿
月米五石未入流各部司務州學正縣典史教諭行人司行人
國子監掌儀牧監錄事群長翰林院孔目王府引禮舍人河泊
所牌壩官車民司稅課分司茶鹽課司慶遠裕民司揚州府都
伯瓜洲稅課司茶鹽批驗所長史司倉庫州縣衛倉生藥庫中
帛針工稅課抄紙印鈔鑄印惠民銀場抽分竹木等局并關大
使副使遊運所鈇冶所司竹局鹽運司衛府州庫河州軍民指
揮使遼陽青州府樂安三稅課司大使軍儲京衛府倉都稅宣
課司牲稅課等司工部軍器局布政司庫寶泉軍器各府織染
雜造局副使斷事兵馬指揮長官司吏目理問所提控案牘驛
丞祿月米有差醫學典科訓科陰陽學典術訓術僧綱司副都

綱僧正司僧正僧會司僧會道紀司副都紀道正司道止道會
司道會與僧道錄司僧綱道紀醫學正科陰陽學正術俱不給
祿

大明太祖聖神文武欽明啓運俊德成功統天大孝高皇帝實
錄卷之二十二

明太祖高皇帝實錄卷之二百二十三

洪武二十五年十二月丁未朔以金潤復為禮部郎中潤湖廣人先任禮部郎中坐事謫都察院鞫獄嘗奏事殿中應對稱旨至是上顧問廷臣曰向有戴中奏事者頗有條理久不列其人何在吏部以其名對上曰此人才可用遂命復舊職○山丹衛遣官進瑞麥一莖二穗者凡十一本○戊申皇第三十五孫有嶠生周王第四子也○勅宋國公馮勝潁國公傅友德等曰昔漢唐之禦胡虜每煉高馬肥知其入寇乃謀定策伏兵以待之否則必為邊患古今時勢雖異而禦侮仿患則同今以十萬之衆捕獵塞上手無尺寸之兵而耕耘田畝可乎故必伏兵甲以自防立斥候以知警則有備無患矣期明年三月發京師壯勇及河南山西銳卒鼓行塞上爾等立屯既成率數十萬衆馳

馳雷擊蒐獵虜庭耀張威武不亦壯哉勅至毋違朕命○壬子
夜雷○甲寅朶甘都指揮使司遣指揮鎮南監藏卜奉表箋來
貢馬○丙辰安陸州知州余彥誠以征稅愆期當逮問其州民
楊么等七人詣闕言彥誠雖慢於催科而勤於愛民 上特宥
之賜宴加賞遣還任么等亦預宴○安慶府知事周昌言臣見
士人或因小過罷黜然其才有堪用而於例不得舉宜垂寬宥
今有司得薦起之吏部奏言有罪復^用言無以示懲昌言不可聽
上曰良工琢玉不棄小疵朝廷用人必赦小過故改過遷善
聖人與之鑄長棄短人君務焉苟因一事之失而棄一人則天
下無全人矣昌之言誠是其令有司凡士人因小過罷黜及遷
謫遠方者知其才德果優並聽舉用○丁巳夜有星黑赤色尾
跡有光起自造父東北行至北斗杓後○庚申琉球國山南王

承察度遣使南都妹等貢方物并遣姪三五郎尾及寨官之子
實他盧尾賀改志等赴國子監讀書詔賜三五郎尾等鈔各五
錠襪衫緇中皂絛靴鞮并文綺綉絹衣各一襲○都督僉事何
福等征蠻還京師詔賞福金二百兩文綺十疋鈔二百錠茅馬
白金一百兩文綺八疋鈔一百錠徐司馬陶文俞淵白金各五
十兩文綺四疋鈔一百錠將士二萬四千餘人俱賞有差○辛
酉陞府軍右衛指揮僉事陳麟為中軍都督僉事○兵部奏留
守中衛百戶犯罪死其子當編戍外衛上曰其父犯法既死
其子勿問○壬戌西河中護衛指揮僉事王福有罪謫戍會川
既行其叔父都督僉事寬以疾卒上遣使追福還俾營葬事
尋寬其罪令還職○癸亥夜太陰犯五諸侯○甲子陞金吾前
衛指揮使陳庸為湖廣都指揮使湖廣都指揮同知許亮為右

軍都僉事仍以其子傑為留守左衛指揮同知子孫世襲○廣東都指揮使花茂奏東莞香山等縣大溪山橫琴山通逃倭戶華人凡一千餘戶附居海島不習耕稼止以操舟為業會官軍則稱捕魚過番賊則同為寇盜隔絕海洋殊難管轄其守禦官軍冒山嵐海瘴多^疾疢疫而死請徙其人為兵庶革前患從之○乙丑都督僉事楊春討靖州綏寧蠻寇楊晟禮平之晟禮自洪武十八年拒命不供賦稅至是命春率辰州衛指揮陳貴等領兵討之先遣人諭以禍福順逆之理晟禮不聽春遂督兵進攻斬蠻人數百而俘其男女千人其黨遁散○改製鐵券賜潁國公傅友德定遠侯王猷長興侯耿炳文武定侯郭英及故魏國公徐達曹國公李文忠安陸侯吳傑西平侯沐英家○丙寅後軍都督僉事常權卒權合肥人少好騎射喜兵法元季從軍淮

西為列校歲乙未自采石來歸從克太平授銀牌先鋒累功陞
後軍都督府都督僉事至是以疾卒○戊辰置雲南沅江府儒
學時沅江府言土官子弟編氓多願讀書宜設學校以教之詔
從之○庚午以雲南布政司右叅議范祖為左叅議戶部郎中
為右叅議揚規火用大用祖當塗人故學士常之子在任三考比入覲
以疾卒于京大用雲南人上以其習知土俗故擢用之○山
東布政使趙子良奏濟南長清東阿兗州濟寧河洸久涸舟楫
不通詔兵部設車輛運賜在京致仕武都督官米一百五十
石鈔七十五錠指揮米一百石鈔五十鈔千戶衛鎮撫米九十
石鈔四十錠百戶所鎮撫米八十石鈔三十錠○辛未以北平
河間府水災詔免其田租凡五萬五千餘石○後軍都督府都
督僉事李恪於禮還京先是命恪等往諭山西民願徙居彰德

者聽至是墨報彰德衛輝廣平大名東昌開封懷慶七府從居者凡五百九十八戶計今年所收穀粟麥三百餘萬石綿花千一百八十萬三千餘斤見種麥苗萬二千一百八十餘頃上甚喜曰如此十年吾民之貧者少矣○哈梅里兀納失里王遣回回哈只阿里等來貢馬四十六匹驪十六隻詔賜使者白金文綺有差○壬申宋國公馮勝等籍民兵還先是上遣勝等往太原平陽選民丁立部伍置衛屯田至是還以所籍之數奏之鳳翔侯張龍徽先伯柔敬籍平陸夏縣芮城三縣民丁為一衛定遠侯王弼籍臨汾襄陵蒲縣民丁為一衛宣寧侯曹泰都督馬鑑籍洪峒浮山二縣民丁為一衛會亭侯張溫都督李勝籍曲沃翼城絳縣三縣民丁為一衛都督徐禮籍聞喜安邑猗氏三縣民丁為一衛開國公常昇籍霍州靈石趙城汾西四州縣

民丁為一衛東平侯韓勳東莞伯何崇籍絳州及太平縣民丁
為一衛江陰侯吳高都督蔣義籍蒲州及稷山萬泉臨晉滎河
四縣民丁為一衛全寧侯孫恪籍隰吉二州及石樓永和太寧河
津四縣民丁為一衛安陸侯吳傑致仕指揮李茂之籍平遙太
谷祈縣三縣民丁為一衛永平侯謝成籍汾州及汾水孝義二
縣民丁為一衛西涼侯洪璵籍遼沁平定三州及樂平和順榆
社武鄉沁源五縣民丁為一衛安慶侯仇正都督孫彥籍石州
岢嵐保德三州及寧鄉臨縣興縣靜樂嵐縣河曲河津七縣民
丁為一衛都督商嵩表洪籍忻代二州及崞縣繁峙五臺三縣
民丁為一衛懷遠侯曹興籍太原清源徐溝交城介休五縣民
丁為一衛都督劉德籍陽曲榆次壽陽孟縣定襄五縣民丁為
一衛○甲戌以米國公馮勝潁國公傅友德兼太子太師曹國

公李景隆涼國公藍玉兼太子太傅開國公常昇全寧侯孫恪
兼太子太保詹徽為太子少保兼吏部尚書茹瑺為太子少保
兼兵部尚書任亨泰為詹事府少詹事兼翰林院修撰杜澤楚
樟為詹事府丞徽等以下兼官者併給其俸○乙亥里第三十
六孫有熹生周王第五子也○詔陝西都指揮使司甘肅等處
回回軍民願還西域者悉遣之還撒馬兒罕之地凡千二百三
十六人○丙子詔五軍都督府諭各都指揮使司以軍馬糧儲
之數及關隘要衝山川險易道里遠近悉繪圖以聞
閏十二月丁丑朔○己卯命戶部遣官於湖廣江西諸郡縣買
牛二萬二千三百餘頭分給山東屯種貧民○辛巳 上諭禮
部臣曰周制諸侯之妻曰夫人漢制妃以下亦曰夫人今王妃
以下有所出者皆稱夫人著為令 甲申擢縉雲縣稅課局太

使陳德文為監察御史德文南雄之保昌人性和平易有幹濟才
建昌府知府王克敬薦於朝故擢用之○乙酉高麗權知國事
李成桂欲更其國號遣使來請命 上曰東夷之號惟朝鮮之
稱最美且其未遠矣宜更其國號曰朝鮮○初昏太白入曼壁
障○庚寅初昏有大星赤色尾跡有光起自天苑西南流三丈
餘炸散至游氣沒○辛卯更定巡檢考課之法先是巡檢考滿
給由無私過者陞正九品犯私答者本等用杖罪降祿職吏部
言巡檢之職當以捕獲逃軍逃囚盜賊等項多者為稱職若止
拘過名不考功蹟則僥倖者多有在任三年獲軍囚三二百名
之上為犯私罪而降者有全無所獲依例而降者似此功過弗
明陟罰未當乞更定其法自今巡檢考滿捕獲軍囚盜賊等項
二百名之上無私杖者陞一級有私杖者對品用一百名之上


無私杖者對品用有私杖者降雜職三十名之上無私杖者降雜職有私杖者降邊遠雜職不滿三十名者發邊遠充軍若有強賊及逃軍聚衆劫畧能擒獲以除民害者二十名之上無私杖者陞一級有私杖者對品用一十名之上無私杖者對品用有私杖者降雜職九名以下無私杖者降雜職有私杖者降邊遠雜職若擒強賊逃軍六十名之上或止二十名而又能獲軍囚二百名之上及擒偽造寶鈔及偽印者具奏陞陟從之著為令○壬辰戶部尚書趙勉有罪下獄甲午免翰林院學士劉三吾官時三吾詣吏部自陳壻戶部尚書趙勉夫婦坐贓罪法當死皆緣素失教誨致負深恩近被御史糾劾雖蒙恩宥竊思職居近侍自當引退以勵廉耻吏部以聞遂免其官命僧錄司造知周冊頒于天下僧寺特京師百福寺隱囚徒逋卒往往

易名姓為僧遊食四方無以驗其真偽於是命造周知文冊自
在京及在外府州縣寺院僧名以次編之其年甲姓名字行友
始為僧年月與所授度牒字號俱載于僧名之下既成頒示天
下僧寺凡遊方行脚至者以冊驗之其不同者許獲送有司械
至京治重罪容隱者罪如之○乙未置會川衛送易守禦千戶
所○戊戌命宋國公馮勝為總兵官潁國公傅友德為之副往
山西河南訓練軍馬及領屯衛其餘公侯都督悉聽節制○中軍
都督府都督僉事高銘卒銘鳳陽人上起兵于濠州招募勇
敢士銘仗戈來從授百戶洪武元年授千戶四年上見銘年
老且念其從征日久多著勞績命其子亮襲職特授銘中軍都
督府都督京事致仕食其祿以優之俾歸鳳陽至是卒○甲辰戶
部尚書趙勉伏誅○丙午享太廟○是月刑部尚書楊靖逮一

武官將鞫之門卒檢其身得大珠一顆卒持至靖前僚屬方駭愕靖徐曰安有許大珠此以偽物侮人命權碎之因以上聞上嘉嘆曰靖此舉有四善他人見奇物必以獻朕以求容悅而靖不然所謂以道事君一善也其人藏珠於身苟窮詰之必謂有所投獻是以一珠而起大獄靖有陰德於人二善也若門卒得是珠因而嘉獎之由是快意求獲人將受法外之苦靖能杜小人僥倖三善也且人處常易而應變難今千金之珠卒然至前略不動心迺斥以為偽物而碎之靖有過人之智應變之才四善也○姚安軍民府同知高保以襲遺_職弟高勝貢馬謝○是歲建端門承天門樓各五門復於承天門外建長安東西二門○計內外武官并兵馬總數在京武官二千七百四十七員軍二十萬六千二百八十人馬四千七百五十一匹在武官萬三

千七百四十二員軍九十九萬二千一百五十四人馬四萬三百二十九匹

大明太祖聖神文武欽明啓運俊德成功統天大孝高皇帝實錄卷之二百二十三



大明太祖高皇帝實錄卷之二百二十四

洪武二十六年春正月丁未朔上御奉天殿受朝賀大宴羣

臣○朝鮮國權知國事李成桂遣同知密直司事盧嵩安南國

遣大夫阮宗亮廣西思明府土官知府黃廣平霑益州阿索姚

知州

安軍民府同知高保四川播州宣慰使楊鏗烏撒軍民府知府

穆卜東川軍民府女土官攝賽水西女土官奢香平茶洞長官

楊再勝楚雄府同知高政芒部軍民府女土官金筑安撫司平

伐長官司各遣使貢馬及方物暹羅斛國王恭烈寶毗牙遣其

臣李三齊德奉金葉表貢方物詔賜宴于會同館仍各賜文綺

鈿有差○冊美人李氏為賢妃葛氏為麗妃劉氏為惠妃賢妃

冊文曰妃嬪之立所以資內助廣後嗣也朕稽古制皇后以下

各有員次必歸行貞淑及有子者然後進以位焉爾李氏自選

入宮事朕有年生子控已封為唐王朕特遵古典冊爾為賢妃其敬慎之焉妃生子搆已封伊王冊為麗妃劉妃生子棟已封鄂王冊為惠妃其冊文與賢妃同○戊申遣使召署雲南都指揮使司事右軍都督甯正還朝○詔免天下耆民來朝先是詔天下民年五十以上者來朝京師訪民疾苦有才能者拔用之其年老不通治道則宴賚而遣之至是耆日衆上諭吏部尚書唐徽等曰朕念耆民其中亦有年高者跋涉道途勞苦可遣人馳傳於所止之○庚戌亨太廟○置四川越萬衛○辛亥皇第三十七孫孟昭生楚王第八子也○中軍都督府都僉事徐司馬卒司馬御賜名字從政世為揚州人元季兵亂司馬生九歲無所依上得之養以為子既長出入侍左右屢從征伐有功歲癸卯除總制守金華吳元年授金華衛指揮同

知洪武元年從曹國公李文忠北征獲故元宗王慶生三年十一月陞杭州衛指揮使十二月以本衛為都司陞都指揮使九年遷河南都指揮使十九年正月入勤勳陞中軍都督僉事二十年冬率師征越雋還至成都以疾卒司馬好文學接人温然謙恭為政以惠愛為先所至撫綏士卒拯卹貧困甚得人心尤敬士大夫公事之隙退居一室講論終日蕭然如韋布之士自少富貴家無餘貲人稱其賢云○癸丑戶部奏定雲南烏撒中鹽則例凡輸米一斗五升給浙鹽一引輸米二斗給川鹽輸米一石八斗給安寧井鹽輸米一石六斗給黑鹽井鹽○甲寅以都察院右副都御史解敏為江西按察使敏開封陽武人洪武乙丑進士授監察御史出署浙江按察司事尋授本司僉事後陞副都御史至是調為按察使○乙卯起兵部尚書致仕唐鐸

無太子賓客○丁巳置廣寧中左右前後五衛及右屯後屯前
屯三衛命指揮僉事姚文王確領兵屯守○辛酉大祀天地于
南郊○癸亥詔肅王樸遼王植慶王梅寧王權之國初命肅王
都甘肅遼王都廣寧慶王都夏寧王都大寧至是甘肅以陝西
各衛調戍士馬未集命肅王且駐平涼廣寧以宮殿未成命遼
王且駐大凌河北寧夏以糧餉未敷命慶王且駐慶陽北古鞏
州城以就延安綏德祖賦惟寧王就國○頒誥命於雲都_南指揮
使司及京衛各都司衛所官凡百四人○大理寺右少卿曹銘
父喪賜欵五十錠命馳驛歸葬畢事起復○甲子雲南武定軍
民府知府商勝病不能任事請以子海積襲職從之○置建昌
白黑二鹽井鹽課司設大使副使各一人隸四川鹽課提舉司
○琉球國中山王察度遣使麻州等貢馬及硫黃詔賜麻州等

錦綺及鈔有差○雲南土官縣丞高銷貴州宣慰使安的署永寧宣撫司女土官奢尼各貢方物賜冠帶襲衣文綺鈔有差○戊辰罷廣西荔波縣儒學時本縣言自洪武十七年詔置縣治其地界于雲南因蠻寇作亂焚毀學舍其後大軍克復雖已重建然生員皆苗蠻獠獠缺舌之徒教養無成不堪選貢徒費民供無益國家乞罷其學從之○命以大成樂器頒給天下府學先是上以天下通祀孔子而樂器未備命禮部工部集工人製之至是樂成以給各府儒學俾州縣俾州縣皆如式製之○以前永寧宣撫司宣撫祿照子阿聶襲職先是祿照遣阿聶及次子智入大學受業至二十一年祿照坐事逮至京得直還卒于途遂以其庶母奢尼署司事至是奢尼入朝請以阿聶襲父職從之○夜太陰犯箕宿○己巳命永定侯張鈐往山東都司

調沂州衛將士以充齊府護衛○初靖州會同縣山賊王漢等恃險聚衆據天柱龍寨連結五開龍里羣盜為亂乘間時出剽掠命靖州衛發兵討之兵至斬獲甚多至是械其首從五百餘人至京廷臣請誅之上曰蠻人為亂何代無之但誅其首亂者是矣其餘悉發戍東勝州○徙長沙護衛官軍於越州訓練○辛未以刑部尚書楊靖兼太子賓客并給兼官之俸○置大同左護衛○命修治靖江王府○廣西龍州土官知州趙崇壽貢馬及方物○癸酉賜工部右侍郎鄭彥文致仕彥文山西蔚州人仕明王珍為宣慰使洪武四年東歸仍命為宣慰使六年改澧州知府九年坐事免十三年起為工部右侍郎至是以年老致仕○賜總兵官涼國公藍玉鈔五百錠文綺二十匹指揮徐質嚴麟鈔各百五十錠文綺各六匹○給陝西寧夏等衛軍

士十萬五百人冬衣○是月重定親王公主婚禮凡親王納徵前一日尚寶司陳設御座于奉天殿內官監禮部設納徵儀物于文樓下教坊司設中和樂于殿內其日清晨錦衣衛設儀仗于丹陛丹墀之東西教坊司設大樂于丹陛之東西北向及設樂于午門外設護衛將軍文武執事官如常儀禮司設百官侍立位于文武樓南設玉帛案于殿內之東鼓三嚴文武官具朝服東西向立特鍾聲止儀禮司跪奏請陞殿皇帝具皮弁服導駕奉引如常儀樂作陞座樂止鳴鞭訖序班舉玉帛案置殿中引正使副使入就拜位樂作四拜樂止承制官詣御前跪承制俯伏興由東門稍東出序班舉玉帛案隨之置丹墀中道承制官稱有制贊禮贊跪宣制曰今聘某官某女為某王妃命卿等行納徵禮贊禮贊俯伏興樂作四拜樂止儀禮司奏禮畢

駕興樂作鳴鞭樂止引禮引玉帛案由奉天門東出置玉圭玄纁于綵輿執事官引文樓下儀物由午門東出以次陳列正副使至御橋外收服乘馬至妃家妃家前一日設正副使幕次于大門外道左南向設香案于正堂中設受玉帛案于香案之南其日禮物至妃家引禮捧玉圭玄纁先行正副使隨之至幕次執事者陳禮物于正堂捧玉帛者俟于幕次東向西禮官一員先入至正堂立于東西向主婚者出見立于西東向禮官白奉制命正使某官某副使某官某為某王行納徵禮引主婚者出迎引禮引正使捧玉圭副使捧玄纁先行主婚者隨行至正堂置玉圭玄纁于案正使立于案之左西南向副使立于案之右東南向贊禮引主婚者就拜位四拜詣前跪贊捧圭正使捧玉圭授主婚者主婚者授玉圭以授執事執事者跪受興置于案贊

捧帛副使捧玄纁授主婚者主婚者受玄纁以授執事者執事者跪受興置于案主婚者俯伏平身復位四拜禮畢正副使出主婚者至正副使前致詞云請禮從者酒饌畢主婚者捧帛以勞正副使正副使出主婚者送至門外正副使詣皇帝前復命冊妃儀前期一日工部以王妃儀仗從西華^門入內官監其日清晨內官監錦衣衛尚寶司教坊司文武執事等官于奉天殿陳設如納徵儀儀禮司設冊案于殿內之東承制官持節官位于殿內之東西向設正使副使拜位于丹墀正使在東副使在西錦衣衛設蓋冊黃傘一于殿門外禮部陳設絲輿于門外內官陳王妃鳳輦儀仗于彩輿之南鼓三嚴引禮引文武官入就侍立位鐘聲止儀禮司跪奏請陞殿皇帝具皮弁服導駕奉引如帝儀樂作四拜樂止承制官詣御前跪承制俯伏興

樂作殿座樂也輦引禮引正副使各就拜位

由東門稍東出持節官舉節舉冊官舉案隨行亦由東門稍東出校尉擎傘遮冊行至丹墀御道中持節官立于案東西向傳制官稱有制贊禮唱跪宣制曰今冊某官某女為某王妃命卿等持節行禮贊俯伏興樂作四拜樂止持節官以節授正使引禮引節冊及正副使由東道至奉天門由東門出至午門外置冊于綵輿儀禮司官奏禮畢駕輿樂作百官以次出儀仗鳳輪前行引禮引節及綵輿正副使隨行過御橋收服持節正副使俱上馬至妃家是日妃家先設幕次于大門之外南向設香案于正廳冊使至引禮引正副使至幕次禮官先入見主婚者禮官曰奉制命正使某官某副使某官某持節行冊禮主婚者出迎引禮引正使持節副使捧冊入主婚者隨行至正廳正副使立于香案東南向引禮引主婚者至拜位四拜平身退立于西

南引捧冊內官詣前贊禮贊舉冊副使以冊授內官內官跪受訖贊禮贊請詣中堂行禮內使二人引捧冊內官入中堂正副使仍前立候內官出告行禮畢正使副使以節出主婚者請禮正副使如納徵儀受冊其日妃家陳設香案于中堂設冊案于香案之南設妃拜位于冊案之南妃服翟衣訖俟內官捧冊入置于案贊禮女官一員居東一員居西在妃拜位前相向立宣冊女官展冊女官立于東引禮女官二員分左右引妃出房至冊案前拜位女使執事者立于西贊禮女官贊四拜興宣冊女官稱有制女官贊跪妃跪贊宣冊宣冊女官詣冊案前取冊立宣于香案東宣冊訖以冊入于盃贊受冊宣冊女官捧冊立授妃妃受冊贊以冊授執事者妃以冊授女使女使跪受冊置于案妃興四拜畢內官出告正副使行禮畢執事者徹香案冊

案設妃座引禮請妃陞座衆命婦及應賀者序立于庭北向四
拜畢妃降座 醮戒其日內官監設 皇帝中宮御座于宮中設大
樂儀仗于丹陛之東西執膳內官先備酒金爵果合以俟 皇
帝服皮弁服 皇后燕居服出樂作陞座樂止王服袞冕贊禮
引王由殿東門入詣 皇帝前樂作四拜樂止執事者以爵斟
酒立于御前之東贊禮贊王詣前跪搢圭受爵執事者以爵立
授王王跪受爵飲訖以爵授執事者贊禮贊出圭恭聽戒命隨
旨意致戒詞王聽戒詞訖贊俯伏興平身贊鞠躬樂作贊四拜
興平身樂止贊禮引王詣 皇后前禮同贊禮畢引禮引王出
收袞冕具皮弁服行親迎禮妃受醮戒親迎日妃家先于祠堂
陳設祭物妃服燕居冠服妃父母同妃詣祖宗前奠酒讀祝禮
畢執事具酒饌命妃飲食訖父母坐於正堂女執事引妃詣父

母前各四拜父母隨意致戒詞妃聽受訖次辭諸尊長禮畢改服翟衣以俟親迎其日儀衛司先設王儀仗象輅于承天門外妃家先設王幕次于中門之外設香案紫帛案于正堂之中是日王受命訖引禮引王由午門東門出典儀具服跪請陞輅王陞輅儀從前導過御橋樂作至妃家門外引禮跪請王降輅導引至幕次禮官一員先入至正廳立于東西向主婚者出見立于西東向禮官曰某王奉制行親迎禮引禮二人具服引主婚者迎王于幕次之外內官二員具服引王出幕次主婚者請王入中堂王先行主婚者後隨內官具服奉禮物入至于中堂主婚者進立于堂中之左妃母立于堂中之右東西相向王至中堂女執事二人引妃出房立于妃母之下內官引王至紫帛前內官捧帛進王王以帛置于案內官引王稍退近東西向立贊禮

引主婚者詣帛案前行八拜禮退復位執事者徹案引禮內官
導王先出女輜夫舉鳳輜至于中門之內內官具妃儀仗于中
門之外女執事引妃出內官跪啓請王詣輜所啓請揭簾妃陞
輜內官啓請王陞輜前行妃具儀從後行王至承天門外降輜
候妃至內官跪啓請王揭簾妃降輜王先行至內釋皮弁服具
衮冕至奉先殿俟妃入午門陞輜將至奉先殿降輜行廟見禮
廟見是日內官于奉先殿陳設牲醴祝帛訖每廟豕一羊一

帛二共一筐祝共一贊引二人引王二人引妃至奉先殿詣

德祖玄皇帝皇后御前王在東妃在西贊王與妃各兩拜贊跪

王跪妃亦跪贊楷圭王楷圭進帛王受帛以授執事奠于神前御

進爵王受爵以授執事者贊獻爵執事者以爵奠于玄皇帝

皇后前再進爵三進爵如前儀訖王俯伏興妃亦興復位王與

妃皆兩拜次詣 懿祖皇帝皇后次詣 熙祖皇帝皇后次詣
仁祖皇帝皇后禮如前贊詣讀祝位王詣讀祝位跪妃亦跪
讀祝訖王俯伏與平身妃亦興復位王與妃皆兩拜平身執事
者捧祝帛各詣燎所王與妃詣燎位禮畢引禮引王及妃還宮
行合卺禮合卺其日內官先于王宮設王座于東西向設妃座
于西東向各設拜位于座之南設酒案于正中稍南置兩爵兩
盞于案上執事者啓請王具皮弁服訖贊引導王與妃至宮門
贊引二人導王前陞二人導妃後陞贊請就拜位王與妃各就
拜位王與妃各就拜位兩拜訖贊請王與妃皆陞座執事者二
人舉饌案進于王及妃之前女官司尊者取金爵酌酒以進王
與妃各受爵飲訖女官進饌王與妃皆舉饌訖女官再以金爵
進酒王與妃皆飲訖女官進饌王與妃皆舉饌訖女官再以盞

盞酌酒合和以進王與妃皆飲訖又進饌王與妃皆舉饌凡三舉酒饌畢執事者徹饌案贊王與妃興就拜位相向贊兩拜禮畢王從者餞妃之饌妃從者餞王之饌朝見第二日清晨王冕服妃翟衣贊引各啓請出宮至宮內門外以俟 皇帝服皮弁服 皇后服燕居服陞座贊引引王及妃自東門入王先入妃從之贊詣 皇帝前王立于東妃立于西宮人以棗栗盤立于妃之右王與妃皆四拜興執事者二人舉案至 皇帝前宮人以棗栗盤授妃妃捧棗栗盤置于案上執事者舉案妃隨捧進至 皇帝前妃復位贊禮贊王與妃皆四拜興贊引引王及妃詣 皇后前宮人以服脩盤立于妃之左贊王與妃皆四拜興執事者二人舉案至 皇后前宮人以服脩盤授妃妃捧服脩盤置于案上執事者舉案妃隨舉進至 皇后前妃復位贊四

拜王與妃皆四拜興執事者以 皇帝前棗栗案徹于東 皇
后前殿脩案徹于西贊禮畢贊引引王及妃出是日賜王與妃
宴 盃饋第三日清晨妃服翟衣贊引引妃出陞輿將至宮內
門降輿由東門入俟膳至贊引引妃詣 皇帝前四拜尚食以
膳授妃妃捧膳置于案復位四拜贊引引妃詣 皇后前禮同
贊引引妃退立于西南俟膳畢贊引引妃出王與妃見東宮是
日王與妃朝見訖王具皮弁服妃服翟衣詣東宮前行四拜禮
東宮皮弁服坐受東宮妃翟衣立受兩拜答兩拜王與妃至妃
家其日內官先將禮物往王與妃儀仗導從如常儀王先行至
妃父第妃父出迎王先入妃父從之至正廳王立于東西向妃
父立于西東向王於妃父母前行四拜禮妃父母立受兩拜答
兩拜禮畢王中坐其餘親屬見王行四拜禮王皆坐受妃至入

中堂於父母前行四拜禮父母正面坐受其餘親屬見妃各序家人禮 公主婚禮受冊前期告奉先殿用祝帛羊豕行禮如常儀 謁廟受冊其日駙馬受誥如常儀 公主受醮戒其日清晨公主具禮服辭奉先殿申時內官陳設儀仗于正宮內丹陛之東西大樂陳于丹墀執事女官備金爵酒壺果合以俟內贊女官二員于殿之東西 皇帝常服 皇后燕居服陞座公主具禮服引禮女官引公主詣 皇帝前贊拜樂作四拜樂止贊跪贊受爵女官以爵斟酒立授公主公主受酒飲訖以爵授執事者執事者跪受虛爵退復位贊恭聽戒命隨旨意訓戒公主聽受訖贊興復位樂作四拜樂止引禮女官又引公主詣 皇后前贊拜樂作四拜樂止贊跪贊受爵執事授爵如前儀贊恭聽戒命隨旨意戒訓公主聽受訖贊興復位樂作四拜樂止

禮畢公主換燕居冠服命婦送至宮門引禮引公主由宮門東
出過宮門西上陛輦至右門內公主降輦駙馬揭簾公主陞輦
內使備儀仗鼓樂前導合女樂三十六人接引至府公侯百官
命婦送至府各回家○駙馬受醮戒其日早駙馬父與駙馬具
家用祭服告祠堂畢至午後駙馬父坐于正堂駙馬具見尊長
服引禮引駙馬至拜位兩拜跪搢笏執事者斟酒授駙馬飲訖
駙馬父隨意致戒詞駙馬聽已俯伏興復位兩拜禮畢駙馬使
服上馬行親迎禮若駙馬父母俱存則父母同坐于正堂行禮
如前儀 親迎其日駙馬受醮戒訖具儀從鼓樂前導至午門
西下馬至朝房具朝服候申時序班二人具服引駙馬由午門
西角門門至右紅門內官二員具服接引駙馬至內使監前候報
公主醮戒將畢引駙馬至右門西東向立公主坐駙馬揭簾公

主陞轎駙馬先出上馬至府候公主至揭簾公主降轎同謁祠堂○謁祠堂執事者先於祠堂設祭物畢引禮女使引駙馬及公主至祠堂拜位駙馬立于東公主立于西贊禮贊駙馬公主皆兩拜引禮引駙馬詣高祖考妣神位前公主仍立于拜位贊跪駙馬公主皆跪贊搢笏贊進爵駙馬受爵授執事以爵奠于高祖考妣神位前再進爵如前儀贊俯伏興公主亦興詣曾祖考妣祖考妣其儀同訖贊詣讀祝位跪公主亦跪讀祝訖俯伏興公主亦興復位駙馬公主皆兩拜畢導還府行合盞禮合盞其日女使陳設駙馬座于室東西向公主座于室西東向各設拜位于座之南設酒案于室中稍南置兩盞兩盞于案上饌案二于室中贊引二人導駙馬二人導公主就拜位贊兩拜駙馬公主相向皆兩拜請就位駙馬公主各就位執事者捧饌案

置於駟馬公主前執事者二人以二盞斟酒以進駟馬公主皆
飲酒訖執事者進饌駟馬公主皆舉饌執事者再斟酒駟馬公
主皆飲酒執事者再進饌駟馬公主皆舉饌執事者以兩盞盞
斟酒合和以進駟馬公主皆飲訖執事者又進饌駟馬公主皆
舉饌執事者徹饌案贊駟馬公主興就拜位駟馬公主相向皆
兩拜禮畢 見舅姑禮公主見舅姑舅姑坐于東西向公主立
于西東向行四拜禮舅姑答兩拜○沐川長官德聚來朝貢馬

大明太祖聖神文武欽明啓運俊德成功統天大孝高皇帝實
錄卷之二百二十四

大明太祖聖神文武欽明啓運俊德成功統天大孝高皇帝實
錄卷之二百二十五

監修官資善大夫太子少師臣姚廣孝資政大夫戶部尚書性夏原吉

總裁官文淵閣大學士兼左春坊大學士奉政大夫臣胡廣等奉

勅修

明太祖高皇帝實錄卷之二百二十五

洪武二十六年二月丙子朔夜歲星犯壘壁陣○丁丑遣官釋奠于先師孔子○上命晉王總宋國公馮勝等所統河南山西馬步軍士出塞勝及潁國公傅友德開國公常昇定遠侯王弼全寧侯孫恪等馳驛還京其餘將校悉聽晉王節制○詔長侯耿炳文還京○戊寅祭大社大稷○辛巳置大同後衛及東勝左右陽和天城懷安萬全左右宣府左右十衛于大同之東高山鎮朔定邊玉林雲川鎮虜宣德七衛于大同之西皆築城置兵屯守○旌表廣武衛卒陳禮關孝行禮關善事其母劉母嘗患病幾死禮關割肝奠粥以啖母母病得差事聞詔旌表其門○癸未遣使往西涼永昌甘肅山丹西寧臨洮河州洮州岷州鞏昌緣邊諸番頒給金銅信符勅諭各族部落曰往者朝廷或

有所需于爾必以茶貨酬之未嘗暴有徵也近聞邊將無狀多假朝命擾害爾等使不獲寧居今特製金銅信符族頌一符遇有使者徵發比對相合始許承命否者械至京師罪之○乙酉蜀王椿來朝○并長沙護衛於越州衛○涼國公藍玉謀反伏誅初玉以開平王常遇春妻弟屢從征伐有功胡陳之反玉嘗與其謀上以開平之_功及親親之故宥而不問後諸老將多歿乃擢為大將總兵征伐所向克捷甚稱上意然玉素不學性復狠慢見上待之厚又自恃功伐專恣暴橫畜莊奴假子數千人出入乘勢漁獵嘗占東昌民田民訟之御史按問玉捶逐御史及征北還私其駝馬珍寶無算夜度喜峯關關吏以伎不即納王大怒縱兵毀關而入上聞之不樂會有發其私元主妃者上切責之玉漫不省嘗見上命坐或侍宴飲玉動止

傲悖無人臣禮及總兵在外擅陞降將校黥刺軍士甚至違詔
出師恣作威福以脇制其下至是征西還意覬陞爵命為太傅
玉怒攘袂大言曰吾此回當為太師迺以我為太傅及時奏事
上惡其無禮不從玉退語所親曰上疑我矣乃謀反當是
時鶴慶侯張翼普定侯陳桓景川侯曹震驪侯朱壽東莞伯何
榮都督黃輅吏部尚書唐徽侍郎傅友文及諸武臣嘗為玉部
將者玉迺密遣親信召之晨夜會私第謀收集士卒及諸家奴
伏甲為變約束已定為錦衣衛指揮蔣瓖所告命牽臣訊狀具
實皆伏誅○丙戌置陝西行都指揮使司所屬經歷斷事二司
○賜皇陵祠祭署令汪倫及守陵人七十七戶鈔有差先是
上以山陵之故命給倫等田地以優養之至是來謝復賜賚之
遣還○丁亥蜀王椿還國其從官侍衛賜予有差○庚寅躬耕

藉田遣官享先農○太常卿丘玄清卒玄清陝西人幼為道士於均州武當山宗全真之學往來漢沔河洛間年及五十有司以其有治才薦入京初授監祭御史超擢太常卿為人持重有守 上嘗賜以媛女玄清固辭不受 上益重之至是以疾卒○壬辰置營州前屯衛於興州右屯衛於建州中屯衛於龍山縣左屯衛於塔山北○癸巳命河南都指揮僉事謝賁署山西行都指揮使司事○朝鮮遣使送馬九千八百八十匹至遼東命指揮王禹運紵絲綿布一萬九千七百六十匹以酬之○乙未遼東開元衛軍士馬名廣上言五事一曰遼東二十一衛定等七衛已有都司儒學金復海蓋蓋四州已有州學其開元瀋陽廣寧義州亦皆名郡學基尚存遺碑猶在宜建學立師以復其舊二曰天下學校教育人材有出於工商拔藝之家稍通於唐

淺即欺人傲物管子曰工商雜類不預士伍萬一任之以政必無益於治宜慎選端厚明敏者入學每三年一考九年通考能通四書本經理趣者入國學既入國學勿令歷事以荒其業三曰狹鄉之民宜遷於寬鄉地有餘而民力不給則分兵以屯之如此則民無游食之憂兵無坐食之害四曰兵老死而營無丁者除其籍庶免有司勾補之勞五曰今華夏治安夷狄遠遜正歸焉放牛之日昔唐太宗初年置府兵分隸禁衛天下八百而在關中者五百舉天下之兵不敵關中此居重馭輕之法也臣願外衛軍士老死者免補且漸收蕃衛移置京畿不勝社稷之福書奏 上觀所言有可采者但謂工商技藝之子不預士伍則與孔子有教無類之意悖矣命禮部擇其可省行之名廣廣東番禹人能詩既從軍遼東讀書不報至是詣闕上書 上既

納其言復命吏部用之仕為吉安泰和縣丞○丙申瓜哇國遣
番僧阿烈均祿等上表貢馬及方物則其使二十五人欵有差
○國子監生魏昭以罪罰為吏上言願改過自新入試林闡許
之○賜致仕廣州衛指揮僉事張嚴以下騎帛鈔錠有差○己亥
陞光祿司丞王順德為少卿光祿試少卿陳銘堅太常司贊禮
郎李德成為尚寶司丞○辛丑命工科右給事中梁煥署吏部
事○命右軍都督僉事楊文率京衛將士運糧往遼東各賜鈔
有差○壬寅降禮部右侍郎張智為北平府儒學訓導未行改
國子學錄智坐烏思箴奏請印章文移失體故也○西寧番僧
三刺貢馬先是三刺為書招降罕東諸部又弔佛利於碾白南
川以居其衆至是始來朝因請護持及寺額 上賜名曰瞿曇
寺勅曰自有佛以來見佛者無不瞻仰雖兜戾愚頑者亦為之

敬信化惡為善佛之願力有如是耶今番僧三判生居西土踵
佛之道廣結人緣輯金帛以徇佛利比者來朝京師朕嘉其向
善慕義之誠特賜勅護持諸人不許擾害聽其自在修行違者
罪之改勅○癸卯夜太白犯天街○甲辰給四川都指揮使司
所屬及成都三護衛征西將士萬五千二百餘人欵十五萬五
千八百七十一錠○乙巳命洱海衛指揮同知賴鎮守景東時
西平侯沐春奏鎮在洱海以恩信撫下夷民服從而景東之地
尤為險要乞調鎮往守之遂命指揮程達守洱海代鎮往景東
鎮至廣城郭建樓堞置廨舍郵驛倉庫又立屯堡以厚儲恃自
是軍民相安遠夷懾服鎮初名正孫後賜今名○置大同右護
衛○賜遼東定遼等衛軍士綿布三十七萬匹綿花一十五萬
斤○賜神策等衛軍士及家屬工匠九十一萬九千餘人冬衣

○田州府知府岑堅遣其子思恩州知州永昌貢馬及銀器皿
詔賜文綺鈔錠○人有告燕山中護衛指揮使阿魯帖木兒留
守中衛指揮使乃兒不花有逆謀 上曰二人之未歸也朕知
其才可用故任之不疑今反側乃爾何胡人之心不誠如是乎
命軍中察實以聞○是月朝鮮權知國事李成桂遣門下贊成
事高仁烈貢馬及方物

大明太祖聖神文武欽明啓運俊德成功統天大孝高皇帝實
錄卷之二百二十五

明太祖高皇帝實錄卷之二百二十六

洪武二十六年三月丙午朔夜太白犯諸王星。命襄陽衛指揮僉事致仕方全、胡良、張勝署中都留守司事。河東都轉運鹽使司請增鹽額。上不許，止令如舊。戊申，緬國遣其臣板南速刺進方物。上即位嘗遣使往諭之，使者不能達而返。及是，八百國遣使洪都入貢，因言緬國近其邊，以地遠不能自達。上廼令西平侯沐春遣使至八百國王所諭意。至是，遣板南速刺至，詔賜綺帛有差。禮部奏更定救日食儀，前期結綵於禮部儀門，及正堂設香案于露臺上，向日設金鼓於儀門內。兩傍設樂于露臺_台下，各官拜位于露臺上下，至期百官朝服入班贊禮，唱鞠躬樂，作四拜興樂，止跪執事者捧鼓詣班首前，班首擊鼓三聲，衆鼓齊鳴，侯復圓贊禮，唱鞠躬四拜興樂，止禮畢。

月食則百官便服於都督府救護如前儀其在外諸司日食則於布政使司府州縣月食則於都指揮使司衛所禮亦如前從之○庚戌以施昇為興州左屯衛指揮僉事昇滁州人父政歲甲午自滁來歸乙未從渡江積功至岷山衛指揮僉事與同官馬嶸以私忿訐奏誦戍遼東死昇以故官子徵至京請迎父喪歸葬許之上復念政有舊勲仍俾昇襲職○夜焚惑犯積薪○辛亥勅代王率護衛兵出塞受晉王節制○命長興侯耿炳文往陝西訓練軍馬○乙卯遣魏國公徐輝祖齎勅諭今上曰阿魯帖木兒乃兒不花俱有異志雖撫之以誠難保其往人言夷狄畏威不懷德果然可遣人防送至京胡人反側背思不可無備爾護衛士卒每遇出獵必選數千騎被堅執銳以訓練之使之常習勞苦則臨陣不怯宋國公馮勝等今已召回諭以

防禦之策舊降胡兵非出征不可輕縱恐盜馬潛遁陰泄事機所係甚重若欲用以禦敵常使參錯為伍庶幾無慮○命附馬都尉王寧掌後軍都督府事○以故中軍都督僉事高銘子能為前衛都督府都督僉事賜宴于府○昏刻東南天鳴○丙辰命宋國公馮勝穎國公傳及德等往北平等處備邊其山西屬衛將校悉聽晉王節制北平屬衛將校悉聽晉今上節制凡軍中庶有機務一奏朝廷一啟王知永著于令○某官民步卒人等服對襟衣唯騎士許服以便於乘馬故也其不應服而服者罪之○丁巳遣使諭北平山西二都指揮使司發屬衛步騎人衛三月糧往駐宣府聽調○戊午上以天象示變遣使諭晉王今上反宋國公馮勝等令步軍回衛止將精騎巡邏塞外其屯兵乃備菴菜之具以俟來歲築城○國子監生唐簡奏乞

歸迎其母就養許之命授簡為兵科給事中復賜道里費○己未賜山西屬衛及韃靼軍士五萬五千^七四百四十二人布絹二十萬九千四百七十一匹綿花八萬三千六百十三斤○庚申復遣使諭晉王今上各統所轄都司軍馬凡軍中賞罰大者以聞小者從宜處分且諭以藍玉之變將兵塞上尤宜謹慎今廣平順德及山西遼沁二州為王天賜作耗境內小盜因而延蔓蓋守禦官軍不能討捕故也宜遣人督捕務在殄除此寇以靖吾民○辛酉詔併西安右衛於西安中護衛先是曹國公李景隆選陝西諸衛精壯軍士為秦府護衛至是併西安右衛為中護衛○壬戌馴象衛進象先是詔思明太平田州龍州諸土官領兵會馴象衛官軍往欽廉藤離澳等山捕象養馴狎至是以進○會寧侯張溫都督蕭用等生與藍玉同謀伏誅○癸

亥前軍都督僉事楊春平蠻還京師初春會茅鼎等討堂屋諸
洞蠻平之詔即其地立右州衛鎮守後春復率長沙衛州寶慶
武岡諸衛兵討富春徕蠻駐軍於江華縣上以蠻方連歲用
兵民勞於供輸故詔還京師諸軍各還屯種○甲子命駙馬都
尉李堅掌前軍都督府事○乙丑擢道錄司右至靈王德益為
太常司卿○丙寅以致仕指揮繆仙為湖廣都指揮使劉淵齊
讓為都指揮同知時在京致仕武職官能書判而精力未衰者
仍命兵部錄用之故有是命○立西寧僧綱司以僧三刺為都
綱河州衛漢僧綱司以故元國師魏失刺監藏為都綱河州衛
番僧綱司以僧月監藏為都綱蓋西番崇尚浮屠故立之俾主
其教以綏來遠人復賜以符曰自古帝王致治無間遠邇設官
以理庶務稽諸典禮復有僧官以掌其教者非徒為僧禁也歛

其率修善道陰助王化非其誠寡欲澹泊自守者奚足以任斯職今設僧綱司授爾等以官給爾符契其體朕之心廣佛功德化人為善欽哉○戊辰命中軍都督僉事陳麟掌四川都指揮使司事○庚午諸司職掌成先是上以諸司職有崇卑政有大小無方冊以著成法恐後之蒞官者罔知職任政事施設之詳迺命吏部同翰林儒臣倣唐六典之制自五府六部都察院以下諸司凡其設官分職之務類編為書至是始成名曰諸司職掌詔刊頒布中外○庚午改革山衛為西安左護衛○賜貴州宣慰使司土官安的白金四百兩鈔四百錠綺帛各十匹以其守城有功故享賞之其從者亦有賜○壬申貴州中槽蠻夷長官謝河梭貢馬詔賜以綺帛○雲南左布政使張統考滿來朝命吏部勿考即遣復任仍賜宴及道里費以其綏輯荒裔有

治績也○夜有大星青白色起正南東流至游氣沒○癸酉以

大理寺少卿曹銘為都察院右僉都御史右僉都御史李文吉為左僉都御

史○以山海衛致仕副千戶王成為浙江都指揮使贛州衛致

仕副千戶李敬府軍衛致仕副千戶任旺並為都指揮同知寧

國衛致仕副千戶朱光衛衡州衛致仕副千戶陳原福並為都指

揮僉事○甲戌改秦川衛為西安右護衛○上聞晉王督兵於

下水築城遣使責之曰迺者上天垂象征伐之事不可輕舉向

命爾與燕王各統將校出塞以振揚威武禦侮胡寇燕王

深入虜庭掃清沙漠爾不及而還今又無深謀遠慮即有築城

之役則人受其害者多矣自今軍中調遣必計出萬全毋徒勞

軍士○改蘇州軍民指揮使司為寧番衛遣使賜指揮魯毅欵

三百錠白金三百兩文綺八匹授世襲指揮使以守禦有功也

○是月頒示稽制錄于諸功臣 上自即位以來封賞功臣皆稽考前代典禮凡封爵祿食禮儀等差悉倣唐宋之制其間因時損益皆適其宜然功臣多武人不知書性恃功驕恣踰越禮分甚或肆情廢法奢僭不度及藍玉以反誅籍其家見其服舍器用僭侈踰制 上因詔翰林院稽考漢唐宋功臣封爵食邑之多寡及名號虛實之等第編輯為書名曰稽制錄御製序文頒示功臣使之朝夕省覽以過其奢僭

大明太祖聖神文武欽明啓運俊德成功統天大孝高皇帝實錄卷之二百二十六

大明太祖高皇帝實錄卷之二百二十七

洪武二十六年夏四月乙亥朔享太廟○置潮州蓬山守禦千戶所命凡剡公宇修城隍惟以軍士供役不許勞民○湖廣德安府孝感縣言民饑官有預備倉糧萬一千石請以貸民即命行人乘驛往給之 上諭戶部臣曰朕嘗損內帑之資付天下蒼民糴粟以儲之正欲備荒歉以濟饑民也若歲荒民饑必候奏請道途往返速者動經數月則民之饑死者多矣爾戶部即論天下有司自今凡遇歲饑則先發倉廩以貸民然後奏聞著為令○丙子革雲南會川府初月魯帖木兒叛土官知府王春攻陷會川燬民居府治至是遂墮其城 己卯福建鎮海衛千戶黎旻等伏誅旻帥舟師四百巡海至潮州南澳猝與賊遇未及戰旻與百戶毛榮引眾遁百戶韓觀帥部下四十餘人力

戰皆死事聞 上命錄觀等功旻等以軍法伏誅○壬午瀋陽
侯察罕坐藍玉黨伏誅○從遼東鐵嶺衛治於瀋陽開元兩界
右黨州之地○夜太陰入軒轅○癸未田州府知府岑堅貢白
金一千二百九十兩○甲申命兵部復留守等衛指揮申敬以
下四百七十九人官先是敬等咸坐罪謫雲南俾立功以自贖
至是 上念其祖父舊勞及敬等亦咸能立功故召還復其官○
乙酉以四川都指揮使司都指揮使瞿能都指揮同知徐凱並
為中軍都督府都督僉事仍會同署四川都司事○命右軍都
督府都督僉事宋晟劉真同署陝西行都指揮使司事○丁亥
旌表湖廣沔陽州民王受妻張氏饒州府鄱陽縣民張彥信妻
畢氏寧國府民俞彥連妻陳氏貞節淮安府桃源縣民張住北
平府東安縣民王重樂亭縣民杜仁義妻韓氏應天府江浦縣

民張二女勝奴皆以事親克盡孝道各旌表其門曰孝行之門
○戊子周王橐及其世子有墩來朝 庚寅 上以天久不雨
必朝政有缺失詔羣臣直陳時事羣臣有言請疏決罪囚 上
以為然迺詔刑官除十惡及殺人真犯依律外其餘雜犯死罪
令輸粟往北平以贖徒流而下逾減有差若犯者已死妻子拘
在官者釋之其未經審錄者刑部都察院大理寺即時會審有
未當者許執法覆奏阿旨奉行者坐以其罪 今上遣人送阿
魯帖木兒乃兒不花至京以逆謀伏誅○辛卯琉球國中山王
察度遣使壽禮結致貢馬及方物并遣其寨官子段志每入國
學讀書○夜太陰入南斗○壬辰陞大名府滑縣儒學訓導宋
復祖為國子司業復祖故祭酒訥之仲子也○直隸高郵州興
化縣奏天旱民饑已發預備倉糧賑貸之以其數來聞○甲午

上以雨澤愆期命禮部令天下郡縣以雨澤之數來聞○乙未龍州土官知州趙宗壽貢馬及金銀酒器○命工部造柳葉甲銷子頭盔六千副給皇城四門守衛軍士○丙申詔賜越嵩侯俞淵公田歲租之入計米二千五百石○遼州榆社縣隕霜損麥○詔絕安南國朝貢時安南弒主廢立故絕之仍命廣西都指揮使司布政使司自今勿納其來使○丁酉命濟南府齊東縣知縣鄭敏復任先是敏坐事繫獄邑民數十詣闕言其賢上命宥其罪賜欵一百錠綺羅紗衣各一襲宴勞遣還職至是考滿來朝者民復上言願留敏再任上從其請仍宴賞以遺之○戊戌周王橐及其世子有燬還園賜其從官軍士欵有差○賜賴園公傅友德第于鳳陽○賜國子監琉球生雲南生夏衣靴鞮其僮從之人亦皆有賜○己亥詔百官凡朝會無朝

服者許具公服行禮○癸卯直隸滁州知州徐伯大言歲旱民饑已發預備倉糧貸之凡一千五百餘石○甲辰命吏部司封主事翟善署部事○太白晝見千位

五月乙巳朔置湖廣澧州守禦千戶所○己酉命在京各衛凡陣亡病故殘疾軍旗止以在營丁男紀錄入伍不許於舊貫追取○庚戌兵部臣言故河南都指揮使茅羽無嫡嗣有二庶子皆幼請所宜立上曰庶子論賢不論長第給以羽之祿俟其長擇賢者襲之○癸丑瓜哇國民阿里等八人隨其國使入貢汎海至中途遇風相失為暹卒所獲以聞詔賜鈔遣還其國○連東廣寧中護衛軍士失燒百戶大所印法司違罪之上曰失火出於不測非故意勿問更鑄印給之○乙卯直隸淮安府鹽城縣歲旱民饑知縣吳思齊發預備糧之半賑之以其數未

聞 上遣行人盡發所儲糧給之凡二千九百六十四石。賜
遼東廣寧中護衛將士千一十五人鈔二萬七十錠。命署四
川都司事。中軍都督僉事瞿能署雲南都司事。陝西民有坐
事謫戍邊。妻病留中途。其弟夫婦請代往監送者。聽之。御史責
弟不當代。兄并罪監送者。其人訴于朝。上曰。弟之代。兄義也。
監送者能聽其代。是亦有仁心矣。命賜其弟道里費。而併賞監
送之人。○丙辰。署雲南都指揮使司事。右軍都督府左都督寧
正。至京師。○革思南宣慰使司之洪安化濟長官司。○夜熒。武
犯軒轅。○丁巳。復置東川軍民府。以土官攝賽為知府。○戊午。
給在京各衛軍士二十二萬八千九百餘人夏布各一疋。○甲
子。魏國公徐輝祖。崇山侯李新。奏考稽制錄所載公侯家人及
儀從戶存留如制。餘請給付有司。上命發鳳陽隸籍為民。○

乙丑道士仲宇純等一百二十五人請給度牒禮部審實皆逃
民避後者詔隸錦衣衛習工匠。丙寅以都察院右僉都御
史周志清為刑部左侍郎。重修京師大中橋。定學官考課
法以科舉生員多寡為殿最縣生員二十名教諭九年任內有
舉人三名又考通經者為稱職陞用舉人二名雖考通經為平
常本等用舉人不及二名又考不通經者為不稱職黜降別用
州學生員三十名學正九年任內舉人六名又考通經者陞用
舉人三名雖考通經本等用舉人不及三名又考不通經者黜
降別用府學生員四十名教授九年任內舉人九名又考通經
者陞用舉人四名雖考通經本等用舉人不及四名又考不通
經者黜降別用府州縣學訓導分教生員九年任內舉人三名
又考通經者陞用舉人二名或一名雖考通經本等用舉人全

無又考不通經者黜退別用先是教官考滿並數其歲貢生員之數至是 上以歲貢為學校常例故專以科舉為其殿最○丁卯詔工部自今凡功臣卒不建享堂其墳塋葬具皆令自備惟及于戰陣者官給之○以後軍都督府都督僉事陳用為山西行都指揮使司都指揮使 戊辰越雋侯俞淵有罪削爵杖還鄉里○己巳復湖廣永州衛指揮僉事袁簡職先是簡以征進後期罷官立功至是以征五關蠻獠有功復其職○庚午琉球國山南王叔汪英紫氏遣使不里結致來朝貢馬及方物○壬申擢花榮為東勝衛指揮使榮廣東都指揮使花茂長子也茂年老請以榮代職 上念勲舊命仍舊任并擢榮馬○夜有星青白色起正南東流至游氣沒○癸酉復改桂林左衛為廣西護衛○廣西泗城州知州岑振姪奉議州知州黃嗣隆等遣

人負馬及方物詔賜以鈔錠○置雲南中護衛調長沙衛將士
守之○賜雲南景東蒙化二衛補後軍丁道里費有差

大明太祖聖神文武欽明啓運俊德成功統天大孝高皇帝實
錄卷之二百二十七

大明太祖聖神文武欽明啓運俊德成功統天大孝高皇帝實錄卷之二百二十八

監修官資善大夫太子少師臣姚廣孝資政大夫戶部

尚書臣夏原吉

總裁官文淵閣大學士兼左春坊大學士奉直大夫臣胡廣等奉

勅修

(大明太祖高皇帝實錄卷二百二十七終)

大明太祖高皇帝實錄卷之二百二十八

洪武二十六年六月乙亥朔○丙子以都察院右僉都御史曹
銘為左僉都御史復以左春坊左贊善凌漢為都察院右僉
都御史漢字斗南河南原武人洪武十七年以秀才舉至京獻
烏鵲論上喜之擢司經局正字未幾出知會稽縣以事逮繫
浙江按察司獄久不決會按察使陶晟在京上知漢無罪獄
為晟所淹命械晟還釋漢與俱來既至拜監察御史巡按陝西
奏陝西民病教事且言古人謂大夫出疆有可以安國家利社
稷者專之可也臣竊以為在春秋戰國則可在今大一統之時
則不可苟許其專恐啓大臣擅權之漸上善其言召其子賜
鈔二百錠衣一襲又以不受私遺尋陞右都御史時詹徽為左
都御史論議教不合每面折徽徽銜之奏遣按事蘇松還朝以

失職為監察御史桂滿所劾左遷刑部侍郎未幾命署吏部教
月改禮部右侍郎又教月上以漢年老令歸鄉里漢叩頭曰
臣願生居京都死葬京土上許之命居于私第歲餘起為左
贊善又歲餘復拜右僉都御史尋令致仕還河南陞辭上問
先賜歸不行今歸何也漢對曰先時詹徽在臣有後憂今徽伏
誅臣無憂故敢歸耳漢頗有政事然出言不檢時人亦以此少
之○禮部奏臨江府清江縣民李均敬妻方氏年二十八而寡
歷五十三年今年八十一福州府長樂縣民林以德妻王氏年
二十六而寡歷五十九年今年八十五濟南府齊東縣民郝六
妻馮氏年十八而夫亡今年七十八守節凡六十年韶州府樂
昌縣民鄧從禮妻蘇氏年二十八而夫亡今年七十一守節四
十三年比平府密雲縣民張大妻蕭氏守節三十七年今年六

十四鎮江府金壇縣民戴榮甫妻王氏守節六十四年今年九十三皆脩潔無瑕命各旌表其門曰貞節之門比平府昌平縣民劉驢兕松江府上海縣民沈德皆割肝療父疾濟南府長山縣民王德兕應天府上元縣民姚金土皆割肝療母疾溧陽縣民史以仁母病心氣剝股肉以食母皆得愈命旌表其門曰孝行之門○朝鮮國權知國事李成桂遣使上表箋薦及方物謝更國號并上高麗恭愍王金印且請更名且從之賜其使李恬等文綺鈔錠○己丑免武定侯郭英合輸稅糧仍撥賜佃戶○夜熒惑犯太微垣右執法太陰自己卯與太白同度至是犯壘壁障 壬辰申嚴皇陵禁令凡車馬過陵及守陵官民入陵者百步外下馬違者以大不敬論○以通政使司左叅議宋徵為左通政降都察院左僉都御史李文吉為通政使司右叅議尋

遷刑部郎中。都督馬俊坐藍玉黨伏誅。遼東都指揮使司
奏謀知朝鮮圖近遣其守邊千戶招誘女真五百餘人潛渡鴨
綠江欲寇遼東。上曰李旦方來奉貢而復欲寇邊是其自生
釁端遣使勅之曰昔在元季羣雄並起中原擾動民被兵災幾
及二紀朕訓將練兵掃陰羣雄四征不庭蠻夷率服化鋒刃為
農器諾將析珪儋爵享有太平李何高麗屢懷不靖詭詐日生
數構釁端屢肆慢侮誑誘小民潛通海道朝廷命將鎮守遼東
輒遣人以金帛誘之後王額被弑殺及朝使今爾方遣使入朝
聽約束而_及陰令邊將誘女真人潛渡鴨綠江意將何為昔在
漢時高麗寇邊漢兵致伐高麗由是敗滅及晉魏之時陰懷二
心與吳通好魏亦再加兵討晉以爾國悖慢焚爾宮室俘爾男
女隋兵再伐高麗之民死傷塗地唐兵討爾弑逆平爾土地為

九都督府遼金至元滿國屢造孽瑞殺其信使由是屢加討伐
宮室焚蕩民庶斬虜國滅君誅監戒甚通爾猶蹈其覆車之轍
豈真非愚之甚乎性歲請令王昌入朝朕不之許及後以瑤任
國事遂以其子與來朝及與還國瑤已被廢爾乃廢絕王氏自
取其國朕以爾能安靖東夷之民聽爾自為警教前者請更國
號朕既為爾正名近者表至仍稱權知國事又先遣使遼王寧
王所逾月方來謝恩何其不知尊卑之分乎朕視高麗不啻一
彈丸僻處一隅風俗殊異得人不足以廣衆得地不足以廣疆
歷代所以征伐者皆其自生釁端初非中國好土地而欲吞併
也朕聞金世宗時高麗進表啓函惟小石數枚及賀正稱進玉
幣驗之乃石世宗由是興師破數十城此前代事之可見者也
近者爾國入貢復以空紙圈數十雜於表函中以小事大之誠

果如是乎爾之所恃者以滄海之大重山之險謂我朝之兵亦如漢唐耳漢唐之兵長於騎射短于舟楫用兵浮海或以為難朕起南服江淮之間混一六合攘除胡虜騎射舟師水陸畢備豈若漢唐之比哉百戰之兵豪傑精銳四方大定無所施其勇帶甲百萬舳艫千里水繇渤澥陸道遼陽區區朝鮮不足以具朝食汝何足以當之雖然際天所覆皆朕赤子明示禍福之機開爾自新之路爾能以所誘千戶女直之人送京師盡改前過朕亦將容爾自為聲教以安夷人若重違天道則罰及爾身不可悔○乙未城廣西南寧衛貴縣守禦千戶所○丁酉以徐增壽為左軍都督府都督僉事李增枝為右軍都督府都督僉事沐晟為後軍都督府都督僉事增壽改魏國公達次子增枝改曹國公文忠次子晟改西平侯英次子○由錦衣衛鞠刑之禁

凡所運者俱屬法司理之。擢肇州吏目諸葛伯衡為陝西布政使司右叅議。伯衡金華蘭溪人。洪武初以秀才舉。擢比平寶泉局大使。改雜造局大使。遷福建鹽運司。廣盈庫大使。凡典錢幣十餘年。守法奉職。人稱其廉。後改雲南大理府肇州吏目。操持益勵。時左春坊大學士董倫知其賢。會倫出為河南叅議。迺上書薦伯衡于朝。即召至京師。擢陝西布政使司右叅議。甫數月。丁母憂。服除。改廣東叅議。以疾卒。伯衡事親孝。操行甚篤。拔自下僚。叅佐大藩。尤以能官聞。○戊戌陞戶部右侍郎。郁新工部右侍郎。嚴震直俱為本部尚書儀禮司正。田春為工部右侍郎。遷刑部左侍郎。周志清為戶部左侍郎。以任勸復為刑部左侍郎。勵時坐庫藏出納不明。繫都察院獄。上特命宥之。俾復其職。○夜有星大如椀。青赤色。光燭地。自即將西北行至近濁。

沒○已亥詔習匠軍人老弱殘疾無子孫者于養濟院存養○
庚子遷刑部右侍郎祁著為戶部右侍郎○開卜筮禁先是京
師卜筮者多假此妄言禍福特下令禁之至是勅欽天監凡瞽
目及陰陽人仍聽其卜筮諸人不許妄詞訐告○辛丑命禮部
申嚴公侯制度僭侈之禁勅曰歷代聖君賢臣必謹禮節循法
度者所以畏神明也蓋知畏神明則知守禮法一或不謹則鬼
神鑿之將假手于人而禍患作矣朕自即位之初稽古定制凡
爵祿禮儀等殺皆著為令俾勲臣之家世守之朕觀前代受封
皆為虛號其于祿食止給繒布我朝賜以膏腴土地田所以待有
功者不為不至尚有不知分限以速罪戾者已命翰林歷考漢
唐宋故事輯為稽制錄頒之勲臣使有所遵守爾禮部其申明
之仍將公侯食祿及服舍器用等殺著為定式俾不至奢僭亦

保全勳舊之道也。○壬寅命禮官重定期朔賀傳制等儀。上以立國以來幾三十年制度典章雖曰備具然官制既多更定而禮文屢有損益故欲因繁就簡立為中制以成一代令典于是禮官及群臣定議凡正旦朝會前期一日尚書司設御座于奉天殿及寶案于御座之東設香案于丹陛之南教坊司設中和韶樂于殿內之東西北向其日清晨錦衣衛陳鹵簿儀仗于丹陛及丹墀之東西設明扇于殿內東西列車輅步輦于丹墀東西相向鳴鞭四人左右北向教坊司陳大樂于丹墀_陛之東西北向儀禮司設同文玉帛案于丹陛之東金吾衛設護衛官于殿內及丹陛之東西陳甲士于午門外奉天門外及丹墀東西錦衣衛設將軍于奉天門外丹墀丹墀及奉天門列旗幟于奉天門外東西典牧官陳仗馬犀象于文武樓南東西相向欽天監

設司晨郎報時位于內道東近北立糾儀御史二人于丹墀北東西相向內贊二人于殿內外贊二人于丹墀北東西相向設傳制宣表等官位于殿內東西相向鼓初嚴文武官具朝服齊班于午門外次嚴引禮引百官由左右掖門入詣丹墀東西北向立鼓三嚴執事官詣華蓋殿伺候內官跪奏 皇帝具袞冕陞座鐘聲止儀禮司官跪奏各執事官行禮贊五拜禮畢贊供事執事各就位儀禮司官跪奏請陞殿駕興樂作奏聖安之曲尚寶司捧寶前行導駕官前導扇開扇捲尚寶官置寶于案樂止鳴鞭司晨郎報時唱晚對贊唱排班班齊贊禮唱鞠躬大樂作贊四拜平身樂止典儀唱進表大樂作給事中二人詣同文案前導引序班舉案由東門入置殿中樂止內贊唱宣表目宣表目官宣訖俯伏興唱宣表展表官取表宣表官至簾前跪外

贊唱衆官皆跪宣表訖內外皆唱俯伏興平身序班即舉表案于殿東外贊唱衆官皆跪代致詞官跪于丹陛中致詞云具官臣某茲遇三陽開泰萬物咸新洪惟 皇帝陛下膺乾納佑奉天永昌賀訖外贊唱衆官俯伏興樂作四拜興平身樂止傳制官詣御前跪奏傳制俯伏興由東門出至丹陛東西向立稱有制贊禮唱跪百官皆跪宣制云履端之慶與卿等同之贊禮唱俯伏興樂作平身樂止贊措笏鞠躬三舞蹈贊跪唱山呼百官拱手加額曰萬歲復唱山呼曰萬歲唱再山呼曰萬歲凡呼萬歲樂工軍校齊聲應之贊出笏俯伏興大樂作贊四拜平身樂止儀禮司官跪奏禮畢中和樂作奏定安之曲駕興尚寶官捧寶導駕官前導至華蓋殿樂止引禮引百官以次出其冬至節禮同唯致詞則云律應黃鍾日當長至傳制則云履長之慶

若 天壽聖節禮亦如前但致詞云恭惟 皇帝陛下萬壽聖
節臣某等誠懼誠忭敬祝萬萬歲壽不傳制。中宮朝儀正旦
前一日女官設御座于宮中設香案于丹墀之南其日清晨內
官陳設儀伏于丹陛之東西及丹墀東西女官執執者立于御
座之左右陳女樂于丹陛東西北向設篋案于殿東門外設班
首拜位于中道之東西設命婦拜位于丹墀北向設司贊位于
丹墀東西設司賓位于命婦班之北東西相向設內贊二人位
于殿內東西命婦至宮門外司賓引命婦入就拜位女官具服
侍班如常儀尚官尚儀等官詣內奉迎尚儀啓請陞座 皇后
具服出導從如常儀樂作陞座樂止司贊唱班齊樂作贊四拜
樂止外贊唱進篋引篋案女官前導擊篋案女官二人舉案由
殿東門入樂作至殿中樂止贊衆命婦跪內贊唱宣篋目女官

宣訖興唱宣箋展箋女官詣案前取箋宣箋女官宣訖興舉案
者舉案于殿東贊命婦皆興司宥引班首由東階陞樂作自東
門入至殿中樂止內贊唱跪班首稱某國夫人妾某氏茲遇履
端之節敬詣 皇后殿下稱賀內贊司贊同唱興班首及殿外
命婦皆興司宥引班首由西門出降自西階樂作至拜位樂止
贊拜樂作四拜樂止司言前跪將旨由東門出至丹陛東西向
立稱有旨司贊唱跪衆命婦皆跪司言宣旨云履端之慶興夫
人等同之贊興衆命婦皆興司贊唱拜樂作四拜樂止尚儀跪
啓禮畢 皇后興樂作還宮樂止引禮引命婦以次出冬至節
禮同唯致詞則云茲遇履長之節傳旨則云履長之慶若干秋
節禮亦同前但致詞云茲遇過千秋令節敬詣 皇后殿下稱
賀不傳旨○東宮朝儀正旦前一日興璽官設皇太子座于文

華殿中錦衣衛設儀仗于殿外東西教坊司陳大樂于文華門
內東西北向府軍衛列甲士旗幟于門外錦衣衛設將軍十二
人于殿中門外及文華門外東西相向立儀禮司官設箋案由
殿東門外設文武官拜位于文華門外設傳令宣箋等官位于
殿內東西執事官先行四拜禮訖各就位引禮引各官詣文華
門外北向立儀禮司官啓請陞座導引官奉迎東宮具冕服出
樂作陞座樂止贊禮唱班齊鞠躬樂作四拜樂止唱進箋給事
中前導箋案由殿東門入置殿中內贊唱宣箋日宣訖俯伏興
平身唱宣箋外贊唱跪展箋官詣案前取箋宣箋官宣訖內外
皆贊俯伏興平身即舉案于殿東外贊唱衆官皆跪代致詞官
中道跪致詞云具官臣某等茲遇三陽開泰萬物咸新敬惟皇
太子殿下茂膺景福賀畢唱衆官皆俯伏興平身傳令官跪啓

傳令由東門左出至丹陛東西向立稱有令贊衆官皆跪宣令云履端之節同臻嘉慶贊俯伏興樂作四拜平身樂止儀禮司官跪啓禮畢冬至禮同但致詞云律應黃鍾日當長至宣令云履長之節其千秋節禮儀亦同但致詞云茲遇皇太子殿下壽誕之辰臣某等敬祝千歲壽不傳令○大宴禮其日尚寶司設御座于奉天殿錦衣衛設黃麾于殿外之東西金吾等衛設護衛官二十四員于殿東西教坊司設九奏樂歌于殿內設大樂于殿外立三舞雜隊于殿下光祿司官設酒亭于御座下之西膳亭于御座下之東珍羞醞醞亭于酒膳亭之東西設御筵于御座之東西設羣臣四品以上位于殿內之東西設羣臣酒尊食桌于殿外設五品以下位卓于東西兩廊司臺尚食各洪乃事引禮引羣臣于殿外東西相向立儀禮司跪奏請陞座駕輿

大樂作陞座鳴鞭樂止鳴贊引文武官四品以上由東西門入至殿中橫班北向立五品以下官列于殿外丹墀北向立樂作贊四拜樂止光祿司官進御筵大樂作捧素至御前樂止進花樂作進訖樂止光祿司官開爵注酒捧詣御前進第一爵酒贊內外官皆跪教坊司官跪奏一奏炎精之曲樂作進酒飲畢贊衆官俯伏興四拜平身樂止贊各就位序班隨進群臣卓散花樂作散訖樂止序班即進群臣盞第二爵酒教坊司跪奏二奏皇風之曲樂作光祿司官斟酒御前序班隨斟群臣酒教坊司奏進酒候 皇帝舉酒群臣以次舉飲訖樂止光祿司官進湯鼓吹響節前導至殿外鼓吹止殿上樂作群臣起立光祿司官進湯御前群臣復坐序班即供群臣湯樂止教坊司跪奏進湯樂作候 皇帝舉筋羣臣次舉 皇帝進湯訖贊饌成樂止武

舞入教坊司跪奏平定天下之舞舞畢出第三爵酒教坊司跪
奏三奏養皇明之曲樂作進酒如前儀樂止教坊司跪奏樂奏
撫安四夷之舞舞畢出第四爵酒教坊司跪奏四奏天道傳之
曲樂作進湯如前儀食畢教坊司跪奏樂奏車書會同之舞舞
畢出第五爵酒教坊司跪奏五奏振皇綱之曲進酒如前儀飲
畢教坊司跪奏百戲呈應舞畢出第六爵酒教坊司跪奏六奏
金陵之曲進酒進湯如前儀畢教坊司跪奏八蠻獻寶進呈舞
畢出第七爵酒教坊司跪奏七奏長楊之曲進酒如前儀教坊
司跪奏採蓮隊子呈應畢出第八爵酒教坊司跪奏八奏芳醴
之曲進酒進湯如前儀畢教坊司跪奏魚躍于淵呈應畢出第
九爵酒教坊司跪奏九奏駕六龍之曲進酒如前儀飲訖光祿
司官收御前爵序班隨收群臣盞光祿司官進湯進大膳大樂

作群臣起立進訖復坐序班隨供群臣飯教坊司跪奏進膳食
訖贊饌成樂止光祿司官收膳訖教坊司跪奏百花隊舞呈應
舞畢出鳴贊唱徹案序班徹群臣卓訖光祿司官即徹御卓贊
宴成羣臣皆出席北向立序班即徹群臣座殿外官皆詣丹墀
北向立贊鞠躬樂作贊四拜平身樂止羣臣分東西立儀禮司
跪奏禮畢駕輿大樂作鳴鞭百官以次出其中宴禮同前但進
酒七爵其常宴同中宴禮儀但百官一拜三叩頭進酒或三爵
或五爵而止凡文武官宴四品以上俱陞殿坐侍看侍不以秩為拘
如宴于奉天門則四品以上官坐門上五品以下官坐丹墀內
有越位喧嘩者御史初之口傳制警戒及違官祭祀禮凡大祀
前三日陳設如常儀文武官各具朝服詣丹墀拜位 皇帝御
華蓋殿具皮弁服鐘聲止執事官行禮訖儀禮司跪奏請陞殿

樂作 皇帝出陞座樂止捲簾鳴鞭訖贊四拜傳制官詣御前
跪奏傳制俯伏興由東門出至傳制位稱有制贊跪宣制云洪
武某年正月某日大祀天地于南郊爾文武百官自某日為始
致齋三日當敬慎之傳訖贊俯伏興樂作又四拜興平身樂止
奏禮畢凡遣官祭祀前一日陳設如常儀次日各官具朝服于
丹墀北向立 皇帝御華蓋殿具皮弁服鐘聲止執事官行一
拜叩頭禮訖儀禮司跪奏請陞殿樂作 皇帝出陞座樂止捲
簾鳴鞭訖百官一拜叩頭畢分東西立引禮引獻官詣拜位贊
四拜興平身傳制官詣御前跪奏傳制俯伏興由東門出至傳
制位稱有制贊跪宣制祭孔子則曰某年月日祭先師孔子大
成至聖文宣王命卿行禮祭歷代帝王則曰某年月日祭先聖
歷代帝王命卿行禮贊俯伏興樂作四拜興平身樂止禮畢○

進春禮是日早文武百官具朝服于丹墀內北向引禮引應天府縣官就拜位贊鞠躬樂作四拜樂止典儀唱進春引府縣官舉春案樂作由東階陞跪置于丹陛中道俯伏興平身樂作又四拜禮畢鳴贊唱排班引禮引文武官北向立贊班齊致詞官詣中道之東跪奏云新春吉辰禮當慶賀贊鞠躬樂作贊五拜三叩頭訖樂止儀禮司奏禮畢○頌誥儀是日早陳設如常儀皇帝陞殿鳴鞭百官一拜三叩頭畢引禮引受誥官詣拜位執事官舉誥案于丹墀中道或吏部或兵部官奏訖贊鞠躬樂作四拜樂止執事官舉誥案置于丹墀中道贊跪俯伏興樂作又四拜樂止禮畢○問請詔故儀前期一日設御座寶案如常儀錦衣衛設雲蓋于奉天門教坊司陳樂于殿內禮部設宣讀案于承天門上西南向其日清晨陳設如常儀教坊司設大樂

于各門東西相向儀禮司設百官拜位于承天門外橋南校尉
四人擎執雲蓋于殿內簾前鼓初嚴文武百官具朝服鼓次嚴
引禮引公候侍班于午門外東西相向鐘聲止儀禮司跪奏請
陞殿皇帝具皮弁服導駕官前導樂作陞座樂止鳴鞭捲簾
禮部官奉詔書詣甯塞前用寶訖捧置雲蓋中校尉擎執雲蓋
由殿東門出大樂作自東陞降由奉天門至金水橋南午門外
樂作公侯前導迎至承天門文武官就位樂作贊四拜樂止宣
讀展讀官陞案稱有制贊東官皆跪禮部官捧詔書授宣讀官
宣讀訖禮部官捧詔書置雲蓋中贊禮唱俯伏興樂作四拜樂
止唱播笏鞠躬三舞蹈跪唱山呼者三百官山呼如常儀唱出
笏俯伏興樂作四拜樂止禮畢禮部官捧詔書分授使者畢駕
輿中和樂作鳴鞭樂止百官退凡使者欽齋勒符丹符到處若

事干機密則不許先期報知亦不許本處官司迎接使者與衆
官直至本衙門置勅符于案使者立于案東衆官四拜使者取
符宣讀訖復置于案衆官再行四拜禮畢遂與使者行禮若與
一二人止于本堂接符從便安放使者以符授本官本官叩頭
開看畢乃與使者行禮若齎詔書至總兵官處近營十里先令
人報總兵官設香案于營內南向列金鼓旗仗率諸將出營迎
接見使者下馬立于道傍俟詔書過乃上馬後從至營門外俱
下馬使者前行總兵官等從至營內使者捧詔書置于案遂立
于案東西向總兵官等行四拜禮使者取詔書授宣讀官衆官
跪聽宣讀畢以授使者復置于案衆官俯伏興行四拜禮畢使
者東立西向總兵官西立東向行兩拜相見畢仍東西相向序
坐若齎勅諭勅符手詔至總兵^官處徑至總兵官營外先遣人密

報總兵官設香案于兵幕南向總兵官親出營迎接使者下馬
捧制諭勅符前牲總兵官後從至兵幕使者取制諭勅符置于
案使者立于案東西向總兵官行五拜禮畢悉令屏去左右使
者取制諭勅符親授總兵官開看畢即收卷復置于案其與總
兵官相見序坐如接詔儀○頒曆儀前期陳設如常儀儀禮司
設御曆案于殿中設進曆案于丹陛中道設百官曆案于丹陛
下鼓初嚴引禮引文武官進曆官入就侍立位鼓三嚴傳制受
曆侍從官各就位文武官執事官詣華蓋殿五拜三叩頭導駕
至奉天殿 皇帝具皮弁服出樂作陞座捲簾樂止鳴鞭訖引
禮引進曆官就位贊鞠躬拜樂作進曆官皆四拜樂止典儀唱
進曆引禮引欽天監正由東階陞樂作詣丹陛案前跪措笏取
曆由殿東門入至殿中跪內贊唱跪外贊唱衆官皆跪樂止唱

進曆監正以曆置于案唱出笏俯伏興外贊亦唱俯伏興樂作
監正復拜位樂止贊禮唱鞠躬拜樂作監正以下皆回拜樂止
進曆官退執事舉百官曆案于丹墀中道替拜樂作百官皆回
拜樂止傳制官跪奏傳制俯伏興由殿東門出至丹陛東西向
立稱有制贊跪宣制曰欽天監進某年大統曆其賜百官頒行
天下贊俯伏興樂作回拜樂止頒曆官取曆散百官散畢樂作
駕興百官以次出樂止○皇第三十八孫悅燁生蜀王第三子
也○癸卯召秦王模晉王桐 今上周王橐齊王樽期以八月
十二日至京師代王桂肅王模遼王植慶王楸寧王權期以九
月十二日至京師○置監井衛指揮使司命中軍都督府都督
僉事徐凱署司事○宣寧侯曹泰卒

太祖高皇帝實錄卷之二百二十九

洪武二十六年秋七月甲辰朔享太廟。日有食之。丙午詔罷各布政司寶泉局以鑄錢擾民故也。在京則仍舊鼓鑄。戊申選秀才張宗濬等俾隨詹事府左右春坊官分班入直。文華殿侍講畢進說民間利害。田里稼穡等事。問陳古今孝悌忠信文學材藝諸故事。日以為常。辛亥勅遼東都指揮使司謹守邊防。絕朝鮮國貢使。又命左軍都督府遣人往遼東金復海蓋四州增置閔隘繕脩城隍發騎兵巡邏至鴨綠江而還。壬子信國公湯和男燮奏以原給家奴儀從四十八人還官隸籍為民。癸丑以長興侯耿炳文男璠為前軍都督府都督。僉事中軍都督府都督。僉事劉德左軍都督府都督。僉事袁洪並為本府左都督。左軍都督府都督。僉事徐增壽為右軍都督府都督。

僉事右軍都督府都督僉事李壇枝為左軍都督府都督僉事
○置甘州左護衛指揮使司○乙卯雲南武定軍民府女知府
商勝貢馬○丁巳調府軍前衛將士之有罪者隸甘州左護衛
賜道里費有差○辛酉欽天監監副李德秀言臣按故元至元
辛巳為曆元上推往古每百年長一日每百年消一日永久不
可易也今監正元統改作洪武甲子曆不用消長之法考得春
秋曆獻公十五年戊寅歲距至元辛巳二千一百六十三年以
辛巳為曆元推得天正冬至在甲寅日夜子初三刻與當時實
測數相合以洪武甲子元上距獻公戊寅歲二千二百六十六
年推得天正冬至在己未日午正三刻此辛巳為元差四日六
時五刻有此不合今當用至元辛巳為元及消長之法方合天
道疏奏統復言臣所推甲子曆元實與舊法相合畧無差繆故

敢上聞。上曰：二說皆難憑，只驗七政交會行度無差者為是。○癸亥命吏科給事中張迪署吏部事，其印仍令署部事司封主事翟善掌之。○甲子置寧夏衛，調甘州左護衛將士守之。初發府軍前衛將士之有罪者隸甘州左護衛，既而以負罪者不可為親王扈從，遂徙於寧夏置衛，別調兵為護衛。○乙丑復賜故東川侯胡海田初海嘗有罪，收其祿田，至是其子觀尚公主詔復給之。○丙寅禮部奏定武職隨從人數：一品至三品六人，四品至六品四人，七品至九品二人，俱用正軍。三日一更。○戊辰廣東韶州府樂昌縣盜起，殺縣官，發倉庫，劫掠民貨，命清遠衛指揮雍文率兵討捕之。○以署北平布政使司事華敏為本司叅議。○己巳置各處布政使司司獄秩從九品。○都督聶緯坐藍玉黨伏誅。○河南衛軍王狗兒妻周氏一產三男，事聞遣

行人給賜鈔十錠米五石且命分其子二伴無子之家養之月
給米五斗過二歲罷給著于例○辛未遣禮部員外郎潘善應
司務譚孟高往祭廬山為周顛仙立碑顛仙姓周不知其名自
言建昌人身長壯貌奇崛舉止不類常人年十餘病癲嘗操一
瓢入南昌乞食于市久之至臨川未幾復還南昌日施力於人
夜卧閣簷間祗寒暑雨自若嘗趨省府曰告太平人皆異其言
遂呼為顛僂不數年天下果亂陳友諒據江漢引兵入南昌顛
僂隱跡不見及上自將伐友諒既定南昌將還顛僂從道左
拜謁潛隨上至金陵每遇上出輒趨進曰告太平告太平
間見或捫蝨而談擊節而歌詞多隱語上頗厭之特命飲以燒酒
酣暢不輒明日復至上命賜以新衣視其舊衣帶紫葛蒲三
寸許曰細爵飲水腹無痛又自言入火不熱乃以巨甕覆之積

蘆薪五尺許燔甕四旁火盡熾發而視之端坐如故如是者凡
三及寓蔣山寺月餘寺僧言顛僂與沙彌爭飯怒不食半月矣
上幸翠微亭召之步趨無異平時因賜之食乃食 上問曰
能不食一月乎曰能乃坐之一密室中不食者二十三日矣上
將幸寺賜之食京師將士聞之爭持酒肴往食之既食而盡吐
之頃史 上至與之食乃復飲食如常時既醉 上将還顛僂
于道側以手畫地作園曰破一桶成一桶矣是時中原尚未定
友諒復圍南昌 上欲親勒兵往援問顛仙曰陳氏已僭號吾
此行何如顛仙仰視良久曰可行上面無此人分曰與汝偕行
可乎曰可即躡躍持杖搖舞如壯士揮戈狀以示必勝之兆舟
次皖城無風不能進顛仙曰行則有不行則無既而行不數里
風果大作至馬當見江豚戲水曰水怪見前損人必多 上曰

顛者言何妄也復爾則垂之江中乃自言能入水不濡遂命投之于江久之復來謁見欲求食上命賜之食食已正衣襟前引頸曰今可殺矣上笑曰殺爾何為乃縱其還廬山及友諒敗死遣人往廬山求之至太平宮側有言一老人止民舍曰我告太平來不食且半月今去不見矣洪武癸亥秋有僧名覺顯者自言廬山巖中老人使來見上以其虛誕却之至是上不豫飲藥未瘳前僧復徒跣至云周顛仙遣進藥上不納僧具言前事乃餌其藥覺有葛蒲丹砂之氣是夕疾愈僧亦去不知所之遂親為文勒石記其事命善應等往祠焉○思明府知府黃平遣弟忠華進方物○壬申普定衛西堡長官司阿德諸寨長卜刺讚等聚眾作亂命貴州都指揮顧成領兵討平之八月甲戌朔散騎舍人劉昌捕劫盜王天錫斬其首獻京師天

天錫真定元氏縣人聚衆劫掠出沒山谷間或變服潛入城市蹤跡詭秘自廣平順德遼沁山東西河南諸郡皆被其害是年五月命昌率力士官軍分詣諸縣捕之天錫勢窮遁入李相山北溝自經死昌斬其首以獻盜遂平。丁丑遣官釋奠于先師孔子。戊寅祭大社大稷。己卯曲靖府馬龍州知州法燧等遣使貢馬及方物。庚辰命吏部今後除授官員即與實授勿令試職著為令。辛巳以王晟為浙江布政使司左叅議初晟署廣東布政使司事至是命為浙江叅議。署吏部事主事翟善言內外雜職官三年給由無私犯者未入流陞從九品有私犯者降用有司官三年秩滿不稱職者黜降稱職及平常者雖有私犯亦令赴任今議雜職私犯尚有降用之條况有司曾犯私罪而不加黜降則無以示勸懲。上曰有司犯私罪而有之

所以奠其改過自新也宜勿降等○壬午皇第三十九孫有充
生周王第六子也○癸未秦王棟晉王桐 今上周王楠齊王
搏至京師○始命天下府州縣儒學訓導冠帶先是訓導冠服
與士人之未仕者同至是河南布政使司右叅議董倫奏各處
儒學訓導合比醫學訓科陰陽訓術一體冠帶以別士類命禮
官集議之而未決 上曰陰陽醫學技術之流且有冠帶訓導
教誨生徒為國育材豈有重于技術宜授冠帶自是訓導皆冠
帶上名史部附選貼黃、乙酉遣官祀歷代帝王○丙戌祭太
歲風雲雷雨嶽鎮海濱山川月將城隍諸神○遣官祭禳蠹○
命崇山侯李新傑水縣督視有司開燕脂河 上諭之曰兩浙
賦稅漕運京師歲實繁浩一自浙河至丹陽舍舟登陸轉輸甚
勞一自大江沂流而上風濤之險覆溺者多朕甚憫之今欲自

畿甸既鑿河流以通于浙俾運輸者不勞商旅獲便故特命爾
往督其事爾其涖事惟勤役民勿暴新頓首受命而行暨河成
人皆便之○復以刑部郎中李文吉為都察院右僉都御史○
丁亥夜大陰犯昴宿○戊子中秋節宴羣臣于奉天門○西番
思曩日等族來歸進馬百三十匹命給金銅信符并賜文綺襲
衣○己丑罷新置湖廣古州衛令將士屯田五開 庚寅刑部
奏瀘州民生侵盜官擢罪當死 上曰遠方愚民但知貪利不
知有法遂命宥之○詔凡未入流雜職官幘頭展角與入流官
同不用垂帶○乙未復置武昌府興國鐵冶○夜五更有大星
起東南流丈餘沒○庚子太陰與太白晝見○以工部右侍郎
田春為左侍郎命司務王昇署右侍郎事○賜琉球生仁悅慈
等羅絹衣各一襲其從人亦給布衣

九月癸卯朔欽天監進明年大統曆○陞和州含山縣典史王棟爲廬州合肥縣知縣棟閔鑿堰塘畫圖入奏上喜其通敏特陞用之○夜太陰入南斗○甲辰賜廣西桂林等衛征進將士六千餘人銀三萬三千二百餘錠○設寧夏僧會司○戊申賜江陰侯吳高誥券○復以劉三吾爲翰林學士○己酉道州永明縣蠻人作亂擁衆二千餘劫挑川巡檢司殺兵民焚廬舍永州衛百戶李實戰死事聞命永州衛指揮使許仁等率兵勦捕尋討平之○癸丑代王桂肅王拱遠王植慶王璘寧王權呈京師○乙卯建遠王府於廣寧丙辰宥工部尚書嚴震直弟姪罪初震直卿民有訴其弟姪不法者命震直自訊之獄成具奏上以震直不欺并其弟姪釋之○丁巳河南按察司僉事王平巡按至孟津有司歛衆財以賂平平械其人并所賂米奏

上嘉平得憲臣體命賜平文綺襲衣及鈔百錠書史衣鈔減平
之半仍以勅書勞勉之曰古之有志者篤誠守已事不苟為及
其仕也竭忠以事君務公以福民聲色貨利皆不能動蓋其志
已定於未仕之先故生則富貴安榮沒則垂名史冊朕臨御三
十年矣求賢之心夙夜孜孜而鮮有能副朕望任風憲者無激
揚之風為民牧者無撫字之實作法司奏言河南僉事王平同
書吏高源按臨屬郡其孟津宜陽官吏聞王平至即斂財為賄
賂計平持法無私不為利動朕聞之喜若平者真有志之士哉
特遣人賜平鈔百錠及衣被高源賜鈔五十錠爾其益勵初志
務公福民則永有嘉譽歆哉○乙未命自今 聖節日在京官
吏監生軍民僧道並賜鈔○庚申 天壽聖節 上御奉天殿
受朝賀大宴羣臣○播州宣慰使司宣慰使楊鏗遣其從兄杰

建昌土官黃略刺遣其弟刺撒各進馬○壬戌 上欲運山西
解州鹽入京命自絳州垣曲縣壺關至淮安清河縣白萍驛凡
設遞運所二十七○給神策金吾等衛軍士冬衣布六十五萬
六千八百餘匹○甲子以鄭濟為左春坊左庶子王勳為右春
坊右庶子初 上以東宮官屬久闕命廷臣舉孝義為行之士
廷臣以浦江鄭氏對 上曰鄭氏朕素知之聞其里人王氏亦
倣鄭氏家法皆可選用以風厲天下乃徵兩家子弟年三十以
上者詣闕既至今自推舉鄭氏舉濟王氏舉勳餘皆給道里費
遣還○陛紹興府會稽縣知縣鄒魯為大理寺丞賜鈔襲衣靴
鞞魯泗州盱眙人以聰明正直舉授河內縣主簿尋以事降為
會稽縣典史著民奏其庶能遂陞知縣既而廣寧衛鎮撫趙興
以公事至縣為人請求魯執法不從興遂誣奏之逮至刑部事

得直 上嘉其有守特陞賞之○乙丑命工部新製弓樣令各處布政使司歲造進貢弓闔三指不如法者罪之○丙寅秦晉等十五還國賙其從官侍衛鈔錠有差○丁卯夜有大星光赤色起自諸王北流至五車沒○戊辰賜天界天禧靈谷能仁難鳴五寺蘆柴地四十七頃有奇○壬申賜致仕都指揮魏平等十三人金織文綺及素衣人二襲鈔百錠○朝鮮國王李旦得祈賙劄書惶懼遣使奉表陳情謝罪貢白黑布人參及金裝鞍馬

大明太祖聖神文武欽明啓運俊德成功統天大孝高皇帝實錄卷之二百二十九

大明太祖聖神文武欽明啓運俊德成功統天大孝高皇帝實
錄卷之二百三十

監修官資善大夫太子少師

臣

姚廣孝資政大夫戶部

尚書

臣

夏原吉

總裁官文淵閣大學士兼左春坊大學士奉政大夫

臣

胡廣等奉

勅修

明太祖高皇帝實錄卷之二百三十

洪武二十六年冬十月癸酉朔○甲戌享太廟○乙亥大理寺奏四川民以輸糧違期及移易者坐法當誅上曰四川水陸險峻輸輓良難故有失期彼移易者或兩取便利求無逋欠可矣豈得遽論以死甚失愛民之心其悉宥之仍給道里費遣還病不能至者遣內官就道給賜稅糧未足者令就本處輸之○丙子以崔士先為戶部主事士先兵部吏也有才幹為吏十年未嘗有過吏部以聞上曰吏能如此可謂難矣其擢用之以激勸為吏者○丁丑命致仕武官有才幹精力未衰者為督撫等官指揮王罷為浙江都指揮使司都指揮使高德鄧義為都指揮同知十戶張文孫成為都指揮僉事張翠為江西都指揮使司都指揮同知鄭顯為都指揮僉事張聚為山西行都指揮使

司都指揮同知鄧斌為都指揮僉事陶瑾為廣西都指揮使司
都指揮同知蔣成為都指揮僉事魏平為四川都指揮使司都
指揮同知趙德謝貴為福建都指揮使司都指揮僉事朱真李
信為遼東都指揮使司都指揮僉事吳旺許方為陝西都指揮
使司都指揮僉事李實為山東都指揮使司都指揮僉事朱彥
為貴州都指揮使司都指揮僉事張敬為北平都指揮使司都
指揮僉事袁成為北平行都指揮使司都指揮僉事熊興為山
西都指揮使司都指揮僉事竇義為湖廣都指揮使司都指揮
僉事喬成為廣東都指揮使司都指揮僉事○定諸王來朝及
遠國祭祀禮其禮於端門用豕一羊一葷素各一壇不用制帛
先是諸王來朝還國祭真武等神於端門用豕九羊九制帛等
物祭護衛旗纛於承天門亦如之至是 上以其禮太繁故有

是命尋又罷端門祭祀唯用葦素二壇祭於承天門外○戊寅
給北平都指揮使司所屬衛所并三護衛將士九萬一千七百
餘人布三十五萬九千八百餘匹綿花十三萬七千五百餘斤
○壬午夜太陰犯外屏○丙戌宥朝鮮國海寇罪先是有寇百
餘人入金州新市屯劫掠獲其一人張葛買者迺朝鮮國海州
民詐為倭國人服遼東都司遣人械至京上命宥之遣還其
國○己丑革中都國子監以其師生并入國子監○壬辰詔國
子監祭酒胡季安選國子生年三十以上能文章者二百四十
一人命吏部除授教諭等官○夜太白與填星同度○丙申擢
國子生劉政為福建布政使司左布政使鄧志和為右布政使
蕭禮敦為左叅政姜謙為右叅政江壽祖為左叅議楊允為浙
江布政使司右布政使羅鍾為左叅政李文華為右叅政陳收

海為右叅議楊鏞為山東布政使司右布政使劉達為左叅政
顏純為北平布政使司左布政使申達為右布政使張傑為左
叅政張貫為右叅政周振為河南布政使司左布政使張璉為
右布政使蔣彥琪為左叅政徐德源為右叅政魏全為左叅議
許銘惠為四川布政使司左叅政房吉為左叅議吳復為右叅
議王允為山西布政使司左布政使陳嘉為右布政使孫炳為
左叅政喬誠為右叅政邵禮為左叅議薛郁為陝西布政使司
左布政使董倫為右布政使郭燧為左叅政王春為右叅政單
鉉為江西布政使司左叅政李裕為廣西布政使司左叅政何
應為右叅政邢政為右叅議方溫為湖廣布政使司右布政使
班平為右叅議龍鐔為浙江按察司按察使宋源黃壽為副使
鄭隱為僉事阮友免章為福建按察司按察使陳鏞聞人善慶為

副使王禮為北平按察司按察使張璉為副使高勉為僉事李皓為山西按察司按察使劉準為副使曹

汝舟為僉事曲能為山東按察司按察使王尚賓孫逢吉為僉

事梁志道為廣東按察司副使張忠為僉事李溫為廣東按察

司副使李文憲為僉事李賡為河南按察司副使張健為僉事

羅遠鄭珉為江西按察司僉事汪同孫泰為陝西按察司僉事

○己亥皇弟四十孫遜端生代王世子也○更給天下府州縣

工匠輪班勘合先是諸色工匠歲率輪班至京受役至有無工

可役者亦不敢失期不至是工部以為言上令先分各色

匠所業而驗在京諸司役作之繁簡更定其班次率三年或二

年一輪使赴工者各就其役而無費日罷工者得安家居而無

費業于是給與勘合凡二十三萬二千八十九人人咸便之○

命總兵官宋國公馮勝凡將校有罪削爵聽征者悉復其職○

是月改建翰林院于皇城東南宗人府之後詹事府居其次太醫院又次之

十一月壬寅朔賜國子監琉球生及雲南生賀啟志等襲衣鈔錠○癸卯召道士劉淵然于贛州賜號高道館于朝天宮○賈州水西上官遣祀事阿夷阿庫貢馬六十五匹○丁未遣使至山西大同蔚朔及北平密雲永薊諸州郡收糴黍麥蕎粟各九千石俟明年發兵出塞給種屯田○戊申監察御史奏稽覈在京諸司洪武二十三年二十四年案牘得其隱沒違錯等事通一百二十四刑部尚書楊靖等當逮問者二百餘人詔宥之○己酉浙江觀海衛千戶呂祥之弟訴祥有罪當黜官 上曰元不友其弟弟不恭其兄豈可復使居官治人皆誦成于邊仍詔其幼弟襲職○庚戌戶部奏貴州宣慰使司宣慰使妥的言水

東所統異種蠻民言語不通雖承納租賦而近年逋負益多逃
徙鄰境無從徵納西平侯沐春亦言水西土官鬻翠所納稅糧
八萬石連年遞減至二萬石然亦不能供也 上曰蠻夷之人
其性無常不可以中國治之但羈縻之足矣其貢賦之逋負者
悉免徵逃徙者招諭復業○西平侯沐春奏永寧宣撫司招徠
土官林肇所部蠻民四百六十五戶誅其逆命者七十餘人初
蠻民作亂官軍進討既降復遁數為邊患至是始平○辛亥冬
至 上御奉天殿受朝賀宴羣臣于奉天門○癸丑詔建鑿駕
庫于皇城東長安門之外○甲寅詔發漢中等府民丁修棧道
凡三百二十橋○乙卯廣東東莞縣民黃廷輔等聚衆作亂廣
東都指揮使司發兵討平之○夜有大星起自參旗南行至將
氣中沒有二小星隨之○丙辰以右軍都督竇正子忠為鷹揚

衛指揮使後軍都督袁洪子宇為驍騎右衛指揮使○遼東遺民流寓女直境內者二十五戶男女凡百一十六人來歸詔東寧衛給糧撫綏而居之○朝鮮國械送逋逃軍民百二十二戶三百八十八人及馬牛百餘至遼東○濟南府霑化縣典史杜漢坐事當徒縣民詣闕言漢廉幹愛民上曰典史幕官耳過能待民心必有善政可稱命復其官○戊午詔遼東都指揮使司凡朝鮮人至止令于革河互市不許入境○夜太陰犯鬼宿○己未東莞叛寇何迪伏誅迪東莞伯真之弟也真次子宏以罪誅迪自疑禍及遂聚衆作亂南海衛以兵捕之迪伏衆狙殺官軍三百餘人遁入海島廣東都指揮使司發兵追擊敗之械迪送京師誅之○庚申曹國公李景隆奏還莊田六所凡田地山塘池蕩二百餘頃○辛酉特授故百戶李思明嫡子順為副

千戶賜冠帶襲衣靴襪白金二百兩鈔三百錠文綺帛二十四
其庶兄成亦賜襲衣以其父討叛賊月魯帖木兒之功也○丙
寅電○丁卯遼東都指揮使司獲朝鮮諜者李敬先等六人至
京師命錦衣衛給廬舍居之○爪哇國遣使僧阿烈等貢方物
○是月青州兗州濟寧三府水○革慶遠裕民司

十二月壬申朔降工部尚書嚴震直為監察御史左侍郎田春
為本部主事署右侍郎司務王昇仍為司務命都給事中冀凱
署工部左侍郎卓敬署右侍郎○定六部司務為從九品每部
添設二員復設史二人掌出入文書簿籍○夜有大星赤色自
西南行流至近濁沒○癸酉皇弟二十六子楠生○己卯山東
濟南府長山縣水傷民田○罷越蕩衛商人中鹽初以鹽井建
昌蘇州越蕩會川五衛土地硠瘠軍食不敷故令商人輸米中

鹽至是以越嵩稍近成都糧餉可給故罷之○丙戌命禮部中
禁軍民人等不得用太孫太保太師待詔大官郎中等字為名
稱○庚寅進羅斛國遣使貢_旨未貢方物○癸巳廣西太平府
太平州知州李國泰貢白金器皿及馬田州府知府岑堅等貢
馬及方物○乙未賞建昌衛襲職百戶雷貴妻白金五十兩鈔
八十錠文綺帛各二匹以其父役死于戰陣故也○丙申四川
石柱宣撫使馬良龍州土官同知李昭等貢馬及方物○己亥
西平侯沐春奏麗江府土民每歲輸白金七百六十兩皆摩訶
洞所產土民以馬易金不諳真偽請令以馬代輸為便許之○
庚子享太廟○刑部言天下諸司比年以來勘合不報者積至
千數請因官吏未朝罪之上曰勘合不完固有罪但不可用
其未朝而治之也其移文趣完之○蜀王椿進馬○雲南烏蒙

芒部臨安大理普定廣西金齒景東麗江等府土官俱入貢○
貴州宣慰使司宣慰使女的等安順州及十二營長官司各遣
人貢馬○盧蕃韋蕃小平伐三長官司土官盧朝等未朝貢馬
○結倫州土官馮志威安平州土官李貴萬承州土官許郭安
泗城州土官岑振南丹州土官莫金各遣其弟姪來朝貢馬及
方物○播州宣慰使司宣慰使楊鏗雲南鶴慶府土官董信龍
州土官同知李昭松潘軍民指揮使司指揮使牟力結陝西河
州衛番僧綱筆占班各貢馬俱賜以綺帛及鈔○太僕寺奏是
歲孳生馬駒萬七百餘匹○命右軍都督府榜諭河州等處禁
民毋鬻官馬先是朝廷以言者謂陝西各處軍民徃往有過河
販鬻馬匹既遣使往甘肅西涼西寧印洛條官之馬宜俾闕吏
禁絕過河私販之弊既又有言西人所賴者畜牧為生舊常以

馬過河鬻售今既禁遏之恐妨其生計上然其言乃命右軍都督府給榜諭守關者今後止禁官印馬匹不許私自販鬻其西番之人自己馬無印者及牛羊雜畜之類不問多寡一聽渡河售易闕吏阻者罪之○是月永鑑錄成其書輯歷代宗室諸王為惡悖逆者以類為編直叙其事頒賜諸王又輯歷代為臣善惡可為勸懲者別為一書名曰世臣總錄以頒示中外羣臣○戶部計是歲天下錢糧金帛之數凡糧儲三千二百七十八萬九千八百餘石鈔四百一十二萬四千餘錠布帛五十二萬二千二匹金二百兩銀二萬五百餘兩絲綿茶鉛鐵硝礬水銀硃砂諸物三百六十五萬四千餘斤鹽一百三十一萬八千餘引海肥三十一萬六十餘索○是歲建瓴王府于雲南谷王府于宣德府

卷二百三



太祖高皇帝實錄卷之二百三十一

洪武二十七年春正月辛丑朔上御奉天殿受朝賀宴羣臣

于奉天華蓋二殿○雲南麓川平緬宣慰使司宣慰使思倫發

及元江府土官知府那榮因遠羅必甸長官司長官白文玉等

五十處土官來朝各貢馬象方物○壬寅免山東青州府樂安

等縣田租先是青州府樂安縣及兗州府嶧縣以水災聞命戶

部遣官覈實至是詔免其租三千餘石○置普定衛儒學及惠民

八藥局○甲辰享太廟○乙巳命都察院戒飭天下按察司官

時按察司官入覲監察御史鄭大本劾其不能肅紀綱正風化

除姦屏蠹激濁揚清率皆備員竊祿以致獄訟繁滋枉直莫辨

有司病民恬不加察遂使廉者無激勸之方貪者長僥倖之志

宜以各官付法司推鞠非才者黜罷詔勿問命都察院為文戒

筋之○丙午西寧衛鎮撫李喃哥等建佛刹于其地以居番僧
未請寺額賜名曰寧番寺○丁未復置山西平陽府吉州豐國
富國二鐵冶先是 上以採鐵勞民罷二鐵冶至是工部臣言
營造蓋廣用鐵類多諸復置冶煎煉以供國用從之○戊申遣
官往光州等處市料牛給洛陽護衛屯田軍士○命禮部榜示
天下僧道寺觀凡歸併大寺設碇基道人一人以主差稅每大
觀道士編成班次每班一率高者率之餘僧道俱不許奔走于
外及交構有司以書冊稱為題疏強求人財其一二人于崇山
深谷修禪及學全真者聽三四人勿許仍毋得矜菴堂若游方
問道必自備道里費毋索取于民民亦毋得輒自侮慢凡所至
僧寺必揭周知冊以驗其實不同者獲送有司僧道有妻妾者
許諸人插逐相容隱者罪之願還俗者聽亦不許收民兒童為一

僧違者并兒童父母皆坐以罪年二十以上願為僧者亦須父母具告有司奏聞方許三年後赴京考試通經典者始給度牒不通者杖為民有稱白蓮靈寶火居及僧道不務祖風妄為論議沮令者皆治重罪○辛亥以中都國子司業周斌為齊府左長史斌福之寧德人為建寧府學教授考滿陞中都國子司業未幾革中都國子監召回京師遂陞是職○賜雲南四川湖廣進方物土官及從人凡五百四十一人鈔四千六百五十九錠錦二十三匹文綺一百七十六匹絹二百四十二匹○雲南摩狄洞蠻寇建昌打冲河西守堡中軍都督府都督僉事徐凱以成都等衛兵擊敗之○癸丑廣西思陵州土官韋延壽江州土官黃中立思明府知府黃廣平貢馬及方物○甲寅禁民間用番香番貨先是上以海外諸夷多詐絕其往來唯琉球真臘

暹羅許入貢而緣海之人往往私下諸番貿易香貨因誘蠻夷
為盜命禮部嚴禁絕之敢有私下諸番互市者必寘之重法凡
番香番貨皆不許販鬻其見有者限以三月銷盡民間禱祀止
用松栢楓桃諸香違者罪之其兩廣所產香木聽土人自用亦
不許越嶺貨賣蓋慮其雜市番香故併及之○乙卯大祀天地
于南郊○丙辰遣京衛千戶郭均英往賜麓川平緬宣慰使司
宣慰使思倫發公服幘頭金帶象笏○召信國公湯和入朝時
和居鳳陽里第以風疾不能行 上思之特召入見勉慰問勞
既而遣還賜鈔一百五十錠俾擇地營壽藏○己未命瀘州衛
指揮僉事皇甫霖鎮守鹽井衛時西平侯沐春奏鹽井衛地遠
遼夷而衛新置宜遷宿將詣練懷柔可服夷心者鎮之故有是
命○辛酉永順宣慰使司宣慰彭添保貢方物○ 上退朝顧謂

翰林學士劉三吾曰朕歷年久而益懼者恐為治之心有懈也
懈心一生百事皆廢生民休戚係焉故日慎一日惟恐弗及如
是而治效猶未臻甚矣為治之難也自昔先王之治必本於愛
民然愛民而無實心則民必不蒙其澤民不蒙其澤則衆心離
於下積怨聚於上國欲不危難矣朕每思此為之惕然○命曹
國公李景隆似平巷將軍印往甘肅鎮守調都督宋晟劉貞率
馬步壯士緝捕盜馬寇遣仍令陝西都指揮王英領河州洮州
鞏昌臨洮軍馬往歸德金佛寺等處追捕叛羌○以天下郡縣
預備倉糧貸貧民先是命戶部遣耆民於各郡縣權糧置倉於
民間儲之委富民守視以備荒歉議者以粟藏久致腐宜貸於
民而收其新者於是遣使給貸之○甲子烏思灌頂國師吉剌
思巴監藏已藏卜等各遣使來朝獻甲冑罽纓等物○乙丑琉

球國中山王察度山南王永察度遣其臣亞蘭匏等奉表貢馬九十餘匹及硫黃蘇木胡椒等物○貴州宣慰使司宣慰使安的遣使貢馬十二匹先是建昌衛寇亂上以安的固守疆境遣使賞勞之故安的獻馬謝恩○丙寅置各處布政司按察司并各府照磨檢校官上諭六部都察院諸大臣者朕以各部案牘填委往往淹積不行吏緣為姦事愈浩繁於是各設司務職專紀其出入督其稽滯而察其姦弊不旬日間事多完集今在外布政司按察司并各府亦宜設照磨檢校如司務之職於是各司府置照磨所設照磨檢校各一人不置_署文案及不評差遣○上以皇孫及諸王世子郡王年漸長未婚勅禮部於河北平山東山西陝西凡職官及軍民家或前朝故官家女年十四以上十七以下有容德無疾而家法良者令有司禮遣之

俾其父母親送至京選立為妃其不中選者賜道里費遣送有司用足擾民者罪之○戊辰道州徭蠻盤大等五百餘人作亂湖廣都指揮使司遣兵討捕獲其黨周子昌等二十九人誅之徐皆潰散○上以山西大同蔚朔鴈門諸衛軍士月給糧餉有司侵民轉輸難若不勝遂命各衛止留軍士十人戍守餘悉令屯田以息轉輸之勞○命廣武衛指揮使劉福鎮永州還安陸中護衛指揮僉事馮喜為廣武衛指揮僉事時喜以不事事調鹽井衛指揮僉事及陞辭上閱其老故有是命○己巳北平宣府軍儲倉成初廷議以北平府餘糧運至宣府儲備遂置官度地置倉于居庸關下至是倉成凡六百區○庚午以前中都國子監為鳳陽府儒學○是月建漢壽亭侯關羽廟于雞鳴山之陽廟舊在玄津橋西至是改作焉與歷代帝王及功臣域

隍諸廟並列通稱十廟云。○建昌衛指揮使安配烏撒軍民府前宣慰使阿么沐川長官德聚隴木頭長官車落弟蒲亭程番長官程谷秀岳希蓬長官蒲送靜州長官非車子車送及奉議州上官黃世鐵泥溪長官司土官王鳳遣子王鳳馬湖府知府安仁尋甸府土官沙姑遣把事李不花臨安府土官甥祿勝來朝貢馬詔賜錦綺及鈔錠有差

^二五月辛未朔。○壬申車里軍民宣慰使司宣慰使刀暹荅遣其弟刀散等貢方物詔賜綺帛各十四匹鈔一百八十錠。○夜雨霰。○癸酉置建昌衛前千戶所守禦打冲河。○重定優給例凡軍官在任亡故及征傷失陷者自指揮至所鎮撫並賜其妻米五石優給終身無子孫者亦如之坐事死無子孫承襲者賜其妻鈔二十錠令依親不優給。○命中軍都督府都督僉事劉德前

軍都督府都督僉事商嵩巡視兩浙城隍簡閱軍士。上以倭
夷屢爲寇患命德等巡視沿海州郡城隍度其高廣丈尺以及
軍士器械之數仍督各衛嚴爲備禦遇有調發則一百戶所全
軍同出庶幾兵將相知不致相失。○給廣西屬衛官軍六千九
百餘人鈔三萬三千二百餘錠。○禮部言朝鮮國歲給大統曆
一百本今李旦數生違釁既已絕其往來則歲賜之曆亦宜免
造詔可。○乙亥夜太陰犯昴宿。○丁丑遣官釋奠于先師孔子
○戊寅祭大社大稷。○庚辰置河南等都指揮使司司獄時河
南都司奏獄囚無官專掌故命各都司特設司獄一人。○置應
天府溧水縣東壩稅課局批驗鹽引所巡檢司等衙門初溧水
縣耆民奏朝廷近開東壩既利漕運且便商賈宜立稅課局批
驗所巡檢司各一所從之。○詔罷在外文武諸司公晏先是每

歲正旦冬至 天壽聖節及千秋節令諸司各給官錢設晏于公堂至是官吏以市物擾民故命罷之。○辛巳吏部奏北平等布政使司山東等按察司考覈所屬有司官不勝任者四十餘人宜行黜降 上曰考覈行則善惡明黜陟公則賢者得以展其才不肖者不得以曠其職此輩宜即除官代還毋令廢事。○壬午免揚州府如臯縣民亡絕逋賦凡二百一十餘戶。○癸未皇帝四十一孫孟燿生楚王第九子也。○四川天全六番招討使高敬嚴遣使貢馬詔賜以文綺鈔錠。○免松江府華亭縣荒田租稅先是 上以民間多荒蕪田土有司仍徵其賦稅民甚苦之命戶部榜諭天下郡縣凡土田荒蕪者以實奏報於是華亭縣言流民七百二十戶該徵稅麥絲綿租米四千一百二十餘石詔覈實免之。○甲申夜有流星起自左旗東行至匏瓜沒

○乙酉遣官享先農○丙戌旌表武昌府江夏縣民孟福妻張氏貞節○丁亥增造運驛夫糧額初逆運驛傳夫皆以民間田賦多者充役少則併別戶以足之轉逆往復久不得代船壞馬斃則易買補償雖巨室甲戶亦憚其役吏緣為姦往往富者以賄免而貧者愈困於是饒州府樂平縣民方慶漸上言郡縣徭役不均最為民病如紅船馬船站船等役皆可計會乞令有司計每里雜役若干驗其丁賦輕重以損益之務令均一定為圖冊十年之內以次更番其餘輕役則於每年里長之下閤戶差遣如此則吏無賕賄之弊民無不均之患書奏上命戶部集百官議之戶部尚書郁新等言天下水馬驛逆運所夫其役至重雖蠲其稅糧而久不得代困乏之故皆由於此今後不須免糧但於各布政使司所屬境內計水馬驛逆運所船馬車牛之

數以所隸民戶田糧照依舊食糧額加倍均派不分民匠依次
輪充周而復始其兩浙稅戶與市民及宥罪發充者應役如故
湖廣山西之民先嘗梁軍已除水馬諸項役占人戶宜令依舊
充當不須均派 上曰若依舊例糧數止加一倍恐不足以蘇
民力命增至五倍餘如所議○給賜膳貲山開河民匠六千人
鈔一萬八千錠○庚寅命江陰衛指揮僉事朱信等率軍士運
糧往遼東○辛卯代州繁峙知縣劉英坐事被逮邑耆民十四
人詣闕言英在官廉謹誠心愛民乞貸其罪 上曰為令者能
得其民心之為民者能懷其令之惠皆可嘉也遂命釋英給耆民
道里費遣還○賜致仕指揮楊清等九十六人鈔各十錠布六
疋○甲午初山東濟州諸府鄒平諸縣被水災者凡一十七處
布政司以聞詔免其租稅戶部尚書郁新言近者高苑縣被災

田租皆准收綿布今鄒平縣宜如其例從之○勅左軍都督府
臣曰朝鮮國屢入朝貢既聽約束乃復使人鈔掠邊境為國啟
釁近日激浦獲賊胡德等五人問之迺其國遣之出海劫掠偵
伺邊警者宜遣人往詰朝鮮李旦何得無禮如此今胡德所連
之人甚多朕不欲深究其事姑與李旦言俾知之○丁酉遷蘇
州府崇明縣無田民五百餘戶於崑山開種荒田時崑山縣民
上言其邑田多荒蕪而賦額不蠲故有是命後慮其重遷之費
命本處衛所發軍船迎之○四川黎州安撫司土官副使苟德
貢馬○己亥夜有流星大如盂青赤色起自正南雲中隱隱有
聲西南行至雲中沒○是月城同安縣嘉木山置永寧中左千
戶所○緬國及朶苾烏思藏皆遣使入貢、

大明太祖聖神文武欽明啓運俊德成功統天大孝高皇帝實錄卷之二百三十一

明太祖高皇帝實錄卷之二百三十二

洪武二十七年三月庚子朔 上御奉天殿策會試舉人判策

試

曰昔列聖之馭宇也其立綱陳紀皆稽思遠慮至當無疵者為典章垂法萬世夫何歷代創業之君於革命之際必有損益果前代立法有未善歟抑時君樂於更張而有損益歟爾諸文士當立志之秋正直講此其悉陳之朕將覽焉時廷對者百人以張信為第一賜信等進士及第出身有差○辛丑 上謂侍臣曰人主之聰明不可使有壅蔽一有壅蔽則耳目聾瞶天下之事俱無所達矣翰林學士劉三吾對曰人君惟博采衆論任用賢能則視聽廣而聰明無所蔽若信任險邪隔絕賢路則視聽偏而聰明為所蔽矣 上曰人主以天下之耳目為視聽則是非無所隱而賢否自見昔唐玄宗內惑於聲色外蔽於權姦以

養成安史之亂及京師失守倉皇出幸雖田夫野老皆能為言
其必有今日者玄宗雖恍然悔悟亦已晚矣夫以田夫野老皆
知而玄宗不知其殺於聰明甚矣使其能廣視聽任用賢能不
為邪佞所惑則亂何從生哉○命魏國公徐輝祖安陸侯吳傑
往浙江訓練沿海軍士時海上有倭寇之警先命都督楊文節
制沿海諸軍備之至是復命輝祖等往加訓練○特賜新除署
府州縣儒學教官李宗等百六十三人鈔人十錠○癸卯陞河
南按察司僉事王平為都察院左僉都御史曹銘為右副都御
史初平在河南應介明敏為政有聲至是秩滿入覲故有是命
○以太子賓客兵部尚書致事唐鐸為太子少保○甲辰詔武
官子弟習騎射上諭五軍都督府臣曰朕嘗令武官子弟讀
習武藝今天下父安彼年少者惟安享父兄俸祿縱酒嗜音樂

歌舞遊戲一旦襲職使之挾弓天上馬且不能安能為國効力哉近揚州衛指揮單壽襲其父職率兵泰州捕寇猝與寇遇衆軍併力迎敵壽懼而走且麾衆使退遂致敗事此由其素不練習故爾自今武官子弟宜於閒暇時令習弓馬當承襲者五軍閱試其騎射閑習者方許否則雖授職止給半俸候三年復試之不能者謫為軍著為令○發山西軍士築東勝城北平軍士築宣府城○乙巳賜琉球國使臣亞蘭匏甚模結欽等宴于會同館○丙午以進士及第張信為翰林院修撰○山東寧陽縣民沈進詣闕訴水灾先是寧陽縣汶河決南連滋陽西至汶上水高出河丈餘濱河居民多漂流田禾皆浸沒惟高阜居民復存縣以灾上聞詔遣使省錄被災戶數使者還言灾不甚民妄訴復遣使覈之亦詭符前使言遂逮繫其吏民至是進詣闕訴

言民實被災者千七百餘戶而使者所錄止百七十餘戶有司
督迫祖賦民愈困憊 上命戶部覆覈之得實杖使者釋吏民
蠲其田祖賦○雲南臨安府僧鑑音等來朝請開設僧綱司從
之以鑑音為都綱○丁未命兵部凡武官子弟年幼襲職者俟
年二十以例比試○上謂侍臣曰毀譽之言不可不辨也人固
有卓然自立不同於俗而得毀者亦有諂媚狎昵同乎汚俗而
得譽者夫毀者未必真不賢而譽之者未必真賢也第所遇有
幸不幸爾人主能知其毀者果然為賢則誣謗之言可息而人
亦不至於受抑矣知其譽者然不肖則偏陂之私可絕而人亦不
至於伴進矣問君子於小人小人未必能知君子鮮有不為所
毀問小人於小人其朋黨阿私則所譽者必多矣惟君子則處
心公正然後能得毀譽之正故取人為難而知言為尤難也○

戊申陞行人司正為正七品左右司副為從七品行人為正八品凡設官四十員咸以進士為之先是所任行人多孝廉人村上以其將命四方往往不稱使指至是始命以進士為之凡賈捧詔赦奉使外夷諭勞賞賜祭祀徵聘賢才賑濟軍務整點軍馬等事則遣之餘非奉旨諸司不得擅差而行人之任重矣○旌表嚴州府分水縣民陳光叔妻胡氏貞節○己酉命授琉球國王相亞蘭匏秩正五品時亞蘭匏以朝貢至京其國中山王察度為請於朝以亞蘭匏掌國重事乞陞授品秩給賜冠帶又乞陞授通事葉希尹等二人充千戶詔皆從其請俾其王相秩同中國王府長史稱王相如故仍賜亞蘭匏公服一襲副使僉從以下鈔有差○庚戌命天下種桑棗。上謂工部臣曰人之常情安於所忽飽即忘飢暖即忘寒不思為備一旦卒遇

凶荒則茫然無措朕深知民艱百計以勸督之俾其咸得飽暖
此年以來時歲頗豐民庶給足田里皆安若可以無憂也然預
防之計不可一日而忘爾工部其諭民間但有隙地皆令種植
桑棗或遇凶歉可為衣食之助於是工部移文天下有司督民
種植桑棗且授以種植之法又令益種綿花率蠲其稅歲終具
數以聞○癸丑降山西按察司僉事宋禮呂震為戶部主事時
禮等考滿至京不進功績文冊吏部奏之遂降用焉○甲寅命
韓王松藩王模往省秦王晉王 今上周王齊王 上以二王
年幼欲共遊觀諸王國都以敦友悌之情故有是命二王之行
從官各十一人翰林編修王府紀善各一員掌侍從講說經史
撰述文字禮部郎中一員掌祭祀所過名山大川及祀典神祇
序班二員掌贊相禮儀良醫二員掌調治藥餌典膳二員掌王

飲饌百戶二員率校尉二百人扈從二王同日啓行至宿州分
道韓王由周歷秦晉抵燕齊瀋王自齊歷燕晉抵秦周皆至秋
月而還○廣西鎮安府知府岑添保上言往者征虜前將軍
傅友德令郡民歲輸米三千石運餉雲南普安衛本府僻處溪
洞南接交趾孤立一方且無所屬州縣人民寡少舟車不通陸
行二十五日始至普安道遠而險一夫負米僅可三斗給食之
餘所存無幾往往以耕牛及他物至其地易米輸納而普安荒
遠米不易得民甚病之去年米纔輸七百石尚逋二年十二百餘
石又本府歲輸本衛米四百石尤困極艱難舊以白金一兩折
納一石今民賴依前例輸白金如准臣所言恕寬民病書奏從
之○夜天鳴○癸亥 上謂禮部臣曰先王之治天下奠倫焉
本至於胡元昧於教化九十三年之間奠倫不叙至有子納父

妾而弟妻兄妻兄據弟婦者此古今大變中國之不幸也朕膺
天命君主華夷復先王之教以叙彝倫務使各得其序既定於
律又著之大誥以明示天下比聞民間尚有頑不率教者仍蹈
蠻胡俗甚乖治體宜申禁之違者論如律○有儒士初授知縣
陞辭 上問之曰試言蒞民之道何先對曰教化為先對曰獎
勸之 上曰治民固以教化為本而身又為教化之本長一邑
則擘一邑之望民率視己以為則己身不正民將何法雖多為
獎勸彼不見信故曰以身教者從以言教者訟爾其識之○甲
子命工部藏軍器 上以四方底寧師旅弗用命工部取甲兵
裹而藏之○陝西有士人上仁政書 上覽之謂侍臣曰既言
仁政則必當愛民何故所言皆等民傷財之事自相悖戾彼山
林儒生不深究事體然亦肯言有可嘉也不必指撻瑕玦以杜

言路○乙丑歲星犯熒惑于奎宿○是月詔前軍都督府都督
僉事孫彥復姓謝彥字子起本起姓謝世為鳳陽於皇里人父母
早逝育於外家孫氏辛丑渡江歸附數從征討有功累授應天
衛指揮僉事移鎮朔州洪武二十年陞前軍都督僉事至是
上命復其姓

夏四月庚午朔享太廟○壬申福建泉州府地震○癸酉詔兵
部凡以罪請克軍者名為恩軍○戊寅罷司牧局○庚辰詔陝
西乾州立唐忠臣渾瑊祠先是乾州同知史益通上言渾瑊在
唐德宗時涇原兵變來與在奉天逆臣未此據長安引兵圍奉
天衆心洶洶晝夜攻城經月城中資糧俱盡瑊獨引兵苦戰
百計禦敵卒能保來與全城郭功載唐史章章可致令其祠廟
尚在而祀事有缺甚非報功勸忠之義宜令有司每歲春秋致

祭廷議是之故有是命○更定蕃國朝貢儀是時四夷朝貢東
有朝鮮日本南有暹羅琉球占城真臘安南爪哇西洋瑣里三
佛齊渤泥百花覽邦彭亨淡巴須文達那凡十七國其西南夷
隸四川省軍民府凡六烏蒙烏撒芒部邛部普安東川安撫司
一曰金筑宣撫司一曰酉陽宣慰司三曰貴州播州石柱招討
司三曰天全六番長河內長官司凡三十廬山慕後西堡大華
寧谷寨頂營十二營平茶程番康佐木瓜方番阿普亦簇占藏
先結簇略臣簇北定簇祁命簇阿普洞簇勒都簇班班簇者多
簇參臣簇泥溪雷奴沐川平夷蠻夷岳希達隴木頭靜州府四
德昌馬湖建昌會川州十九安順龍水寧鎮寧建安禮栢興黎
里關武安永昌隆善黎溪會理威龍昌普濟衛十曰建昌縣三
中碧舍麻龍其隸廣西者府三田州思明鎮安州二十五龍英

江龍養利上下凍思陵萬承安平太平都結思城結倫鎮遠左
茗盈南丹結安思同東蘭那地全茗利泗城奉議縣四陀陵羅
陽崇善永康隸雲南者軍民府一曰姚安府八元江麗江景東
楚雄瀾慶尋甸大理臨安宣慰使司三平緬車里八百州二姚
鄧土官三海東賓居小雲南縣二廣通習莪隸湖廣者宣慰使
司四施南思南永順保靖安撫司一忠建長官司三隸部六洞
黃奴等處軍民府一曲靖西域之部七西天泥八刺國朵甘沙
州烏思藏撒立畏兀兒撒來撒馬兒罕 上以舊儀頗煩故復
命更定之凡蕃國王來朝先遣禮部官勞于會同館明日各服
其國服如嘗賜朝服者則服朝服於奉天殿朝見行八拜禮畢
即詣文華殿朝皇太子行四拜禮見親王亦如之親王立受後
各二拜其從官隨蕃王班後行禮凡遇宴會蕃王班次居侯伯

之其藩國使臣及土官朝貢皆如常朝儀○辛巳旌表太平府
當塗縣民劉恒妻王氏朱華妻關氏趙福妻魯氏通州瞿彬妻
王氏麗水縣葉仲餘妻林氏山陰縣民姚彥良妻俞氏貞節禮
部言俞氏子體原嘗為禮部員外郎坐法死直停其旌表 上
曰豈可以子不肖而沒其母之賢其亦旌之○壬午命民間高
年老人埋其鄉之詞訟先是州郡小民多因小忿輒興獄訟越
訴于京及逮問多不實 上於是嚴越訴之禁令有司擇民間
耆民公正可任事者俾聽其鄉訴訟若戶婚田宅闕廢者則會
里胥決之事涉重者始白於官且給教民榜使守而行之○癸
未以尚寶司丞楊能為都指揮使洮州衛指揮使陳軍宋國公
馮勝子克讓為都指揮同知俱著陝西行都指揮使司事能在
軍都督文之弟也 上謂太子少保唐鐸曰帝王之於天下體

天道順人心以爲治則國家基業自然久安朕每思前代亂亡之故未有不由於違天道逆人心之所致也天之愛民故立之君以治之君能妥妥安生民則可以保茲天眷卿與朕共事者又夙夜左右資弼良多凡朕之事天子民有弗至者卿卽以爲言使知有所警苟謂己安不以爲意治亂繫焉鐸頓首曰陛下敬天恤民之心拳拳如此臣雖老悖敢不盡心○丙戌詔徵儒臣定正宋儒蔡氏書傳上觀蔡氏書傳日月五星運行與朱子詩傳不同及其他註說與番陽鄒季友所論間有未安者遂詔徵天下儒臣定正之於是太子少保唐鐸等舉翰林院編修致仕張美和國子監博士致仕錢宰助教致仕靳權教授高讓學正王子謙教諭張士諤俞友仁何原銘傅子裕周惟善訓導唐棊周寬趙信洪初萬鈞王賓謝子方吳子恭儒士解震生熊

劉獨執蕭尚仁蕭子尚王允昇張文翰張師哲宋麟並遣行人
馳傳徵之○己丑禮部言兗州府曲阜縣歲貢儒學生員考不
中式請以貢舉非其人坐知縣孔希文罪 上曰孔希文聖人
之後勿問○庚寅瓜哇國遣使貢蘇木香藥等物○丙申賜國
子監琉球生夏衣○戊戌給山西所屬軍校七萬三千餘人布
絹二十九萬六千餘匹棉花十萬九千餘斤○署北平按察司
事監祭御史陳德文奏言嫁母劉氏卒乞存喪許之德文四歲
喪其父家貧隨母嫁陳氏後年長歸宗至是其母卒時已除奔
喪之制德文獨懇請甚至 上特憐而許之○是月置寧川守
禦千戶所於吳川縣○酉陽宣撫冉興邦以襲職來朝貢方物
大明太祖聖神文武欽明啓運俊德成功統天大孝高皇帝實
錄卷之二百三十二

大明太祖高皇帝實錄卷之二百三十三

洪武二十七年五月己亥朔○庚子夜有流星大如雞子赤色
起自奎宿南行至羽林軍沒○辛丑詔免孝子郝安童軍役安
童永州府祁陽縣人父玄戍定遠以卒卒安童當補後以母老無
他兄弟供養且有姑守節老而無依亦仰給於已詣闕自陳
上憐之復其身○福建泉州府地震○壬寅前軍都督府都督
僉事馬鑑卒鑑字哲壽州人元季劉福通盛文郁兵起鑑年十
四為文郁養子冒其姓文郁卒鑑代領其家居安豐自為同僉
張士誠圍安豐上命徐達常遇春攻敗士誠兵鑑遂來降素
從征伐以功陞懷遠衛指揮僉事復姓馬二十三年陞今官至
是巡視廣東病卒年五十六上為輟朝一日恤其家甚厚○
乙巳陞春寧波府象山縣民周彥博妻王氏吉安府廬陵縣民

劉啓宗妻羅氏貞節。○戊申遼東送朝鮮國千戶李堅貢鎮撫
康保鼎通事金龍。至京師詔賜以衣服鈔錠。○己酉勅諭宋國
公馮勝曰。天道以有餘補不足。人反其道。迺以不足奉有餘體。
天道者仁人也。以不足奉有餘者非仁人也。嗚呼禍福之來皆
自人致。故智人循理而行。則家昌。愚人所行悖於理。則家亡。朕
命卿子出鎮西鄙。近以家人不從所使。來言於朕。朕察言觀色。
良由不得其所。故爾。然小人畧無怨言。誠可愛惜。朕以卿昆弟
相從於開創之初。其有功勞。且有姻親之愛。故不忍忘。而為卿
言之。自今以後。所存役者。使得從容。足衣食。俾無窘迫。自然劬
力下無怨咨。則家道昌矣。○癸丑雲南八百土官刀板冕遣其
叔父刀板直進象牙席香藥等物。賜板直等三十六人鈔四百
八十錠羅綺各十四布一百二十匹。○命左軍都督府左都督

揚文率并師鎮太倉。○甲寅安南遣其臣阮均等奉表由廣東貢方物。上諭禮部臣曰安南慕試不許朝貢已諭廣西布政司毋納其使今又從廣東來有司不先請命而擅納其使並遣人詰責之仍却其貢獻不受。○癸亥以少詹事兼翰林院修撰任亨杰為禮部尚書。○甲子以署吏部事主事崔善為吏部左侍郎給事中張廸為右侍郎。○丙寅命四川平茶洞長官楊抵綱孫正賢襲職初抵綱死其子再隆再興再德三人相繼署事皆死再興子正賢再德子玄壇保皆以幼不得襲於是抵綱第四子再勝通正賢母單氏為妾代著司事請俟玄壇保長還其職既而謀欲殺正賢及洞長楊通保等正賢等覺之潛逃至京師訴其事且言再勝與景川侯謀反。上命逮再勝鞫之再勝辭服當族誅正賢亦應緣坐。上命獨誅再勝釋正賢使襲長

官職○禁諸司文移有奉旨施行者勿書聖旨二字凡有陞賞
差調等事悉以欵字代之○是月改廣東廉州千戶所為廉州
衛欵州百戶所為千戶所○給陝西蘭州等衛軍士十萬四千
三百餘人布絹四十三萬九千二百餘匹綿花十五萬六千四
百餘斤

六月己巳朔○庚午丹徒縣民賈良有仇家告其子自斷其指
良乃訴於朝言臣嘗得疾臣子臥冰為禱又絕食三日而禱皆
不愈既而刳股及以指然灰服之遂愈非無故而傷肢體者命
法司驗之得實遂釋之○辛未夜熒惑犯天街○癸酉上燕
閒與侍臣論古上曰昔楚莊王謀事而當羣臣莫能達朝而
有憂色魏武侯謀事而當羣臣莫能達朝而有喜色夫一喜一
憂得失判焉以此見武侯之不如楚莊也夫喜者矜其所長憂

者憂其不足矜其所長則志滿志滿則驕驕則淫佚敗日至矣
憂其不足者則志下志下必能虛心以受人則人孰不樂告以
善道故莊王卒伯諸侯以興楚國武侯侵暴鄰國而魏業日衰
以此觀之人君當選志以納善人臣當直道以事君君臣之間
各盡其道則天下之事無不濟矣○給武昌三護衛及長沙衡
州寶慶茶陵永州五衛軍士鈔四萬三千八百餘錠初全州灌
陽等縣猶蠻作亂各衛軍士嘗從征討至是各賜鈔錠有差○
丁丑兗州府滋陽縣丞劉奉言河水泛溢浸沒民田三百六十
餘頃詔戶部遣官覈實免其賦稅○戊寅命遼東定遼等二十
一衛軍士自明年俱令屯田自食以紓海運之勞○己卯鄉雲
見○雲南曲靖軍人嚴政以親老乞於鄉衛編伍以便養從之
○壬午詔河東鹽止運至淮安仍添置河東鹽運司運判一人

於淮安主之。○甲申置建昌前衛。先是西平侯沐春奏層臺衛地多山林少平衍難於耕稼軍餉不給。至是命置衛於建昌。徙層臺衛官軍實之。○置緬中宣慰使司。時緬中米貢。上勅吏部置宣慰司以其土官之長普刺浪為宣慰使。賜其使二十人鈔三百一十五錠羅綺各十四匹布四十八匹。○乙酉命兵部遣官至北平布政使司議置驛。傳自大寧至廣寧東路四百八十五里置十驛。中路北平至開平七百六十五里置十四驛。西路至開平六百三十里置十三驛。土木至宣府一百里置二驛。○癸巳夜有流星大如鷄子青白色起自奎宿西南行至壘壁陣沒。○甲午詔互徙浙江福建沿海土軍初閩浙濱海之民多為倭寇所害以指揮方謙言於沿海築城置衛籍民丁多者為軍以禦之而土人為軍反為鄉里之害至是有言於朝者乃詔

互徒之既而以道遠勞苦止於各都司沿海衛所相近者令互
居之○全州及灌陽等縣平川諸原搖民聚衆爲亂命湖廣廣
西二都司發兵討之擒殺千四百餘人諸搖遂奔竄遁去○是
月命兵部遣官給賜遼東軍士冬布三十四萬四千餘疋

殊七月戊戌朔享太廟○更定親王婚禮凡親王納妃預擇親

迎日期別擇日行定親納徵發冊催粧等禮其禮物仍依節咨

名數同日給送發納徵冊催粧儀前期一日內官監禮部儀禮

司設冠服首飾金銀段疋等儀物于文樓下設玉帛案冊案并

節于奉天殿內至日早禮部設綵輿教坊司設樂于午門外內

官設王妃鳳輦儀仗于綵輿之南官皇帝具皮弁服陞殿百侍

班正副使先行四拜禮執事官舉節及玉帛案冊案至丹墀置

案于中道持節俟立傳副官宣制曰今聘某官某女爲某王妃

命卿等行納徵發冊等禮正副使又四拜禮畢執事官以節授
正使引禮引節并玉帛案冊案冠服等物至午門外置冊及玉
帛綵輿冠服等物以次陳列而行妃家受聘禮前期一日妃家
設香案節案于正堂中玉帛案冊案左右相向至白禮物至家
主婦者出迎引禮引正使持節副使捧冊執事者捧玉帛至正
堂各置于案正副使立于案左右冠帶等物以次陳列禮官一
員立于左主婦者立于右禮官曰奉命正使某官某副使某官
某為某王行納徵發冊等禮引禮引主婦者詣香案前行四拜
禮執事官捧玉圭玄纁主婦者先受玉圭次受玄纁各受執事
再行四拜禮畢內官先以冠服進于妃具服訖內官詣冊案跪
捧冊入中堂置于案引禮女官引妃出至冊案前行四拜禮跪
女官宣冊訖妃受冊以授執事者再四拜禮畢執事者設妃座

引禮請妃陞座妃家應賀者行四拜禮正副使候內官出告行
禮畢持節出主婚者送至門外正副使回朝復命妃家回奉禮
物從午門入內官監官奏聞 醮戒儀其日 皇帝具皮弁服
執膳內官備金爵酒果王具冕^袞行四拜禮執事斟酒立授王
王跪飲聽戒命訖再行四拜禮復詣 皇后前禮同 親迎儀
前一日妃家令親人鋪房至日王親迎儀衛司先設王儀仗教
坊司設樂于長安門外妃家先設王幕次于中門之外香案帛
案于中堂是日王受戒命訖具皮弁服陞輦至妃家幕次禮官
先入正廳立于東主婚者立于西禮官曰某王奉制行親迎禮
主婚者詣幕次迎王王前行主婚者後隨至中堂內官捧禮物
入中堂主婚者立于左妃母立于右女執事二人引妃出立于
妃母之下內官以帛進王王受帛置于案王立于案左贊禮引

主婚者詣帛案前行八拜禮畢引禮內官引王先出中門外詣妃轎所揭簾妃陞轎王陞輦前行妃具儀從後行王至長安門外降輦候妃至揭簾妃降轎王先行至內釋皮弁服具袞冕與妃詣奉先殿行禮 廟見儀是日內官先于奉先殿陳設牲醴祝帛訖引禮引王與妃詣四廟 帝后神御前行四拜禮獻帛獻爵讀祝訖又行四拜禮畢還宮 合盞禮其日內官先於王宮設王座妃座東西相向各設拜位于座之南王具皮弁服妃服鞠衣行拜禮王再拜妃伏拜執事者設酒案于正中饌案于左右置兩爵兩盞于酒案王與妃陞座執事者舉饌案進于王及妃之前女官以爵進酒王與妃飲訖進饌饌訖再進酒饌如前儀又以盞盞斟酒進皆飲訖進饌皆饌訖徹案王從者餞妃之饌妃從者餞王之饌 朝見儀次日早王具冕服妃服霞帔

稽子 皇帝服皮弁服引禮引王與妃詣御前宮人以棗栗盤
立于王妃之右王與妃各行四拜禮執事二人舉案妃隨進至
前王與妃又行四拜禮復詣 皇后前獻殿修如前儀禮畢賜
王與妃宴 回門儀其日內官先以禮物至妃家王與妃導從
如常儀王先至妃家妃父出迎至正廳王於妃父母前行四拜
禮妃父母立受二拜答兩拜王至中堂坐其餘親屬見王行四
拜禮妃至入中堂於父母前行四拜禮其餘親屬於妃前行家
人禮更定公主郡主封號婚禮及駙馬儀賓品秩皇姑曰大長
公主皇姊妹曰長公主皇女曰公主親王女曰郡主郡主女曰
縣主郡主孫女曰郡君郡王曾孫女曰縣君郡王玄孫女曰鄉
君靖江王府比正枝郡王連戚一等女稱郡君自公主以上俱
授冊郡主以下俱授誥命公主夫曰駙馬都尉祿秩依前比從

一品自郡主夫至鄉君夫皆稱宗人府儀賓其祿秩各遞減一
等散官照品級授公主及駙馬都尉歲^一祿米二千石郡主及
儀賓八百石縣主及儀賓六百石郡君及儀賓四百石縣君及
儀賓三百石鄉君及儀賓二百石凡公主郡主下嫁既以選定
日期預先或一月或兩月或三四月前選日入府第將^及納^及婿預
先選日安牀及蓮裝奩金銀段匹等物入府先嫁期二日公主
受冊郡主郡君駙馬儀賓受誥上具袞冕告廟發冊用綵亭
早至午門外用紅仗二對女樂行^迎至本府月臺上設冊案香案
列儀仗公主具服內命婦二員升禮內官傳制贊四拜贊跪受
冊又贊四拜禮畢徹冊案香案次日公主謝恩駙馬儀賓受誥
完成禮二日執事官陳設^誥案并冠服于丹墀駙馬儀賓行禮
四拜受誥又四拜禮^畢用鼓樂迎告于家所司各備儀仗鞍馬回

日給賜次日駙馬儀賓具服謝恩至日用鼓樂送駙馬儀賓入
府成禮俟十日出府謝恩○庚子賜國子生袁斌等六百餘人
有家室者米人三石鈔五錠○辛丑辰星犯鬼宿○癸卯鳳陽
定遠等縣以編賦役黃冊內有欽免土民及太僕寺長淮等監
養馬戶雜役難同役戶編排申請定度戶部以聞詔土民優免
有例養馬者亦不令重役○夜有流星大如雞子赤色起自蒼
古東南行至畢宿沒○乙巳賜應天府溧陽縣銀墜東壩關河
石匠四千九百餘人鈔萬四千七百餘錠○己酉陞大理寺左
評事汪善為左寺丞善安慶潛山人洪武二十年由國子生擢
左評事二十六年署本寺事以年勞陞令官○夜太陰入南斗○
庚戌以褚富為宗人府儀賓尚皇從曾孫女興安郡君○壬子
夜有流星大如杯青白色起自河鼓西行至雲中沒○癸丑皇

第四十二孫濟煬生晉王第七子也。○甲寅旌表孝子李德成及節婦高氏德成易州涞水縣人其母早亡德成念劬勞之恩乃搏土肖象日奠飲食奉之如生一夕夢母墮寒冰間挽之不能得既寤與妻王氏徒跣行三百里至昌平墓所臥冰七日時天大雪冰為融釋鄉里稱之會朝廷徵孝廉有司以德成應詔擢光祿司署丞遣太常寺贊禮郎尋陞尚寶司丞至是復旌其門曰孝行之門高氏種州府長洲縣民張德妻也年二十五而夫亡姑何氏憐其少欲嫁之高氏自陳願攻紡績奉姑訓子誓不易志事聞詔表其門為貞節之門。○乙卯先是西寧炒團等簇土蕃亦令真班等言於都督宋晟願率蕃民男女八百餘人內附至晟晟還朝以聞上曰蠻夷嚮化其心固善懷柔之道要不失其本性耳命仍於本族居之。○甲子以謝達為駙馬都

尉尚皇第十五女汝陽公主遠都督僉事彥之子也○置洛陽中護衛指揮使司于南陽汝州

大明太祖聖神文武欽明啓運俊德成功統天大孝高皇帝實錄卷之二百三十三

大明太祖高皇帝實錄卷之二百三十四卷

洪武二十七年八月戊辰朔福建泉州府地震○辛未詔免河南府祥符陽武封丘三縣水災田租時三縣之田連三歲為河水暴決浸沒有司不以言上聞之即遣官覈實免其租且切責三縣官吏坐視民災之罪○壬申以湖廣全州及灌陽縣隸廣西布政使司○癸酉詔有司免輸明年桑稭先是以造鈔歲買浙江河南北平山東及直隸鳳陽諸府桑稭為鈔料民間不免伐桑以供科索至是上以其不免便於民恐妨蠶作故免之○甲戌命安陸侯吳傑永定侯張銓等率致仕武官往廣東訓練沿海衛所官軍以備倭寇○置廣東青蓋守禦千戶所○乙亥遣國子監生及人材分詣天下郡縣督吏民修治水利上諭之曰耕稼衣食之原民生之所資而時有旱澇故不可已無備

成周之時井田之制行有溝防溝之道法雖遇旱滂民不為病
秦廢井田溝洫之制盡壞謀者遂因川澤之勢引水以溉田而
水利之說興焉朕嘗令天下脩治水利有司不以特奉行至令
民受其惠今遣爾等往各郡縣集吏民乘農隙相度其宜凡陂
塘湖堰可蓄蓄以備旱熯宣洩以防霖潦者皆宜因其地勢修
治之毋妄興工役培剋吾民衆皆頓首受命給道里費而行○
丁丑遣官釋奠於先師孔子○戊寅祭大社大稷○癸未以尹
清為駙馬都尉尚第十四皇女舍山公主○乙酉遣官祀歷代
帝王○給神策等衛軍士二十一萬七千餘人布絹六十一萬
八千餘疋○丙戌祭太歲風雲雷雨嶽鎮海濱山川月將城隍
諸神○遣官祭旗纛○陝西階文千戶張者等叛命右軍都督
府左都督竇正為平羗將軍會都督僉事徐凱率陝西成都衛

兵討之初秦州衛令者親率本所軍往兩當聽調者不聽命衛
遣人逮之者遂與千戶趙原吉等率所部八百餘人伐木遮道
據守文縣及打江牛頭關等處道梗不通事聞遂命正等率兵
一萬八千餘人往討之○詔禁用銅錢時兩浙之民重錢輕鈔
多行折使至有以錢百六十文折鈔一貫者福建兩廣江西諸
處大率皆然由是物價湧貴而鈔法益壞不行上廸諭戶部
尚書郁新曰國家造鈔令與銅錢相兼行使本以便民比年以
來民心刁詐乃以錢鈔任意虧折行使致令鈔法不行甚失立
法便民之意宜令有司悉收其錢歸官依數換鈔不許更用銅
錢行使限半月內凡軍民商賈所有銅錢悉送赴官敢有私自
行使及埋藏棄毀者罪之○戊子夜天鳴○庚寅新建京都酒
樓成先是上以四海^內太平思欲與民偕樂乃命工部作十樓

於江東諸門之外令民設酒肆其間以接四方賓旅其樓有鶴
鳴醉仙謳歌鼓腹未賓重譯等名既而增作五樓至是皆成詔
賜文武百官鈔命宴於醉仙樓○癸巳夜太陰犯軒轅熒惑犯
積薪○丙申禮部主事蓋霖以事繫獄其父伏闕言霖以菲才
受任觸犯國法罪當大辟雖死莫贖但臣年老父子之情有所
不忍願以次男從軍以贖其死 上憫其言特宥之○是月以
大理寺左寺丞馬文或為刑部郎中

九月戊戌朔浙江布政使司右布政使楊允左叅政羅鍾右叅
政李文華湖州府知府王禎俱以事被逮 上以其罪非貪墨
俱宥之復其官歸安縣丞高彬亦連坐著民詣闕言彬在任公
廉未嘗以事擾民民得安業今坐死繫獄乞加寬宥 上以其
得民心即詔釋之○乙巳夜熒惑犯鬼宿○青州府日照縣民

江伯兒以母病割脇肉食之不愈乃禱於岱嶽祠誓云母病愈則殺子以祀神竟而女病愈竟殺其三歲子以祭有司以聞上怒曰父子天倫至重禮父為長子三年服令百姓無知賊殺其子絕滅倫理宜亟捕治之勿使傷壞風化遂逮伯兒杖一百謫戍海南因命禮部定議旌表孝行事例行於天下禮部議曰人子之事其親居則致其敬養則致其樂有疾則托之良醫杖以善藥至於呼天告神斯又懇切之至此為人子所當為也卧水割股前古無聞雖後世亦是間見至若割肝殘害尤甚且如父母止有一子割肝割股或至喪生卧水或致凍死使父母無依宗祀永絕反為不孝之大者原其所自皆愚昧之徒務為詭異以驚世駭俗希求旌表規避徭役割股不已至於割肝割肝不已至於殺子違道傷生莫此為甚自今人子遇父母有疾醫治

弗愈無所控訴不得已而割股卧水亦聽其所為不在旌表之例詔從之○丙午撒馬兒罕駙馬帖木兒遣首長迭力必失等奉表來朝貢馬三百匹表曰恭惟大明大皇帝受天明命統一四海仁德私布恩養庶類萬國欣仰咸知上天欲平治天下特命皇帝出膺運數為億兆之主光明廣大昭若天鏡無有遠近咸照臨之臣帖木兒僻在萬里之外恭聞聖德寬大超越萬古自古所無之福皇帝皆有之所未服之國皆服之遠方絕域昏暗之地皆清明之老者無不安樂少者無不長遂善者無不蒙恩惡者無不知懼今又特蒙施恩遠國凡高賈之人來中國者使觀覽都邑城池富貴雄壯如出昏暗之中忽觀天日何幸如之又承勅書恩撫勞問使站斥相通道路無壅遠國之人咸得其濟欽仰聖心如照世之杯使臣心豁然光明臣

國中却後閭茲德音惟知歡舞感戴臣無以報恩德惟仰天祝
頌 聖壽福祿如天地遠大永永無極照世杯者其國舊傳有
杯光明洞徹照之可知世事故云○丁未置四川行都指揮使
司於建昌府以建昌軍民指揮使司及建昌前衛寧蕃越雋會
川鹽井六衛隸之○賜國子監雲南四川官生冬衣○戊申以
、天壽聖節賜在京文武官并國子監生吏民軍匠人等鈔有
姜○己酉温州府樂清縣民為錦衣衛卒誣告逮至京事白衛
卒伏誅賜民鈔八十錠遣還免其今年田租○庚戌山東曲阜
縣知縣孔希文坐湏知不完罷為民○辛亥免四川永寧宣撫
司積年無徵稅糧一千三百三十餘石○癸丑夜太陰犯昴宿
○定正蔡氏書傳成初召國子監博士致仕錢宰等至 上語
以正定書傳之意且曰爾等知天象乎皆對以不知 上曰朕

每觀天象自洪武初有黑氣凝於奎壁間奎壁乃文章之府朕甚憂焉今年春暮其間黑氣始消文運當興爾等宜考古正今有所述作以稱朕意於是命翰林院學士劉三吾等總其事開筭翰林院正定是書時禮遇諸儒甚厚各賜以綺繒衣被等物又御製命次韻和之朝參則班於侍衛之前宴享則賜坐殿中時酒樓成人賜鈔宴其上各獻詩謝上大悅復遣禮部尚書任享泰諭旨諸儒有手毫思歸者先遣之衆皆願留至是書成凡蔡氏集傳得者存之失者正之又集諸家之說足其未備三吾等率諸儒上進賜名曰書傳會選命禮部刊行天下賜諸儒宴及鈔俾馳驛而還乙卯夫壽聖節上御奉天殿受朝賀大宴羣臣於奉天殿○朝鮮國李旦遣其子某及門下評理趙琳等奉表貢方物賀天壽聖節詔諭其子某自今朝貢進

進賀免進表某奏云小邦以小事大之禮必因進表得達微誠
況正旦 聖節華夷會同莫不奉表進賀難比其餘不敢不進
○丙辰湖廣辰州衛奏本衛地方上抵沅州下接常德請置五
驛如沅州例每一驛置一堡每堡置卒二百人戍守且令走遞
從之○丁巳雲南烏撒軍民府知府卜穆奏言霑益州屢侵奪
其地詔令西平侯沐春理斷之○戊午浙江定海衛奏所屬廓
柵等千戶所皆瀕海地方陸路一百二十里水路則風濤險遠
遇警急卒難應援請於穿山築城置千戶所分調官軍守禦從
之○己未夜太陰與熒惑會於柳○庚申修寰宇通衢書成時
上以與地之廣不可無書以紀之乃命翰林儒臣及廷臣以天
下道里之數編類為書其方隅之目有八東距遼東都司陸行
為里三千九百四十四馬驛六十四水陸無行為里三千四十

五驛四十又自遼東東北至三萬衛馬驛四為里三百六十西
極四川松潘陸行為里五千五百六十馬驛九十二水陸兼行
為里八千三十驛一百有四又西南距雲南金齒陸行為里六
千四百四十四驛馬一百水陸兼行為里八千三百七十五驛
一百一十三南踰廣東崖州水陸兼行為里六千六百五十五
驛七十有八又東南至福建漳州府水陸兼行為里三千五百
二十五驛五十四北暨北平大寧衛為里三千六百一十四馬
驛五十三水陸兼行四千二百四十五驛六十一又西北至陝
西甘肅為里五千五十馬驛八十一水陸兼行為里六千七百
二十驛九十六布政司十三浙江福建江西廣東之道各一浙
江水驛十三為里九百四十八福建水馬驛四十一為里二千
八百四十五江西水驛十五為里一千五百二十廣東水馬驛

四十五為里四千三百九十河南陝西山東山西北平湖廣廣
西雲南之道各二河南水驛三十一為里二千八百四十五馬
驛二十二為里千一百七十五陝西水馬驛五十一為里四千
一百馬驛四十二為里二千四百三十山東水馬驛二十九為
里千九百一十五馬驛二十六為里千四百八十四山西水馬
驛五十為里四千三十馬驛四十一為里二千三百八十北平
水馬驛四十七為里三千四百四十五馬驛三十九為里二千
三百六十四湖廣水驛十八為里一千七百三十馬驛二十六
為里一千五百三十五廣西水驛五十三為里四千四百六十
水馬驛六十四為里四千二百六十五雲南水馬驛九十六為
里七千二百馬驛八十三為里五千二百七十五四川之道三
水驛九十四為里七千二百六十五馬驛八十二為里四千七

百九十五水馬驛七十為里五千九百時天下道里縱一萬九
百里橫一萬一千七百五十里此其大畧也四夷之驛不與焉
○甲子置廣海衛于廣州新會縣置惠州平海海豐三守禦千
戶所○丙寅命遼王府校尉軍士屯田自食與定遼等衛屯卒
俱俟十年後始收其租○詔自今諸王婚禮使者所持之節置
于冊案使者受命行禮畢執事者舉冊案由王道正副使由臣
道出至于門外以節置絛輿舁至妃家門外正使乃持節行禮
禮畢乃置絛輿舁回復命○是月濟淮安山陽縣支家河水南
入淮北通安東海州○遣中使諭陝西都指揮使司訓練將士
北自延安綏德西自蘭州從魏國公徐輝祖等節制候來春征
討西蕃○廣西田州府上隆州知州岑永通遣其弟永玉等貢
馬十二匹○陞都察院左副都御史曹銘為右都御史銘肇昌

之會寧人洪武十九年以進士授兵科給事中累遷左副都御
史至是陞今官

大明太祖聖神文武欽明啓運俊德成功統天大孝高皇帝實
錄卷之二百三十四

天明太祖高皇帝實錄卷之二百三十五

洪武二十七年冬十月丁卯朔享太廟○戊辰初命鑄尚書儀尚服尚食尚寢尚功印○己巳夜有流星大如雞子青白色起自天市東垣西北行至近濁沒○遼東有倭夷寇金州卒入新市燒屯營糧餉殺掠軍士而去詔以沿海衛所將校不加倍禦命都督府符下切責之○辛未賜國子監琉球生冬衣○壬申賜故指揮劉福家鈔百錠文綺十匹以福嘗征雲南浹于行陣故也○丁丑陞四川都指揮使司都指揮僉事潘永為都指揮同知掌四川行都指揮使司事○己卯賜新除知府夏文舉等五十人帽帶襲衣○冊武定侯郭英女為遼王植妃兵馬指揮張泰女為寧王權妃○庚辰命各處都指揮使司自今凡武官到任即驗劄付給祿遣人覆奏還乃視事著為令○命自今

府州縣學生員凡食廩十年考其學無成效者罰為吏○李己翰林院啓事府成詔皆賜宴落成之○陞大理寺右評寺王雋為工部左侍郎署部事給事中冀凱為右侍郎時雋以言事不實法司請致其罪上曰雋年少有才畧在官四年無過姑宥之遂陞今官○壬午府軍左衛指揮僉事凌雲言武官子弟除嫡長襲父職總軍伍餘自十五歲以下令入郡縣學講讀經史及御製武臣鑑戒諸書使其通曉禮法習知今古俟有成立授以牧民之職從之○乙酉賜提督屯田致仕官變七千五百餘石○丙戌戶部尚書郁新奏蘇州府太倉常年海運糧儲有司自止月以來即拘集民船以備盤運及至三月中方已甚妨民業今後請自三月初方許集船盤運其正二月間不許從之○丁亥以監生師遠為監察御史初遠與御史馮彬往江西刷卷

理獄囚為彬所劾罰都察院書寫父歿奔喪至是與其母妻子同至京自言家貧親老願需一命就祿以養上聞之遂以為監察御史○己丑罷建岷王宮殿上諭工部臣曰邊境土木之工必度時量力順民情而後為之時可為而財力不足不為也財有餘而民不欲不為也必有其時有其財而民樂於趨事然後為之則事易集今雲南土曠民稀軍餉轉輸民力甚勞若復加以興造之役非惟力未可於民情亦有所不欲岷府姑為棕亭以居俟十五年後民富力紓作之未晚爾工部遣人馳驛往輸雲南守臣罷其役○庚寅初天下衛所屯田將士以時耕作毋怠其事每歲秋後遣人上教京師○辛卯夜有流星二俱大如雞子一青白色起自天街西北行至卷台沒一赤色起自天鉤西北行至天津沒○癸巳上命有司凡軍士居沒官房

屋者免征其賃錢。○乙未，旌表瀘州民李克中妻劉氏貞節。○丙申，福州府地震。○以府軍衛指揮僉事張豫為陝西行都指揮使，司都指揮僉事。○置神電衛指揮使司于高州，電白縣以寧川雙魚二千戶所隸之。○城寧川千戶所及置樂民海康海安錦囊四千戶所于雷州之地。

十一月丁酉朔。○戊戌，朝鮮國遣知門下府事李茂奉表貢馬十四匹。○庚子，夜辰星犯鍵閉。○甲辰，陞沐陽縣知縣周質為山東布政使司叅政，衡山縣主簿紀惟正為陝西布政使司叅議，賜以鈔鈔衣服靴帽等物，質惟正皆剛直有為，廉潔自守，為同僚所忌，因事誣陷之，逮至刑部，得辦理其事以聞。上嘉賞之，故有是命。○福建興化府地震。○貴州宣慰使司宣慰使安的貢馬二十六匹，以免其積歲逋租故也。○乙巳，以署陝西行

都司指揮使司都指揮同知馮克讓為指揮使綏德衛指揮僉
馬溥為陝西行都指揮使司都指揮同知○改甘州左衛為肅
州衛指揮使司置甘州中衛指揮使司○戊申皇第四十三
孫尚炆生秦王第六子也○己酉陞潞州知州劉士源為陝西
布政使司左參政參士源在官以廉幹聞偶以事被逮上特釋
之陞今官仍賜鈔五十錠文綺衣一襲及皮裘狐帽靴鞮○庚
戌夜太陰犯司恆○辛亥雲南易門守禦千戶段弘毅死其弟
長請襲職兵部以長比試不習武藝難之上以其土人宜免
比試令襲職○丙辰冬至上御奉天殿受朝賀大宴羣臣○
丁巳夜有流星二俱大如雞子一青白色起自輦道西南行至
左旗沒一赤色起自騰蛇東北行至紫微東蕃沒○戊午以吳
倫為宗人府儀賓尚皇孫女蒲城郡主郡主秦王長女倫安陸

侯傑之弟也。○癸亥鳳陽府泗州盱眙縣耆民劉本等詣闕言
知縣方素易在職三年民受其惠今以母喪當去官乞留復任
從之復遣使齎勅勞素易曰古者賢知身仕於當時而名流於
後世者必其持心操節始終一致而不為聲色貨利所移奪故
能廉以守身仁以利民民懷其惠而神降之福卒致上顯父母
下榮妻子身名俱全永永不磨爾盱眙知縣方素易蒞政三載
惠愛在民俱稱廉能今以內艱去官民弗忍舍詣闕懇留再任
非能盡牧民之職者曷以致此嗚呼若素易者豈不追蹤古之
賢知者耶故特遣使齎鈔二百錠衣被各一襲靴鞵二對用旌
爾能爾其慎終如始以福吾民爾惟懋哉素易受賜詣闕謝恩
復命賜宴于禮部陞辭請歸葬母而後復任詔許之素易饒之
樂乎人初以明經薦任淮安府學訓導後復以才薦授令官○

○甲子以馬隆衛指揮僉事李茂為中軍都督府都督僉事先
是茂已致仕遣赴大同置衛也戊而茂盡心所事故有是命○
乙丑以魯瑄為宗人府儀賓尚皇從曾孫女永福郡君○越州
上酋阿資復叛西平侯沐春都督何福等率兵討之營于越州
城北督指揮李得徐毅分道四面攻之又別遣指揮何琪俞輔
領壯伏於岐路以兵挑戰於是蠻寇悉衆以出伏兵四起縱擊
大敗之殺獲甚衆惟阿資脫身遁去○置南山守禦千戶所○
給賜足遠廣寧等衛軍士六萬八千八百餘人綿布三十三萬
四千八百餘疋綿花一十萬二千一百餘斤○顏國公傳友德
卒

^為十二月丙寅朔置寧夏郡收千戶所○丁卯冊指揮孫繼達女
慶王梅妃○賜公侯及五府都督等官宴于右順門○己巳洛

陽民進瑞粟一莖二穗。○賜致仕指揮姚德等四十餘人麥三千餘石以其督視山東屯田有成故賜之。○辛未廣西鬱林州民李友松上言本州北流南流二江其間相去二十餘里乞鑿河通舟楫以便行旅仍乞蠲其所侵田稅及設石陡諸牌詔從之。○癸酉給賜揚州高郵二衛捕寇有功持鈔有差。上諭兵部臣曰自古君天下者立兵衛任將帥申明號令以嚴守禦况皇城四門尤為至重近者將佐怠於約束軍士入直致有析離隊伍禍化人待直者亦有約束過嚴使軍士勞苦不得顧其父母妻子者此皆御下之道安望其守衛嚴肅哉今朕自定其法令諸將仕遵守凡守衛皇城四門自指揮至軍士各依其伍全隊上直不得使人代替如一所數缺則以別所全隊易之勿以不足之伍分豁補數違者處重刑本隊軍士有告言者賞不依原伍

因而縱令在衛自指揮以下各杖一百指揮降千戶其餘逸降
俱調邊竟受賄者治重罪其軍士當直如有死喪疾病嫁娶生
產等事有妨者皆准所告父母病無丁男者許侍疾不限月日
妻病無男女者亦如之親戚吉凶慶吊不出百里外者亦許給
假留難及不實者皆治罪若本身暴疾不准所告致病甚者本
管治以罪其力弱子姪顧代者聽凡上直各守本門不許從別
門往來違者許執獲雖國戚亦聞奏區處執獲者賞容縱者處
重刑若有關請孕婦不許入內違者皆坐以罪○甲戌定議皇
城門禁法凡朝參午門先放直日都督將軍及應直帶刀指揮
千百戶鎮撫散騎舍人然後文武百官以次而入不許擺越其
上直官軍俱三日一易於朝退辰時交代嚴加守衛凡內官內
使小火者出門須叱對銅符若本無銅符及有不叱對輒放行

者守門官軍治重罪仍密加搜檢有公差帶金銀段匹出者憑
勘合照驗亦須明白附寫往某處公幹及記所服衣服顏色數
件致回日點對有不同者即時聞奏其工匠人等出入各門依例
搜檢有誤帶鈔物在身者許附寄各門如出門夾帶鈔物者許
執奏凡官民軍人有事入奏不許過阻及問其事情違者官軍
皆坐罪○乙亥置廣東碣石衛及甲子門千戶所○定遠侯王
弼卒○朵甘都指揮搠幹爾監藏等遣其姪班丹藏卜等來朝
貢馬○夜有流星青白色起自四輔北行至紫微東蕃沒○戊
寅築台州海門北岸城○冊指揮孫繼達女為肅王模妃○戊
子賜貴州都指揮使司所屬土官寨長把事舍人八十一人鈔
一千八百六十錠○辛卯以耿璿為宗人府儀賓尚皇孫女江
都郡主郡主懿文皇太子掌女璿長興侯炳文子也○復漢中

府用知恭庸職時庸以事下刑部獄其僚屬與同獄者咸言其在官廉介尚書楊靖以聞上特宥之復其官凡為庸言者亦減罪一等○癸巳貴州貳江新藍等處蠻民作亂四川都指揮使司都指揮使程暹率兵討平之○城富川縣徙梧州守禦千戶所于城中時富川典史徐魯以縣治去所甚遠遇徭蠻竊發卒難備禦請徙于城中故有是命○賈哈刺寇益井指揮僉事陳進死之進全椒人由蘇州衛千戶陞益井衛指揮僉事賈哈刺入寇進率衆奮擊所殺甚衆被創而死○兵部奏是歲雅州碉門及秦河二州茶馬司市馬得二百四十餘匹○雲南臨安府知府致仕世家寶卒世家寶蒙古人安貌豐整善言論涉獵書史元末以集賢院學士守膠東登萊等郡洪武元年大將軍徐達下山東叅政傅友德兵至萊陽世家寶以所守城降授大

理寺少卿尋改禮部侍郎二年陞刑部尚書未幾以事貶知廬
陵縣召還授兵馬指揮司副指揮改兩浙運鹽使司同知十五
年知臨安府秩滿賜致仕還家後復召至京遣賑濟廣東興寧
長樂二縣至是卒○陞袁州府宜春縣知縣沈昌為南安府知
府青州府昌樂縣知縣于子仁為登州府知府宿州靈璧縣知
縣周榮為河南府知府寶慶府新化縣丞葉宗為黃州府知府
初昌等與膠州即墨縣知縣孔克庸等十餘人俱以廉能稱先
後坐事逮至京其民皆列其善政以聞 上嘉之故有是命克
庸等皆循例陞擢榮後以言事稱旨陞河南布政使司左布政
使○夜有流星大如雞卵青白色起自奎宿西北行至游氣中
沒○乙未享太廟○是歲改建通政使司及錦衣旗手二衛于
中軍都督府之後建儀禮司于長安街之東○建行人司于西

華門外

大明太祖聖神文武欽明啓運俊德成功統天大孝高皇帝實
錄卷之二百三十五

大明太祖高皇帝卷之二百三十五終

太祖高皇帝實錄卷之二百三十六
洪武三十八年春正月丙申朔 上御奉天殿受朝賀大宴群
臣是日朝鮮國李旦琉球國山北王珉貴州宣慰使安的并金
筑等處土官各進方物馬匹○丁酉置四川鹽井衛軍民指揮
使司儒醫陰陽學官時本衛新置以儒醫陰陽學并倉庫驛傳
未設官為請吏部議倉庫官以鎮撫兼之驛官以百戶領調卒
當傳者兼之儒學等官宜許其請從之○辰星犯壘壁陣○己
亥享大廟○命駙馬都尉梅殷等閣中都留守司屬衛軍士并
籍其戶丁名數未獻○庚子陝西行都指揮使司指揮僉事張
豫言治所北濱邊塞鮮有儒者歲時表箋之人撰書武臣子弟
多不識字無從學問乞如遼東建學立師本司衛所官俸舊皆
給鈔由是各占田耕種多役軍士乞給祿米十之三庶免役軍

之弊甘州等衛隸兵者多謫戍之人例不給賞然邊地苦寒不產木綿乞給衣布以為禦寒之具連年軍士通負種糧積二千八百二十八石貧不能償者乞免其徵從之于是置陝西行都指揮使司儒學設官如府學之制○辛丑以湖廣布政使司左叅議鄭賜為北平布政使司右叅議時賜以親長朕閱故調用之○陞西安府知府閻彥清為陝西布政使司左叅議延安府葭州史目凌守誠為衢州府知府華昌府徽州史目林宗德為九江府知府西安府涇陽縣知縣牛成為建寧府知府時彥清等居官皆以廉能稱故陞擢之○命廣東都指揮同知花茂討捕海寇時廣東都指揮使司言潮州吉頭澳有賊船九艘泊岸約五百餘人劫掠南柵等村上以廣東瀕海州縣常被寇害由守禦官軍巡邏不嚴所致于是詔都司以兵操海舟五十艘

往來巡捕令茂總之○丙午平羗將軍右軍都督審正討平階
天叛寇張者等復命正以兵從秦樸征洮州等處○丁未大祀
天地于南郊○旌表南昌府南昌縣民李秉良妻葉氏貞節○
庚戌命戶部以耕牛一萬頭給東昌府屯田貧民先是命遣登
萊之民屯東昌^田至是又慮小民貧窶無資市牛故有是命○福
建興化衛軍魏保妻黃氏一產三男事聞循例給賜米鈔○太
陰犯御女星○辛亥遣使勅周王橐駝河南都指揮使司屬衛
馬步官軍三萬四千餘人往塞北築城屯田○壬子置皇城長
安東安西安北安四門倉儲糧以給守禦軍士倉設副使一員
○癸丑填星守氐宿○甲寅遣使敕晉王橐駝山西都指揮使
司屬衛馬步官軍二萬六千六百人往塞北築城屯田○丙辰
冊兵馬指揮周鐸女為谷王穗妃○戊午置濟川江淮二衛指

揮使司陪各處馬船遞江上往來軍民。己未，冊都督袁洪女
為岷王妃。○庚申，以羽林左衛指揮使湯弼為河南都指揮
使，驍騎右衛指揮僉事蕭中為都指揮同知，府軍後衛指揮僉
事俞渠、金吾前衛指揮僉事李順並為四川都指揮同知。○甲
子初，令上發北平二都指揮使司并遼東都指揮使司屬衛
精銳騎兵七千步兵一萬，命都指揮使周興為總兵，高右軍都
督僉事宋晟、劉真往三萬衛等處剿捕野人，其屬衛指揮莊德
景保、安張玉、盧震等悉令從征。○給賜山西北平遼東屬衛軍
士綿布人五匹，綿花人二斤。○酉平侯沐春中軍都督僉事何
福等討越州阿資平之初，阿資適去，時曲靖土軍千戶阿保、張
麟所守之地與越州相接，其部屬多與之貿易，春使人陰結阿
保等，令覘知阿資所在，于其所經行之地，星列守堡，絕其糧道。

阿資困急，福潛引兵屯赤窩鋪，遣百戶張忠等擣其寨，擒阿資，斬之，俘其黨。越州遂平。○右軍都督甯正遣人搃叛寇張者，趙原言至京伏誅。○是月琉球國山南王叔汪英紫氏遣其臣耶師姑等中山王察度遣亞蘭袍等各貢馬共三十六匹，硫黃共四千斤，詔賜耶師姑等鈔有差。○二月己丑朔，丁卯遣官擇奠于先師孔子。○宋國公馮勝卒。勝初名國勝，又名宗異，後更今名。鳳陽定遠人。上起義兵于臨濠，下滁州，勝與兄國用來歸，以忠勇見任，隨取和州，勝預有功。歲乙未六月，上率國用等以舟師克采石，破太平，遂命國用典親兵，任以腹心。丙申，從上破元將陳瑛，先從于江寧鎮，遂從克建業國，用以功陞。帳前親兵指揮使。己亥四月，國用以疾卒，追封郢國公子，諡幼。上廼命勝代領其衆，居中宿衛。

庚子陳友諒犯龍江命勝伏兵石灰山與徐達合擊大破之獲
戰艦數百艘降將士二萬餘人癸卯從伐陳友諒大戰于首陽
湖勝功居多甲辰陞同知樞密院平乙巳從左相國徐達伐張士
誠丙午取湖州轉大都督府同知洪武元年正月加銀青光祿
大夫都督府右都督兼太子右詹事四月率兵下陝州進攻潼
關守將李思齊張思道宵遁遂西至華州據關而守九月同御
史大夫湯和進兵太行山取澤潞二州擊走賀平章張伯顏十
二月破猗氏遂下平陽絳州擒右丞賈成左丞李茂田保保等
獲將士五百餘人馬三百餘匹二年從大將軍徐達征陝西克
鳳翔取鞏昌降元總帥汪靈真保平章簡噶等是歲九月召達
還京師命勝總制軍事三年論功行賞封宋國公賜鐵券文曰
咨爾開國輔運推誠宣力武臣特進榮祿大夫右柱國宋國公

同恭軍國事食祿三千石馮勝朕惟歷代創業之君必有親同
骨肉愛若肢體之將使之周旋左右出入以防奸詐遂得保全
其身施為造化以有天下即是而觀其功不小朕自淮渡江以
未爾兄國用實典親軍導從有方動合古道俄而因疾長逝朕
念其勞追封為邦國公憫其子幼以爾勝繼之爾勝十餘年間
居京師則除肘腋之患歷征戰則建木牙之功敵犯龍江帥奇
兵而大挫群寇副將北伐屢克捷而平定中原宣力內外佐成
混一今天下已^定論功行賞朕無以報爾是用加爾爵祿使爾
子孫世世承襲朕本疎愚皆遵前代哲王之典禮茲與爾誓若
謀逆不宥餘犯死罪爾免二死子免一死以報爾功嗚呼爾以
忠誠夙夜事朕累除奸惡爵祿之崇由爾勤勞而致尚其日慎
一日待守高盈訓及子孫保于永世四年賜守先塋戶一百五

十五年賜交趾弓五十彤弓五命為征西將軍同大將軍達分
道征沙漠兵至掃林山與虜兵大戰斬故元平章不花等四百
餘人降大尉瑣納兒加平章管著等進兵亦集乃路守將卜顏
帖木兒以城降次別駕山口岐王朵兒只遁去獲平章長加奴
等牛羊馬駝十餘萬至甘肅守將上都驢等率所部降獲吏民
八百三十餘戶馬駝牛羊稱是師還詔賜第于中立府六年命
為右副將軍率兵山西北平防胡七年召還復命同衛國公鄧
愈等往鎮北邊九年移鎮西安二十年復命為征虜大將軍北
征沙漠招降故元將納哈出以罪詔收勝總兵印而命永昌侯
藍玉行總兵官事召勝還京師上以勲舊不加謹命執策鳳
陽奉朝請二十三年賜鈔二千錠令建碑于具先塋九月赴京
賀天壽聖節賜鈔百錠命與賴國公傅友德等巡撫山西塞

二十三年朝于京師賜鈔百錠

上二十五年加魚太子太師至是卒勝性勇悍善戰及為大將
馭衆稍無紀律其征納哈出也裨將有盜胡將馬者勝斬之以
徇然亦自掠胡馬至使闖者行酒于納哈出之妻求大珠異寶
又胡王死終二日勝強娶其女大夫夷狄降附之心上以此
深責之○給陝西都司屬衛并西安三護衛軍士十萬六百人
綿布四十二萬三千八百匹綿花十五萬九百斤○戊辰秦大
社大稷○詔復置袁州府分宜縣鐵冶所令循舊額辦課○山
東布政使司言青兗濟南登萊五府民稠地狹東昌則地廣民
稀雖嘗遺閑民以實之而地之荒闕者尚多乞令五府之民五
丁以上田不及一項十丁以上田不及二項十五丁田不及三
項并小民無田耕者皆令分丁就東昌開墾閑田庶國無遊民
地無曠土而民食可足也 上可其奏命戶部行之○庚午陝

西行都司言山丹永昌涼州西寧四衛軍士之係臨邊征調之數宜以官倉所儲料豆支與飼養庶可調用其屯田軍士之馬則于各軍歲輸數內免其十之二以給飼之又言甘州五衛軍士分耕塞上一伍之中有逸至二百里者軍不成伍將吏不能朝夕督視以致軍士怠惰所獲不足自食繼今宜令一百戶為一屯以便耕種從之○西平侯沐春言雷益烏撒地境相鄰連年爭地不決宜以所爭地給烏撒衛官軍屯種可之○置寧夏衛及前左中屯四衛指揮使司儒學各設教授一員訓道二員○壬申以監察御史謝祥為刑部右侍郎工部虞部郎中孫顯為本部右侍郎○太陰犯司怪○甲戌以工部侍郎王雋為本部尚書通政使司左通政宋微為通政使都察院左僉都御史王平為右都御史監察御史嚴德珉為左僉都御史范俊帝權

為右僉都御史馮彬為工部右侍郎右侍郎孫顯為左侍郎大理寺左寺丞汪喜為左少卿右寺丞徐正為右少卿兵科給事中張泌為光祿司卿兵部郎中齊泰為本部左侍郎主事劉雋為右侍郎戶部員外郎李彪為本部右侍郎右侍郎祁著為左侍郎監察御史房安為江西按察使王文為湖廣按察使陳文通為廣東按察使黃信為廣西按察使潘伯庸為河南按察使師達為陝西按察使陳奕為山東按察使張翀為四川按察使李瑛為北平按察使○己卯遣官享先農○庚辰詔右軍都督府榜諭龍州土官趙宗壽等先是二十一年九月土官趙貼堅卒無子其侄宗壽襲為土官知州己而鄭國公帝茂以罪謫居龍州貼堅妻黃氏有二女其一為太平州土官李圖泰妻而茂納其一為妾方是時宗壽雖襲職而貼堅妻猶持土官印與茂圖

奉旨擅州事數凌逼宗壽會茂以病卒具聞者趙觀海等亦肆
侮宗壽宗壽乃與其把事等以計取土官印上封章言茂已死
并械觀海等至京于是貼堅妻惶惧使人告宗壽擄掠又與圖
泰謀劫茂妻并其奴婢往太平州及趙氏祖父官誥諸物盡掠
取之又欲并取龍州之地乃自至京告宗壽實從子不應讓土
官宗壽亦上章言狀上乃詔宗壽勿問下吏議貼堅妻與圖
泰罪既而以蠻夷遠人俱釋之至是復有人告茂匿龍見州未
死前宗壽所言皆妄遂詔右軍都督府榜諭宗壽及其官民人
等曰皇上以鄭國公常茂有罪特以其父開平王之功不忍
遷寘于法安置龍州其昆弟仍享爵祿撫存如故惟龍州遠在
西南自我朝平定天下土官趙貼堅稱藩納款誠事朝廷貼堅
已故其妻乃與茂結為婚姻誘合諸首肆為不道及貼堅姪宗

壽襲為上官與貼堅妻互相告訐又言茂已死皇上以誠信待人且以茂功臣之子得罪而死深可矜憫并釋其告訐之罪今有人言茂實不死宗壽等知狀已遣散騎舍人諭宗壽捕茂宗壽漫不加意延玩使者久不復命其意莫測皇上未即問罪特命榜諭宗壽等知之如茂果存則送至京師以贖爾罪復違令則命大將軍率兵討捕罪在不赦如茂果死則宗壽亦親率大小頭目至京具陳其由凡龍州軍民人等悉皆知會○壬午熒惑犯鬼宿○乙酉降河南都指揮僉事謝貴為陝西河州衛指揮僉事時都指揮僉事趙隆有罪詞連貴貴已署山西行都司事上特宥之降今官○丙戌冊兵馬指揮使呂貴女為周世子有燉妃○太陰犯心宿○丁亥懷慶府倉糧虧耗四百餘石法司逮問守倉者五十人罪當徒上以倉糧歲久減

耗非守倉者之罪亟命釋之○戊子詔工部罪人罰役死者免
補先是有罰役死者所司輒追其父兄至京補其役 上聞之
惻然曰朕以人犯法多至于死故不忍加刑令罰役以全其生
致則已耳乃追其父兄補之果何罪耶命釋之○置廣州衛增
城所千戶惠州衛右後二千戶所及所屬提役千戶所○刑部
臣奏律條與律例不同者宜更定俾所司遵守 上曰法令者
除防民之具輔治之術耳有經有權律者常經也條例者一時之
權宜也朕御天下將三十年命有司定律久矣何用更定○乙
丑應天府上元縣典史隋言言農民之中有一夫一婦受田百
畝或四五十畝者當春夏時耕種之務方殷或不幸夫病而婦
給湯藥農務既廢田亦隨荒及病且愈則時已過矣上無以供
國賦下無以養其室家窮困流離職此之由請命鄉里小民或

二十家或四五十家團為一社每遇農急之時有疾病則一社協力助其耕耘庶田不荒蕪民無飢窘百姓親睦而風俗厚矣

上善其言諭戶部臣曰古者風俗淳厚民相親睦貧窮患難親戚相救婚姻死喪隣保相助近世教化不明風俗頽敝鄉隣親戚不相周恤甚者強凌弱眾暴寡富吞貧大失忠厚之道朕即位以來恒申明教化于今未臻其效豈習俗之固未易變耶朕置民百戶為里一里之間有貧有富凡遇婚姻死喪疾病患難富者助財貧者助力民豈有窮若急迫之憂又如春秋耕穫之時一家無力百家代之推此以往百姓寧有不親睦者乎爾戶部其諭以此意使民知之○命比干都指揮使盛熙葉萬全懷安等城

太祖高皇帝實錄卷之二百三十七

洪武二十八年三月甲午朔○乙未後軍都督府都督僉事劉寧卒寧亳縣人初隸劉福通麾下為總管歲丙午未降授管軍百戶累功至都督僉事十八年以老疾致任卒年七十五○丙申罷應天府龍江及大勝港抽分場官○給大同三護衛并蔚朔東勝左右四衛軍校六萬二百餘人綿衣布二十一萬六千一百匹絹五千一百匹綿花九萬四百斤○戊戌制諭中軍都督僉事朱信充總兵官前軍都督僉事宣信充副總兵率舟師運糧赴遼東具海運大小官軍悉聽節制○後軍都督府都督僉事李恪格鳳陽人歲癸巳從軍濠州丙申從渡江累功至都督僉事卒年六十八○己亥以錦衣衛指揮僉事楊嵩為四川行都指揮使司都指揮同知石玉為陝西行都指揮使司都指揮

僉事鎮南衛指揮僉事鄧顯為山東都指揮使司都指揮僉事
四川行都司都指揮同知潘永為都指揮使府軍衛致仕指揮
僉事劉貞為山西都指揮使司都指揮僉事旗手衛致仕指揮
僉事劉義為河南都指揮使司都指揮僉事府軍衛致仕鎮撫
郭青為福建行都指揮使司都指揮僉事○東勝左衛百戶吳
信坐侵暴屯卒誅 上遣使諭守邊將士曰昔漢將趙充國征
討西羌所用芻糧未嘗仰給朝廷皆由其勸課撫綏有道遂成
大功出美千載近緣邊列衛因中原之民艱于供給故立屯田
之法以代民力奈何將校不能撫綏又重困擾之如東勝左衛
百戶吳信不恤士卒侵尅其賞賜貪淫無厭是致受害者稱訟
大邊衛士卒居則望烽燧出則禦寇盜天氣早寒田穀少獲屯
之內地士卒勞苦加倍而信又侵暴如此使守邊者皆如吳信

田土何得而治糧食何得而充疆場何以禦侮哉今遣人往諭爾等具俗遵朕言毋如吳信為也○辛丑太陰犯天罇○甲辰以武德衛指揮僉事李張為鎮武衛指揮使司世襲指揮使○後軍都督府都督僉事徐禮卒禮淮安邳州宿遷人元季以從征功為叅政吳元年率沂州馬步軍三萬餘人來歸累功陞都督僉事至是卒于官○乙巳詔谷王穗之國宣德府○己酉詔中軍都督府左都督劉謙右軍都督府都督僉事陳春後軍都督府都督僉事朱榮注彰德衛輝大名廣平順德真定東昌兗州等府勸督遷民屯田○庚戌鎮南衛百戶造軍士入龍洞山採荊杖為虎嘯死法司論當杖誦戍邊上曰猛獸害人人豈能測免其戍邊但停俸一年令出資歛葬之○癸丑秦王樸薨王上第二子孝慈皇后所生也年十五受封二十三之國至

是薨年四十訃聞詔定喪禮禮部尚書任亨泰奏曰考之宋制
宜輟朝五日今遇特享宜暫輟朝一日 皇帝及親王王妃公
主世子郡王郡主及靖江王世子郡君服制皆與魯王喪禮同
皇太孫服齊衰期年因視事以日易月亦十三日而除素服期
年從之定謚曰愍冊曰古之君國子民者生則有爵歿則有謚
爵以辨上下謚以昭善惡此古今不易之典天下之公論也朕
自即位以來列土分茅封建諸子爾以年長者首封於秦期_本
永保祿位藩屏帝室夫何不良于德竟殞厥身烏乎哀痛者父
子之至情追謚者天下之公議義之所在朕何敢私茲特謚爾
曰愍○夜有星大如鷄子青白色起自紫微東蕃外約流五尺
發光如杯大明燭地北行至雲中歿○戊午罷太僕寺群監官
以其馬匹隸有司_牧養_牧計羸監群一百一十一處先是和州民

安仁言民間馬戶既養孳生馬匹又於有司供應差役是一戶而充兩差實為重複下廷臣會議禮部等官言宜省牧馬監群就令有司兼掌之使至是滁陽牧監及大勝關柘子驢興保寧草堂五群大興牧監及永安如阜沿海保全朝陽永昌安定七群香泉牧監及大全銅城永豐龍勝龍山永寧新安慶安襄安九群儀真牧監及萍陽壽寧廣陵善應四群定遠牧監及龍江龍安萬勝龍泉四群天長牧監及天長懷德招信衛得勝武安五群長淮牧監及長安白石荆山南山團山草平六群江都牧監及萬寧廣生萬驥順德大興驥寧崇德七群句容牧監及句容易風仍信福胙通德承仙上容政仁練塘壽安十群溧陽牧監及舉福從山明義永定福賢崇米永城永泰奉安九群江東牧監及開寧泉水惟政清化神泉新亭長泰光澤八群溧水牧監

及儀鳳仙壇立信歸政豐慶安興遊山永寧八群當塗牧盜及石城永保化洽姑熟繁昌多福丹陽德政八群舒城牧盜及棗林海亭伏龍龍河會龍九龍萬龍七群悉罷之復定其管牧州縣直隸鳳陽府壽州及鳳陽臨淮定遠盱眙昭懷遠霍丘蒙城七縣揚州高郵州及泰興江都如臯儀真四縣廬州府無為州六安州及棠舒城合肥廬江四縣鎮江府丹徒丹陽金壇三縣太平府當塗蕪湖繁昌三縣應天府上元江寧江浦六合句容溧陽溧水七縣滁州及全椒來安二縣和州及含山縣凡三十七

○詔瓊州府南山海口二千戶所分兵鎮廉州○改惠州衛提徑千戶所為提勝千戶所○命左軍都督府都督僉事李增枝署陝西都指揮使司事以都指揮王英副之○昏刻西南天鳴有聲如風水相薄西北行至一鼓止○庚申給京衛軍士夏布

八二匹○陝西四川二都司率馬步官軍征討西番東峯里烏
雜山及水扶州羅家毛工等族及祈家溝丹堡等處破之獲男
女一千六百七十餘口其一十四族五百九戶內附編籍輸賦
○壬戌禮部製秦愍王金冊金寶成其制渾金澀粉冊蓋一裏
用紅紵絲貼襯聯貫冊彙紅絲緜一紅紙錦藉冊一紅織金紵
絲墊冊褥一蓋覆蓋紅羅銷江天袱一裏冊紅羅銷金天袱一
嵌金鐵鎖鑰一副木貼金寶池匣一副紅綾條一內外木匣二
俱澀粉渾金裏用紅紵絲貼襯渾金澀粉木貼金寶匣一并木
貼金寶座一四角蟠螭金匣裏用紅紵絲貼襯紅紙錦寶座褥
一紅織金紵絲用寶褥一紅織金紵絲墊寶褥一裏寶紅羅銷
金天袱一蓋覆寶匣紅羅銷金天袱二寶匣嵌金鐵鎖鑰一副
硃紅油寶案卓一木貼金寶池蓮池座一俱用澀粉渾金）

亥命賞雲南從征有功官軍先是西平侯沐春中軍都督府都督僉事何福等率兵討越州阿資 上命預定賞格凡獲首賊者賞白金五百兩大把事一百兩小把事五十兩從賊五兩及阿資平春等第其將士之功以聞 上命戶部如數賞之凡官軍二萬三千九人賞黃金一百九十二兩白金二萬三千八百四兩鈔九千一百一十八錠錠○給賞貴州都司及各衛征剿西堡獲功并陣亡傷殘官軍三萬七千五百三十二人鈔二十一萬二千四百七十九錠○給在京金吾等衛并三儀衛司軍士二十萬七千一百餘人冬衣○是月初總兵官周興令都督僉事宋晟領遼王府中護衛都督劉真領寧王府中護衛指揮莊德領三島衛軍馬征勦野人畢日領還

大明太祖聖神文武欽明啓運俊德成功統天大孝高皇帝實錄卷之二百三十七

明太祖高皇帝實錄卷之二百三十八
洪武二十八年夏四月甲子朔享太廟○旌表平陽府稷山縣
民裴思孝妻董氏懷慶府修武縣民江彥深妻秦氏寧國府宣
城縣民吳賢生妻張氏山西汾州民郭世玉妻陳氏貞節○乙
丑填星退行出宮宿○戊辰遼東義州千戶鄧銘以徵歛部率
財物應杖為軍其子赴訴請代父罪並上許之令代後免杖○
己巳以翰林院編修齊麟為禮部右侍郎盧原質為太常寺少
卿禮部右侍郎張炳為左侍郎○命監生六百九十八分行天
下勾稽吏牘賜鈔錠及文綺細絹衣服靴帽遣之○勅岷府西
河中護衛并儀衛司官軍校尉往雲南鎮守賜鈔四萬錠○庚
午琉球國中山王察度遣使亞撒都等奉表貢硫黃馬匹及方
物○辛未 上諭禮部尚書汪亨奏曰秦國王既沒國事無統世

子長成宜命襲爵爾其集議以聞亨泰同翰林諸臣議漢諸王
堯遣使者拜嗣子為王則玄冠素衣素服以承詔事訖反喪服
又諸侯受天子之命亦宜服其命服使者出反喪服即位而哭
既合於禮且協人情詔依服命服禮行之○詔停造遼王宮室
初武定侯郭英曰遼東軍務物情未者多言其艱苦况邊境營
繕朕嘗為卿言不宜盡力以困之今役作軍士皆強悍勇力善
戰之人勞苦過多心必懷叛故往往逃伏草野山澤間乘間劫
掠近者高麗表奏言多不實朕已命有司究之聞彼自國中至
鴨綠江凡衝要處所儲軍糧每驛有一萬二萬石或七八萬十
數萬石東寧女直皆使人誘之入境此其意必有深謀朕觀高
麗自古帝與中國爭戰昔漢唐時遼東地方皆為所有直抵永
平之境恃遠不在時時弄兵自古無狀如此今遼東之糧軍士

飢困儻不即發沙嶺倉糧賑之必啓高麗招誘逋逃之心非至計也。使高麗出二十萬人以相驚諸軍何以應之。今營繕造作暫宜停止且令立營屋以居十年之後再為之。古人有言人勞乃易亂之源深可念也。○壬申蠻寇鄧華仔等伏誅。初通州大猛洞蠻盤滿仔作亂華仔等以逋賦往從之殺千戶百戶各一人寶慶衛指揮同知姚祥會衡州衛官軍討捕擒華仔等二十九人遣入械至京誅之。○癸酉擢國子生李翔為江西布政使司右叅議何昉為廣東布政使司左叅議郭韜為右叅議吳衡為浙江布政使司右叅議。○乙亥改遼東金復海蓋四州儒學為衛儒學各設教授一員訓導四員。○丁丑詔增給福州新軍月糧先是廣東諸衛新舊軍士其在內郡者守城屯種各居其半其沿海屯種者十之三守城者十之七既而福建新軍有許

月糧不給者乃命有司增其數但屯種守城例如廣東○戊寅
麗川平緬宣慰使思倫發遣刀越孟等貢犀象方物詔賜鈔二
百五十錠文綺帛各十五匹○己卯賜兵馬指揮呂貴米五十
石○太陰掩房宿○庚辰以驍騎右衛指揮使袁宇為右軍都
督府都督僉事○以羽林右衛百戶朱能為豹韜衛指揮使司
世襲指揮僉事初能為淮安衛軍士以上封事擢百戶尋以目
眇廢令其子義代之至是特陞指揮僉事兵部言能已致仕例
不當陞上曰能居行伍中而所言可用非智識過人者不能
也故特陞之仍俾其子孫世襲罷百戶之職○辛巳以陝西都
指揮使司都指揮同知陳暉為都指揮使王英為陝西行都指
揮使司都指揮同知武昌衛指揮僉事謝源為襄陽衛指揮使
司指揮僉事○壬午降河州衛指揮使趙庸復為定遠右衛指

揮使司指揮僉事初庸任定遠右衛世襲指揮僉事洪武二十六年陞河州衛指揮使坐私受蕃人馬法司逮論死上以其勲舊特宥之復降定遠原職○癸未湖廣岳州府華容縣河汨所輸魚油赴京中道覆舟溺其半有司欲論輸者罪追物償官工以風濤之險出于不測命免之○甲申詔置遼寧谷慶肅五王護衛指揮使司命武定侯郭英會遼東都司分調廣寧義州等衛官軍置遼王廣寧左右二護衛北平都司調大寧左右二衛為寧王營州左右二護衛宣府左右二衛為谷王宣府左右二護衛改興州中護衛為宣府中護衛陝西都司調慶陽衛為慶王寧夏左護衛改寧夏衛為右護衛調甘州在城官軍置肅王甘州右護衛凡有差遣從王調用○廣西布政使司言龍州土官趙宗壽屢詔令赴京宗壽與群蠻結脈拒命不出又言奉議

南丹等處蠻人梗化 上復命兵部尚書致仕唐鐸賈勅往諭之宗壽不從命○乙酉詔賜代王柱氏租一千石○戊子榮感入軒轅中○辛卯城雲川衛命山西都指揮同知王仙領兵置堡七種○城雲南建昌衛○是月播州宣慰使楊瑄遣其弟瑄等貢馬賜瑄綺鈔

五月癸巳朔○乙未太陰與辰星同在井宿○庚子以李芳英為中都留守司留守芳英嘗國公景隆弟也○癸卯詔鳳陽河南并直隸衛所凡軍官犯徒流死罪宥免者悉發遼東擒捕野人具有征調過期免罪還職軍官悉令自備鞍馬衣甲器械期以六月至京聽發廣西征進○甲辰辰星犯天璫○乙巳 上以內外大小武臣多缺員命兵部自壬辰至甲辰從軍洪武十五年以前除授二十年以前陞除指揮僉事千百戶衛所鎮撫

者咸任用之其在各王府護衛者從王陞轉○詔發湖廣江西所屬衛所馬步官軍六萬餘及諸衛達達官軍各貢三月糧期以秋初俱赴廣西從大軍征進龍州奉議等處○丙午金吾後衛軍貳顏珠妻孫氏一產三男事聞循例給賜米鈔○庚戌旌表建昌府南城縣民審顏孫妻危氏太原府陽曲縣民賈文遠妻楊氏貞節俱以年少夫亡不嫁臨汾縣民延宜妻魏氏年二十四夫病死是夕自縊于庭樹間與夫同葬旌其門曰貞烈○癸丑安南國遣其臣大中天大黎宗轍朝儀大夫裴鑿奏表貢象賜宗轍鑿冠帶賜其從人鈔有差○乙卯皇第四十四孫悅忻土蜀王第四子也○丙辰四川宋儂茶洞蠻賊田大蟲作亂四川都指揮使司發瀘州衛官軍征勦賊走竄靖重慶衛指揮楊錦率兵與竇靖民兵追擊之斬大蟲等二百餘人俘男女一

百八十口○戊午錦衣衛指揮宋忠還自蜀言連雲棧松林馬道驛各九十里險遠不使詔增置武關清橋二驛○熒惑犯靈臺○是月膏鹽井會川寧番越嵩建昌等衛軍士一萬三千四百八十人綿布二萬六千八十匹綿花一萬三千四百斤

大明太祖聖神文武欽明啓運俊德成功統天大孝高皇帝實錄卷之二百三十八

明太祖高皇帝實錄卷之二百三十九
洪武二十八年六月癸亥朔夜天鳴○乙丑肅王禛始就國甘肅○丙寅遣前軍都督府都督謝彥通政使宋徵奉金冊免服持節詣陝西冊秦世子尚炳為秦王同日朕惟君天下者必封建王國使其子孫世世相傳以蕃屏帝室此古昔聖王不易之大法也朕自即位之初法遵前聖分王諸子命爾父禩首王于秦已有年矣近以疾薨逝今爾世子尚炳年已長成特命爾襲封為秦王爾其恪勤忠孝親賢愛民永為藩輔致哉○丁卯大陰祀軒轅○辛未以戶部員外郎莫禮為本部右侍郎兵部員外郎夏恕為大理寺右寺丞壬申戶部知印張永清言雲南四川諸處邊夷之地民皆囉囉朝廷與以世襲土官於三綱五常之道惜焉莫知宜設學校以教其子弟上然之諭禮部曰邊

夷土官皆世襲其職鮮知禮義治之則激縱之則玩不預教之何由能化其雲南四川邊夷土官皆設儒學選其子孫弟姪之俊秀者以教之使之知君臣父子之義而無悖禮爭鬪之事亦安邊之道也○癸酉太白犯畢宿○辛巳總兵官都指揮使周興等率師至開元聞西陽哈在黑松林使指揮莊德領舟師順腦溫江下忽刺溫截廬口時步軍亦進至忽刺江分為三道宋晟率指揮錢忠張玉盧震軍由西北同河至阿陽哈寨劉真率指揮房寬軍由松花江北岸東南截廬口至蒙古山寨指揮景誠朱勝軍由中道忽刺溫江東北出銅佛寨者迷河黑松林等處獲野人詢之云西陽哈已於二月河凍時過松花江真等率兵由斡朶里進至甫谷迷舊城適天雨晝晦不及而還獲女真鎮撫管三并男女六百五十餘人馬四百餘匹遣人入奏○甲

中羽林衛軍張山妻李氏一產三男事聞循例給賜米鈔○乙酉改甘州中中衛復為甘州左衛指揮使司初陝西甘州置左右中前後并中中六衛後改左衛為肅州衛至是以都指揮使陳暉奏遂改中中衛為左衛○丁亥勅曹國公李景隆整飭陝西屬衛士馬惟陝西行都司甘州五衛及肅州山甘永昌西寧涼州諸衛從肅王理之慶陽寧夏延安綏德諸衛從慶王理之其餘衛所除七種外馬步軍士悉令訓練以俟征調○己丑上御奉天門勅諭文武群臣曰朕自起兵至今四十餘年親理天下庶務人情善惡真偽無不涉歷其中奸頑刁詐之徒情犯深重灼然無疑者特令法外加刑意在使人知所警惧不敢輕易犯法然此特權時處置頓挫奸頑非守成之君所用常法以後嗣君統領天下止守律與大誥並不許用黥刺剗割之

刑蓋嗣君宮生內長人情善惡未能周知恐一時所施不當誤傷善良臣下敢有奏用此刑者文武群臣即時劾奏處以重刑又曰自古三公論道六卿分職自秦始置丞相不旋踵而亡漢唐宋因之雖有賢相然其間所用者多有小人專權亂政我朝罷相設五府六部都察院通政司大理寺等衙門分理天下庶務彼此頡頏不敢相壓事皆朝廷總之所以穩當以後嗣君並不許立丞相臣下敢有奏請設立者文武群臣即時劾奏處以重刑又曰皇親國戚有犯在嗣君自決惟謀逆不赦餘犯輕者與在京諸親會議重者與在外諸王及在京諸親會議皆取自上裁其所犯之家止許法司舉奏並不許擅自逮問合議親戚如皇后家皇妃家東宮妃家王妃家郡王妃家駙馬家儀賓家魏國公曹國公信國公西平侯武定侯之家朕皆已著之祖訓爾

五府六部等衙門以朕言刑禘揭于官署永為遵守○普定西
堡土官阿傍誘集蠻民二千餘人叛入山箐時出剽掠命貴州
都指揮同知顧成等領兵討之○庚寅夜有星大如椀青白色
上光明燭地自天圍東南行至近濁汶○辛卯上謂侍臣曰論
禮樂者必原於德此至德也論蓋德盛者禮樂明備否德則禮樂
不興三代之德盛故禮樂達于天下後世德不如古禮樂有其
名而無其實王道云如有王者出三十年而後禮樂可稱此本
孔子必世而後仁之說朕居位已三十年矣禮樂之文粗備而
政治不能如古揆德涼薄故也侍臣對曰陛下武定禍亂文
致太平天下翕然同風感蒙至化所謂十年平之十年富之十
年和之真有奇效矣而聖德謙冲不有具有此其跨越于前
代也

秋七月壬辰朔享太廟○命翰林院編修馬京署通政使司事
○甲午置會川衛軍民指揮使司巴松大龍黎溪會川四驛○
廣西都指揮使韓觀率兵捕獲宜山等縣蠻寇二千八百餘人
斬偽大王韋召偽萬戶趙成秀韋公旺等傳首詣京師時嶺南
盛夏官軍多病瘴 上命觀班師觀還軍廣西○昏刻有星如
杯大青白色有光起自庫樓南行至近濁沒○乙未山東布政
使楊鏞奏青兗登萊濟南五府民五丁以上及小民無田可耕
者起赴東昌編籍免種凡一千五十一戶四千六百六十六口
○戊戌七夕宴百官于奉天殿○河南汝寧府確山縣野蠶成
繭群臣表賀 上曰人君以天下為家使野蚕成繭足以衣被
天下之人朕當受賀一邑之內偶然有之何用賀為○原子增
設刑部所屬十二部主事各二人以國子生歷事者為之○詔

凡亡故征傷武官子弟襲職如比試弓馬不中仍令還衛署事
與平倭二年後復比試不中者降為軍○丙午太白犯井宿○
己酉太白出井宿犯東扇三星○辛亥山東寧海州文登縣者
氏王子春等言比年水旱田禾不收民間乏食乞以預備糧儲
貸之上可其奏○命刑官審錄囚徒惟軍士屢逃者依律餘
論死者皆免為軍從征廣西○旌表饒州府餘干縣民劉溫妻
祝氏貞節○甲寅上諭兵部臣曰近來在外衛所遇有寇盜卒
起守禦措捍千戶不親率兵勒捕但遣百戶旗手領之是以失
机誤事自今各衛所地方設有寇三四十人即調官軍一二百
人寇有數百人即調數千人刻期捕獲毋令滋蔓如指揮千戶
不躬率士卒及調兵失律誤事者罪之于是兵部榜示天下○
乙卯貴州宣慰使安的貢馬賜白金三百兩鈔二百五十錠夏

衣二襲○丙辰置河源守禦千戶所○工科給事中陳洽等奏
凡大臣犯重罪雖蒙恩宥不宜仍列本班必少加降抑以示勸
懲 上從之詔禮部凡大臣犯重罪得免者叙列八品九品班
後○丁巳遼東衛鎮撫張詠言遼東三萬衛所部高麗女直歸
附者常做出獵為患 上命武定侯郭英徙其衆于廣寧西屯
種遼海軍出調在外者悉從還衛○戊午冊郤督盛庸女為周
郡王有燿妃○詔國子生曰孔子作春秋明三綱叙九法為百
王軌範修身立政備在其中未有舍是而能處大事決大疑者
近諸生專治他經者衆至于春秋鮮有明之繼今宜習讀以求
聖人大經大法他日為政臨民庶乎有本○有道士以道書獻
上却之侍臣請留觀之或有可取 上曰彼所獻書非存神
固氣之道即煉丹燒藥之說朕烏用此朕所用者聖賢之道所

需者治術將躋天下生民于壽域豈獨一己之長生久視哉苟
一受其獻迂誕怪妄之士必爭未美故斥之毋為所惑○是月
撤馬兒罕遣回回送力必失等貢馬二百一十二匹詔賜_欽有
差

大明太祖聖神文武欽明啓運俊德成功統天大孝高皇帝實
錄卷之二百三十九

明太祖高皇帝實錄卷之二十九終

天明太祖高皇帝實錄卷之二百四十一

洪武二十八年八月壬戌朔山東德州大水壞城垣沒軍士營舍○以金吾前衛指揮使陳英萬全右衛指揮同知劉遂俱為遼東都指揮使司都指揮同知○丁卯遣官釋奠于先師孔子○命左軍都督府左都督楊文佩征南將軍印為總兵官廣西都指揮使韓觀為左副將軍右軍都督府都督僉事宋晟為右副將軍劉真為叅將率京衛精壯馬步官軍三萬人至廣西會各處軍馬討龍州土官趙宗壽及奉議南丹向武等州叛蠻賜文等及從征指揮而下鈔有差師行遣使祭嶽鎮海瀆諸神曰昔者元運將終英雄並起民受兵殃時予亦與羣雄並驅輯兵保民上帝默相山川效靈所在必克五年而兵偃民息天下太平今二十有八年矣近者蠻夷酋長趙宗壽及奉議等州不

循沾化負固殃民故命將討之兵興重事不軌不告所以告者
兵行十萬各離父母妻子道途飢飽勞逸山嵐瘴氣深患者有
之此行之難予之所以憂也嗚呼大軍經過荆棘生焉民蒿且
移十萬之衆經過未有不傷者也用是致告于神惟神鑒予誠
懇聞于上帝教佐三軍使瘴癘之方化煙嵐為清涼之氣即
珍梁魁良民安業軍士早還以養父母是其禱也○朝鮮國遣
典農正崔子雲等送馬一千五百匹至遼東詔發定遼諸衛牧
養擇其良者送京師○夜有星大如椀青白色有尾光明燭地
起自河鼓西北行入天市垣內至候星旁後有二小星隨之
○戊辰祭大社大稷○遣禮部尚書任亨泰監察御史嚴震直
使安南諭以討龍州趙宗壽之故上謂亨泰等曰龍州地連
安南大軍壓境彼必致疑宜告以趙宗壽之罪不可赦安南當

慎守邊境毋啓納叛之謀若如朕命彼此邊徼之民皆幸矣亨
泰等至安南陳日焜間命畏恐即奉詔貽書亨泰等言朝廷懷
柔遠邦矜恤蠻夷覆煦教戒不啻如天地父母此皆好生之德
也而陋邦下國畏天事上之誠惟閭下亮察而已亨泰等因復
書叙朝廷所以用兵之意以慰安之○信國公湯和卒和字鼎
臣鳳陽人幼孤育於母姨家為兒時嬉戲常習跨馬持稍父老
多異之及壯個儻有大志元末兵起和徒步率子弟十餘人從
滁陽王郭子興克小枝攻宿州取九灣克定遠降其將謝成李
德春子興命為千戶歲終已從上攻大洪山陞萬戶克滁州
陞管軍總管招降鮑子方兵千餘人甲午上攻和州時同列
猶顧望異同獨和毅然以所領兵從上擊陳瑄先敗之追至
亦帝壩中傷而還乙未取湯泉寨獲馬三百餘匹與瑄先戰于

太平流矢傷左肢，屢創復戰，丙申從克建業，取句容，從徐達下鎮江，招青襖軍千餘，陞統兵元帥，取金壇、富莊等寨，攻常州，下之。陞樞密院同僉，遂留守常州。戊戌，張士誠遣兵來寇，擊却之。己亥，士誠復來攻城，和出戰，敗之，獲千餘人，船四十餘艘。自是士誠不敢復攻城。從徐達攻無錫，取新安、望亭諸寨，癸卯攻揚州，牛皮卷寨，殺其將陸某，斬首五級，遂其將莫乙。陞中書左丞。甲辰，張士誠兵圍長興，和率步將吳福興會常遇春擊士誠，兵大破之。陞中書省平章。乙巳，攻永新州，克之，仍還守常州。丙午，從征蘇州，克太湖水寨，下吳江州，遂攻蘇州閘門，飛礮傷左臂。召還建康，療之。丁未，復攻蘇州，從徐達俘張士誠，以歸。陞榮祿大夫、御史大夫，兼太子諭德。是歲十月，命為征南將軍討慶元方國珍。國珍乘巨舟出沒海島，和宣諭朝廷威德，國珍率子弟

詣軍門降得海舟千餘質貨無算遂命和由海道取福州師至
而平洪武元年二月取延平漳泉等府元春政文珠海牙等降
執平章陳友定送京師召選智造海舟于慶元八月扈駕幸大
梁九月徙都督馮勝取山西澤潞等州二年克河中府從攻鳳
翔六盤涇州慶陽三年取寧夏獲馬牛萬數論功賜號同國輔
運推誠宣力武臣榮祿大夫柱國中山侯食祿一千五百石賜
鐵券文曰咨爾和朕思猛將佐興王運如雲之從龍於太虛赫
然而滿于兩間神龍造化于其內人莫能窺頃刻霖雨天地通
和民物皆遂其生此雖龍之化實雲之助也朕起自草萊將多
鄉里爾和以英俊之姿勢若熊虎自朕定居江左以爾列守甌
陵時姑蘇未下其兵銳狡爾獨富之彼欲窺我情實爾能巡捕
謹嚴防禦周密國之事情彼終莫測故我得施其運用豈非若

雲之從龍乎自是西克永新東取姑蘇皆顯著勲績授以征南將軍兵至浙東八閩悉歸版籍及副征山西陝右所至效勞熊虎之將可謂稱矣今天下已定朕無以報爾是用加爾爵祿使爾子孫世世承襲朕本疎愚皆遵前代帝王之典禮茲與爾誓除謀逆不宥其餘若犯死罪免爾一死以報爾勲於戲秉忠勅力為藩鎮于邊陲際遇方今實千幸之一會尚其宣爾勤勞訓及子孫以保祿位于悠久四年命為征西將軍率舟師取四川二月攻烽火山僞夏將李逢春迎降六月抵瞿塘分兵破其水陸寨柵引水軍直擣重慶降夏主明昇五年從魏國公徐達北征沙漠六年命練兵於臨清七年移鎮彰德八年從征察罕腦兒獲馬羊牛畜無算九年番將伯顏帖木兒為邊患命和為征西將軍率傅友德等駐兵延安備之伯顏帖木兒乞和還十

一十年正月進光祿大夫大都督府左都督左柱國封信國公議
軍國事食祿三千石賜鐵券文曰古者哲王立綱陳紀賞有功
罰有罪執此道而天下安朕起自草野賴諸將効力平羣雄定
禍亂君主華夷當定功行賞之時爾和雖居舊將之行惟守昆
陵於忠有懷雖未彰顯其情在心朕念相從之久泯前過而封
見功爵以中山侯今者朕服念爾勤勞特釋爾過授以信國公
之爵食祿三千石永為子孫世祿仍與爾誓除謀逆不宥餘犯
死罪爾免二死子免一死於戲人目無將可謂忠矣威福不專
可謂智矣爾其慎守斯道以訓後世教哉毋忽十三年從徐達
練兵北平十六年出鎮四川永寧十七年巡視閩浙城池訓練
軍士十八年總兵討五開九溪叛蠻俘蠻獠四萬餘人十九年
賜鈔萬錠俾建第于鳳陽尋命往浙江溫台明越築沿海城堡

置松門等衛二十一年詔率家屬還鳳陽新第陛辭 上賜璽書勞之賜白金二千兩黃金三百兩鈔三千錠綵段四十表裏賜其妻胡氏白金一千兩黃金二百兩鈔二百錠綵段三十表裏二十三年赴京朝正旦感風疾失音 上親臨視命醫治療遂伴還鄉命其女魯王妃歸寧侍疾已而 上念之復命與至京師賜以安車入殿宴勞有加賜鈔六百錠遣還二十七年正月復召至京師 上親撫視見其病篤對之流涕命擇瑩域治後事賜鈔百五十錠至是卒壽七十 上輟視朝一日遣使吊祭仍命親王各遣官致祭追封宋既王謚襄武賜葬鳳陽曹山之原仍命塑像祀于功臣廟和在諸將中號剛勇善戰其守常州也與扶士誠接境士誠日遣游說囑以子女玉帛和一無所動巡守嚴密使內奸不出外奸不入東藩無事我師得以從容

西平荆楚和有力焉然性頗嗜酒語言少檢嘗醉謂部下曰吾
居常州如卧屋脊上左轉則在東右轉則在西言東向則張士
誠也部下以告上曰此吾腹心舊將姑置之及論功行賞止
封侯爵第一後上復念其相從之久進封信國公賜券文特
申誠之和能祇奉訓勅卒以功名終云○年未遣官分詣河南
山東湖廣諸府州縣買牛分給山東屯種之民○壬申新添衛
指揮使司奏軍士缺糧詔貴州都指揮使程暹整飭附近各衛
軍馬以征方命蠻夷寨柵俾之困擢于敵以給軍餉候至春作
方輿班師屯種○甲戌遣行人沈暹往貴州等都司給賜征討
西堡官軍鈔一萬三千三百三十七錠○詔給在京金吾等四
十三衛并三儀衛司軍士二十萬七千一百餘人冬衣○丙子
命在軍都督府遣人諭總兵官征南將軍左都督楊文令調南

寧衛兵千人江陰侯吳高領之柳州衛兵千人安陸侯吳傑領之皆令從征先是高等以事獲罪故俾征討建功以自贖己卯遣官祭歷代帝王○詔總兵官征南將軍左都督楊文等如兵至龍州土官趙宗壽躬親未見具陳常茂已死之由則宥其罪若詐遣人來即進兵討之○庚辰祭太歲風雲雷雨嶽鎮海濱山川月將城隍諸神○遣官祭旗纛○辛巳賜山東遼東諸衛恩軍綿布各二匹綿花二斤初以恩軍為宥罪之人比之正軍例不賞賜至是上以邊地苦寒特命賜之○兵部尚書唐鐸還京言龍州土官趙宗壽伏罪未朝乞罷兵勿征詔征南將軍左都督楊文移兵奉議等處仍命鐸至軍奉議軍事上以各王及世子有木媼者命禮部遣人往河南山東山西陝西北平諸處送官民家女年十四五容德瑞厚及父母俱存家法嚴

整者官給舟車令其父母親送至京選用之有司毋得擾民○
癸未詔置南丹奉議慶遠三衛指揮使司命兵部取罷免武官
及遼東捕野人有功者俱送總兵官左都督楊文傑征進單日
選授三衛指揮以下官每衛指揮五人所千戶三人百戶依缺
選補○丁亥命蘄州衛指揮僉事胡冕為征虜前將軍六安衛
指揮僉事宋晨武昌荊州二護衛指揮僉事徐越榮鑄副之各
率本衛及潘陽等衛官軍討郴州桂陽等處山賊時桂陽縣者
民陳仲才言本處山賊劫掠人民廣西湖廣二都司調指揮胡
宗等將兵收捕賊聞官軍至皆遁入山谷及師還復羣出剽掠
屢為民患於是詔冕等討之○戊子詔更定皇太子親王等封
爵兩寶之制皇太子親王俱授以金冊金寶皇太子妃王妃止
授金冊不用寶皇太子嫡長子為皇太孫次嫡子并庶子年十

歲皆封郡王授以塗金銀兩銀印親王嫡長子年十歲授以金
冊金寶王為王世子次嫡子及庶子年十歲皆封郡王授以塗
金銀兩銀印凡王世子必以嫡長如或以庶奪嫡輕則降為庶
人重則流竄遠方若王年三十正犯未有嫡子其庶子止為郡
王待王與正妃年五十無嫡子始立庶長子為王世子若王世
子襲封及王世子并郡王娶妃郡^王被^王封并郡王嫡長子襲封朝
廷遣人行冊命之禮郡王子授鎮國將軍孫授輔國將軍曾孫
授奉國將軍玄孫授鎮國中尉五世孫授輔國中尉六世孫以
下世授奉國中尉其有文武才能堪任用者宗人府具以名聞
考驗陞轉如常選法如或有犯宗人府取問明白具實聞奏輕
則量罪降等重則黜為庶人但明賞罰不加刑責者為余○更
定王府官制長史副左右長史各一人秩正五品典簿一人正

九品審理所審理正一人正六品審理副一人正七品典膳所
典膳正一人正八品典膳副一人從八品奉祠所奉祠正一人
正八品奉祠副一人從八品典樂一人正九品典寶所典寶正
一人正八品典寶副一人從八品紀善所紀善二人正八品良
醫所良醫正一人正八品良醫副一人從八品典儀所典儀正
一人正九品典儀副一人從九品引禮舍人三人未入流工正
所工正一人正八品工正副一人從八品伴讀四人教授無定
員俱從九品庫大使副使各一人俱未入流其護衛指揮使司
官并屬官隨軍多寡設置不拘員數品秩俸祿並同在京衛分
儀衛司儀衛正正五品副從五品典仗六人正六品

大明太祖聖神文武欽明啓運俊德成功統天大孝高皇帝實
錄卷之二百四十

天明太祖高皇帝實錄卷之二百四十一
洪武二十八年九月壬辰朔○癸巳五軍斷事官奏清平衛千
戶曹迪受賄賣軍命杖之謫戍遼東三萬衛○陞昌國等衛千
百戶萬鍾等十八人為指揮僉事皆以歷任歲久故也○甲午
詔岷王樞之國雲南政西河中護衛為雲南中護衛調指揮同
知賀安寧之雲南左衛為雲南左護衛指揮僉事王福寧之雲
南前衛為雲南右護衛指揮僉事李謙寧之初岷王改都岷州
上以雲南土曠人悍必親王往鎮之故命岷王改都焉○乙
未上諭戶部尚書郁新曰岷王之國雲南糧餉不敷其王國
歲與米六百石金銀則貯之王府錢鈔海肥諸物則送布政司
收之以備用○雲南鶴慶府四川劍川州地震○丙申戶部尚
書郁新言山東海南府廣儲廣豐二倉糧七十五萬七千石有

奇止給臨清訓練軍士月糧其德州平山濟南三衛所儲雖足
支用然二倉蓄積既多歲久紅腐宜以三衛官軍係糧於此支
給其今年秋糧宜折綿布以備給賜上曰山東之民供給遼
東山西北平軍需宜免之龍州土官趙宗壽借耆民農里等
六十九人來朝謝罪貢方物○丁酉征虜前將軍指揮僉事胡
冕等進兵追捕彬桂西山養牛諸洞山賊禽賊首康節孫等斬
之俘獲其下三千餘人仍以兵搜捕餘黨○都察院左都御史
曹銘有罪誅○免山東稅糧詔曰朕起寒微備知農事艱難今
天下大定己二十八年矣民人供給煩勞過年以來朝廷倉廩
實府庫充而山東之民供給遼東山西北平軍需勞亦甚矣今
年應納官民秋糧盡行蠲免又免直隸應天等五府秋糧詔曰
朕年二十八渡江二十九入建業秣馬礪兵與群雄並驅凡軍

與所需^皆出我江東五郡之民以此平定天下禍亂海內康寧
朕今老矣思民効力無可撫勞今特以洪武二十八年官民秋
糧盡行蠲免少報前勞○戊戌戶部尚書郁新言昨奉詔免應
天等五府州秋糧其應天府屬縣江浦六合本居江北非原供
億之民難免其租上曰與沙洲鄉受賞之民一體蠲免○賜
廣西思明府土官及朝鮮國使宴○崇山侯李新有罪伏誅○
夜初鼓天鳴如瀉水起自東北南行至二鼓止○庚子置靖江
王府諮議所秩從七品諮議記室教授各一人品秩俱倣宋制
○辛丑命澗所鎮撫發夜巡銅牌初銅牌掌於中府每夜令軍
旗持牌分行巡城及點視各門鎖鑰與守禦知更官軍至是於
每夜^命巡鎮撫一員發牌分鎖二員領軍旗巡警仍置大木牌一
面編定當巡官員姓名及更次序懸於中府○壬寅兵部尚書致

仕唐鐸言長沙寶慶澧州永州四府郡道二州食鹽缺少廣東積鹽寶多而廣西新立衛分軍糧未敷若將廣東之鹽運至廣西召商中納可給軍食戶部議先令廣東布政司運鹽至梧州命廣西官司於梧州接運至桂林召商中納每引納米三石令於湖南賣之庶幾官民俱便從之○癸卯戶部尚書郁新言山東已免秋糧乞以他糧與民易布以給軍士上曰此意甚善然恐有司並緣為奸以病吾民且軍士綿花布疋迺年給賞今年且停給○甲辰監察御史裴承祖言四川責播二州湖廣思州宣慰使司及所屬安撫司州縣貴州都指揮使司平越龍里^南添^新都勻等衛平浪等長官司諸種苗蠻不知王化宜設儒學使知詩書之教立山川社稷諸壇塲歲時祭祀使知報本之道從之○戊申賜國子監琉球生秋冬衣及賜其從人有差○已

酉天壽聖節 上御奉天殿受朝賀大宴郡臣是日廣西思明
府土官知府黃廣成等貢馬朝鮮因遣門下評理金立堅等上
表貢方物來賀賜廣成文綺^二及羅衣^金束帶鈔二百錠從
人有差○代王桂進大同城北所產嘉禾一莖三穗者三本二
穗者二十一本○庚戌頒祖訓條章於內外文武諸司勅諭禮
部曰自古國家建立法制皆在始受命之君以後子孫不過遵
守成法以安天下蓋創業之君起自側微備歷世故艱難周知
人情善惡恐後世守成之君主長深宮未諳世故山林初出之
士自矜已長至有姦賊之臣徇權利作聰明上不能察而信任
之變更祖法以敗國家贖害天下故日夜精思立法垂後永為
不刊之典如漢高刑白馬盟非劉氏者不正以後諸呂用事盡
改其法遂至國家大亂劉氏幾亡此可為深戒者朕少遭亂離

賴皇天眷命剪除群雄混一天下即位以來勞神焦思立法
制革胡元弊政至於開導後世後為祖訓一編立為家法俾子
孫世世守之爾禮部其以朕訓頒行天下諸司使知朕立法垂
後之意求為遵守後世敢有言改祖法者即以爲姦臣論無赦
○今上命進永清左衛龍門東屯嘉禾一莖三穗者二本二穗者
六本○壬子諭西平侯沐春曰前改雲南左右二衛為護衛蓋
此二衛官軍久居雲南習於征戰若爲護衛則可不調遣宜仍
其舊可改馬隆衛為左護衛餘置馬隆千戶所分調越州衛
官軍補之景東蒙化二衛以一衛為左護衛調雲南中衛於北
勝州置瀾滄衛雲南後衛於廣南府置廣南衛其大理劍川鶴
慶土軍各隨其地置千戶所悉隸大理衛以洱海蒙化土軍增
置中左千戶所各隸原衛官員就彼遠調○乙卯戶部尚書郝

新言近烏撒烏蒙芒部東川歲賦擅衫不如守貴州雲南軍士
舊例三歲則賜冬布人三疋請如其例賜之上皆從其言○
丙辰以雲南楚雄府知府朱守仁為太僕寺卿時守仁以秩滿
至京特陞是職○丁巳劍川地震○置大同中左右前後五
屯衛時上以代王之國大同糧餉艱遠復命立衛屯種以紓
轉運之勞勞戊午冊周王第二子有為勳汝南郡王○以袁容為京
人所儀賓尚皇孫女永安郡主郡主今上長女容都督洪之子也
多庚申廣西右江歸德州土官黃碧言思恩州知州岑永昌隱
匿五縣民不供賦役仍用故元印章上以其不奉朝命時左
都督楊文方總兵討奉議等處乃令右軍都督府諭文使相機
討之○辛酉遣使諭征南將軍左都督楊文凡獲奉議等處蠻
寇軍器俟班師之日給與新運衛所軍士餘收貯王府俟廣西

都司各衛缺用則分給之○四川貴州宣慰使安的遣把事阿沙貢馬賜以文綺鈔錠○命戶部令事廣東北海北二提舉司運益八十五萬餘引至廣西桂林以給商人之入粟者且以先定納米三石太重令減其半以便商人○是月重定宮官六尚品職及內官監司庫局與諸門官并東宮六局王府承奉等官職秩尚宮局尚宮二人正五品掌導引中宮總司記司言司簿司闈四司之官屬凡法尚事物出納文籍皆印署之司記二人正六品典記二人正七品掌記二人正八品司記掌印宮內諸司簿書出入錄目審而付行典記掌記佐之女史六人掌執文書司言二人正六品典言二人正七品掌言二人正八品司言掌宣傳奏章啟之事典言掌言佐之女史四人掌執文書司簿二人正六品典簿二人正七品簿掌二人正八品司簿掌掌人名籍庫賜之事

典簿掌簿佐之女史六人掌執文書司關六人正六品典關六
人正七品掌關六人正八品司關掌宮闈管鑰之事典闈掌
闈佐之女史四人掌執文書尚儀局尚儀二人正五品掌禮樂
起居總司籍司樂司賓司贊四司之官屬司籍二人正六品典
籍二人正七品掌籍二人正八品司籍掌經籍教授筆札凡按
之事典籍掌籍佐之女史十人掌執文書司樂四人正六品典
樂四人正七品掌樂四人正八品司樂掌率樂人習樂陳縣附
擊進退之事典樂掌樂佐之女史二人掌執文書司賓二人正
六品典賓二人正七品掌賓二人正八品司賓掌朝見宴會賞
賜之事典賓掌賓佐之女史二人掌執文書司贊二人正六品
典贊二人正七品掌贊二人正八品司贊掌朝見宴會贊相之事典
贊掌贊佐之女史二人掌執文書彤史二人正六品掌后妃群

妾御於君所書其日月尚服局尚服二人正五品掌供內服用
采章之數總司寶司衣司飾司杖四司之官屬司寶二人正六
品典寶二人正七品掌寶二人正八品司寶掌珍寶符契圖籍
典寶掌寶佐之女史四人掌_執文書司衣二人正六品典衣二人
正七品掌衣二人正八品司衣掌衣服_首飾典衣掌衣佐之女使
四人掌執文書司飾二人正六品典飾二人正七品掌飾二人
正八品司飾掌膏沐巾櫛器玩之事典飾掌飾佐之女史二人
掌執文書司杖二人正六品典仗二人正七品掌仗二人正八
品司仗掌羽儀仗衛之事典仗掌仗佐之女史二人掌執文書
尚食局尚食二人正五品掌供膳羞品齊之數總司膳司醢司
樂司饌四司之官屬凡進食先嘗之司膳四人正六品典膳四
正七品掌膳四人正八品司膳掌割烹煎和之事典膳掌膳佐

之女史四人掌執文書司與^與二人正六品典與^與二人正七品掌
與^與二人正八品司與^與掌輿傘繖扇羽儀之事典與^與掌輿左之女
史二人掌執文書司苑二人正六品典苑二人正七品掌苑二
人正八品司苑掌園苑種植蔬果之事典苑掌苑佐之女史二
人掌執文書司燈二人正六品典燈二人正七品掌燈二人正
八品司燈掌燈燭膏火之事典燈掌燈佐之女史二人掌執文
書尚功局尚功二人正五品掌女功之程課總司製司珍司絲
司計四司之官屬司製二人正六品典製二人正七品掌製二
人正八品司製掌衣服裁製縫線之事典製掌製佐之女史四
人掌執文書司珍二人正六品典珍二人正七品掌珍二人正
八品司珍掌金玉寶貨之事典珍掌珍佐之女史六人掌執文
書司絲二人正六品典絲二人正七品掌絲二人正八品司絲

掌絲物繒錦絲染之事典絲掌絲佐之女史六人掌執文書司計二人正六品典計二人正七品掌計二人正八品司計掌度支衣服飲食薪炭之事典計掌計佐之女史四人掌執文書宮正司宮正一人正五品掌糾察宮闈責罰戒令之事司正二人正六品典正四人正七品女史四人掌執文書官監十一曰神宮曰尚寶曰孝陵神宮曰尚膳曰尚衣曰司設曰內官曰司禮曰御馬曰印綬曰直殿監皆設太監一人秩正四品左右少監各一人秩從四品左右監丞各一人秩正五品典簿一人秩正六品神宮監掌洒掃太廟殿庭廊廡尚寶監掌御寶璽勅符將軍印信孝陵神宮監掌洒掃殿庭及栽種果木蔬菜之事尚膳監掌供養奉先殿并御膳與宮內食用之物及督光祿司供奉宮內諸筵宴飲食之事尚衣監掌御用冠冕袍服履舄靴鞞

之事司設監掌御用車輦床榻衾褥帳幔諸事內官監掌成造
婚禮粧奩冠馬傘扇衾褥帳幔儀仗及內官內使貼黃諸造作
并宮內器用首飾與架閣文書諸事司禮監掌冠婚喪祭禮儀
制帛與御前勘合賞賜筆墨書畫并長隨當差內使人等出門
馬牌等事及督光祿司供應諸筵宴之事御馬監掌御馬及諸
進貢并典牧所關收馬騾之事印綬監掌誥券貼黃印信選簿
圖書勘合符驗信符諸事直殿監掌洒掃殿庭樓閣廊廡之事
又設長隨奉御秩正六品各門官七掌晨昏啓閉關防出入曰
午門曰東華門曰西華門曰玄武門曰奉天門曰左順門曰右
順門門皆設官二人門正一人秩正四品門副一人秩從四品
設司二曰鍾鼓曰惜薪司皆設司正一人秩正五品左右司副
各一人秩從五品鍾鼓司掌祭樂及御樂并宮內宴樂與更漏

早朝鐘鼓諸事惜薪司掌宮內諸處炭炭之事局庫九局有六
曰兵仗曰內織染曰針工曰巾帽曰司苑曰酒醋麵庫有三曰
內承運曰司鑰曰內府供用每局庫皆設大使一人秩正五品
左右副使各一人秩從五品兵仗局掌御用兵器并提督匠役
造作刀甲之類及宮內所用梳篦刷牙針剪諸物內織染局掌
染造御用及宮內應用段匹絹帛之類針工局掌成造諸婚禮
服裝付內官監收用及造內官諸人衣服鋪蓋諸事巾帽局掌
造內官諸人紗帽靴襪及預備賞賜巾帽諸事司苑局掌宮內
諸處蔬果及種田之事酒醋麵局掌內官諸人食用酒醋麵糖
諸物內承運庫掌收支段匹金銀珠玉象牙諸寶貨之物及同
司鑰庫掌鈔錠之數司鑰庫掌各門鎖鑰及收支錢鈔之事內
府供用庫掌御用香米及內用香燭油米并內官諸人飲食果

實之類其東宮典璽典藥典膳典服典兵典乘六局各設局郎一人秩正五品局丞二人秩從五品惟典璽局增設紀事奉御秩正六品典璽局掌璽寶翰墨諸事典藥局掌同御醫修合藥餌供進湯液之事典膳局掌供進膳羞典服局掌冕弁冠帽袍服佩刀靴鞵諸物典兵局掌甲冑戈矛矢刀劔諸物典乘局掌車馬之事其親王府承奉司掌王府諸事凡事則呈長史司并護衛指揮使司行之與內官衙門不相統攝設承奉正秩正六品承奉副秩從六品所三曰典寶曰典膳曰典服典寶掌王之寶設典寶正一人秩正六品副一人秩從六品典膳掌飲膳之事設典膳正一人秩正六品副一人秩從六品典服掌冠冕袍服諸事設典服正一人秩正六品副一人秩從六品門官二人掌王城宮殿門啓閉關防出入設門正秩正六品門副秩從

六品設內使十人司冠一人司衣三人司佩一人司履一人司
藥二人司矢二人又各公主位下設中使司掌府中諸事司正
司副各一人皆雜職

大明太祖聖神文武欽明啓運俊德成功統天大孝高皇帝實
錄卷之二百四十一

明太祖高皇帝實錄卷之二百四十二

洪武二十八年閏九月壬戌朔○癸亥皇弟四十五孫盤斌生
寧王世子也○夜有星青白色尾跡有光起自紫微垣內出聞
闕門東北行至玄武旁沒○乙丑熒惑犯東咸○丁卯吏部尚
書崔善以受賄當死其父謙訴于朝乞宥子死從軍終身以贖
命宥之降為南寧府宣化縣知縣○遣使諭征南將軍左都督
楊文等近聞奉詔兩江溪洞等處林木陰翳蛇虺遺毒草莽中
雨過毒流溪澗飲之令人死師入其地凡行營駐劄勿飲山溪
水泉恐餘毒傷人宜鑿井以飲爾等其慎察之○壬申遣行人
林英賞播州宣慰使司及興隆等衛所征進有功將士并上兵
凡二萬三千三百六十一人鈔一十七萬三千四百四十一錠
○太白入角宿○癸酉征南將軍左都督楊文等自廣西進兵

發廣西都司并護衛官軍二萬人及調田州府泗城等州土兵
三萬八千九百人從征來議等處○以福建都指揮使司各衛
所半深武職陞授指揮千百戶鎮撫等官凡六十四人○己卯
湖廣沅州等衛指揮僉事李貞等率兵討沅州作耗苗賊平之
斬首三千七十餘級禽獲四千二十人○庚辰廣西慶遠府思
恩縣都亮等洞蠻賊莫父練等一千五百餘人作耗攻掠縣治
劫殺官民取倉庫錢糧詔廣西都指揮使司發兵討捕尋剿平
之○免壯平霸州文安縣夏稅先是文安縣言去歲雨滂傷民
田稼 上命戶部遣官覈實免其稅○辛巳壘壁陣星珠折復
聚○壬午兩 今上長子高熾為世子○兩兵馬指揮張麟女
為世子高熾妃之徒靖州會同縣蠻洞民常通搖賊者徒茂大
同計男女一千二百五十二人各賜衣三件○丁亥鎮遠寇長

晉等處苗蠻作亂鎮遠衛指揮使司發兵討之指揮萬繼百戶
吳彬等戰死指揮許能聞之即率兵會偏橋等衛官軍擊敗其
衆斬首七十三級禽獲三十八人餘衆散走○戊子賜京衛軍
官命婦帛○己丑賜府軍等衛習技幼軍八百四十九人衣三
件○庚寅詔更定親王歲賜祿米先是上謂戶部尚書郁新
等曰朕今子孫象盛原定親王歲用祿米各五萬石今天下官
吏軍士亦多俸給彌廣其斟酌古制量減各王歲給以資軍國
之用至是戶部議更定親王歲給祿米萬石郡王二十石鎮國
將軍一千石輔國將軍八百石奉國將軍六百石鎮國中尉四
百石輔國中尉三百石奉國中尉二百石公主及駙馬二千石
郡主及儀賓八百石縣主及儀賓六百石郡君及儀賓四百石
縣君及儀賓三百石鄉君及儀賓二百石皇太子次嫡子并庶

子既封郡王必俟出閣然後歲賜與親王子已封郡王者同女
俟及嫁然後歲賜與親王女已嫁者同郡王嫡長子襲封郡王
者歲賜比始封郡王減半支給 上于是重定祖訓錄名為皇
明祖訓其目仍舊而更其歲戒章為祖訓首章 以是編之
作將垂之萬世命大書揭于右順門內西南廊下朝夕諦覽斟酌
損益久而後定既而遣使召諸王至京諭以量減祿米之故
且以皇明祖訓賜之○工部臣言各處續開爐冶今已三年而
內庫見貯鐵凡三千七百四十三萬餘斤 上以庫內儲鐵已
鉅詔罷各處鐵冶令民得自採煉而歲輸課程每三十分取其
二○辛卯戶部尚書郁新言親王歲未既有定議請令有司如
數給之 上曰晉 燕楚蜀湘給與如數代肅遠慶寧谷遠在
邊地民少賦薄歲且給五百石齊府千石嗣秦王幼應用未敷

有司月進周府且未給各府罷給及多寡不齊者特出一時權
制云○是月葬秦愍王○雲南臨安府貢生員趙仁等入國子
監
冬十月辛卯朔享太廟○癸巳上以子孫蕃衆命名之際慮
有重複乃於東宮諸王世系各擬二十字每一字為一世以某
字為命名之首其下一字則臨時取義以為二名編入玉牒至
二十世後復擬續增○命前軍都督府給安德鳳臺等門守門
軍士七百餘人絹布○甲午賜天策等衛欽仕指揮千百戶鎮
撫三百餘人麥有差○乙未賜功臣五府六部官宴于華蓋殿
○己亥賜錦衣等衛操練軍馬萬四百餘人布絹各一匹○庚
子國子生劉簡以父坐事當死乃上書言臣祖父母俱年踰七
十止生臣父一人無他兄弟侍養父死則祖父母無所歸矣書

奏宥之○征南將軍左都督楊文等師至奉議州蠻寇聞官軍至悉竄入山林據險自固文督諸將分兵捕之復調叅將劉真等領兵分道攻南丹叛酋○命北平都指揮使盛熙為中軍都督府都督同知○士寅遣鎮撫顧忠賞畢節普定二衛征進獲功將士二千二百人鈔一萬一千六百七錠○禮部臣言百官朝叅賜食實出厚恩緣職事衆多供億為難請罷賜從之先是每旦視朝奏事畢賜百官食 上御奉天門或華蓋武英等殿公侯一品官侍坐於門內二品至四品及翰林院等官坐於門外其餘五品以下官於丹墀內文東武西重行列位贊禮贊拜叩頭然後就坐光祿司進膳案後以次設饌食罷百官仍拜叩頭而退率以為常至是始罷之○癸卯冊光祿少卿馬全女為皇太孫光熉妃○先是兵征龍州趙宗壽以安南與龍州接壤遣

前刑部尚書楊靖往諭安南輸糧八萬石至龍州助軍餉至是
靖奏言臣至安南諭旨其國相黎一元等咸言本國地狹民稀
田賦僅可自給願輸米一萬石餘以金千兩銀二萬兩代輸且言
昔歲輸米臨安臨安可通舟楫止運五千石猶不易致今龍州
陸道艱險乞止運至憑祥洞臣諭令出米二萬石運至沱海江
次沱海江去龍州程纔半日因詢及沱海村實龍州所屬江闊
四十丈舟棹可達丘溫兩岸地勢崎險非可儲糧已令龍州造
浮橋運輸其王年幼語言不通政事皆為國相黎一元與其子
澄所專狙詐百出頗聞趙宗壽已蒙恩宥是以觀望如此時宗
壽已服罪謝過大軍移征向武等諸蠻上迺遣行人諭靖令
運所輸米二萬石餉給奉議向武軍其代輸金銀則還之○平
奉議州蠻寇初征南將軍左都督楊文等駐師奉議州之東南

分兵追捕賊黨且遣人招降其脇從者賊皆焚廬舍入山谷憑險阻立柵自守文督將士屢攻破之賊衆潰散左副將軍韓觀等遂分兵追討都康向武富勞上林諸州縣破其更吾蓮花大藤峽等寨斬賊首黃世鐵并其黨一萬八千三百六十餘人賊屬八千二百八十七人焚死男女四百三十四人招降蠻民復業者六百四十八戶徙置象州武仙縣蠻寇遂平時兵部尚書欽仕唐鐸叅議軍事以朝廷嘗命征進畢日置衛守之乃會諸將相度山川形勢置奉議等衛并向武河池懷集武仙賀縣等處守禦千戶所設官軍鎮之事聞詔從其言○夜太陰犯昴宿○丙午湖廣衡州衛指揮使司指揮僉事張大有以罪誅以千戶朱真為指揮僉事先是洞蠻盤滿仔等叛大有率兵捕之遣千戶康寧畧白水洞仍分兵三道搜捕寧領軍至小塘遇賊戰

死官軍死者二十餘人。大有按兵不敢真等由別道分擊。敗之。俘獲七十餘人。并降隣境流民男女一百五十餘口。賊平。奏功。乃下大有獄。以失律伏誅。遂以真為指揮僉事領衛事。○夜太陰犯井宿。○戊申詔總兵官左都督楊文置龍州軍民指揮使。司調副象衛官軍築城守禦。○夜太白犯東咸。○辛亥。上謂兵部臣曰。江淮養馬之民。遇有馬死。有司令其買補。乃去家離業。購於遠方。至有歷年不返。斃于道路者。朕甚憫之。其令太僕寺凡缺馬者。免其償。○乙卯。應天府溧陽縣知縣盧何生言。本縣荒熟田計一萬三千二百七十四頃。丁男七萬四千六百餘。若量力均種。則官不缺。租民有恒產。上敕戶部議行之。戶部言。若附近田地。令其量力均種。如僻遠不便於民者。宜候生齒。蓄息以漸開耕。從之。○丙辰。置淮安府支家河至安東海州。贛

榆縣瀕河水驛五遞運所三罷山陽縣淮北下關至贛榆廬家
莊陸路遞運所六先是山陽縣民夏比言本縣至贛榆瀕河水
路四百餘里已通舟楫如罷車站改造舟船置遞運所庶客使
便於往來於是遣使驗其道里遠近置水驛五遞運所三仍以
淮北下關六遞運所民夫免役舊役夫一千五百六十人至是
五驛三所減其夫之半人稱便焉乙丁己以李讓為宗人府儀
賓尚皇孫女永平郡主 今上第二女讓指揮僉事達之子也
○己未禮部言今天下僧道數多皆不務本教宜令赴京考試
不通經典者黜之詔從其言年六十以上者免試○是月給北
平山西二都司軍士一十二萬九千一百餘人絹布共五十二
萬三千九百匹綿花一十九萬三千六百斤○緬國王卜剌浪
遣使桑乞刺查貢方物因言百夷思倫發屢出兵侵奪其境土

之故 上謂廷臣曰遠夷相爭蓋其常事然中國撫馭四夷必使之無事當遣使諭解之○雲南都指揮同知王俊城廣南土官僕貞佑叛禽之時俊領雲南後衛官軍至廣南築城建衛貞佑疑不自安因結羣蠻據山寨拒守俊遣人招之負固不服輒伏蠻兵草莽中劫掠覘視官軍進退俊乃與將佐謀曰貞佑小醜如螻蟻耳然敢拒命者與諸寨羣蠻互為聲援故也今彼大寨據險峻固守故各寨恃之皆有易心以為官軍不敢近兵法曰善攻者敵不知所守宜出其不意亟取之彼各自救不暇貞佑必禽矣乃遣指揮同知殿慶等分兵攻各寨自將取貞佑又以兵扼間道絕其救援於是諸寨悉破賊衆潰散貞佑窮蹙就禽械送京師因命慶署衛事鎮守

大明太祖聖神文武欽明啓運俊德成功統天大孝高皇帝實
錄卷之二百四十二

明太祖高皇帝實錄卷之二百四十三

洪武二十八年十一月辛酉朔冬至上御奉天殿受朝賀大宴羣臣賜國子監生宴于國學壬戌燕命中都留守司屬衛士卒於洛河山採取煤炭給軍士造器械以省民力○癸亥侍臣進講尚書無逸篇上曰自昔有國家者未有不以勤而興以逸而廢勤與逸理亂盛衰所繫也人君當常存惕厲不可少怠以圖其終成王之時天下宴然周公輔政乃作是書反覆開論上自天命之精微下至生民稼穡之艱難以及閭里小民之怨詛莫不具載周公之愛君先事而慮其意深矣朕每觀是篇必反覆詳味求古人之用心嘗令儒臣書于殿壁朝夕省閱以為鑒戒今日講此深愜朕心聞之愈益警愾○湖廣湘鄉縣言舊有鹽井本處人民私煎販鬻宜官令官司開煎徙之○甲子詔從

直隸蘇州等十七府州及浙江等六布政使司所屬府州縣小
民二萬戶赴京占籍於上元寧江寧二縣以充各倉夫役名曰倉
脚夫○乙丑遣使勅陝西行都指揮使司曰西涼甘肅山丹屢
被胡虜入寇宜留精銳軍馬備之但時于境上巡邏不可深入
其地若春秋耕獲之時尤宜嚴加守備○貴州都指揮使司都
指揮同知顧成等討西堡土官阿傍平之梟其首以警衆并擒
殺羣蠻五千三百二十六人獲馬二十四疋稻三千七百三十
八石○己巳置道州寧遠衛指揮使司先是知州徐士銘奏道
州僻在萬山邊寧兩廣東接常寧大小猛洞南抵九疑山橫嶂
九十六渡溪源西隣懸田平洲北連灌陽永猛等源國初遣兵
三千守禦後調發二千止存千人洪武二十一年山賊何女子
逃卒杜回子與強蠻劫掠居民嘗調軍勦捕至則潰散退則復

聚蓋守禦兵少不能制敵乞置軍衛屯守庶幾民獲安業詔從之至是立衛焉○乙亥辰刻日上赤氣一道長五丈餘須臾又生直氣一道青赤色鮮明未散又生背氣一道青赤色鮮明又生淡重半暈白虹二段貫兩珥又彌天貫日至巳時漸散○夜月食○禮制集要成先是上謂翰林學士劉三吾等曰朕自即位以來累命儒臣歷考舊章上自朝廷下至臣庶冠婚喪祭之儀服舍器用之制各有等差著為條格俾知上下之分而姦臣胡惟庸等擅作威福謀為不軌僭用黃羅帳幔飾以金龍鳳文通者逆賊藍玉越禮犯分床帳護膝皆飾金龍又鑄金爵以為飲器家奴至於數百馬坊廊房悉用九五間數而蘇州府民顧常亦用金造酒器飾以珠玉寶石僭亂如此殺身亡家爾等宜重加考定以官民服舍器用等第編類成書申明禁制使各

遵守敢有仍前借用者必寘之法成造之人如之至是書成其
日十有三日冠服房屋器皿傘蓋床帳弓矢鞍轡儀從奴婢俸
祿奏啓本式署押體式服制頒布中外○命魏國公徐輝祖往
鳳陽長興侯耿炳文往陝西錦衣衛指揮劉智往鎮江訓練軍
馬○參將劉真等攻破南丹州執土官知州莫金并俘其衆復
遣寶慶衛指揮孫宗等分兵擊巴蘭等寨蠻獠懼焚寨遁去官
軍追捕斬之蠻地悉定○戊寅後軍都督僉事朱榮言東昌等
三府屯田遺民五萬八千一百二十四戶租三百二十二萬五
千九百八十餘石綿花二百四十八萬斤右軍都督僉事陳春
言彰德等四府屯田凡三百八十一屯租二百三十三萬三千
三百一十九石綿花五百二萬五千五百餘斤○己卯門兵馬
指揮趙恩禮女為郡王允嬭妃○金吾後衛軍任曾兒妻傅氏

一產三男事聞循例給賜米鈔○癸未北平都指揮使司言燕
山等十七衛屯田凡一萬四千三百六十二人租十萬三千四
百四十餘石○甲申置灌陽守禦千戶所初灌陽隸湖廣因廣
西平川等三十六源猛賊作亂攻劫縣治詔寶慶衛指揮孫宗
總兵討平之縣丞李原慶因奏灌陽去湖廣遠隸廣西為近遂
以灌陽隸桂林府設千戶所命廣西都指揮同知陶瑾領兵築
城守之○暹羅斛國嗣王蘇門邦王昭祿群膺遣其臣崇婆郎
直事刺等表貢方物且告國王參烈寶毘牙唎哩哆囉祿喪詔
賜使者及通事柰詩俚曾等鈔有差○都勻衛豐寧長官司三
藍等寨并鐵梁平州西涼蠻賊達管等作亂時都指揮同知顧
成破土官阿傍還遂移兵討平之

十二月庚寅朔○辛卯夜有星如盤大黃白色曳尾光燭地起

自翼宿東南行至平星沒○壬辰 上諭戶部官曰方今天下
太平軍國之需皆已足用其山東河南民人田地桑棗除已入
額徵科自二十六年以後栽種桑棗果樹與二十七年以後新
墾田地不論多寡俱不起科若有司增科擾害者罪之○癸巳
車里軍民宣慰使刀選荅以賜詔命遣其弟刀吾等貢方物謝
恩詔賜刀吾等文綺鈔有差○甲午詔代遼寧各四府臨邊護
衛常存步卒千人騎士五百人及守城者五百人餘皆屯種○
乙未方番長官方文康來朝貢馬○丙申詔邊境築城軍士停
役一年以其連歲勞苦故也○丁酉土官刀板冕遣其下招板
阿敏曠等貢紅白西洋布疋賣壁衣手中剪絨單及象牙白檀
香等詔賜其使文綺鈔○辛丑征虜前將軍指揮僉事胡冕等
捕彬柱山賊餘黨禽殺一千二百餘人其地悉定遂分遣指揮

僉事宋晟率兵至兩廣境上追捕潭源諸洞蠻賊○甲辰太陰掩軒轅○丙午以鳳陽中衛指揮僉事趙壁為皇陵衛指揮使司指揮僉事壁鳳陽人與上同里閩龍潛時常幸其家○戊申征南將軍左都督楊文等以平蠻捷聞凡禽戮猛蠻二萬八十餘人獲馬五十匹牛二千五百八十六頭又獲印五顆誥勅三道遂詔文等班師○廣東崖州寧遠縣遷家村賊人羅危等劫掠人民都指揮同知花茂統兵勦捕殺獲賊衆三百五十七人○己酉朝鮮國王李旦遣使臣柳均等奉表貢方物進賀明年正旦上見其辭不遜謂禮部臣曰以小事大禮重修辭前者朝鮮王李旦數生釁端已嘗詰問彼謝罪之使方歸而侮慢之辭又至朕非不能伐之古人有言不勤兵於遠所以不即興師者以此今留其使者可移咨李旦令遣撰文者至方歸之使

知生黨之由，珣言表文是其國門下評理。鄭道傳所撰，遂命遣道傳未幾，釋珣還。○庚戌，詔賞貴州從征將士。先是，土官阿傍等叛，都指揮同知顧成統兵討之。上所部軍功至京，上命賞詣軍中，驗功高下給之。○辛亥，洪武志書成，其書述都城山川地里、封域之沿革、宮闕門觀之制度，以及壇廟、寺宇、街市、橋梁之建置，更易靡不具載，詔刊行之。○太僕寺上羣生馬駒之數是歲凡九千四百七疋。○乙卯，湖廣布政使司上所屬郡縣菓樹之數計栽過桑、棗、柿、栗、胡桃等樹凡八千四百三十九萬株。○戊午，詔遣內使趙達、朱福等使暹羅、斛國、祭故王、參烈寶、昆牙、唵哩、哆囉祿、賜嗣王、蘇門、那王、昭祿、羣、膺、文、綺、四疋、羅、四疋、毳、絲、布、四十疋、王妃、文、綺、四疋、羅、四疋、毳、絲、布、十二疋、勅諭之曰：朕自即位以來，命使出疆，周于四維，歷諸邦國，足履其境。

者三十六聲聞于耳者三十一風殊俗異大國十有八小國百四十九較之於今暹羅爲最近邇者使至知爾先王已逝王紹先王之緒有道于邦家臣民歡懌茲特遣人祭已故者慶王紹位有道勅至王其罔失法度罔淫于樂以光前烈其敬之哉○已未享太廟○是歲開天下郡縣塘堰凡四萬九百八十七處河四千一百六十二處陂渠堤岸五千四十八處先是遣國子生人才分詣天下郡縣集吏民乘農隙修治水利至是工成○重建朝天宮感先是建是宮凡正旦 聖節冬至群臣習朝賀禮於其中 上以其制度未備故命重建之至是成詔右演法曹希鳴住持

大明太祖聖文武欽明啓運俊德成功統天大孝高皇帝實
錄卷之二百四十三

明太祖高皇帝實錄卷之二百四十三卷終

大明太祖高皇帝實錄卷之二百四十四

洪武二十九年春正月庚申朔上御奉天殿受朝賀禮部
晏於奉天殿○壬戌以詹事府丞杜澤為吏部尚書左春坊左
贊善門克新為禮部尚書澤莒州沂水人繇本縣儒學訓導授
司經局試校書郎詹事府丞至是與克新並陞尚書○夜有流
星青赤色起自氐宿東行至雲中沒○甲子享太廟○乙丑
上罷朝從容問左右民間事禮部尚書門克新對曰 聖澤深
廣天下之民各安生業幸蒙至治 上曰雖堯舜在上不能保
天下無窮民若謂民皆安業朕恐未然何得遽言至治克新對
曰 聖德謙虛不自滿假天下之民受福無窮矣○丙寅赦復
泗州 祖陵及徐王楊王守墳戶○己巳琉球國山北王攀安
知道其臣善佳古耶中山王蔡度遣其臣典簿程復等各奉表

賁馬及方物詔賜來使三十七人鈔二百四十七錠○旌表蘇州府吳縣民呂原哲妻錢氏貞節○壬申大祀天地于南郊○乙亥朝鮮國王李旦遣其臣知門下府事鄭總來請印誥上弗許謂禮部尚書門克新曰古昔帝王列聖相承建邦錫土撫安華夏其四夷外蕃風殊俗異各有莫長自置其民初不以中國之法令治之此內外遠近之別也今朝鮮僻在東隅遠隔山海朕嘗勅其禮從本俗使自為聲教來則受之去亦勿追今來請印誥實非誠心固難與之爾禮部其咨李旦使知朕意○丙子命致仕千戶尹林為四川都指揮僉事○詔脩西安城中水渠引龍首渠水注之覆以石甃以障塵穢計十家作渠口一以便汲水舊西安城中多苦水渠成民獲其利○置北平易州盤石驛大同廣昌縣秀嶺驛靈丘縣蒼峰驛○丁丑定擒獲倭賊

陞賞格凡各衛指揮獲倭船一艘及賊者僉事陞同知同知陞
指揮使仍賞白金五十兩鈔五十錠千戶擒獲者陞指揮僉事
百戶擒獲者陞千戶其賞俱與指揮同在船軍士能生擒及殺
獲倭賊一人者賞白金五十兩將校軍士與倭賊陸地交戰能
生擒或殺獲一人者賞白金二十兩鈔二十錠○庚辰太陰犯
心前星○辛巳以散騎舍人湯醴為左軍都督府都督僉事醴
信國公湯和庶子也○以王寧襲豹韜衛指揮僉事寧父英先
任豹韜衛指揮僉事嘗領兵征廣西峒蠻以杖屬官致死得罪
誅寧例當遣戍上念其祖智嘗立軍功乃命寧襲職○夜流
星青白色起自天津東行至游氣中沒○乙酉撒馬兒罕遣回
回阿刺馬丹等二十人來貢馬二百四十餘匹賜鈔五千九百
餘錠○以遼東都指揮同知劉遂為陝西都指揮使遂廬州人

父德以軍功累官潞州衛指揮僉事洪武十三年遂始襲職教
從信國公永昌侯北伐有功其女復為嗣秦王妃故命統陝西
軍衛之政○思州宣慰使田琛來朝貢馬賜琛及其從人鈔有
差○貴州清水江蠻人金牌黃等作亂貴州都司發兵捕之攻
破蠻人金牌黃遁去上以叛首賈哈刺未獲下令軍民有能
擒獲者賞白金一千兩其黨能擒獲以獻者免其本罪賞亦如
之○是月改南丹度遠二衛為軍民指揮使司
二月己丑朔緬國復遣使來訴百夷以兵侵其境土○庚寅遣
行人李思聰致古訓使緬國及百夷詔緬國王曰道里險遠山
川阻修風殊俗異此乃天造地設也爾能勤使者涉險遠越隣
邦銜煙突霧晨進昏止異風霜而至中夏可謂難矣古人有云
誠君子將有事于遠友千里之外神交而志通今萬國之外爾

能勤使遠修其好美絕古而惟今然排難解紛之事朕之旨意
恨不一言而止使彼此各罷兵宇樂黎民于市野兩國之民居
處雖分惟存闡市之議是其和也其或忿爭不已天將昭鑒福
善禍淫遲速可待初至爾其着之緬人既聽命遂往詔思倫發
曰朕惟中國古先聖人馭頑禮德各有條章列聖相繼守而行之
故上下相安黔黎樂業諸侯敬畏世祿子孫國祚綿長若列
國敢有憑弱犯寡者則天子發兵以昔之賦賢害民者亦發兵
以伐之暴內凌外則興師以壇之野荒民散則用兵以劑之員
固不服則舉兵以侵之賊殺其親則止其罪以殺之故弑其君
則明其罪以誅之犯令凌政則杜而絕之內外亂鳥獸行則殄
滅之此九伐之法也爾思倫發律以九伐之法宜加憑弱犯寡
之罪何以見之歲以兵寇車里不時侵掠八百恃強犯緬慶瑞

國小民寡而已平之夫中國周臨四夷與諸酋長地里相接然朕未嘗恃強憑凌絕滅其嗣者雲南之地已為我有似乎尚強以取之非也乃元世祖孫梁王者恃元之苗裔匿我有罪納我遁逃誘我邊守是乃不得已而發問罪之師非無故也況元運天更其苗裔不當安處於此爾麓川之蠢初擅興金齒之後次謀景東而寇定邊理當發兵致討朕釋而不較未嘗強爾為約束之邪聽爾自為聲教今又幾年矣近聞蠶食隣邦意在擴土地而擅有其衆又將為我西南之役意未可古中國聖人有云山川地理人物之類迺神器也非人強有必天授然後得之爾思倫發不修隣邦之好三面發兵蠶食諸國其貪也如其謀也如是彼麓川周臨之國始古至今各有主者未嘗合併朕雖不能止爾聽爾自為果天道使然爾以人事應之或者猶可朕

今戒爾守全設或不守全而動若不全虧是為全亡然莫若守全以圖綿長不亦美乎思倫發聞詔怒懼俯伏謝罪願罷兵通其部首刀幹孟叛思聰等以朝廷威德諭其部衆叛者稍退思倫發欲倚使者以服其下強留思聰等又以象馬金寶為餽思聰等為書諭却之以謂中國不以象馬金玉為寶所寶者惟忠臣烈士強兵勇將孝子順孫宜送使者還朝自此不為侵擾斯可以明忠君之心思倫發大喜邊思聰等設晏為樂率其部衆送之境上思聰等還具奏其事且著百夷傳紀述其山川人物風俗道路之詳以進 上以其奉使不失職謂其才可用甚喜之各賜衣一襲○辛卯詔仍給故東甌襄武王湯和家福米三千石○賜陝西緝德衛比試得勝總旗江有孫等九十人錦襪襖袴皮裘狐帽各一事靴鞋各二綱先是 上諭都督府臣曰

北平口外及山西雁門關外苦寒之地守邊士卒其來北試者
雖夏月亦給以衣帽俾歸為禦寒之具其陝西所屬綏德慶陽
寧夏臨洮鞏昌甘肅亦如之故有是賜○四川永成鹽井竈戶
鹽井水涸竭艱於煎辦歲課有虧乞於附近南部縣開煎大成
鹽井以助不足從之○癸巳岳州衛言臨湘等縣民多荒田請
撥官軍屯種從之○夜五鼓有流星青赤色起自騎官南行至
近濁沒○甲午禮部尚書任亨泰奉使安南還降為監察御史
亨泰在安南私市蠻人為僕故降之○陝西行都指揮使司都
指揮俞事張璩言今遠西所統邊衛人稠地狹供給糧儲惟藉
內地轉運况各衛軍士多由罪謫既有壯丁代役而老幼尚同
在營糶食如將此輩聽於黃河以南直抵陝州以北地曠州縣
寄籍屯種每歲供給正軍俟三年後與土著軍戶一體輸租應

後若軍伍有缺就於幼丁內選壯者補役為便又言各衛軍士年七十以上并老疾無丁可代者若留在任虛費糧賞宜令回鄉依親其因罪謫戍守者則令罷役在營自給所缺之伍別調補之 上並從其言惟老疾無親可依者令送至京養贍○丙申征南將軍左都督楊文言廣西新立衛所奉議慶遠二衛水陸並通糧儲足用獨南丹不通舟楫山路崎嶇商人中納鹽糧避遠就近宜令先於南丹輸粟為便先是監察御史嚴震直嘗以為言命戶部定廣西中鹽則例南丹每引納米二石已而減為一石五斗至是因文言又以鹽價太重定南丹每引五斗奉議慶遠一石五斗俱於順便倉所支鹽仍定行鹽地方梧州鹽於田州龍州柳州南寧潯州慶遠思恩太平潯廣西鹽於長沙寶慶衡州永州全州道州桂林衛賣○置慶遠衛軍民指揮

使司左千戶所○丁酉遣官釋奠于先師孔子○戊戌祭大社
大稷○安南陳日焜遣其臣通奉大夫陶全金少中大夫阮應
龍等奉表貢方物賜鈔有差○陝西行都指揮使司都指揮僉
事張豫言肅州衛軍糧每月於涼州衛關給往後二千餘里甚
為勞費請以甘州見收鹽糧支給便又涼州肅州馬驛及遞運
所見仗恩軍多係曾經籍沒之人所以衣食不給往往逃故繼
今請於弛刑編軍之徒免沒家財其見役者再乞人給月糧三
斗 上皆從之仍命給以冬衣○庚子詔給北平遼東山西陝
西都司所屬衛所并護衛儀衛司軍校冬布綿花北平都司布
六十萬匹綿花三十四萬斤遼東都司布五十五萬匹綿花二
十萬斤俱以山東布政司所徵給之山西都司布五十萬匹綿
花十五萬斤以本布政司所徵給之陝西都司布五十萬匹綿

花二十二萬斤以河南布政司所徵給之○辛丑揚州府通州
火焚官民廨舍一千九百間男女死者二十人○壬寅北平都
指揮使司言自二十七年至今年歲調撥山東軍士往古北口懷
安等處繕修城堡者於內宜撥三千七種俟其秋成儲穀于彼
摘留三百守之餘悉發還各衛請如舊例從之○安南以其前
王陳叔明卒遣其臣來告哀 上以叔明篡弒得國諭禮部臣
曰安南自陳叔明逼逐其王陳日煜使不得其死因篡其位廢
置相仍未嘗來告叔明懷姦挾詐殘滅其王自圖富貴不義如
此庸可與乎今叔明之死若遣使弔慰是撫亂臣而與賊子也
異日四夷聞之豈不效尤狂謀踵發亦非中國懷撫外夷之道
也爾禮部咨其國知之○癸卯遣官享先農流星青赤色起自
西南雲中西北行至近濁沒○征虜前將軍指揮俞事胡冕率

兵至柳桂征勦山寇分遣指揮僉事宋晨等討平廣東潭源諸洞及廣西平川增益之地凡斬馘數千餘人生擒賊首呂法子等八人械送京師上以法子等罪不可宥命戮于市將軍胡冕宋晨等雖有平蠻之功而縱殺太過乃遣使諭之曰近者苗蠻叛亂諸洞之民被其迫脅乃命爾等征之意在殲厥兇渠者其脇從爾等乃奮一時之威一舉戮之其中豈無誣誤不得其死者乎朕觀宋太祖時曹彬為將不妄殺一人其後子孫昌盛曹翰殘酷身罹窮窘天道福善禍淫昭然如此爾等既往者不可追矣後當為戒○乙巳旌表南昌左衛軍任騰保妻楊氏貞節○詔發安東瀋陽各衛恩單三千六百餘人往戍甘肅人賜鈔五錠○丙午常州府武進縣言本縣犇牛呂城二壩河道淺涸請浚深以為漕運從之○戊申詔遣國子監琉球生三五廟臺

等歸省賜三五卽疊白金七十兩綵段六表裏鈔五十錠寨官
子實那盧疊等鈔二十錠綵段一表裏○辛亥廣西都指揮使
司都指揮僉事蔣成率兵討蠻寇卒于道詔遣官致祭仍以米
布給其家○寧王權言近者騎兵巡^塞見有脫輻道于道上意
胡兵往來恐有寇邊之患 上曰胡人多姦示弱于人此必設
伏以誘我軍若出軍追逐恐墮其計於是勅 今上選精卒壯
馬抵大寧全寧沿河南北覘視胡兵所在隨宜掩擊仍勅周王
櫛令世子有愾率河南都司精銳往北平塞口巡邏○壬子陝
西行都指揮使陳暉等遣使入奏言韃靼有宗他力者挈其家
屬十餘口馬二十匹來降臣等訊之言失刺罕之地有偽王撒
力失結偽國公完者不花失包^失之地有偽國公末台并其屬
三千餘人於是命暉及同知馬溥率甘州等衛兵五千人討之

以宗他力為鄉導兵抵其地擊敗撤力失結等獲男女一千四百七十餘人殺院使乞力禿爾等一百三十餘人招降七百餘人得馬駝牛羊七千六百事聞詔來降韃靼送京師馬駝牛羊賜戰士○甲寅命給恩軍月糧先是編發恩軍至欽州千戶所俾有司遂中續食比至其地例以贖罪為軍無月糧日給為艱廣水都指揮使司以言詔有家四口以上者月給米一石三口以下六斗無妻子者四斗○乙卯遂昌縣民有犯法者官逮之不獲發兵捕之復拒殺官軍縣人繆宗等六人集壯士捕而殺之有司以宗等擅殺人逮繫至京上曰頑民犯法竄匿又復拒殺官軍其罪重矣命宗等赦之為良善除害非擅殺也命釋之給道里費遣還○監察御史辛彥德出按事道經彭澤聞民間歲歎官吏不以時存恤至有鬻其兒女者還奏之上曰縣

令於民最親民乏食鬻及兒女乃坐視其困恤不加恤而又不
以上聞為民父母者果如是耶命杖之令發粟賑其民○是月
田州府上隆州知州岑永通遣其子岑女等貢馬及方物詔賜
卹安等文綺衣服

大明太祖聖神文武欽明啟運俊德成功統天大孝高皇帝實
錄卷之二百四十四

天明太祖高皇帝實錄卷之二百四十五

洪武二十九年三月戊午朔四川永寧州土官刺他男刺馬逃等酉陽宣撫司土官冉興邦等貢方物賜鈔有差○瀋陽衛火延燒倉庫及軍民廬舍○遣官往四川天全六番招討司覈實洪武二十四年至二十六年茶課○庚申命中軍都督府都督僉事朱信前軍都督府都督僉事宣信總神策橫海蘇州_太倉等四十衛將士八萬餘人由海道運糧至遼東以給軍餉凡賜鈔二十九萬九千九百二十錠○辛酉召楚王禎湘王栢至京師○壬戌給廣東及貴州平越等處完聚鞮鞞軍士七百餘戶鈔有差○甲子 今上率諸軍北至徹徹兒山遇胡兵與戰擒其首將孛林帖木兒等數十人追至兀良哈瓦城遇哈剌兀復與戰敗之遂旋師○丙寅廣東揭陽縣言近改設蓬州千戶所

修築城池侵民田地詔除其租稅○命國子監學正吳起署祭酒博士楊崧署司業學錄張毅署監丞事 上面諭之曰太學國家育材之地天下人材所聚為之師者不專務記問博洽在手檢身飭行守道尊嚴使之敬慕日化於善則賢才衆矣蓋師嚴則道尊道尊則德立昔胡翼之為太學師嚴條約以身先之此最可法○賜在京文職官五品以上及翰林院中書舍人給事中王府長史紀善高麗布人一匹○丁卯掌雲南都指揮使司都督僉事瞿能來朝賜白金二百兩鈔三百錠文綺帛各十匹○楚王楨湘王柏還國○戊辰造三山門外石橋成賞後夫二千餘人胡椒各一斤蘇木各五斤○己巳賜在京旗手等衛軍士二十二萬二千餘人良布五十五萬三千九百餘匹○庚午 上以清州古城地勢寬廣廼苗蠻出入擾邊之處命設千

大所守之。○令吏民有犯流罪者，覓京師城各一尺。○賜京衛指揮千戶以下麥三十石，其監工致仕官一體給賜。○辛未命山丹衛致仕百戶楊義為遼東都指揮僉事，義巢縣人。故元帥俞昭妻弟也。因征戰以傷致疾，已令致仕。還鄉，至是來朝。上見而閔之，故有是命。○四川黃祿井歲煎鹽數多，不及原額，有司請開煎小德井，監以助不足，從之。○命賜天策衛往廣西駕船軍士凡一千五百二十人鈔七千七百二十六錠。○壬申，行人司副楊砥言孔子廟庭從祀諸賢皆有功世教，若漢楊雄、匡事賦、莽、忝，列從祀以董仲舒之賢反不與為事，于名教甚為乖錯，宜黜雄，進仲舒，則祀典明矣。上納其言，命去雄，祀仲舒。○癸酉，征虜前將軍指揮僉事胡冕等言，榔桂二州數被猺賊剽掠，其藍山等縣芭離召募等處山谷深遠，乃賊出入之地，宜設

二千戶所分兵屯守廢田無荒間民獲安業從之遂詔冕等還師○甲戌太陰犯房宿第二星○戊寅陝西延安府知府李廣以罪繫獄同知李受奏其勤政愛民乞宥其過從之○詔令湖廣九溪衛設蓋倉庾貯收鹽糧以衛鎮撫領其事○置寧國府南陵縣裁嶺巡檢司○己卯流星赤黃色起自亢宿東行至天市西垣內汶○庚辰給京衛軍士糊楯各一斤蘇木各三斤○賞虎賁等衛從征廣西將士四千九百餘人鈔二萬七千二百二十八錠○清水江中平等寨群蠻聚衆為亂貴州守禦官軍捕之獲從亂蠻人五百械至京師俱宥死給衣謫戍三萬衛○壬午遣行人陳誠立撒里畏兀兒為安定衛指揮使司初自安定王卜煙帖木兒遣使朝貢詔立其酋長為四部給銅印守其地後番將朵兒只巴叛遁沙漠過其地大肆殺掠并奪其印去

由是其部徵弱藍玉西征兵徇阿真州州土酋司徒哈答等懼羣
居山谷不敢出及肅王之國甘州哈答等遣僧撒兒加藏卜等
至甘州見王乞授官以安部屬王為奏請於是遣誠立其部為
安定衛以銅印五十八給之置官屬如諸衛○癸未大爭衛言
屯田軍士多乏農具紅螺山舊有鐵場宜開爐冶造具以給上
曰遠戍勤苦不可重勞其令有司運農器給之○以都督僉事徐
增壽為右軍都督府左都督李增枝為前軍都督府左都督沐
晟為後軍都督府左都督湯醴為左軍都督府都督同知袁宇
為後軍都督府都督同知都指揮使韓觀為右軍都督府都督
同知指揮使李諒為中軍都督府都督僉事○蘇州府崇明縣
實慶觀道童孫宇常言洪武十九年改築城池侵用官民田地
而租稅未除詔悉蠲之○甲申監察御史薇裳直還自廣西言

平樂地廣民稀其遠運之船不給請益臨境民戶以助其後
上曰彼民既困而又重困臨境之民不可其令法司錄有罪之
人買船逸運以自贖○乙酉置廣安千戶所於桂陽縣土橋寧
溪千戶所於藍山縣張家坡時郴州二州民言連歲為徭蠻劫
掠官軍至則遁入山谷退則復聚蓋因守禦兵遠故也乞於各
縣要害之地增置戍兵遂立二千戶所守之○丙戌陝西漢中
府漢陰縣知縣郭昂言人民戶絕者衆田地荒蕪宜免其賦從
之○賜旗手等衛征廣西將士三千九百九十四人鈔二萬一
千八百八十六錠○丁亥增置山東濟陽縣小交村驛以楊宣
驛道里遠故也○以監察御史辛彥德為都察院左僉都御史
夏四月戊子朔東北方天鳴○詔以姚安府境內屯田軍士撥
隸雲南護衛初雲南唯姚安多荒田調岷府護衛軍士屯種立

為中屯千戶所至是仍撥謀雲南護衛○以賈慶衛指揮使孫宗為廣西都指揮使桂林中衛指揮僉事姜旺錦衣衛指揮僉事童勝為都指揮同知永州衛指揮僉事葛森府軍衛指揮僉事焦銘為都指揮僉事初征廣西 上命總兵官都督楊文侍平寇日於諸將中選其材智可任者署都司事至是文以宗等名聞故有是命○己丑享太廟○廣西布政使司言新設南丹奉議慶遠三衛及甯川千戶所歲用軍餉二十餘萬石有司所徵不足以給 上命俱屯田既而奏議衛奏本衛地控蠻峒若俱出屯種設有緩急卒難調用宜以三分守城七分屯田為便 上不許○長興侯耿炳文奏秦州茶馬司不便於互市請遷於西寧命戶部議之○癸巳賜征廣西總兵官都督楊文白金三百兩文綺帛各二十匹鈔百錠副總兵都督同知韓觀白金

百兩文綺帛各十二匹鈔八十錠○甲午羽林左衛百戶林全
征廣西南卅州山寨戰死事聞勅追贈賜布米令工部營葬○
乙未嘗北平都指揮使司事都督趙清言先奉勅撥軍守禦興
河懷來彼無見儲之糧其原操軍士今皆屯種乏人轉輸莫若
于秋成之時就以雲州宣德二屯所收之粟轉運給之况口內
屯軍秋後農隙亦可運糧度利邊圉上可其奏○戊戌中軍
都督何都督食事朱信言比歲海運遼東糧六十萬石今海舟
既多宜增其數上命增十萬石以蘇州府嘉定縣糧米輸往
太倉俾轉運之○己亥罷開封府馮陵十字河龍堂快活林傘
兒三里萬龍及陳州東橋凡八舖○置漢中府沔縣栢林驛青
陽驛仍改沔縣羅村驛為黃隄驛大安驛為金牛驛復徙南鄭
縣中梁驛於沔縣為黃沙驛○庚子禮部奏請請江王庶子輔

國將軍儀仗牙杖一對骨朵一對鞍籠一馬杓一茶褐羅傘一
其夫人冠服珠冠一霞帔大衫一褙子一詔從之○甲辰流星
青白色起自庫樓西南行至雲中沒○太陰犯斗杓第二星○
丙午 上謂侍臣曰朕觀古人於聲色之好亦不能無如公劉
之於貨太王之於色好之不過其度也若太康之盤遊桀紂之
內嬖秦漢以下耽於宮室苑囿及畋獵禱祠奇伎淫巧之類此
好之失其度也好失其度所以敗亡好之雖不至過要之不通
聲色不殖貨利惟成湯得其正也○監察御史王仲和言湘陰
縣丞劉英以生革為鞭長三尺中夾銅錢撻人至皮肉皆裂嘗
出行以巡檢帶出迎怒而撻其妻幾死請逮英罪之 上曰刑
者不得已而用之故聖人常加欽恤惟恐濫及無辜英一縣丞
耳酷虐迺至於此獨不聞劉寬蒲鞭之事哉且律載刑具明有

定制乃棄不用而殘酷如是是廢吾法也難論常律遂逮英至戮之於市○置洱海衛中左十戶所○改貴州都司所屬龍里新添都勻三衛為軍民指揮使司○丁未琉球國中王察度遣其臣隗谷結致等表貢馬二十七匹及方物山南王承察度遣使表貢方物及馬二十一匹其叔汪英紫氏亦遣使吳宜堪彌結致等貢馬五十二匹礪黃七千斤蘇木一千三百斤○戊申置陝西寧夏甘州二羣牧十戶所○甲寅署國子監事學正吳啓言國子師生例以文學優劣分隸六堂邇來皆無甄別高下不分無以激宜考第如例上命魏國公徐輝祖及禮部翰林院官同詣監考試仍令吏部以次錄用毋使淹滯○是月右軍都督府左都督賓正卒正字正卿鳳陽壽州人少為里中韋德成。養子元末德成率鄉兵從上克滁和二州遂度江克太平建

康進兵擊宣州正與有功德成戰沒詔贈昭勇大將軍中翼元帥府副元帥京兆郡侯以正襲職代領其衆從徐達克常州進階懷遠將軍攻下宣州江陰戊戌從上取婺州又從常遇春克衢州從上克江州改授民兵十戶破陳友諒兵于鄱陽湖調天策衛千戶又改雄武衛千戶從傅友德守徐州與李二等戰有功吳元年擢鳳翔衛指揮副使從徐達平中原取沂莒密三州克益都濟南東昌轉下汴梁河南嵩州渡河取磁州廣平通州進克元都招降元將平章謝雪兒等八十餘人獲馬五百餘匹略永平擒元將平章高家奴下真定平太原平陽自河中府渡河追元將孔興等進取塵臺攻鳳翔逐李思齊遂下鞏昌克平涼至定西六盤招降元知院毛翔下臨洮徐達令正招撫土豪趙脫兒孫平章等及馬鞍山以西諸土酋洪武三年五月從

鄧愈克河州留正鎮守時元鎮西武靖王卜納刺等諸酋長擁兵猶衆正遣兵追之於寧河殺獲頗多於是沙家失里與諸酋長遣人來請降正即策馬往諭之酋長皆感悅獻其全部軍馬及元所授金玉印章金牌宣命權臨洮衛世襲指揮同知又招降元宣政院使何鎖南等尋置河州衛以正為指揮使招徠撒里畏吾兒安定王卜煙帖木兒等暨土番朶甘灌頂國師烏思藏諸部奉表朝貢七年改置西安行都指揮使司于河州以正為都指揮使進階驃騎將軍提調朶甘烏思藏都衛正又招降元右丞朶兒只失結等奏置西寧等衛八年改西安行都指揮使司為陝西行都指揮使司正仍為都指揮使九年十月後姓賓氏進階龍虎將軍會川藏戎為盜命衛國公鄧愈討之正從征有功十一年西平侯沐英征西番遣正追襲叛虜朶兒只巴

獲其羊馬輜重而還十二年蕪領寧夏衛事至則修築漢唐舊渠令軍士屯田引河水灌田數萬餘頃兵食以足十三年從西平侯沐英征北至和林擒元平章脫火赤知院愛足部衆萬餘人十四年從西平侯經略公主山寨殲其戍卒取全寧四部十五年除四川指揮使會河西土官故元左丞刺瓦蒙藏卜等來降唯松茂等州西羗未附正調兵討之擒賊首楊知府十九年改雲南都指揮使二十一年百夷據險作亂賊將刀恩郎等聚衆十餘萬驅象百餘拒敵正率兵從西平侯沐英進戰斬其二將賊衆奔潰盡獲其象馬未幾東川蠻反而越州龍海廣西等山寨亦據險作亂正從西平侯沐英討平之二十五年沐英卒詔授正榮祿大夫右軍都督府左都督代英鎮守久之命為平羗將軍總陝西四川兵討階文千戶張者之亂平之二十八年

正月率兵從秦王徃洮州打魚溝等處克平番寇三月還京至
是以疾卒 上為輟視朝一日遣官吊祭擢其子鷹揚衛指揮
使忠為前軍都督府都督僉事○撤馬兒罕遣回回劉魯刺等
一百九十一人來朝貢馬一千九十五匹詔賜鈔二萬五千一
百九十錠

大明太祖聖神文武欽明啓運俊德成功欽天大孝高皇帝實
錄卷之二百四十五

明太祖高皇帝實錄卷之二百四十六

洪武二十九年五月丁巳朔○戊午給賜錦衣等衛軍士七十
七百餘人布絹萬五千五百疋○續置吏部文官歷仕貼黃簿
內外二冊其以事去官者則別置冊附錄以備稽考○庚申會
川衛軍民指揮使司指揮同知孫禧言武安等州縣為月魯帖
木兒作亂人民逃散洪武二十五年夏麥秋田俱不耕收通糧
二千八百八十九石無徵勅戶部蠲之○命中軍都督府都督
僉事徐凱署四川行都指揮使司事○辛酉端午宴羣臣于奉
天門○增置廣西全州柳蒲建安二巡檢司○壬戌後軍都督
府言開平宜立五屯衛命先置中屯衛調官軍屯守○甲子賜
圓子監雲南琉球生夏衣○乙丑詔各都司致仕武臣俱於今
年九月赴京○賜琉球國使臣吳宜堪彌結致等衣鈔遣還○

貴州都勻衛平浪長官司洞水等寨蠻賊狄把作亂殺其土官
王應名貴州都指揮使程暹率兵討平之應名妻吳氏携其九
歲子阿童來訴請襲父職從之○丙寅熒惑犯諸王西第一星
○庚午 上以湖廣諸郡宜桑而種之者少命於淮安府及徐
州取桑種二十石遣人送至辰沅靖全道永寶慶衡州等處各
給一石使其民種之○四川威龍州土官知州普習叛普習月
魯帖木兒妻之兄也官軍捕之普習中派矢死○辛未給旗手
等衛軍士二十一萬七千七百餘人冬衣布帛六十四萬七百
疋○壬申月食於斗宿○乙亥蘇州府言是歲海運糧米凡八
十萬四千四百二十二石有奇○四川松潘衛納卜薛卜任昌
等寨番寇不時竊發殺害官軍蜀王奏遣都指揮僉事尹林等
率步騎五十討平之○丁丑播州宣慰使楊鏗遣其弟恕祥等

來朝貢馬賜以文綺鈔錠。○戊寅賞湖廣廣西江西諸衛從征南丹將士綺帛鈔錠有差。○初命詹事府翰林院尚寶司中書舍人六科給事中儀禮司於午門內出入者各給牌為驗。○庚辰有流星青白色起自天市東垣內西行至雲中沒。○癸未置徐州石山驛河間府任丘縣新中驛獻縣富莊驛。○甘州護衛將士巡邊至供窩兒獲胡人乃哈歹等詢知逃寇所者孫乞奴往哈梅里哈刺章往速刺討來川偽王撒戶失加往朵工事聞詔陝西行都司及肅府護衛斬者孫已遠適宜勿追哈刺章在討來川不可不捕哈歹等二十人發戍沿海衛所。○乙酉詔分調劄象衛軍士五十人隸奉議衛尋增設中左中右中前中後四十八戶所。○廣東連山縣盜起燒劫縣治命廣東都司發兵捕之。○是月修峩首至越雋道途畢工先是命成都各衛軍士與民合

力修治至是功成

六月丁亥朔○戊子河南左布政使周榮言近年宜陽縣洛河泛溢淹沒民田乞修築河防使水復故道以便耕種詔令預備磚石俟農隙發軍民協力修之○廣西都指揮同知姜旺童勝率兵抵慶遠思恩縣鎮寧等村洞殺獲叛蠻三千餘人降一千一百四十三戶以所得故宋太平興國六年銅印一束上○壬辰徵山西北平湖廣廣東四都司從軍年深武官赴京以備擢用○癸巳萊州府知府饒孟文致仕孟文臨川人初以耆民選用陝西布政使司事遷知萊州府至是以年老致仕○甲午榮感犯司怪南第二星○以遼東三萬衛指揮僉事劉顯為鳳陽留守中衛指揮僉事賜米百石○庚子歲星犯井鉞星○辛丑先是會同縣奏所轄上下十八洞凡十六里惟洞口二里遵約

東其餘蠻民各主寨柵置標鎗刀弩拒命不供賦役恐日久生
變乞捕之遂命湖廣都司發兵討捕至是以所獲蠻民械送京
師詔宥之誦戍三萬衛○癸卯流星赤色起自西南雲中南行
至雲中沒○以五軍都督府斷事廖昇為太常司左少卿翰林
院編修張顯宗為太常司丞左僉都御史辛彥德為詹事府詹
事人賜衣一襲○甲辰置五軍都督府照磨所初五軍文牘俱
度於庫無官專掌多致混亂故特立照磨所以掌之○命吏部
選國子生年三十以上者分隸諸司練習政事月給米一石三
月則考其勤怠能者擢用之○乙巳以監察御史李文敏為四
川按察使張定為陝西按察使王平為副使鄭金保為廣東按
察使耿賢為副使張明為河南按察使胡璉為山東按察使丘
野為副使王莫為廣西按察司副使王仲和為福建按察使齊

魯及刑部郎中曹瑾為副使。○戊申命工部左侍郎孫顯署本部尚書事。○戶部尚書郁新言海北之鹽往者召商人於桂林入米二石鈔三貫給鹽一引其時米賤鹽貴商人利之故中鹽者多比米貴鹽賤雖累榜招之不至今宜減其價每引米一石鈔五貫從之。○太子少保兵部尚書致仕唐鐸言昨運廣東監已至廣西宜召商人於南丹奉議慶遠衛倉依例納米給梧州所貯之鹽償之其原定桂林府鹽糧宜且罷中從之。○賜遼東三萬等衛督視屯田指揮千戶八十二人鈔八百二十錠。○壬子太陰與熒惑會于井。○癸丑命湖廣布政使陳惟春復任惟春山西人初以才諳薦授知府改試觀察使繼署通政使司事陞湖廣布政使至是考滿赴京命復任。○是月思明府知府黃廣成遣其弟威佑奉表貢馬及方物詔賜威佑革鈔有差

秋七月丙辰朔享太廟。○夜歲星入于井。○戊午廣西鎮安府
上官岑志綱遣其從先岑武貢馬及方物先是向武州知州黃
世鐵侵奪鎮安高寨等地殺掠其人民馬牛朝廷遣兵平之以
其地屬鎮安故志綱奉表入貢謝恩。○己未廣東惠州衛指揮
丁振玉席潮州衛千戶勤德興鎮海衛千戶呂仁下海巡寇遇
賊懦怯不即進兵勦捕致賊殺傷官軍事聞皆命誅之。○庚申
上謂侍臣曰人之常情待己厚而待人薄己之所為有不善
雖大亦隱忍而不露他人所為或有過失雖小不能容忍亦有
過在己而怨咎他人者若此是皆不明之所致惟明者責己厚
而責人薄責己厚故能成德責人薄故得寡怨昧者責己薄而
責人厚責己薄故德不修責人厚故人多怨。○癸亥監察御史
蔡民玉按事陝西還言諸府州縣民以轉輸遠郡道遠苦急之宜

於驛道有軍民處置倉令各處民夫就近地計程接遞運至邊
衛給軍為便從之○丙寅、上觀唐書至宦者魚朝恩恃功玩
忽無所憚謂待臣曰當時坐不當使此曹掌兵政故恣肆暴橫
然其時李輔國程元振及朝恩數革勢皆極盛代宗一旦去之
如孤雛腐鼠大抵小人竊主苟能決意去之亦有何難但
在斷不斷爾又曰漢末之時宦官雖號驕縱尚無兵權故凡所
為不過假人主之名以濁亂四海至唐世以兵柄授之馴至權
勢之盛劫脅天子廢興在其掌握大抵此曹只充使令豈可使
之當要路執政操權擅作威福朕深鑒前轍自左右服役之外
重者不過得傳命四方而已彼既無威福可以動人豈能為惡
但過有罪必罰無赦彼自不敢驕縱也○戎衣夜太白入于角
○己巳置泰安衛指揮使司時監察御史裴承祖言山東泰安

州東接泰山西連五道嶺綿亘深遠逋逃者多聚其間時出劫掠宜於本州置衛五道嶺立巡檢司以鎮之詔從^其言遂命立衛於泰安州○遣中使至桂林等府市牛給南冊奉議等衛屯田軍士○丙子詔在外未入流官陪祭俱用祭服先是淮安益城縣儒學教諭王孟上言公服以朝祭服以祀今在外凡祀山川諸神流官具祭服未入流官具公服然公服既於朝賀迎接諸禮用之而又服以祀神禮有未宜且未入流官公服制之自八品以下皆同則祭服亦宜與之同 上是其言詔自今未入流官凡祭皆用祭服與九品同○辰州麻陽縣言荒田四十四頃六十餘畝歲租五百七十餘石無徵 上命蠲之以其田與沅州平溪二衛軍士屯種○丁丑命給鈔償水西金筑烏蒙馬直初大軍征雲南命水西金筑烏蒙出馬以給軍用水西馬一

千餘匹。金筑安撫司及烏蒙軍民府馬各五百匹。至是命給鈔償之。匹二十錠。凡給鈔四萬餘錠。○先是有朝鮮使者歸。至遼東。遼東都司遣百戶夏質送之。期至鴨綠江而止。使者乃誘質渡鴨綠江。至義州。留萬戶府數日。始遣其還。因令船人沉質于江。至是上聞。勅諭左軍都督楊文令咨朝鮮。逮義州萬戶訊其實。○己卯。給旗手等衛軍士十九萬九千一百餘人。綿布三十九萬八千二百疋。明礬八百四十斤。○癸未。晉王櫛進山西陽曲等縣所產嘉禾一莖。五穗者一本。四穗者二本。三穗者十。二本。二穗者二十一本。○是月。陞貴州都指揮同知顧成爲右軍都督府都督僉事。成揚之江都人。自丙申從渡江。累官至貴州都指揮同知。復征康佐。西堡獅子孔。白石崖等寨有功。故陞。今臘。○頒表箋文式於天下。先是天下諸司所進表箋多務奇。

巧詞體駢儷。上甚厭之。乃命翰林院學士劉三吾右春坊右
贊善王俊華撰慶賀謝恩表箋成式。頒於天下。諸司令凡遇慶
賀謝恩。則如式錄進。○衛卒有甲牧馬江北。值乙與之忿爭。乙
以磚擲甲。仆地。甲之子時年幼。持田器在旁。因以器擊乙而死。
乙家訴於官。甲之子被逮。刑部尚書夏時奏應縱。上曰。過矣。
方其父被傷時。其子但知顧父。豈知有法耶。況其幼無識。情可
矜。宜減死論。

八月丙戌朔。○丁亥遣官釋奠於先師孔子。○蘭州衛指揮金
事徐遵等以父及祖母俱病卒。奏願以喪歸。壘鄉里廷議以遵
等職_守邊。徵例不得歸葬。上曰。此人子大事。不可以公義廢其
私。息可其奏。○戊子祭大社大稷。○欽天監言。近歲并宿東偏
北。第二星暗小。且促聚不端。列。○庚寅遣官祭歷代帝王。○置

開平左右前後四屯衛指揮使司初詔立開平中屯衛至是北
平都指揮使司奏已立中屯衛於沙峪今議立左屯衛於七合
營右屯衛於軍臺前屯^衛於偏嶺後屯衛於石塔俱從之○辛卯
祭太歲風雲雷雨嶽鎮海濱山川月將城隍諸神○遣官祭旗
纛○廣西慶遠府思恩縣山賊作亂攻掠縣治命廣西都司發
兵討平之○丙申夜太陰犯羅堰下星○丁酉命大理寺右寺
丞夏愨署刑部尚書事○辛丑貴州宣慰使安的貢馬謝恩以
安的母死朝廷遣使祭之故也 貴州都指揮使司言近發兵
討清水江作亂蠻民惟賊首金牌黃未獲今廉知匿土官宣慰
宋誠家誠不捕送請俱罪之 上曰蠻夷之人鴟張^鼠伏其常
態耳今既懼罪藏匿勿問遂寢其奏○丙午烏蒙軍民府知府
實指貢馬及氊衫○夜有流星大如雞子青白色起自羽林軍

有竹至近濁沒○大陰入于井○丁未免太平等五府田租詔曰
朕定天下之初軍國之需皆取給太平寧國應天廣德鎮江五
府州縣朕既富有天下思與民滿共享康寧然猶慮恩施有所未
洽民力有所未蘇是用蠲爾今年官民田租以稱朕酬勞之意
○己酉禮部尚書門克新卒克新鞏昌秦州人為人寬厚和易
始為本州儒學訓導二十六年秩滿未朝時天下學官入覲者
咸命侍朝或試文辭詢問經史及民間政事得失在列者多應
對不稱旨獨克新敷奏亮直上甚重之時紹興府儒學教授
王俊華亦以善文辭稱旨遂擢俊華為右春坊右贊善克新為
左春坊左贊善後陞今官未幾以疾請告命太醫給藥物不輟
其祿已而病革遂卒上嗟悼遣官祭之命有司護喪歸葬于
鄉○庚戌改六部諸屬部為清吏司上以六部之屬皆稱部混

而無別故欲易其名因寓飭勵之意凡諸屬部皆曰清吏司更其名者十有三吏部選部曰文選司封部曰驗封司勳部曰稽勳禮部儀部曰儀制祠部曰祠祭膳部精膳兵部司馬部曰武選駕部曰車駕庫部曰武庫工部營部曰營繕屯部曰屯田水部曰都水虞部曰虞衡其戶刑十二部及吏部考功禮部主客兵部職方名皆仍舊俱改部為清吏司○詔廷臣重議諸王見東宮禮禮官議諸王來朝具冕服見天子畢次見東宮已有定儀其叙家人禮王及東宮俱常服引禮官請王由文華殿東門入至後殿王西向坐東宮東面贊禮官贊四拜王坐受相見禮畢叙坐則東宮正中南面諸王列于東西奏上從之時諸王皆東宮叔父故復有是議也○壬子桂陽縣知縣周德甫言桂陽山口為諸蠻要害之地宜置兵戍守於是命茶陵郴州桂陽三

衛各調兵千人築城堡以鎮之○癸丑太白犯心宿中星○貴
州都指揮使程暹等來朝賀 天壽聖節獻馬○是月降右都
御史來恭為刑部右侍郎○復賜旗手等衛軍士二十一萬七
千七百餘人布絹六十四萬一千七百餘疋

大明太祖聖神文武欽明啓運俊德成功統天大孝高皇帝實
錄卷之二百四十六

天明太祖高皇帝實錄卷二百四十七

洪武二十九年九月丙辰朔修廣西興安縣靈渠三十六陡其渠可溉田萬頃亦可通小舟國初修浚之至是兵部尚書致仕唐鐸以軍務至其地圖其狀以聞且言修治深廣可通官舟給軍餉於是命監察御史嚴正直發旁縣民丁修之浚渠五千餘丈築泮潭及龍祠土隄百五十餘丈又增高中江石隄改作滑石陡凡陡澗之石礙舟行者悉以火煨鑿去之於是可通漕運矣○朝鮮國王李旦遣其門下評理趙胖等貢金銀器布席等物賀天壽聖節又遣其臣權仲和等來謝恩先是以其表辭侮慢速其撰表之人至是旦遣仲和來言小邦事大之誠不敢少怠而海外之人學問粗淺未識中朝表箋體製以致字樣差謬聞命以來兢惶罔措欵遇聖節不敢上表故遣陪臣仲和

未謝○上以桂陽谿洞瑤人充為官軍勦捕逃竄山谷乃命桂陽千戶所招撫之於是復業者七十餘家○丁巳戶部尚書郁新言近置開平衛軍士糧餉皆仰給於北平道路遠遠所費不貲宜廣募商人於開平納米以淮浙鹽價之庶免轉輸之費從之○庚申陝西行都指揮使司言自涼州至莊浪馬驛遞運所九其大河黑松林岔口三驛以請發刑徒充役餘後夫皆臨洮等府民與莊浪等衛軍參為之其民去鄉既遠貲給不充往往捕逃宜皆以刑徒充之又言白城子去肅州百有餘里北道和林亦集乃路當衝要今令肅州衛遣軍沙山偵守去城四十餘里倘遇烽警猝難策應如置千戶所分撥精壯騎卒就彼屯守庶得備禦詔並從其言仍命右軍都督府遣軍戍白城子○乙丑五軍斷事官言軍校四十五人皆犯重法當死 上曰此輩

非詠於利則脇於威致脂重辟然其情亦有可矜者其以情之
至重者一人寘于法餘皆減死發戍三萬衛○命五軍都督府
遣人往北平山東山西河南陝西各衛所覈實將士隊伍仍具
其善戰步騎將校姓名及馬騾之數以俟調遣○丁卯朝鮮國
王李且送撰表人鄭總等三人至且言鄭道傳病不能行表辭
實總等所撰 上謂禮部臣曰今朝鮮送來數儒生勿遣其還
蓋此輩畧通古今未知大道故任其小智調弄戲侮若朝鮮廢
置無乃皆數生之為彼數生者幸災樂禍曾不如昔楚國一伶
人耳昔楚伐鄭軍少北鄭公鍾儀陷為鄭得之獻於晉晉公見
之問南冠者為誰有司云鄭人所獻楚囚也晉公召問之鍾儀
所言皆中理以語范文子文子知鍾儀雖伶人君子也盍歸之
晉楚構兵連歲不已此人歸晉楚罷兵必成公從之厚待而歸

之楚遣人報鍾儀之歸晉之德也由是兵解數十年無征戰之勞此一人懷君子之道能排難解紛以安終庶朝鮮數生曾不
如一伶人古人云以道助人主不以兵強天下此數生不為王
量力敢為小敵之堅故作戲慢生隙殃民爾移文朝鮮無用是
數生留之京師別授微職以杜絕王左右之禍○庚午陝西行
都指揮使司都指揮馬溥言甘州中納路蓋商人稀少蓋是各
處蓋池常以私蓋侵鬻故官蓋沮遏不行請禁之 上命戶部
遣人封閉延安綏德慶陽三郡蓋池仍令軍士巡邏察罕腦兒
一十三池之地有以私蓋出境者罪之○壬申有流星二俱青
白色一大如雞子起自倉天東南行至堂中沒一大如杯起自
天苑東南行至游氣中沒○癸酉 天壽聖節 上御奉天殿
受朝賀大宴群臣○乙亥大賚天下致仕武臣凡壬辰年至甲

辰年後軍洪武十一年以前為官者指揮使銀一百兩鈔二百
錠指揮同知銀九十兩鈔一百八十錠指揮僉事銀八十兩鈔
一百六十錠正千戶儀衛正銀七十兩鈔一百四十錠副千戶
衛鎮撫儀衛副銀六十兩鈔一百二十錠百戶所鎮撫銀五十
兩鈔一百錠壬辰年至甲辰年後軍洪武十二年以後為官者
指揮使銀九十兩鈔一百八十錠指揮同知銀八十兩鈔一百
六十錠指揮僉事銀七十兩鈔一百四十錠正千戶儀衛正銀
六十兩鈔一百二十錠副千戶衛鎮撫儀衛副銀五十兩鈔一
百錠百戶所鎮撫銀四十兩鈔八十錠乙巳年以後後軍洪武
十一年以前為官者賞同乙巳年以後後軍洪武十二年以後
為官者指揮使銀八十兩鈔一百六十錠指揮同知銀七十兩
鈔一百四十錠指揮僉事銀六十兩鈔一百二十錠正千戶儀

衛正銀五十兩鈔一百錠副千戶衛鎮撫儀衛副銀四十兩鈔八十錠百戶所鎮撫銀三十兩鈔六十錠先是上念諸功臣多物故幸其存者款加恩賚乃詔天下致仕武臣入朝至是至京師凡二千五百餘人咸賚之上諭之曰元末兵爭中原鼎沸人不自保爾諸將奮起從朕効謀宣力共平禍亂勤勞備至天下既定論功行賞使爾等居官任事子孫世襲永享富貴朕思起兵時與爾等皆少壯今朕年老爾等皆老矣久不相見心恒思之故召爾等來見所賜薄物以資養老爾等還家撫教子孫以終天年諸將臣叩首謝上又曰同歷艱難至有今日顧朕子孫保有無窮之天下則爾等子孫亦享有無窮之爵祿諸將臣無不感激至有墮淚者○賜國子監琉球生秋冬衣○丙子民有犯死罪者其弟許于通政使司願為軍以贖死罪辭

意懇切。上憫之命同繫者三十餘人皆減死戍邊。○丁丑太陰掩軒轅右角星。○是月賜天策等衛軍士萬四千七百餘人綿布各一疋蘇木各一斤。

冬十月乙酉朔享太廟。○有流星大如雞子赤色起自天苑北東北行參旗沒。○置甘州中衛千戶所調安東中護衛官軍一千三十八人往實之。○置廣西潯州衛。○癸巳陝西西安府咸寧縣民孫長寧妻一產三男事聞遣行人許謙賜鈔十錠仍命循例月給米贍之。○陞錦衣衛指揮僉事宋忠為指揮使。○甲午安定衛酋長塔孩虎都魯來朝貢馬四十匹先是上遣行人陳誠立撒里畏兀兒為安定衛錫以印章以塔孩虎都魯等為指揮千百戶。○是誠歸塔孩虎都魯隨誠入貢。上嘉其慕義厚賚之復遣中使齎金幣往賜其酋長指揮人織金衣一襲。

文綺帛各三疋白金一百五十兩千戶人衣一襲文綺帛各二疋白金一百兩百戶人衣一襲文綺帛各一疋白金五十兩○丁酉思南宣慰使田大雅貢馬及方物○詔定各司奏事次第禮部會議凡奏事一都督府次十二衛次通政使司次刑部次都察院次監察御史次斷事官次吏戶禮兵工五部次應天府次兵馬指揮司次太常司次欽天監若太常司奏祀事則當在各司之先每朝上御奉天門百官叩頭畢分班序立儀禮司依次贊某衙門奏事奏畢復入班伺各司奏畢俱退若上御殿奏事官陞殿以奏次畢先退其不陞殿者俱于中左中右門外西廊伺候奏事官出則皆出若于文華殿啓事則唐事府在先餘次第並同前凡晚朝唯通政使司六科給事中守衛官奏事其各衙門有軍情重事者許奏餘皆不許詔從之○戊戌陞

致仕武官 上既大齊天下致仕武臣復諭兵部令陞其官各
一級皆授職于甘肅大同北平大寧遼東諸衛所其嗣子職任
卑者後皆許從令職陞授○庚子皇第四十六孫有煥生周王
第七子也○金吾前衛軍錢伯奴言京衛士卒有老疾無丁壯
代役者其江西淮西諸處屯田軍士多壯勇之人乃委置農畝
不能振拔今宜選拔更代庶兵不缺伍農無廢業從之○辛丑
賜國子監南生冬衣○癸卯歲星退行入于井○丙午賜雲南
左右前三衛并楚雄大理臨安曲靖四衛軍士三萬五千人鈔
凡七萬錠○己酉更定雲南通海鹽價初以二處鹽價未定遣
官與布政使張統議之統以通海去雲南尚三百餘里米視雲
南價復減于商人不便今宜輸米雲南府二斗者給淮浙鹽一
石三斗者川鹽三石者安寧并鹽二石三斗者黑鹽并鹽輸米

通海者三斗給淮浙鹽一石五斗川鹽四石安寧井鹽三石黑
鹽井鹽其川鹽及安寧黑鹽二井視入米先後為支鹽之次淮
浙勿拘從之○辛亥熒惑犯上將○西平侯沐春言舊例恩軍
在邊十年不逃者賞與舊軍同人給布三疋舊軍有逃而後役
者人二疋今有逃而後役并以戶丁補役已及十年者亦宜循
十年不逃之例給賞從之○甲寅皇曾孫文奎生皇太孫允炆
長子也 上曰十月教之終又生于晦日命內庭勿賀○改置
天下按察分司為四十一道初以天下為四十八道至是
上欲省之且以各道名稱有未安者因欲易之命廷臣集議之
于是太子少保兼兵部尚書茹璠等議改置為四十一道直隸
六道曰淮西道治鳳陽廬州二府徐滁和三州及太僕寺中都
留守司曰淮東道治淮安揚州二府及六合縣兩淮都轉鹽運

使司曰蘇松道治蘇州松江二府曰建安徽寧道治汜州安慶
徽州三府四常鎮道治鎮江常州二府曰京畿道治太平寧國
二府廣德州句容溧水溧陽三縣浙江二道曰浙東道治紹興
寧波温州台州處州金華衢州七府曰浙西道治嘉興湖州杭
州嚴州四府四四川道曰川東道治重慶夔州保寧順慶潼川五
府州及貴州都司所屬衛分曰川西道治成都叙州馬湖三府
嘉定瀘石雅龍五州及建昌等衛松潘軍民司曰黔南道治雲
南大理等府州縣并各衛分山東三道曰濟南道治濟南東昌
兗州三府曰海右道治青州登州萊州三府曰遼海東寧道治
東寧瀋陽中遼海鐵嶺三萬金州復州蓋州海州義州十衛及
廣寧中護衛廣寧左前後四衛定遠左右中前後五衛河南二
道曰河南道治開封河南汝寧南陽四府曰河北道治懷慶衛

輝德三府北平二道曰燕南道治保定河間真定廣平順德
大名六府曰燕北道治北平永平二府及行都指揮使司所屬
衛分陝西五道曰關內道治西安鳳翔平涼三府曰關南道治
漢中府曰河西道治延安慶陽二府宦夏衛曰隴右道治臨洮
鞏昌二府洮州岷州河州蘭州四衛曰西寧道治西寧莊浪涼
州永昌山丹甘州肅州七衛山西三道曰冀寧道治太原一府
澤潞遼沁汾五州府曰冀北道治大同一府東勝等衛曰河東道
治平陽一府江西三道曰嶺北道治南安贛州吉安臨江袁州
五府曰兩江道治南昌南康九江瑞州四府曰湖東道治建昌
旌州廣信撫州四府廣東三道曰嶺南道治肇慶南雄韶州廣
州潮州惠州六府曰海南道治瓊州府及海南等衛曰海北道
治高州廉州雷州三府廣西三道曰桂林蒼梧道治桂林梧州

平樂三府曰左江道治南寧潯州二府曰右江道治慶遠柳州
二府福建二道曰建寧道治建寧邵武延平汀州四府曰福寧
道治福州興化漳州泉州四府湖廣四道曰武昌道治黃州德
安武昌漢陽四府曰荆南道治荊州岳州襄陽三府沔陽安陸
二州曰湖南道治長沙衡州寶慶永州四府桂陽郴二州曰湖
北道治常德辰州二府靖沅二州縣○是月遷富川縣治於富川
千戶所富川廣西平樂府屬縣也時富川守禦千戶所新立於
矮石城典史徐魯言縣治無城恐蠻寇竊發無以禦之宜遷於
城內為便從之

大明太祖聖神文武欽明啓運俊德成功統天大孝高皇帝實
錄卷之二百四十七

太祖高皇帝實錄卷之二百四十八

十一月乙卯朔上御武英殿謂侍臣曰夫好憎者人情所不能無也然好得其正憎得其實斯不陷於一偏至於喜怒莫不皆然一有所偏則人得而中之矣夫抵人能不偏於好憎喜怒則此心廓然大公不為物累是以耳目聰明志氣如神矣○免國子監生胡望朝參辰州盧溪鉛場等寨蠻首石荅踵等三十五人入朝貢方物初石荅踵等恃險不服盧溪主簿孫應隆招諭之石荅踵等皆聽命應隆因率之來朝詔賜衣服文綺鈔錠○壬戌增設詹事府屬官左右春坊清紀郎各一人從八品司諫各二人通事舍人各五人皆從九品改詹事府錄事為從九品○蠲北平府州大城縣田租初洪武二十五年秋縣大水明年夏復如之沒稻田五百五十餘頃至二十七年水始平事

聞 上謂戶部臣曰大城之民連被水災其飢寃可知凡田之
租賦悉免勿徵於是免其租凡二千九百七十餘石○甲子鎮
星犯罰星○乙丑復以孫應隆為廬溪縣主簿初辰州府廬溪
縣主簿林彥聰以事被逮命應隆往代之應隆到官即招附高
岩等若苗蠻二千六百四十戶及彥聰事白當復官適應隆率
蠻首石荅踵等朝貢至京師荅踵等以應隆招集有方乞留鎮
撫新附百姓 上嘉之遂可其奏○廣西太平府龍英州知州
趙武雄來朝貢方物○丙寅賜在京武官綺帛各二疋鈔五錠
○丁卯冬至 上御奉天殿受朝賀大宴群臣○己巳詔頒稽
古定制先是 上以諸功臣之家不循禮法往往奢侈自縱以
致覆亡雖屢加誡勅終莫之省迺命翰林儒臣取唐宋制度及
國初以來所定禮制參酌損益編類成書凡勸舊之家墳塋碑

礪丈尺房屋間架及食祿之家貨植禁例皆有定制命頌之功
臣之家得遵行之。○月食于井。○士申命刑部主事鄧文鑑署
都察院事文鑑延平沙縣人始以國子監生登洪武乙丑進士
第知高州茂名縣為政平恕人稱之後以考最陞戶部主事逾
年改刑部至是遷超任之。○甲戌錦衣衛有百戶坐法當死者
歎自陳于上前指揮使宋忠為言。上弗許監察御史周勣
忠市恩沽名請罪之。上曰忠率直無隱不計禍福為人請命
何為罪之詔弗問百戶亦得減死戍邊。○戊寅琉球國山北王
攀安知道其臣善佳古耶等中山王世子武寧遣其臣蔡奇阿
教耶等貢馬三十七匹及硫黃等物并遣其寨官之子麻奢理
誠志魯二人入太學先是山南王遣其侄三五郎疊入太學既
三年歸省至是復與麻奢理等偕來乞入太學詔許之仍賜衣

中執鞭。○士午改設四川益課提舉司所屬羅泉等二井益課司為羅泉等五井益課司。

十二月乙酉朔遣行人陳誠呂讓使安南。先是思明府土官知府黃廣成奏言本府自故元設置思明州後改思明路軍民總管府所轄江左一路州縣洞寨東至上思州南至銅柱元兵征交趾土銅柱百里立永平寨軍民萬戶府置兵戍守而命交人供其軍餉元季慢亂交人以兵攻破永平寨遂越銅柱二百餘里侵奪思明屬地丘温如整廢遠淵托等五縣逼民附之以是五縣歲賦皆令土官代輸前者本府失理于朝遂致交人侵迫益甚及昔禮部任尚書立站於洞登洞登實思明府地而交人迺稱屬銅柱社界臣嘗具奏蒙朝廷遣刑部尚書楊靖覈實其事况今建武誌尚有可考乞令安南以前五縣還臣舊封仍止銅柱

為界使疆域復正歲賦不虛上令戶部具其所奏遺誠等
往安南諭還之○庚寅皇第四十七孫悅勳生蜀王第五子也
○壬辰福建泉州府地震○甲午賜錦衣等衛武臣命婦五十
二百餘人帛凡萬九千八百餘疋○丙申賜在京文綺帛各
二疋鈔二錠○己亥有流星大如杯青白色起自冀宿東南行
至游氣沒○庚子賜在京致仕武官米指揮二十五石千戶衛
鎮撫十五石百戶所鎮撫十石江淮濟川監工官俸給外如例
賞之監工指揮十百戶衛所鎮撫正賞外加米十石致仕都督
賞如指揮例監工試百戶賞與見任同○廣西龍州知州薛繼
賢等遣弟薛忠等未朝謝恩貢馬 養利州土官趙芳思陵州
土官黃善政太平州土官李圓泰等各遣使未朝貢方物○壬
寅命趙璟署左軍都督府都督僉事璟父清為後軍都督僉事

璩資蔭得指揮使 上以其熟舊特起任之○於卯榮愍守太
微垣○朝。鮮國王李且遣門下贊成事安翊等貢方物賀明年
正旦○乙巳詔定靖江王庶子鎮國將軍以下祿秩儀禮先是
王國禮秩俱有定制 上以鎮國而下降殺太甚故命更定之
於是兵部尚書茹瑄等奏曰臣聞天子不以天下私其親其鎮
國將軍等祿秩儀禮宜如舊制從之○丙午命禮部會議鎮國
將軍與駙馬公侯文武官相見禮及其出入稱呼之宜禮部會
諸儒臣議凡相見鎮國將軍居左駙馬儀賓公侯居右平行兩
拜禮若文武一品至三品官見之亦行兩拜禮鎮國將軍居中
答拜四品以下官行禮鎮國將軍坐受之若相遇於道駙馬儀
賓公侯向右讓道而行文武一品至三品官引馬側立候其過
乃行四品以下則下馬其於內庭出入皆由左門稱呼則曰官

人言語則曰商肯從之。丁未太陰行房宿中。己酉烏思藏都指揮答里巴等遣僧頊南里監藏衛鎮撫班竹兒藏卜等貢鈿及甲冑等物。湖廣保靖宣慰等司廣西金筑安撫等司雲南安順等州西堡等長官司各貢方物。癸丑享太廟。是月置南丹衛軍民指揮使司。復增中左中右中中三千戶所。永寧州土賊卜八如加等劫殺軍民前軍都督僉事何福遣指揮李榮等領兵討之。其子阿沙遁入革失瓦都寨官軍齋三日糧深入追之。會天大雪衆飢疲賊據險不下軍迺還。肇慶府龍水縣徭蠻李敬宗等作亂率其黨四百餘人襲神電衛指揮郭昂戰死。廣東都指揮使司發兵討之。復永州府知府余彥誠等十人官。初彥誠與齊東知縣鄭敏定遠知縣高斗南義真知縣康彥民岳池知縣王佐安肅知縣范志遠當塗知縣孟廉縣丞

趙森懷寧縣丞蘇益休寧縣丞甘鏞等先後坐事逮獄至是其
者民具列各官善政詣闕以請 上嘉之賜彥誠等襲衣靴鈔
遣還仍給耆民道里費○順寧府土酋阿羅等伏誅先是其土
官知府子兵與其叔父猛丘以兵相讎殺至是猛丘死其記事
阿羅火頭字求等獲梗化相攻擊西平侯沐春遣大理衛指揮
鄭祥李榮等領兵分道征之阿羅等率衆拒戰祥等攻討之甚
力遂擒阿羅字求等誅之○是歲以金筑安撫司上馬橋長官
司隸貴州軍民指揮使司○賞寧番衛軍士一千一百餘人布
帛綿花初夷寇攻寧番將士嬰城固守間出兵擊走之故有是
命○賜遼東定遼左等衛并廣寧三護衛軍士及遼府儀衛司
校尉等十萬三千五百餘人布凡三十四萬一千八百疋綿花
十五萬五千二百斤

太祖高皇帝實錄卷之二百四十九
洪武三十年春正月甲寅朔上御奉天殿受朝賀大宴群臣
○丙辰享太廟○長興侯耿炳文佩征西將軍為總兵官武定
侯郭英為副征陝西及甘肅選精銳步騎巡西北邊以備胡寇
上諭炳文等曰帝王之治天下務安民也今海內無虞民固安
矣然邊境之備不可廢弛爾其竭乃智慮以副朕心凡有寇盜
即殄滅之俾遺民樂業則余汝嘉○上諭禮部臣曰自古分茅
胙土之君必得正人君子國家乃昌任用小人必亂其邦朝鮮
國王李旦因王氏教終天將更運遂有三韓之地更號朝鮮儀
從本俗法守舊章有國之道全矣奈何謀慮不遠周事大之道
左右所用皆輕薄小人不能以德助王撰述表箋搜求構禍之
言置王於無容身之地此徒用之何益雖在朕不以為意然神

明有知禍不可逃。爾禮部移文移朝鮮國王，俾知朕意。○夜填星犯東咸。○庚申，置鎮遠巡檢司於靖州，會同縣言天柱有千戶所巡檢司，而所屬遠口、鄉邊、臨清水、蝦蟇船^兩諸蠻洞乞移天柱巡檢司鎮之，便至。是改遠口曰鎮遠，移置巡檢司，增予手七十人。○辛酉，改陝西臨河衛為鎮^靖衛。○壬戌，夜太白犯建星。○癸亥，四川馬湖府土官知府安仁署芒部軍民府事。土官何伯及安順鎮寧二州并十二營頂營沐川、泥溪平夷蠻夷占歲先結篋等長官何富德聚等各遣人貢馬，並賜文綺鈔錠。○乙丑，勅肅王棖曰：古者兵出於農人，無寒餒有寇則操戈以戰，無事則荷耒以耕，此良法也。今春氣方和，宜及時督軍屯種，遇有凶伐，爾其親率精兵與長與侯耿炳文等進討。○漢中府沔縣吏高福興反，民人田九成、僧李善治謀為亂，縣教諭王堯告于漢

中衛衛道兵補普治獲之九成等率餘賊入沔縣後河及土門
聚衆至千餘人而陝蜀間者民因之作亂事聞詔征西將軍長
興侯耿炳文武定侯郭英發陝西四川兵討之獲勅秦王尚炳
曰遁者沔縣及陝蜀間有盜已命長興侯耿炳文等總兵征討
爾宜練士卒繕甲兵時巡邏以備不虞况爾年幼尤當夙夜警
惕無怠○丙寅大祀天地于南郊○丁卯置行太僕寺于山西
北平陝西甘肅遼東 上慮西北邊衛所畜馬甚蕃息而禁防
疏闊乃設行太僕寺以掌其政山西北平鐵西每寺設少卿一人丞
三人甘肅遼東每寺設少卿丞各一人擇教仕指揮千百戶為
之每寺設首領官一人吏三人口戊辰陝西行都指揮使陳暉
言涼州等衛十有一屯軍三萬三千五百餘人屯田萬六千三
百餘頃涼州西寧永昌肅州浪泉累歲豐熟以十之二輸官八分

給與士卒其甘州山丹等六衛地寒四月雪消方可耕種比苗
始秀而霜已降軍伍每以缺食為病請以涼州等衛輸官糧儲
濟其不足從之○漢中衛發兵捕高福興兵次陽平關之土門
賊黨大集有何妙順者號天王突出逆戰官軍為其所敗賊遂
引衆入畧陽楚縣治殺知縣呂昌執教諭呂詵後燒徽州治殺
學正顏叔彬○陞行人司副楊砥為湖廣布政使司左叅議行
人錢古訓為右叅議崔豫為江西布政使司左叅議李思聰為
右叅議○己巳命左軍左都督楊文往遼東訓練軍馬仍督屯
種○庚午調錦衣衛指揮使宋忠為鳳陽中衛指揮使時監察
御史劉觀奏忠私作威福以邀名譽故熙之○辛未城開平衛
先是上命中軍都督同知盛熙調山海衛五所官軍往開平
左發北平都司屬衛軍士城之至是訖工復命熙分調北平等

都司軍馬屯守於農隙講武以備不虞。○詹事府右春坊司諫
素實建言三事其一曰天下生員定額府學四十名州學三十
名縣學二十名比先定制府學一年一貢州學二年一貢縣學
三年一貢其充貢雖少而儲材實多比年府州縣同於歲貢所
以經學不明未知文理者日衆宜仍前例以蓄其材其二曰太
學者風化之原英才所萃首建彝倫堂次建六堂至於廂厨饌
舍室房罔不周備規模宏遠矣但師生出入正道自國學至於
環球橋狹隘汙穢乞命工部相度開道使其往來其三曰將軍
侍衛人等皆出於農畝知節義者少乞命史官摘取上古以來
忠臣烈士編類成書使彼操之暇命官講解使知忠君報國之
義事上死長之節。○烏思藏都指揮司灌頂國師及尼八剌國
各遣使貢方物詔賜灌頂國師及尼八剌國王報各一百五十

兩文綺帛各十疋。凡列工國師察里巴邁思藏都指揮仰卜羅
沙魯萬戶列思巴端竹都指揮蒼里巴達母爾監卒銀各一百
兩文綺帛各二疋并賜其使人衣鈔有差。○四川貴宣慰使安
的遣把事沙廣西思明府知府黃廣成等來朝貢馬賜襲衣金
帶文綺鈔錠各有差。○壬申遷肇慶府雙魚千戶所治于陽春
縣初置雙魚千戶所于陽江縣地至是陽春知縣趙清言縣境
接連蠻洞乞移千戶所也守故有是命。○初置雲南提刑按察
司以陝西按察司使張定為按察司使監察御史姜濂楊山為
副使監生馮子恭賈興牛廷訓寧溫為僉事先是以雲南地在
荒服未設按察司冷布政使司兼理之至是置司設官其軍民
重事仍令與西平侯沐英春議之。○癸酉命監察御史劉觀景
清司中署都察院左僉都御史刑部主事鄧文鏗署右僉都御

史俱月與半俸署通政使司事翰林院編修馬京實授左通政以監生王鐸為左叅議張翼為右叅議○甲戌給賜陝西北平山西遼等七都司所屬衛所及秦晉燕代肅遼慶寧谷王府護衛議衛司軍校等綿花布疋○乙亥詔郡縣以預備倉糧貸民之貧者○詔淤黃河兩岸河泊所魚課先是河決懷慶等府州縣民人貧困上聞之命徐懷慶而下至正陽沙口黃河兩岸河泊所魚課仍聽其民捕魚以給食○丁丑遣使諭別失八里王黑的兒火者先是遣主事寬徹等使哈梅里別失八里及撒麻兒罕^地寬徹至別失八里而黑的兒火者拘留之副使二人得還至是後遣使特書往諭之曰朕即位三十年西方諸國商人入我中國互市邊吏未嘗阻絕朕復勅吾吏民不得恃強欺謾蕃商由是爾諸國商獲厚利疆場無擾是我中國有大惠與

爾諸^國也。向者撒馬兒罕商人有漢北者，吾將征北，邊執歸京師。朕今居中國，互市後知為撒麻兒罕人，遂俱遣還本國。其君長知朝廷恩意，遣使入貢。吾朝廷亦以知其事上之禮，故遣使寬徽等使爾諸國通好。往來撫以恩信，豈意拘吾使者不遣。吾于諸國未嘗拘番使者一人，而爾拘留吾使，豈禮也哉！是以近年回回入邊地者，且留中國互市，待寬徽歸然後遣還。及回回久不得還，稱有父母妻子。朕以人思父母妻子，乃其至情。逆人至情仁者不為，遂不待寬徽歸而遣之。是用復遣使齎書往諭，使知朝廷恩意，毋使道路閉塞而啟兵端也。書曰：怨不在大，亦不在小。惠不惠懋，不懋爾其惠且懋哉。己卯，改太常光祿二司為寺，官制仍舊。改儀禮司為鴻臚寺，禮部正四品設官六十二員，卿一員，正四品少卿二員，從五品丞二員，從六品主簿一員。

從八品屬官司賓署丞一員正九品司儀署丞一員正九品鳴
贊四員從九品序班五十員從九品以儀禮司正若顯為寺卿
擢吏科都給事中仲收工科都給事中劉繼宗為少卿翰林院
典籍馬定為寺丞○陞翰林院修撰張信為侍讀編修戴昇為侍講
上諭之曰官翰林者雖以論思為職然既列近侍旦夕在朕左
右凡國家政治得失生民利病當知無不言昔唐陸贄崔群李
絳之徒在翰林皆能正言諫論補益當時顯聞後世爾等當以
古人自期毋負朕擢用之意○庚辰置興和懷來二守禦千戶
所調大興左衛永清右衛官軍守之○是月以寧遠諸王各據
沿邊草場牧放孳畜乃圖西北沿邊地里示之勅之曰自東勝
以西至寧夏河西察罕腦兒東勝以東至大同宣府開平又東
南至大寧又東至遼東又東至鴨綠江又北去不止幾千里而南

至各衛分守地又自鴈門關外西抵黃河渡河至察罕腦兒又
東至欽訥關又東至居藩關及古北口北又東至山海衛外凡
軍民屯種田地不許牧放孳畜其羔閒平地及山場_腹內諸王
駙馬及住邊軍民聽其牧放煎採其在邊所封之王不許占為
己場而妨軍民其_腹內諸王駙馬聽其東西往來自在營_腹駐因
而練習防胡或有稱為自己山場草場者論之特示此圖吾子
孫其世守之○頒為政要錄其書載文武官屬體統及僉書某
牘次第軍士月給廩餼與宿衛之禁屯田之政凡十有三條

大明太祖聖神文武欽明蒼運俊德成功統天大孝高皇帝實
錄卷之二百四十九

太祖高皇帝實錄卷之二百五十一

洪武三十年二月甲申朔四川柏興州三尖寨土官千戶刺兀
遣其子八的高進馬刺兀卜木尼寨叛莫賈哈刺之弟也初賈
哈刺與月魯帖木兒叛刺兀諫不從自退守三尖寨因至蓋井
衝歸順既而月魯兒帖木兒就擒賈哈刺遁山谷中怒刺兀曩
已乃引衆擊其吉水寨殺其皆刺牙步步抄布女果木等刺兀
遂遣子入貢○丙戌琉球國中山王察度遣其臣友贊結致山
北王攀安知道恰宜斯耶山南王叔汪英紮氏遣渥周結致各
貢馬及硫黃○朝鮮國王李旦以柳均等蒙恩放還遣其判三
司事倣長壽密直副使幸有賢等首鞍馬及金銀器布人參等
物至京師謝恩 上諭禮部臣曰朝鮮密通東陲比之他國最
為切近前者王氏怠政而亡李氏繼興數生邊釁與語再三終

不能止易云開國成家小人勿用朝鮮本新造之國而所用之人皆非賢智之士此恐非三韓之福也昔子產于鄭凡為辭命計草創論修飾潤色必更數人之手而後行所以鄭國稱治如鄭道傳等廼小人之尤者在王左右豈能助其為善苟使鄭總盧仁度金若恒仍在朝鮮又鄭道傳之羽翼令總等既不免王不精審又將假手於人矣宜諭其國王深思熟慮以保三韓〇占城國遣其臣卜落記真卜農來貢胡椒降香象牙等物命賜片落記真卜農衣服鈔有差〇上以川陝之間山深道阻故寇盜得以截匿出沒不常迺詔陝西都指揮僉事吳旺將兵一萬五千四川都指揮僉事俞琪將兵一萬八千從征西將軍長興侯耿丙文等於沔縣徽州之境據要害立營遣兵入捕高福興等〇丁亥遣官釋奠于先師孔子〇戊子祭太社太稷〇遣官享

先農○己丑遣鷹揚衛千戶朱貴等運皮襖纒帽皮袴各五千二百一十餘事給開平士卒○監察御史嚴震直言舊運廣東海北鹽課提舉司各場小引鹽計八十五萬八千五百引於廣西布政使司及梧州府各收一半召商中買自洪武二十九年正月起運至今年二月終所運纔得九萬四千三百六十引若以未運鹽數較之計及十年方得運畢今宜將兩鹽課所司鹽貨以大船運至廣東布政使司以小船運至梧州府廣西官司又自梧州接運至廣西布政使司先收三十萬引足然後令梧州收留二十五萬引餘有三十萬八千五百引存留廣東布政司置倉收貯召募商人於廣西乏糧衛所照例納米自赴廣東支鹽令於江西南安贛州吉安臨江四府發賣為便從之○庚寅水西土酋居宗必登不科阿加等殺普安衛千戶張駭貴州衛

百戶魏安汪俊及軍士數十人命右軍都督僉事顏成爲征南將軍帥貴州都指揮同知湯清以兵五千會左軍都督僉事何福討之。辛卯廣西太平府土官張士崇來朝貢馬。壬辰上罷朝坐奉天門因與群臣論民間事。上曰四民之業莫勞于農觀其終歲勤勞少得休息時和歲豐數口之家猶可足食不幸水旱年穀不登則舉家饑困朕一食一衣則念稼穡機杼之勤爾等居有廣廈乘有肥馬衣有文繡食有膏粱當念民勞大抵百姓足而後國富百姓逸而後國安未有民困窮而國獨富安者爾等其思佐朕裕民之道庶幾食祿無愧。癸巳實授^部工尚書^尚書事左侍郎孫顯爲本部尚書。甲午命禮部鑄雲南按察司印并巡按點南監察御史印四顆。乙未置鎮溪軍民千戶所時辰州盧溪縣主簿孫應隆招諭蠻民後業者多遂置

千戶所以鎮之以應隆焉鎮撫○宜廣西懷集守禦千戶所○
丁酉勅右軍都督府曰古者帝王馭世必嚴夷夏之辨者蓋以
戎狄之人貪而無厭苟不制之則必侵侮為邊患矣今柔甘烏
思歲長河西一帶西蕃自昔以馬入中國易茶所謂慈邊有無
者也適因私茶出境馬之入互市者少于是彼馬日貴中國之
茶日賤而彼玩侮之心漸生矣爾右軍即移文茶蜀二府長史
司啟王發都司官軍于松峒門黎雅河州臨洮及入西蕃關口
巡禁私茶之出境者朕豈為利哉制馭夷狄不得不然也○常
德府武陵縣民言武陵等十縣自丙申兵興人民逃散雖或復
業而土曠人稀耕種者少荒蕪者多隣近江西州縣多有無田
失業之人乞勅江西量邊貧民開種庶農盡其力地盡其利
上悅其言命戶部遣官於江西分丁多人民及無產業者於其

地耕種。○戊戌禮部侍郎張炳言今考中歲貢生負葉憲等七
百二十三人已送國子監肄業其不中式一百十八人遣歸本
學停膳肄業教官訓導及提調官例皆罰俸。上曰師不嚴訓
有司失于勉勵者罰如例諸生不中式者且遣歸肄業勿停其
膳四川生去京師道遠往復實難可留國子監肄業勿遣。○以
河南按察使張盟為福建按察使。○己亥命靖江王世子贊儀
往省晉王及今上周楚齊蜀湘代肅遼慶谷秦諸王先是楚
湘入蜀歷陝西出河南上山西抵大同東至于宣府北平自大
寧至遼東轉而至山東外擇文武忠厚之士以從。上以贊儀年
幼欲其知親親之義且令涉山川險易以成其德器故也。○以
中軍都督府都督僉事陳信為副總兵率舟師運糧往遼東。○
皇第四十八孫徽煥生岷王世子也。○甲辰行人陳誠呂諫至

安南諭其王陳日焜令以所侵地還思明府議論往復久而不
決誠以譯者言不達意迺自為書與日焜曰適者思明府土官
黃廣成奏言安南侵據壤地朝廷稽典冊考圖記遣使告諭俾
還所侵自誠到王國宣布上意開陳事理而執事所執逾固
未肯聽從今以前代載籍所紀疆場利害為執事陳之按誌交
趾古交州地後漢時女子徵側作亂光武遣馬援率師平之遂
立銅柱紀功亦所以限內外也在唐則為五管之一統以都護
宋時李乾德寇遼耶達將兵本之擒偽太子洪真乾德懼而割
廣源門州思浪蘇茂梳御之地以降則當是時此地尚為中國
所有况銅柱以北丘温等地乎元世祖時而祖先炳入款稱臣
及日焜嗣立失臣子之節於是世祖興問罪之師日焜蒙荆棘
伏草莽生民殆盡城郭幾墟日焜嗣立祈哀請罪世祖遣使降

詔諭令入朝當時書有還地之語而日燭云向者天使辱臨小
國迎送于祿州小國懼有侵越之罪往往辭之丘温而已觀此
則温丘以北之地其屬思明亦明矣今安南延越淵脫踰如罄
廢遠而盡有之非秉元末之亂僥倖而得之者乎行人下車之
日王之君臣皆曰此地舊屬安南而不知所屬之由陳黎二國
相及何致政亦執前說以爲祖宗之地未審何所據而然也苟
如執事所言則誌所紀紀日燭之言無乃但爲浮說耶抑王懼有
侵地之罪固執無稽之言以自飾也我 皇上天錫勇智表正
萬邦怙終者雖小過不赦改過者雖重罪亦釋傳曰過而能改
則復於無過又曰過不改是謂過矣改過效祥往歲龍州趙宗
壽之事也是否過古殃近歲南丹奉議諸蠻首是也是皆明効大
驗所共知共聞者王能避殃迎祥歸其侵地豈惟宗祏之安亦

一國生民之幸也釋此不圖爭而不讓是為怙終自禍矣惟執事圖之日焜以書復誠等曰昨辱惠書諄諭不少所據思明書云天使累遣小國迎送止立温一節此說迎送之事非疆界之事也盖立温當其要衝往時思明而入路州道近時自憑祥入洞登道皆小國林野之地不便立站故立站於立温以當縣之中有縣官館待故也至於交割夫騎則各于疆界如今坡羅唯關是也當元之初立温已為小國之地思明乃謂當元季擾亂始越銅柱二百餘里而來侵其立温等五處觀此則思明人之言不足信矣見誣若此其他可知所稱誌書自漢唐以來遷變不一其可以往昔之事而質之于今日耶餘具回咨不敢復贊誠等得書後與之辨論不已安南王饋誠等黃金二錠白金四錠及沉檀等香誠等固却之安南王曰贖者禮也自陸賈時有

之不必多遜誠曰尉陀欲以區區之越與天子抗衡是古禍者也陸賈受其金以分諸子是苟利者也王欲以尉陀自處而以賈處人抑何陋哉安南王無以對遂復咨戶部曰伏見上司為思明府奏侵占獠地遣行人陳誠呂讓持咨文至下國令還所占地下國竊惟丘温如舊慶遠淵脫五縣自昔以來供輸下國賦役世世相傳而洞登乃淵縣之地天使往來之路其思明府憑祥人每歲與下國淵縣人交割夫騎于憑祥界坡羅唯闌今思明人乃謂下國于其地洞登立站侵占何其戾也夫立站侵占將圖得其地與其人民也今其地其民古昔至今既已有矣又何用立站為夫站之廢立隨地之便隨時之宜站之長存立温地之便也站之暫立洞登時之宜也北時任尚書吳觀等以有把截邊界之役故令草起房屋以便歇宿已而後撤何預於

侵我苟不原其地與其人民而欲圖侵占乃不假何時攻戰何時破滅而此時立站其地主與其人民乃拱手而視不敢誰何又從而供其賦役何其靈異至於如此哉又謂元時大軍二次捕交回軍設立永平寨撥軍守鎮交邊着落交趾供給糧餉初二次大軍之將帥惟鎮南王不止而餞歸元史雖諱而不詳至文其歸也則曰鎮南王在內傍聞賊兵大集以過歸師王遂由單已縣趨孟州間道以出觀此則軍勢可知歸路可辨豈有回軍永平而撥軍守鎮又責交趾供給糧者哉又謂下國越過銅柱二百餘里而侵占其所屬立溫等五縣者謹按漢建武十九年馬援討交趾徵氏女王銅柱時至今一千三百五十餘歲千載之下陵谷遷變誰從能辨又謂拘問老人黃伯顏供說云云者伯顏亦思明人豈不同其願欲維千伯顏將可信耶又謂因前土

官失於申明昨襲牧職畫圖具呈及以建武誌為說者豈有廣成之高曾祖父不識古事不能申明而廣成昨日始至乃龍見識古事而申明耶下國與思明接壤思明之人往往侵占下國田土殺掠人民牛畜下國踈遠難於告愬思明扭于小獲乃圖大利而誣至此下國畏首畏尾自守之不假何敢有侵占之事哉夫苟有侵占豈難退還今不侵占何以退還此五縣者乃下國世世相傳所守之地惟知固守何敢以先世所守之地而付之思明當各守定界以事天朝何敢覬望與奪以煩上司惟聖天子一親同仁與天地同德故下國以此自恃而敢傾心陳懇煩瀆台聽罪焉敢逃今回咨申稟伏冀閣下上體 天子之至德下矜下國之遠人審察鑑裁下國幸甚誠等復命 上召群臣議之或以其抗逆朝命當討 上曰蠻夷相爭自古有之彼恃

頑不服終必取禍姑待之而已○西蕃瞿曇寺僧叅刺來朝貢
馬○丙午立四川永寧宣撫司九姓長官司儒學○辛亥白虹
亘天貫日○壬子置錦衣衛前千戶所十司曰鑿輿曰擊蓋曰
扇手曰旌節曰幡幢曰班劔曰斧鉞曰戈戟曰弓矢曰馴馬○
立西寧僧綱司以僧三刺為都綱河州衛漢僧綱司以故元國
師魏史刺監藏都綱復置河州衛蕃僧綱司以僧端月監藏為
都綱 上以西蕃俗尚浮屠故立之以來遠人也

大明太祖聖神文武欽明啓運俊德成功統天大孝高皇帝實
錄卷之二百五十

太祖高皇帝實錄卷之二百五十一
洪武三十年三月癸丑朔上御奉天殿策試舉人制象曰朕聞古之造理之士務欲助君志在行道受君之賜而民供之所以操此心固此志以待時機之來張君之德布君之仁補其不足而節有餘安蒼生于市野於斯之士古至于今歷代有之載之方冊昭如日月流名千萬世不磨朕自爲王爲帝三十四年尚昧於政事豈不思古而然歟抑志士之難見歟諸生敷陳其道朕親覽焉時是對者五十一人擢陳郟爲第一賜郟等進士及第出身有善乙卯賜在京文武官夏布人十足其九品以下者減半○播州黃平安撫楊光祖卒以其子昌貴襲職貴州龍里長官司長官何友善卒以其子九住襲職○己未以常德府澧州隸岳州府○癸亥遣駙馬都尉謝達往諭蜀王椿曰秦蜀之

茶自碭門黎雅抵朶甘(思)烏藏五千餘里皆用之其地之人不可一日無此適因邊吏譏察不嚴以致私販出境為夷人所賤夫物有至薄而用之則重者茶是也始于唐而盛於宋至宋而其利博矣前代非以此專利蓋制戎狄之道當賤其所有而貴其所無耳我國家權茶本資易馬以備國用今惟易紅纓雜物使蕃夷坐收其利而馬入中國者少豈所以制夷狄哉爾其諭布政司都司嚴為防禁無致失利○廣東都指揮僉事袁遇春討播蠻李敬宗等平之獲敬宗及天荒羅云山寨賊首鄧漢趙柳等并其黨與三百八十餘人斬之生擒二百五十餘人送至京師○上謂禮部臣曰今天下一統四夷諸蕃皆以時朝貢至如烏思藏西天尼八剌國去中夏極遠亦三年一朝惟打煎爐長河西土酋外附月魯帖木兒賈哈剌不臣中國發兵討之固不

為難然鋒刃之下死者必衆宜遣人諭其酋長若聽命素朝一
以恩待不悛則發兵三十萬聲罪致討於是禮部檄打煎爐長
河西酋長曰人之為人無貴賤無夷夏凡有血氣者莫不畏死
而好生畏禍而好福然與其畏之孰若避之與其好之孰若求
之我 皇上受天明命以有九有之師東征西伐不勞餘力四
海豪傑投首歸心已三十年矣至如遠者莫若烏思藏西天尼
八剌國亦三年一朝不敢後時其故何哉正以君臣之分不可
不謹事上之心不可不誠征伐之師不可不懼也是以朝覲之
日錫之以金帛勞之以禮宴比其還國則一國之人同榮之今
爾打煎爐長河西土酋梁月魯帖木兒賈哈剌之汗不朝久矣
豈避禍求福之道耶夫堂堂 天朝視爾土酋大海一粟耳伐
之何難取之何難盡戮其人何難然而姑容而不爾較者 皇上天地好

生之心也。今遣使諭爾首長，爾其思君臣大義，以時來朝，則福
汝生汝獲利，為無窮矣。其不悛命，大將將三十萬衆入爾境，問
爾罪爾其審哉。○詔令史典史皆服吏中，先是五軍都督府提
控掾史六部都察院都史各道書吏俱已別製中樣，不與庶民
同。至是，令天下令史典史皆服之。○甲子，禁民間無以金銀交
易。時杭州諸郡商賈，不論貨物貴賤，一以金銀定價，由是鈔法
阻滯，公私病之。故有是命。○乙丑，烏蒙軍民府署府事土官設
北源，遣使朝貢。初，烏蒙進馬，賜鈔萬錠，至是復來貢馬，謝恩。○
己巳，楚庶長子孟愬薨，追封已陵郡王，謚悼簡。○辛未，以薦揚
衛指揮寧忠為前軍都督府都督僉事。○癸酉，置湘鄉千戶所。
隸長沙衛。○征南將軍右軍都督僉事顧成等擊水西叛酋居
宗必登等斬蠻寇三千三百五十八人，生擒二千一百六十四。

人獲馬二百二十七匹必登道去時西平侯沐春亦令土官宣慰安的招諭密羅歸濟阿尼三寨納馬夷民而不科阿加之地去必登遠山谷窮隘不可以進兵遂還○甲戌改廣西向武守禦千戶所為向武軍民千戶所○刑部署尚書夏愨都察院署左僉都御史司中等奏請加左逆法以為漢法反者夷三族宜改大明律依漢律法不分異姓同居三族應坐者男子無長幼皆磔于市婦人入官為婢沒其資上曰古者父子兄弟罪不相及漢用秦法故謀反逆者皆夷三族其法太重且夫明刑定律務在公平使加之於人其人雖死不怨傳之後世雖有仁聖之君必不能有所變更矣愨等曰不執大惡也重刑以治之所以使民不敢犯也上不允但令如律○戊寅置寧國府南陵縣裁嶺巡檢司○庚辰置四川鹽井千戶所○古州上婆洞蠻林

寬自號小師聚衆作亂攻龍里守禦千戶所千戶吳得鎮撫井
孚議城守之計令人馳報貴州都指揮使司堅守以待援至賊
縱火燒四門攻城益急得曰我等為國守邊又有父母在城今
賊勢如此徒守無益即上馬率精銳開城門擊賊或謂得曰賊
勢方盛宜俟其怠擊之得曰城破在頃刻何俟之有若城不能
守父母不能救是不忠於君不孝於親吾何用生為即率麾下
馳入賊陣中殺數十人搏戰不已遂中毒^死死乎維戰亦死于
陣城遂陷事聞 上曰忠孝立身之大節能^兩全者古人所難今
吳得并孥臨難捐身因忠顯孝非怨丈夫不能命追贈得為指
揮僉事孥為正千戶各令其子襲職仍以錢帛恤其家得滁之
全椒人多泗之盱眙人○命戶部申明牙儉賂利商賈私成交
易之禁○壬午燬^成入太微 上遣使勅楚王楨曰自古至今有

土有衆者務謹身心觀天道察人事不敢自暇自逸劇向云人君候五星出入所舍何分進退休咎務必知之蓋人事作於下則天道應於上可不謹哉其分茅胙土之君亦有一國之休咎苟於神人之理漠然無知如之何而能膺大賞而有土有衆也吾諭爾久矣前者親與天文書一帙備載周天列宿意在爾務知五星出入洞燭禍福以修人事也舊歲熒惑入太微不可不慮况太微居翼軫之度翼軫楚分野也太微天廡也五星無故而入災必甚高自熒惑之入吾憂不已且熒惑徑入而東往猶可也今順入而逆出已八十日矣在內廡十日有死君者有死后者死宰相者况八十日乎今爾子因疾而逝天象豈不可信災非止此更有甚焉爾當省愆慎德以回天心故諭○勅兵部曰已茶自國初徵收累年與西番易馬近因私茶出境致茶賤

馬貴不獨國課有虧殆使戎寇放肆生侮慢之心蓋由守邊者不能禦防或濫文無度縱私茶或假朝廷為名橫科馬匹以致番人悖信朝廷初不知此但謂西番不順豈知邊吏有以激之故嘗命曹國公李景隆齎金牌勘合直抵西番以傳朕命令各番首領受俾為符契以絕姦欺尚恐邊衛將士巡防不嚴私茶出境爾兵部備傳朕意諭邊守者知之於是兵部具禁約事宜遣人齎諭川陝守邊衛所仍遣僧管著藏卜等往西番申諭之

大明太祖聖神文武欽明啓運俊德成功統天大孝高皇帝實錄卷之二百五十一

明太祖高皇帝實錄卷之二百五十二

洪武三十年夏四月癸未朔享太廟○賜國子監生夏衣八五
件有家室者人加帛二尺○甲申禮部奏先王制禮所以辨上
下定尊卑國朝定為禮制行之既久玩習為常相見之禮往往
凌越等有幸禮意請申禁之 上命六部都察院翰林院等官
議凡百官以品秩高下分尊卑其品級近者相見行禮則東西
對立稍卑者居西高者居東其品秩相越二三等者卑者居下
尊者居上其相越四等者則卑者拜下尊者坐而受禮有事則
跪白如一品與二品相見二品居西行禮一品居東答禮與三
品四品相見三品四品居下行禮一品居中答禮與五品以下
相見一品坐受粟事則跪餘放此其司屬官品級亞於上司官
者粟事則跪凡近侍官貧雜拘品級行跪拜禮亦不許與外官

交接凡同僚官品級有高下者不拘凡大小官員於內府相見不許跪拜若官員出入街道亦不許抗慢其餘軍民人等於街市過見官員引道經過即須下馬却避不許衝突違者論其罪議上從之○乙酉勅晉王今上備邊十事其一曰向者發往開平防邊擒胡大小將校宜遣人閱實明白具籍以聞是時塞草方青胡人必順水草而南宜謹斥候廣布置務殫智慮設法設防每一墩用馬二匹而以三十墩為一路計用馬六十匹其相去或二十里或三十里則設一路總十路則用馬六百匹其布置之法則由內而外其近裏則二十里為一墩計十墩外則十五里為一墩又計十墩又外則十里為一墩又計十墩以此得節一路可望五百里少有烽警則無不先知矣其二曰須選人領精騎或五六千或七八千在百五十里至二百里外一路

潛伏以偵望之則可知彼之虛實矣其三曰所設十路斤墩每處馬三十層每層馬二匹東西相去二百里廣受所發防邊將校東五層內西五層內皆須在十層兩間以候遠望消息仍令每墩壘砲積薪務嚴備豫晝則望煙夜則望火至加防慎則彼之多寡亦可知矣其四曰王所統大軍除發去都督等員率領隄備其餘護衛或一萬或二萬王親率於附近屯所往來收放仍須被堅執銳夙夜加謹望遠者去王約三十里不許頃刻有怠王之隊伍常在斤墩以裏不宜久駐一處東南西北往來莫測又須趁逐水草隨營收放以就孳焉其五曰今年八月二十日晉王 燕王起程九月一日遼寧谷代起程務在約量程遠同至京師朕別有議非面諭不可也其六曰今年屯種自東勝至開平開平至大寧廣寧須於五月一報禾苗長養何如七月

再報結實何如十月又報所收子粒若干一歲三報不惟使朕
知邊儲虛實而屯軍亦不至懈力矣其七曰晉王燕王宜督
諸王并都司行都司報知孳畜預戰馬數必從行太僕寺點視
稽驗自洪武二十三年至于今通計所產駒若干悉數以聞其
八曰京師發去江淮太僕寺孳生馬及戰馬八年之間數該七
萬王督諸王及都司行都司以逐年領馬之數稽其原領月日
暨受馬月日條列具陳仍命太僕寺督併更加號令權督都司
行都司母容少怠其九曰向者所發有罪大小將校須悉心點
視立成隊伍其中有名到而人不至及有病亡者皆須明白具
數以聞其十曰不分大小官員并軍校等凡領騾馬驗其關領
牌日每年納駒一匹仍須審其孳產有無不可一槩徵索特諭
爾知如勅奉行○申禁人民無得擅出海與外國互市○成子

命右軍都督府遣鎮撫劉正於瀘州市綿布往西番易馬凡用布九萬九千餘疋得馬一千五百六十匹命分給建昌鹽井二衛軍士操養○己丑旌表蘇州府崑山縣民水得妻李氏貞節○改秦州茶馬司為西寧茶馬司遷其治于西寧從長興侯耿炳文之請也○辛卯 上以書諭 今上曰玉林天城皆西北要地非堅城深池不可以守今山西軍已築玉林城其天城城宜令北平軍士築之期今歲完否則來年完之母促役以困其力也○制諭征西將軍長興侯耿炳文武定侯郭英曰四川陝西兩界相接之地自定天下以來番漢頑民多潛遁山谷間不供征徭不懼法度近者高福興等從山賊作亂阻官道殺人民／故命爾等討之大軍既至其良善者招諭付所司編管為軍餘不順化者必平之迺可班師山深道險難以騎戰如軍中有馬

宜發還都司牧養止留二三千可也應有機務條列以聞○勅
晉王 今上曰近欽天監奏占天象當有胡兵入寇朕以爲不
特天象可徵以人事度之胡人亦有是謀何也前歲秋山西塞
外降胡遊歸嶺北此數人居山西八年安得不以中國虛實爲
胡人謀乎此胡人入寇之端也自今其令都司行都司簡閱步
卒騎兵或三萬或二萬常兼數萬六卒而騎兵每五百以一將
領之五百分爲五隊每隊領以一戰將而五將咸聽一將之令
往來折衝以摧賊陣步兵亦如騎兵之法選將領之嚴防隊伍
與騎兵並進而夾攻我馬雖少步兵則多胡馬雖多彼無步兵
苟有侵犯可與戰矣其深體朕意毋忽○古州蠻寇林寬復率
衆犯新化寔至平茶守禦千戶紀達率壯士七十餘人擊之賊
衆大集達突入賊陣手殺數人以槍橫挑一人擲之反流失中

臂遠拔之復戰賊大驚曰是平茶紀蒙耶即遁去蓋蠻人稱官
為蒙云 上聞之嘉達勇畧賜以鈔帛○癸巳戶部上富民籍
名先是 上謂戶部尚書郁新吏部侍郎張迪等曰人有恒產
斯有恒心今天下富民生長田里之間周知民事其間豈無才
能可用者其稽諸戶籍列名以聞朕將選用焉於是戶部奏雲
南兩廣四川不取今稽籍得浙江等九布政司直隸應天十八
省州田畝七頃者萬四千三百四十一戶列其戶名以進命臧
于印綬監以次召至量才用之○甲午廣南衛火延燒四門城
樓及衛治倉庫軍器官文書軍民廬舍傷人○定考覈著事官
員監生等第時刑部司務楊正等具列郎中以下官及歷事監
生勤謹與其才力不逮者以聞 上命勤謹者仍治其事才力
不逮者下群臣議吏部侍郎張迪會議凡實授官在任三月才

力不逮者考奏然降署事及歷事監生三月才力不逮者仍送監讀書從之○丙申陞刑科給事中張思恭為刑部右侍郎人有暮夜以金遺思恭者思恭却不受其人委金而去詰旦思恭言於朝 上善思恭有守遂陞其官仍以其金賜思恭○置安東瀋陽二郡牧千戶所特韓府瀋府護衛官軍先往東勝立衛特置二所隸之○思南宣慰使司田大雅母楊氏來朝貢馬及方物詔賜白金文綺鈔錠○上以武官多私役軍卒諭法制命禮部考定其從人額數於是禮部議指揮及同知六人僉事及千百戶衛所鎮撫四人皆於正軍伍內取用輪番更直每三日一易下直則歸隊伍操練凡衛所直廳六人守門二人守監四人守庫一人止選老軍充役每月一更直 上以正軍占役太多宜減其數指揮使至僉事人四人千戶以下人三人百戶以

下人二人每三日一更餘如所議著為令○丁酉詔革所在鐵
冶所山西交城縣大通治吉州豐國治富國治江西臨江府新
喻治袁州府分宜治湖廣武昌府興國治河南鈞州治新安治
四川蒲江縣新市治凡九所以其採煉病民故罷之○己亥命
湖廣都指揮使齊讓為平羗將軍蘄州衛指揮僉事胡冕為左
副安陸衛指揮僉事宋晨為右副統兵五萬討古州蠻寇林克
等○賜在京敘仕武官小麥指揮二十石千戶衛鎮撫千石百
戶所鎮撫五石監工及江淮濟川指揮五十石千戶衛鎮撫三
十石百戶所鎮撫二十石○壬寅征南將軍都督僉事顧成等
平水西諸蠻初普定衛西堡長官司土官阿傍作亂貴州都指
揮使司發兵討破之賊酋卜刺贊等遁去與土官阿火者助必
登劫殺官軍至是成道普定衛指揮顧統立賞格誘禽卜刺贊

復射殺阿火者必登援絕遠遁水西平○癸卯置東平州及肥城二千戶所以民編甲屯守復發山東布政使司按察司杖罪囚人補之○陞曉騎衛指揮僉事王聚虎貢衛指揮僉事翁義為湖廣都指揮使司都指揮僉事○以前刑部尚書楊靖為都察院左都御史擢監察御史嚴震直為右都御史○省署僉都御史鄧文鏗劉觀景清罪初文鏗等奏事能以奏本送刑科既而以事左訛私懷都察院印至科吏易之為給事中所奏詔下獄至是宥之命往四川陝西譏察私茶○辛亥以唐庸為給事中庸寧夏人父中嘗為貴州衛戍卒庸代役時有令凡軍民懷一材一藝者得以自効庸詣闕自陳吏部奏庸正軍宜呈戍上曰今既下而背之是不信也人有才而不用是棄賢也遂擢庸之

太祖高皇帝實錄卷之二百五十三

洪武三十年五月壬子朔日有食之是夜鎮星犯罰星○甲寅命六部都察院等官議定贖罪事例凡內外官吏犯笞杖者紀過徒流遷徙者以俸贖之三犯罪之如律雜犯死罪者自備車牛運米輸邊本身就彼為軍民有犯徒流遷徙者發充運運水夫凡運米贖罪者甘肅車一兩牛四頭米十石山丹加一石永昌加二石西涼加三石雲南曲靖普安如西涼之數○大明律誥成上御午門諭群臣曰朕有天下倣古為治明禮以導民定律以繩頑刊著為令行之已久然而犯者猶衆故于聽政之暇作大誥昭示民間使知趨吉避凶之道古人謂刑為祥刑豈非欲民並生于天地間哉然法在有司民不周知故命刑官取大誥條目撮其要畧附載于律凡榜文禁例悉除之陰逆謀并

律誥該載外其雜犯大小之罪悉依贖罪之例論斷今編次成書刊布中外令天下知所遵守刑期無刑庶稱朕恤刑之意○乙卯命楚王楨率師征古州洞蠻湘王栢副之勅曰近西南蠻夷作亂爾若能于此時與民同憂即率護衛軍馬親往征之豈不稱為賢王今迺以都司奏兵不足請調用屯軍爾護衛兵則置而不用所為如何耶夫尊居王位安享富貴宮室衣服輿馬之奉皆民力所供而不能為民禦灾捍患則鬼神必怒百姓必怨福祿將薄矣若能奮威武除民患山川鬼神亦將助順福祿庶可悠久勅至即選護衛精銳期七月二十日進討以湘王為爾副仍統領都司所屬諸衛軍馬務在殄滅兇渠以安民庶○丙辰擢禮部員外郎侯泰為刑部左侍郎司務暴昭為刑部右侍郎○戊午夜夢惑犯右執法○己未直隸安慶府懷寧縣

者民程慶六率衆數十人詣闕言縣丞蘇益廉幹寬平多行善
政今以事遠願加矜宥俾復其職上謂都察院臣曰有司之
職所以為民也蘇益能得其民心良足嘉尚宜宥之以勸其餘
○庚申夜有星大如雞子尾跡有光自天厨入紫微垣後有二
小星隨之至游氣中沒○壬戌遼東都指揮使司言朝鮮國遣
使貢馬謝恩上以其貢非時又所云謝恩不知何故詔禮部
使却之○乙丑命雲南景東府土官故知府俄陶之子幹龍英
州土官故知州趙仁忠之子雄各襲父職○丙寅戶部尚書郁
新言山西狹鄉無田之民募至山東東昌高唐境內屯種給食
已及三年請從本府民地則例驗畝起科自今年為始徵其租
稅上曰民貧則國不能獨富民富則國不至獨貧其再復一
年然後徵之○丁卯詔征南將軍右軍都督僉事趙成運

上以蠻夷見官軍久駐心必疑懼故難猝服欲姑緩之以示綏懷之意故有是命○戊辰當塗知縣孟廡縣丞趙森以事繫獄縣民詣闕言其廡勤察之果得其實命宥之復其官○己巳

○上復以天象示變占北方當有警勅晉王 今上及代遼寧谷六王曰驗之歷代天象若此者邊戍不寧徃徃必驗今天象于徃者正同不可不慎也其應雖非今歲然二三歲間灼有寇邊者宜令軍馬東西布列各守其地今爾等所守地方不下六千里急邊難為聚會每處軍馬多者不過一二萬而胡人之馬計有十萬其不出則已設若南行馬勢必盛自非機智深密晝夜熟算孰能制之兵法云致人不致于人多算勝少算不勝况無算乎吾今老矣精力衰微機思謀慮艱于運籌爾等受封朔土藩屏朝廷若不深思遠慮倘或失機悞事非惟貽憂朕躬爾等

安危亦繫於是可不慎哉吾今畧與爾謀或今歲或二三歲大軍未會止是本護衛及都司行都司軍馬各守分地多不過一二萬倘遇胡馬十數萬寇邊不宜與戰或收入壁壘或據山谷險隘之處夾以步兵深伏以待之彼見我不與之戰必四出鈔掠俟其驕怠分散隊伍不^嚴發我以馬步邀截要道破之必矣若一見胡馬輒以三五千或一二萬輕與之戰豈特不能勝之必至失利務在深藏設計待彼肆志馳騁則一鼓可擒其首將矣

○築遼王府于廣寧先是王之國未築城府但樹木柵於廣寧西大凌河北草創宮室以居之尋命武定侯郭英督遼東各衛及護衛軍士營建王宮城于廣寧故城西後上聞英督工嚴急軍士勞弊命羅其後至是中軍都督僉事陳信宣信運糧于遼東因命信等以舟師協助都督楊文等率遼東諸衛軍士復

築城浚濠建立宮室令高壯其城門以備不虞或有勍敵難以
守禦則王徙居山海衛而以馬步軍守其城王領兵時復往來
因諭信等曰高麗地界遠左其國君臣畏威而不懷德此以誠
撫彼以詐應此以仁義待之彼以譎詐來從昔嘗誘我遼東守
將李謚為叛朝廷先覺故不能為害今不可不為之備此夷不
出則已使其一出必有十萬之衆定遼境土與之相接宜陰戒
斥堠以防其詐凡事有備庶不失機其慎之哉○辛未 上復
以天象示變勅晉王 今上曰今塞草豐茂山後地高夏無酷
暑宜用心為備上天告象不可頃刻自安爾其訓練士馬控弦
以備之庶幾無患○乙亥旌表饒州府浮梁縣鄭敦成妻王氏
金添麟妻鄭氏徽州府歙縣江務本妻許氏貞節○己卯天下
講讀大誥師生來朝者凡十九萬三千四百餘人並賜鈔道還

六月辛巳朔

上御奉天殿策試下第舉人先是禮部會試者多而中式者少被黜落者咸以為言上命翰林儒臣考下第卷中擇文理優長者得六十一人至是復建試之制策曰天生蒸民有欲必命君以主之君奉天命必明教化以導民然生齒之煩人情不一於是古先哲王設五刑以弼五教善者旌之惡者繩之善惡有所勸懲治道由斯而興歷代相因未嘗改也朕承天命君主生民宵衣旰食三十餘年儲思積慮惟欲安安生民其不循教者亦有由是不得已施之五刑今欲民自不犯抑別有其術歟爾諸文士陳其所以朕將覽焉時廷對中擢韓克忠為第一仍賜克忠等進士出身有差○壬午賜進士韓克忠等恩榮宴于會同館○置政平訟理二樞審論罪囚上諭刑部官曰人言法

家少恩此後世用法之過故有是言朕觀唐虞之世好生之德
洽于民心安有是言哉尔等每論因引至朕前雖詳其致罪之
由然一時裁決恐未得情自今論因惟武臣死罪朕親審之其
餘不必親至朕前但以所犯未奏然後引至承天門外命行人
持訟理播傳旨諭之其無罪應釋者持政平藩宣德意遣之繼
令五軍都督府六部都察院六科給事中通政司詹事府詳加
審錄究者即為奏聞無寃實犯死罪以下悉如律其雜犯死者
准贖○乙酉以進士韓克忠為翰林脩撰王恕焦勝為編修行
人司副陳性善行人陳誠為檢討○丙戌以進士苗微為通政
使司右叅議○丁亥勅楚王楨湘王栢曰前者命爾兄弟以七
月二十以前進兵征勦洞蠻今占天象太白七月三日伏兵未
可行十月二十三日當夕見西方太白出高深入者勝此用兵

所當知也。今指揮齊讓兵已歷蠻境，即遣人語之，令且出奇設伏，嚴為備禦，休息士馬，以乘其弊。待太白出後，則併力討之。如生擒蠻人，不可輕殺。蓋兵以安民，非殃民也。○庚寅，靖州洞蠻楊高等作亂，以其衆寇五開。指揮同知方忠率兵攻之，不克。○陝西行都指揮使司都指揮同知王英率兵至白石溝，搜捕鞋靴，獲伯顏答失等男婦五十九人及馬、駝、牛、羊而還。○晉王令上統軍行邊，出開平數百里。上聞之，遣人賫勅往諭之曰：「近者人自塞上來，知爾兄弟統軍深入，古人論兵貴乎知己知彼。若能知彼，又能知己，雖不能勝，亦無凶危。不知己，又不知彼，猝與敵遇，凶莫甚焉。且以知己言之，我朝自遼東至于甘肅，東西六千餘里，可戰之馬僅得十萬，京師、河南、山東三處馬雖有之，若欲赴戰，猝難收集。苟事勢緊急，北平口外馬悉數不過二

萬若逢十萬之騎，雖古名將亦難于野戰，所以必欲知己。其我馬數如是，縱有步軍，但可夾馬以助聲勢。若欲追北擒寇，則不能矣。今尔等率數千馬，離開平三、四百里，駐曠塞中，況無輕騎，遠偵以知敵情，使胡兵數萬，晝潛夜行，隱柳藏荻，猝然相遇，彼以數萬，我以數千，何以當之？若欲縱轡馳行，其將何以全軍士哉？今吾馬數少，止可去城三、二十里往來也。駐遠，斥候謹烽燧，設信砲，猝有警急，一時可知。胡人上馬動計，十萬兵勢全備。若欲折衝鏖戰，其孰可當尔等？不能深思熟慮，提兵遠行，不與敵遇，則僥倖耳。設若遇之，豈不危哉？方今馬少，全仰步軍，必常附城壘，倘有不測，則可固守保全，以待援至此上策也。噫！吾起寒微，因天下亂，不得已入行伍中，不二年從者如雲，猶且聽命于王者。又二年，帥將士東渡大江，秣馬厲兵，於建業以觀天下。

之變其諸雄皆攷肆無籍之徒雖曰無籍而元亦不能馭乃命
中山武寧王開平武忠王總兵四征與群雄並驅又不數十年
群雄殄滅偃兵息民當並驅之時張士誠稱王于姑蘇陳友定
扼險于八閩方國珍擅命于甌越杜遵道劉太保僭亂于中原
徐貞一陳友諒相繼僭號稱尊于江漢兵無紀律同類相夷元
義兵李察罕輩奮起河洛劉太保莫能與敵梁地遂平察罕之
兵徑入齊魯滅亂雄毛氏之類渠帥雖能嬰城固守及與察罕
拒戰所在敗北察罕兵驕氣盈心詐志狂所以卒殞于敵手未
久察罕之甥王保保帥兵一切作為蹈勇之謀不能服衆以致
部下聲言劾忠朝廷請命加誅王保保自是元內外嚮生首將
擅兵於外大臣弄權于內朕觀是機發兵討之自洪武元年兵
渡江淮長驅齊魯席捲河南遂入潼關復遣大將由鄴下趨真

定移營通州元君棄城北歸而幽薊之區悉定矣西入晉冀晉
冀乃平兵渡河西關中亦定不三年而天下一統噫吾用兵一
世指揮諸將未嘗敗北致傷軍士正欲養銳以觀胡變夫何諸
將日請深入沙漠不免疲兵于和林此蓋輕信無謀以致傷生
數萬今尔等又入曠塞提兵遠行設若遇敵豈免凶危自古及
今胡虜為中國患久矣歷代守邊之要未嘗不以先謀為急故
朕于北鄙之慮尤加慎密爾能聽朕之訓明於事勢機無少懈
雖不能勝彼亦不能為我邊患是良策也善勝敵者勝於無形
爾其慎哉○戊戌賞鳳陽等衛築城門軍士九千九百八十七
人鈔各三錠○己酉命右軍都督府凡陝西都司行都司軍民
馬匹不許出潼關藍田武關違者罪之○命征南將軍右軍都
督俞寧顧成討靖州洞蠻時成統兵平水西叛首被召將還京

會蠻人寇五開故遣使賫勅即軍中命成與都指揮程暹統兵討之○駙馬都尉歐陽倫坐貶私茶爭覺賜死初上命秦蜀歲收已茶聽西蕃商人以馬易之中國頗獲其利其後商旅多有私自販鬻至為夷人所賤馬價遂高乃下令嚴禁之有以已茶私出境者寘以重法倫嘗遣家人往來陝西販茶出境貨鬻倚勢橫暴所在不勝其擾雖藩閫大臣皆畏威奉順略不敢違時四月農方耕耨倫適在陝西令布政使司移文所屬起車載茶往河州倫家人有固保者尤繼暴所至驅迫有司索車五十輛至蘭縣河橋巡檢司捶辱其吏吏不能堪以其事聞上大怒以布政使司官不言并倫賜死保等皆坐誅茶貨沒入于官以河橋吏能不避權貴遣使賫勅嘉勞之

太祖高皇帝實錄卷之二百五十三

太祖高皇帝實錄卷之二百五十四

洪武三十年秋七月庚戌朔享太廟○置都知監秩正四品掌
內府各監行移一應關支勘合設太監一人正四品左右少監
各一人從四品左右監丞各一人正五品典簿一人正六品又
置銀作局掌造內府金銀器用設大使一人正五品副使一人
從五品○命左軍都督府遣人驛召都督楊文選京○辛亥皇
第四十九孫貴煥生遼王世子也○壬子征南將軍都督僉事
顧成等奏水西叛首必登不科阿加聞官軍退皆還舊寨可乘
機勦除之 上遣使勅報之曰獸聚鳥散蠻夷之情耳捕之則
又逃竄徒勞師旅不如姑緩之俟一二年再舉可也勅至爾即
移兵討五開等處○癸丑命監察御史張亨國用聞良輔李昇
紀正裴承祖康薦楊直林崧王中同署都察院事○乙卯調右

軍都督同知袁宇為左軍都督同知○丙辰擢行人劉本為陝西左布政使楊璉為右布政使劉季荒為左叅政戚存心為右叅政○丁巳左都御史楊靖以罪賜死靖山陽人登洪武乙丑進士第為庶吉士試事吏科擢戶部試右侍郎實授左侍郎尋陞尚書改刑部靖資性明敏有識善敷奏理刑平恕上教獎厲之及使安南還改左都御史至是靖有鄉人坐事繫獄家人擊登聞鼓狀訴靖為改狀草增飾浮詞為御史所劾上念其才不之問御史論不已乃賜死于家○己未擢行人司正周鈞為河南叅政于四川相據施禮為左右叅議世行人郭子虛為行人司正郭共當宗載為左右司副幸商命戶部成都重慶保寧三府及播州宣慰使司置茶倉四所貯茶以待客商納米中買及與西蕃商人易馬各設官以掌之○甲子陞山西布政使司經歷李彬為右叅議○命太常寺丞張顯宗署國子監祭酒事翰林院有撰韓克忠署司業事行人匡顯鄧彥

質蔣恭張庸許子謨周鐸王禮署助教事○乙丑 上謂兵部
臣曰古人間國君之富數馬以對朕觀往古以至于今無不以
馬為重况人君統一寰宇欲措生民久安于田里豈可不重馬
哉今我朝定天下三十年矣守邊諸將操精兵嚴備禦初本皆
能既定之後人各怠慢但務理財固知備禦如甘肅西涼守將
宋晟莊德張文傑等嘗征討邊夷多獲馬匹牧于塞上又以所
虜胡人為家奴待如親屬諸將曾不思凡征討所得資畜皆出
軍士之力一旦家奴變生罄群牧而掠去上不能有補於朝廷
下不能有益於軍士欲以理財乃至亡財此果智者所為乎爾
兵部其以此意諭之自今邊將不得以胡人為家奴所畜馬或
千百匹或四五十匹不得私鬻若欲財用則入馬于官官給其
直若朝廷出師征討悉以所畜馬分給騎士師還之日損者償

其直若馬少不顧鬻者聽此外惟驛傳及太僕寺馬戶得買餘皆不許陞刑部郎中王良張春戶部主事郭資俱為都察院僉都御史○丙寅上諭群臣曰凡人所為不能無過舉但當平其心則可以知其過矣其心本公所為之事或謬此則識見未至致有過悞若緣私意而所行有謬戾者此特故為耳君子小人之過於此可見然君子之過雖微必彰小人之過雖大弗形蓋君子直道而行固無所回互小人巧於修飾固多所隱蔽人君苟不察其微則君子小人莫能辨別又曰朕觀往昔議論于廷有忤人主之意者必君子也其順從人主之意者必小人也以忤已而怒之以順已而悅之故小人得幸而君子見斥矣人主取人權衡在己當兼取于衆論不可以一時之喜怒為進退爾○己巳申明學規教條上謂禮部臣曰太學育才之地朝

廷學廩祿廣學舍延致師儒以教諸生期于有成為國家用近者師道不立學規廢弛諸生惰業至有不通文理不精書算不諳史事甚者抗拒師長違越禮法甚非育才養賢之道也向者已令條陳學規俾師生遵守尔等宜申明之於是復頒學規教條于國子監曰各堂教官所以表儀諸生必躬修禮度率先勤慎毋惰訓誨使後學有所成就斯為稱職諸生每三日一背書日讀御製大誥及本經四書各一百字熟記文詞精解理義或有疑難則謙恭質問務求明白不許凌慢師長若疑問未通闕疑勿辨升堂背書必依班次序立以俟不許攙越每月作本經四書義各二道詔誥章表策論判語內科二道每日習做書一幅二百餘字以義獻智永歐虞顏柳等帖為法各專一家必務端楷旦暮升堂必衣冠嚴整步趨中節坐堂必禮貌端莊恭勤

誦讀不得脫巾解衣往來別班會饌必款恭飲食不得諠譁朔望隨班謁廟畢方許與假出近處游訪不得放肆醉飲顛倒街巷及與人爭鬪有傷風教一應事務必先告本班教官令堂長率領升堂告於祭酒可否行之若有疾病無妻子者養病房調治每夜必在監宿歇雖在諸司辦事者亦必回監並不許群聚酣飲遇有選人除授及差遣辦事從祭酒公選差違違者罪之○辛未 上謂戶部尚書郁新等曰陝西漢中以茶易馬每馬約與茶百斤歲給茶三百萬斤可易馬三萬匹宜嚴守關隘禁人販鬻其四川松茂之茶與陝西同碭門黎雅則聽商人納米市易爾戶部即遣人於陝西四川按視茶園之數○壬申致仕兵部尚書兼太子少保唐鐸卒鐸鳳陽人初從軍守濠州庚子從 上討江州授西安縣丞召還除中書省管勾出知延平府

三載召為殿中侍御史復出知紹興府陞刑部尚書改太常卿
丁母憂家居特賜食半俸服闋除兵部尚書改諫議大夫以事
左遷監察御史尋陞都察院右副都御史復為兵部刑部尚書
遂以兵部尚書致仕仍食其祿及立詹事府起為太子賓客逾
年陞少保鐸重厚悛密 上初起兵時鐸即事左右 上以故
舊遇之為尚書御史時僚屬數以事連鐸 上重其德皆釋不
問 上嘗稱之曰鐸自友及臣至今三十餘載其人交不知變
色絕不出惡聲其見恩遇如此卒年六十有九遣官護喪事卹
賻甚厚○甲戌夜月掩井鉞○乙亥命戶部下郡縣更置糧長
每區設正副糧長三名以區內丁糧多者為之編定次序輪流
應役周而復始○丙子勅 今上曰夫用兵之道在明號令號
令既出難以姑息違者必正其罪師出以律故也使軍將信其

事而無違或臨戰陣或近敵壘庶不失機少有姑息諸軍必慢其將視以為常悞事不可勝言故用兵必嚴號令使賞罰明賞罰既明推堅撫順易為成功近左護衛千戶李璿奏山海衛指揮黃佑故悞王令如此之人苟不明罰示衆何以號令三軍以一衆志乎近聞發往開平贖罪指揮千戶及衛所鎮撫璿所乘馬驛徒行將何以揚威武而制胡人哉勅至即罪黃佑于開平以徇賣馬驛者繫送京師○置荊州左衛

八月庚辰朔賜國子監琉球生仁悅慈等羅衣人一服○夜歲星入鬼宿中○辛巳清平衛奏黔陽辰溪等處蠻民相扇為亂勅楚王楨曰今黔陽等處蠻人聚衆劫掠必謂官軍征進故乘夜出沒欲梗阻餉道沮我師行今發官軍二萬四千餘人從爾護衛軍後至則令護衛指揮一人總之與都督湯醴審忠駐營

黔陽辰溪之地如蠻人復來就擒捕之以通驛道○丙戌楚王
楨遣千戶周遜請軍餉上勅報之曰晉^住者諸將東征西討朝
廷何嘗運糧隨軍今尔率兵止在一隅欲請糧三十萬石豈不
可愧况三十萬糧儲在靖州者欲備銅鼓立衛五關缺食不可
輕費也尔兄弟計所統軍已不下十萬尚未能勦除蠻寇九月
間當別遣總兵官發京師大軍進討尔兄弟在軍中當爾部伍
不許分營比大軍未至苟有才謀樹立功名先除群蠻以安民
庶豈不偉哉此師之出務令勦絕克渠然後班師出征日期九
月二十六日預令尔知之○丁亥遣官釋奠于先師孔子○黃
河決開封城三面皆受水水將及府之軍儲倉巨盈庫事聞詔
於滎陽高年築倉庫以儲備之○戊子祭大社大稷○夜熒惑
入次宿○己丑以右都御史嚴震直為工部尚書○甲午遣官

洪武三十一年

祀歷代帝王。勅曹國公李景隆曰：古人安不忘危，治不忘亂。今天下平定已久，恐兵事懈弛，緩急罔濟。近天象有警，尤不可不慮。特命爾佩征虜大將軍印，往河南訓練將士。大小官軍悉聽節制。兵法云：用之在乎機顯，之在乎權汝。其慎哉。○乙未，祭太歲風雲雷雨岳鎮海瀆山川月將城隍諸神。○遣官祭旗纛。○丁酉，蘭州奏朵甘烏思藏使臣以私茶出境守關者執之，請寘于法。上曰：禁令以防闕吏及販鬻者，其遠人將以自用一時，冒禁勿論。○戊戌，都察院奏獄囚律應死者二十四人，請以時決之。上曰：爾等倉卒論決，其中豈無情有矜法可疑者？古人云：求其生而不得，則死者與我皆無憾也。苟遽寘于法，一有不當，悞傷人命，遂命群臣審錄，果得其不當死者，皆撻戍。○遼己亥，左軍都督楊文還，白遼東賜馬三匹。○以義門鄭沂為禮

部尚書稅戶人才湯行為吏部右侍郎嚴奇良為戶部左侍郎
潘長壽為都察院右僉都御史王聰為左道政丘顯為右道政
沈成為湖廣左布政使盛任為山東左布政使○辛丑命都督
楊文鼎閱沿江各衛戰船○暹羅國遣其臣素婆郎直事梯上
表貢方物○癸卯四川監井衛遣鎮撫王真入奏前賈哈刺
據十寨已調兵平其五餘負險未下請得兵五千守關隘即與
都指揮使司進兵勸之 上從其請○丙午禮部奏諸蕃國使
臣客旅不通 上曰洪武初海外諸蕃與中國往來使臣不絕
商賈便之近者安南占城真臘暹羅爪哇大琉球三佛齋渤尼
彭亨百花蘇門答刺西洋邦哈刺等凡三十國以胡惟庸謀亂
三佛齋乃生間諜給我使臣至彼爪哇國王聞知其事戒飭三
佛齋禮送還朝是後使臣商旅阻絕諸國王之意遂尔不通惟

安南占城真臘暹羅大琉球自入貢以來至今未庭大琉球王
與其宰臣皆遣子弟入我中國受學凡諸蕃國使臣來者皆以
禮待之我待諸蕃國之意不薄但未知諸國之心若何今欲遣
使諭爪哇國恐三佛齋中途阻之聞三佛齋係爪哇統屬禮
部備述朕意移文暹羅國王令遣人轉達爪哇知之于是禮部
咨暹羅國王曰自有天地以來即有君臣上下之分且有中國
四夷之禮自古皆然我朝混一之初海外諸蕃莫不來庭豈意
胡惟庸造亂三佛齋乃生間諜給我信使肆行巧詐彼豈不知
大琉球王與其宰臣皆遣子弟入我中國受學 皇上錫寒暑
之衣有疾則命醫診之 皇上之心仁義兼盡矣 皇上一以
仁義待諸蕃國何三佛齋諸國背大恩而失君臣之禮據有一
叢之土款與中國抗衡倘 皇上震怒使一偏將將十萬眾越

海問罪如覆手耳何不思之甚乎 皇上嘗曰安南占城真臘暹羅大琉球皆修臣職惟三佛齊梗我聲教夫智者憂未然勇者能徙義彼三佛齊以暹羅之國而持姦於諸國之中可謂不畏禍者矣爾暹羅三獨守臣節我 皇上眷愛如此可轉達爪哇俾其以大義告於三佛齊三佛齊係爪哇統屬其言彼必信或能改過從善則與諸國咸禮遇之如初勿自疑也○丁未上以在外諸王非時興作擅役工匠諭工部臣曰天下人匠編成班次赴工各有定期然諸王府每有興造臨期之際趨此違彼艱莫甚焉夫勞民動衆春秋所戒方今諸王在國宮室各有定制皆宜守禮安分勿擾於民可也朕嘗聞元時廬州太子為修宮室令民冒雪舁木監司版圖兒見其苦即釋之又如威順王在武昌因怒小吏械擊之于市廉訪司官言此小事王宜勿

預王即釋之此二王皆知禮奉法聽納正言所以能保其富貴也今諸王府宜各守定制不得私有興造勞吾民匹若有應頒造作而不可已者必奏請方許爾可移文各王府知之○夜燬惑入房○戊申吏部尚書杜澤言富民既名登天府宜依次取用上命先取山東河南淮東者至京選用之○平羗將軍都指揮齊讓討古州叛蠻來降者多留之軍中上聞遣使諭之曰爾招諭蠻民聞有降者迺留寘營中此豈兵家受降處置之法凡營壘曲折兵馬動靜彼豈不知一旦背叛必有倉卒不測此事切當慎之昔元時洞蠻作亂調三省軍馬征之蠻人詐降厚以金銀賂其平章及左右之人平章遂推誠待之不疑其詐賊迺乘其無備夜入其營生禽平章以去衆皆不知又聞而奴之以為戲笑此覆轍可為鑒戒自今有來降者當詢其山川地

里人口錢糧預為籌畫然後散其部曲收其器械庶幾不墮其詐易於勦滅尔其慎之

大明太祖聖神文武欽明啓運俊德成功統天大孝高皇帝實錄卷之二百五十四

太祖高皇帝實錄卷之二百五十五

洪武三十年九月庚戌朔沔縣賊高福興伏誅初征西將軍長興侯耿炳文駐兵文縣武定侯郭英駐沔縣遣陝西四川都指揮同知吳旺俞琪等領兵分道入沔縣之後河土門文縣之茶峪溝三倉五福之地徧行緝捕福興奔竄無所遂就擒并獲其黨汪伯工陳妙貴楊文舉王師傅劉普成等詔悉誅之宥其脅從者為軍凡四千餘人仍留四川都指揮同知趙興領兵八千餘人追捕餘寇田九成陳二舍等英還軍陝西未幾召還京師

○辛亥 上命戶部下令天下民每鄉里各置木鐸一內選年老或替者每月六次持鐸徇于道路曰孝順父母尊敬長上和睦鄉里教訓子孫各安生理毋作非為又令民每村置一鼓凡遇農種時月清晨鳴鼓集眾鼓鳴皆會田所及時力田其怠惰

者里老人督責之里老繼其怠惰不勸督者有罰又令民凡遇
婚姻死葬吉凶等事一里之內互相賙給不限貧富隨其力以
資助之庶使人相親愛風俗厚矣○壬子冊陝西都指揮使劉
遂女為秦王尚炳妃○置寧羗衛于漢中沔縣之大安遷漢中
衛右千戶所于沔縣屯守先是長興侯耿炳文奏沔縣大安之
地連接一百八渡及虞關等處盜賊出沒皆由此路宜置衛鎮
之仍遷漢中衛所屬右千戶所于沔縣屯守至是詔從其言○
丙辰皇第五十孫仲斌生韓王世子也○丁巳晉王櫜代王桂
各遣使進嘉禾凡一百四十八本○壬戌署平鄉縣知縣國子
生曹禮言往歲詔天下州縣歲貢人才一人緣屬戶有多寡宜
令戶少下縣三年選一人充貢人衆州縣如常制貢之時方取
用富民因命天下罷貢人才○癸亥城銅鼓勅楚王楨湘王栢

曰前命爾兄弟帥師征蠻既不親臨戰陣建立功勳宜各以護
衛軍一萬銅鼓衛新軍一萬靖州民夫三萬餘築銅鼓城每面
三里城池宜高深坊巷宜寬正營房行列宜整齊期十一月訖
工令銅鼓衛指揮千百戶守之其銅鼓軍士除留一千守衛餘
從總兵官征進至耕種時仍還本衛爾兄弟可率築城設衛軍
士還國繪圖來奏○朝鮮國王李旦遣其戶曹判書鄭允輔奉
表貢方物賀天壽聖節○丁卯天壽聖節上御奉天殿
受朝賀大安群臣○戊辰麓川平緬宣慰使司刀幹孟叛逐其
宣慰使思倫發初平緬俗不好佛有僧至自雲南善為因果報
應之說思倫發甚信之又、有金齒戍卒逃入其境能為火炮火
銃思倫發喜其有藝能俾繫金帶與僧位諸部落上刀幹孟惡
之遂與其屬叛率兵寇騰冲府思倫發畏其勢盛率其家走雲

南西平侯沐春遣送京師。○乙亥 上以平羗將軍都指揮齊讓逗遛不進兵平蠻無功命左軍都督楊文佩征虜前將軍印為總兵官右軍都督同知韓觀副之錦衣衛指揮使河清鳳陽衛指揮使宋忠為叅將統京衛及湖廣江西等都司軍馬往代之遣官祭告岳鎮海瀆之神曰昔元末兵爭傷生者衆予荷皇天眷命海岳効靈諸將用命戡定禍亂兵偃民息今三十年通者西南戍守將臣不能宣布恩威虐人肥己致令諸夷苗民困窘怨怒合攻屯戍擾我國善予不得已命將出師討之然山川險遠草木障蔽烟嵐雲霧之間吞吐呼吸多生疾疫與蠻賊持久未遂成功是用再命大軍征討以除患安民然諸將校各辭父母妻子深入其地歷涉險危冀神幹造化之機消瘴癘之氣使兵不躋武諸夷早附各歸營壘養老慈幼是所望也神其

鑒之復諭文等曰都指揮齊讓討賊久而無功故命爾等代之凡用兵行師以嚴明爲勝賞罰必當功罪然後恩威並行人心悅服如分遣官軍入山追捕日可行十五里或二十里暮即還營如此則出入有時寇不得肆其狙詐若五開蠻人果來連構即調兵會征南將軍都督僉事顧成同剿捕之其安陸侯吳傑江陰侯吳高以事獲罪可與步騎三四千俾之立功竊都督湯都督嘗領兵爲楚相二王宿衛駐營黔陽辰溪之地二人亦令從征宋都督劉都督亦各與軍一二萬俾自當一路仍先檄思州宣慰司土官轉運糧餉以足軍用○復遣錦衣衛指揮譚全等諭古州從征將士曰兵征既久未見成功益齊讓老矣且無智謀宜不能馭將士也今特命左軍都督楊文佩征虜前將軍印代齊讓爲總兵爾諸將士當思奮力決戰以蓋前愆

冬十月己卯朔享太廟○詔免淮安府今年田租以淫雨傷稼故也○壬午行人高稹自陝西宣諭禁鬻私茶還言三事一曰乞減內地巡茶關隘二曰選老成練達兵務之將捍禦西陲三曰民之逋糧宜從土地所宜折收上並從其言○癸未詔折收天下逋租上諭戶部曰昨行人高稹言陝西之民困於逋賦其議自洪武二十八年以前凡各處逋租皆許隨土地所便折收布絹綿花及金銀等物宜定著其例於是戶部定每鈔一錠折米一石金一兩折十石銀一兩折二石絹一匹折一石二斗綿布一匹折一石苧布匹綿布減三斗綿花一斤折米二斗上曰折收逋賦蓋欲蘇民困也今如此其重將愈困民豈恤之之意哉其金銀每兩各加一倍鈔止二貫五百文折一石餘從所議乃下詔曰朕荷天眷代元為君統一寰宇主宰生民已三

十年矣設官分職各有攸司通年郡縣租賦因官吏不職不能
宣布條章民愈窮困今勅戶部凡天下積年逋賦皆許隨土地
所便折收絹布金銀等物以免民轉運之勞爾百司一如朕命
毋怠○甲申賜國子監琉球生冬衣○乙酉平羗將軍都指揮
齊讓械送蠻寇林寬等至京○丙戌遣使勅征虜前將軍都督
楊文等曰十月七日齊讓已遣武昌左衛指揮朱俊械蠻寇林
寬及潭洞賊首楊通秀至京觀其人皆庸懦愚人宜不能爲此
亂計諸蠻中必有桀驁者爲謀主特愚弄林寬楊通秀族其倡
亂事急則令其來降爲緩兵之計迺其狡謀也作亂之原實在
諸洞蠻酋今寬等具言諸蠻詭詐狀爾等宜次第捕滅其令寬
等投降皆是虛詐意在沮我大軍若大軍遠行必於中途設伏
掩我不備慎毋遽掠楊文至軍去齊讓營百里先令叅將何清

等領步騎同指揮譚全散騎舍人劉添錫等詣讓營中宣詔收
平羗將軍印即送讓赴京其副將宋晨胡冕仍令從征立功○
戊子 上諭戶部臣曰遼東海運連歲不絕近聞彼處軍餉頗
有贏餘今後不須轉運止令本處軍人屯田自給其三十一平
海運糧米可於太倉鎮海蘇州三衛倉收貯仍令左軍都督府
移文遼東都司知之其沙嶺糧儲發軍護守次第運至遼東城
中海州衛倉儲之○己丑詔發贖罪囚人於平涼諸處立運運
所令其轉運糧餉以給軍士○辛卯勅長興侯耿炳文督陝西
諸衛操練軍馬以俟調用仍啓蕭慶二王知之○擢禮科給事
中王謙爲通政使司左通政吏科都給事中劉昱爲左叅議○
壬辰旌表寧波府慈溪縣民沈性妻張氏紹興府會稽縣民韓
擇可妻薛氏貞節○癸己夜焚惑犯南斗杓第二星○甲午賜

國子監生劉仕名歸養仕名馬湖府宜溪長官司人以歲貢入
監有母老病弟復廢疾仕名上言從古鬻夷不知文教惟皇
上德化遠被建學立師教育邊夷稍知禮義今臣母老且病願
乞歸養雖君恩未報而烏烏私情不能自己上憐之遣歸終
養○乙未重建國子監孔子廟成先是殿上以舊廟隘命工部
改作之至是廟成其制皆自規畫大成殿六楹高四丈三尺餘
深四丈七尺墀廣二十丈深三十七丈大成門六楹靈星門三
東西廡七十六楹神廚庫皆八楹宰牲所六楹○置衡州府安
仁縣長沙府安平縣二巡檢司○庚子革涼州鹽課司時陝西
行都司都指揮僉事張豫言涼州舊設鹽課司置鹽戶撈鹽以
給軍士而所收池鹽不多官吏俱爲虛設請罷之而以撈鹽之
夫爲甘肅倉斗級上從之故有是命○甲辰詔免鳳陽府鳳

陽縣今年田租先是風陽縣自五月至八月不雨禾稼不收者民許景文等來言詔蠲其租戶部以爲未得其實請遣人驗之上曰天旱衆人所共見况風陽朕之鄉里民何敢欺即免之○詔禮部令朝鮮國朝貢三年一來以其國啓本語涉譏訕仍拘留其使○賜在京致仕武官鈔人五十錠麥二十石○丁未暹羅國王遣其臣奈斯勿羅者上表貢方物

十一月己酉朔楚王損妃王氏薨○壬子署僉都御史事鄧文鏗等自陝西畿察私茶還京以文鏗字爲武昌府知府劉觀爲嘉興府知府景清爲金華府知府○宥武定侯郭英罪時英自陝西還監察御史裴承祖劾英私養家奴百五十餘人又擅殺男女五人請治其罪上以英功臣詔勿問左僉都御史張春都給事中馮嶧等執奏不已乃命諸戚里大臣議其罪使知所警

已而宥之○丙辰 上御奉天門見散騎舍人衣極鮮麗問製
用幾何曰五百貫責之曰農夫寒耕暑耘早作夜息蠶婦繰絲
緝麻績績寸成其勞既已甚矣及登場下機公私逋索交至竟
不能爲已有食惟粗糲衣惟垢弊而已今汝席父兄之死生長
膏粱紈綺之下農桑勤苦逸無間知一衣製及五百貫此農民
數口之家一歲之資也而爾費之於一衣驕奢若此豈不暴殄
自今切宜戒之○命中軍都督僉事徐凱指揮使黃中孫禧將
兵討叛酋賈哈剌諭之曰賞罰明信行軍之要賈哈剌雖一賊
功賞不立何以禽之軍士有能斬賈哈剌首者賞白金二千五
百兩斬一從賊者賞銀碗一兩等師往必申明此令○丁巳思
州宣慰使田琛母楊氏以其子琛得罪見釋來謝恩貢馬詔賜
楊氏珠冠霞帔及文綺十二匹帛如之鈔四百錠○癸亥夜月

食○庚午陞行人高稹為鴻臚寺丞初稹以巡察私茶往陝西
還備言道路人民疾苦 上曰古之使者以覽觀風俗咨詢民
情為務今稹所言亦可謂能利國福民矣遂擢用之○改工部
織染局為織染所中帽局針工局為二科添設文思院副使二
員秩從九品○癸酉思倫發至京師 上閔之命西平侯沐春
為征虜前將軍左軍都督何福為左將軍徐凱為右將軍率雲
南四川諸衛兵往討刁幹孟諭思倫發曰爾遠離鄉土經涉歲
月不能無懷土之思強臣為亂勢不容奔逃至此欲謀還國
非將勇兵強不可得也朕今送爾至雲南與西平侯且駐怒江
上先遣爾平日心腹之人入國中諭爾還國之意以觀國中之
向背立衛騰衝以觀其勢若威遠遠幹已附朝廷他郡亦皆聽
命則刁幹孟反逆之威日消腹心之人效順者多爾歸國之期

可數日而待矣若輕易而建而刀幹孟之勢方盛國人腹心莫與爲敵則爾之疆土終非爾有也○甲戌都指揮齊讓至京以總兵逗遛伏誅○乙亥改雲南鶴慶麗江二府爲軍民府時西平侯沐春奏二府地屬遠方州縣人民多義兵土軍聚則爲兵散則爲民卒難調用宜立百夫長領之改爲軍民府便制可○是月蔡河漸徙入陳州衛護城堤西南行先是河道由城北向東行至是以黃河南決下流淤塞故也

十二月己卯朔○癸未時 上不豫廷臣數問安勅之曰昔有元治世民庶乂安何其至正之君夫於勤民慢於事神由是假手羣雄倡亂華夏兵興之時朕潛草野不得已而從戎當時倡亂稱尊者幾人恣爲吞併自相磨滅如此者十有七年朕西定荆楚東平吳越北撫華夏爲衆所推戴定鼎金陵國號大明改

元洪武三十年於茲朕壽亦七十矣靜而思之非皇天眷命安得居天位若是之久哉古語云天不與首亂豈非朕無心於天下而以救民爲心故天特命之乎近者失調受疾卿等頻來問安禮也堯舜禹湯文武之世泉變稷契伊尹周呂爲之臣其有志匡主一也朕以此示卿卿等竭忠修職副朕至懷○戊子皇第五十一孫貴哈生遼王第二子也○癸巳琉球國山北王攀安和遣使恰宜斯耶中山王察度遣使交費結致各上表貢馬及硫黃○戊戌夜太白入壘壁陣○己亥旌表廣信府玉山縣民葉德將妻王氏貞節○以滿復周爲浙江右布政使方孟昇爲江西左布政使吳彥真爲四川左布政使蔣青爲右布政使徐玉和爲北平左布政使曹昱爲右布政使丁景福爲山西左布政使施惟中爲河南右布政使李彥禎爲山東右布政使周

政爲湖廣右布政使儲顛爲廣西左布政使張拱辰爲右布政使黃名俊爲右叅政○四川木瓜長官石保來朝貢馬○甲辰夜辰星犯建星○陞兵部職方郎中趙彝爲通政使負外郎向寶爲應天府尹先是趙彝爲郎中九年考最以任內有私過遂復職至是向寶任滿亦考最 上欲陞用之吏部亦言寶任內有過且引彝爲證 上曰任人當論材否既歷九年宜略其過遂命并彝陞用之○乙巳遣思倫發還雲南勅諭之曰古語有云民之所好好之民之所惡惡之此之謂民之父毋蓋人心之所在即天理之所在善治民者必求夫民情焉今爾思倫發長有平緬一方而與民心好惡不同故爲下人之所不容而歸於我朕思爾以父祖世澤民故推之今一旦失民之心背國之俗棄墳墓離親戚而來久而不歸則境土非爾有矣然是非不可

不明天討不可不正已遣將問罪刀幹孟故命爾還舊邦賜黃金百兩白金百五十兩鈔五百錠以遣之又勅西平侯沐春曰思倫發窮而歸我當以兵送還其土若至雲南令且止怒江遣人往諭刀幹孟毋為不臣必歸而主如其不從則聲其罪以討之是時刀幹孟既逐思倫發懼朝廷致討乃先遣人至西平侯沐春所請入貢言先嘗遣人致方物乞授土官職事為大甸刀的弄所劫由是弗克上聞願為奏之春許之○丁未置爵溪千戶所屬昌國衛移爵溪巡檢司於薑嶼渡先是散騎舍人王璣言臨山衛及餘姚千戶所軍士正伍之外餘軍尚五百人宜分補沿海衛所守禦詔浙江都司定議以昌國衛所屬錢倉千戶所臨海口去衛二百餘里遇警急卒難應援爵溪地在二百餘里之半雖設巡檢司而弓兵百人嘗不及數若以臨山餘姚餘

軍置千戶於壽溪仍遷巡檢司於薑嶼渡以備萊應爲便詔俱
從之○戊申享太廟

大明太祖聖神文武欽明啓運俊德成功統天大孝高皇帝實
錄卷之二百五十五

大明太祖高皇帝實錄卷之二百五十六

洪武三十一年春正月己酉朔上御奉天殿受朝賀大宴羣臣○雲南沅江府四川東川府并諸州宣慰司土官來朝貢馬○甲寅享太廟○乙卯選羅斛國蘇門邦王昭祿羣磨遣使貢方物賀正旦賜其使人鈔有差○湖廣茶陵衛廣安千戶所韃軍脫火赤等詣闕言千戶恭青怙朝廷削其祿俸推牛置酒宴集韃韃總旗閑閑不花等相與飲金盾酒設誓言期旦夕為亂上謂兵部臣曰亂不靖則起取亂何如靖亂朕無負彼彼將何為今以茶陵衛韃韃官軍分隸長沙寶慶衡州諸衛與舊軍衆伍錯若彼雖欲為亂不可得也乃賞脫火赤銀十二兩鈔二十錠遣還○丙辰琉球國山北王攀安知遣其臣進表貢馬○壬戌大祀天地于南郊○上諭戶部尚書郁新曰大寧開平二衛

墮糧若儲備已多則令商人輸粟於東勝西河以備軍餉新言
大寧儲粟六十二萬餘石開平止二萬五千八百石甘肅亦不
過一十五萬二千石其商人所入未宜改輸 上曰大寧姑罷
若開平儲至四十萬亦宜止之俱令轉輸東勝共價與大寧同
西河之儲姑俟甘肅積五十萬石然後再議○甲子工部尚書
嚴正直言貴州新置都指揮使司而未有治所今暫寓貴州衛
治牙亭衛衛歲久蠹朽宜加修葺緣比奉聖諭謂彼處軍士艱
苦土木之功未可遽興今貴州奏言材料已具夫今弗理恐歲
久益加朽壞請及今備葺則易為力詔俟冬月農隙修之○乙
丑 上以山東南向民多惰於農事以致衣食不給乃命戶部
遣人材分詣各縣督其耕種仍令籍其丁男所種田地與所收
穀菽之數來聞○以普定衛頂營長官司寨長阿祿為長官初

阿祿從頰園公傳友德征雲南累有勞績至是詣闕進馬因自
陳前功故有是命○丁卯廣西都指揮同知姜旺平義寧縣抵
巢叛獠以所獲俘馘并招降之數及兵器來獻○庚午以左通
政王謙為吏部左侍郎○辛未置陝西連雲棧通運所曰長橋
曰鎮山曰白石曰寧溪曰關山曰榆林曰熬關曰留壩皆屬鳳
縣曰清水曰魚潭曰馬道曰麻平曰開山皆屬褒城縣曰沙河
曰順政曰漢江曰金堆曰寬川曰大樹曰栢林曰高關皆屬沔
縣凡二十一所○壬申給賜陝西北平山西遼東等七都司所
屬衛所及諸王府護衛等軍校冬衣布花各有差○癸酉四川
長河西安撫等司土官僧吉麓卜等來朝賜宴于東角門○乙
亥太白犯外屏○丙子有星大如雞子起自大陵西南行至天
大將軍浚○工部臣言各處鐵冶久已住罷今內庫所貯鐵有

限而營造所費甚多恐裁用不敷 上令暫開爐冶一年仍使
住罷○是月長河西軍民安撫司土官千戶油籠思卜等來朝
賜文綺襲衣鈿錠

二月戊寅朔定吏員出身事例皆以九年考滿出身凡在京三
考或在京兩考在外一考或在京一考在外兩考一品二品衙
門提控都吏從七品出身掾史令史典史并內府門吏正八品
出身三品衙門令史從八品出身典史及四品衙門司吏正九
品出身四品衙門典史五品衙門司吏典史書吏俱從九品出
身六品至九品并雜職衙門吏典都察院各道吏典俱除雜職
○曹國公李景隆還自西蕃先是命景隆齎金符往西蕃以茶
易馬凡用茶五十餘萬斤得馬一萬三千五百一十八匹至是
還命分給京衛騎士操養○庚辰命吏部設學于虎路關選儒

士十人教故武臣子弟之養于錦衣衛者儒士人給米月二石
○乙酉倭寇山東寧海州由白沙海口登岸劫掠若人教鎮
撫盧智寧海衛指揮陶驛及其弟猷出兵擊之斬首三十餘級
賊敗去猷為流矢所中傷其右臂先是倭夷嘗入寇百戶何福
戰死事聞上命登萊二衛發兵追捕至是驛等擊敗之詔賜
猷帛恤福家○丙戌有星大如杯赤色尾跡有光起自北河東
北雲中西北行至雲中沒○丁亥遣官釋奠于先師孔子○戊
子祭大社大稷○己丑旌表麗州府浮梁縣民黃奉亨妻張氏
貞節○再試寄監下第舉人中式者四百一十五人次其等第
除教授教諭訓導不中者八十七人為州吏目○降浙江按察
使龍鐔為知縣以不任職為人所劾故也○壬辰遣官享先農
○癸巳命監察御史國用署浙江按察使聞良輔林崧署山東

按察司副使裴承祖陳叔署浙江按察司僉事監生孟桓濮銘
艾麟署山東布政使司左右叅議○乙未裁減永州府道州江
華縣丞主簿以其人民不及十里也○丁酉浙江都指揮使陳
禮言近者倭賊二千餘人船三十餘艘入寇海澳寨楚門千戶
王斌鎮撫袁潤等禦之賊勢暴悍斌等力不能勝皆戰死詔發
兵出海追捕賜鈔帛恤斌潤家○戊戌陞蘇州衛指揮同知蔡
本為湖廣都指揮使金吾前衛指揮僉事何清為湖廣都指揮
僉事劉誠為廣東都指揮僉事○袁州衛指揮使石玉卒其母
張氏詣闕言玉男偉例應襲父職但偉尚幼未能任事玉弟斌
年已二十餘乞以斌暫襲玉職俟偉長成還其職 上許之○
庚子西平侯沐春奏麓川刀幹孟請入貢且言刀幹孟叛逐其
酋長思倫發恐朝廷聲罪致討故來歸款而思倫發所部忽都

亦據守騰衝怒江及景東迤外威遠等處俱已嚮化歸朝刀幹
孟懼為所攻故欲假朝廷之威以拒忽都其言入貢恐未可遽
信今姑勒兵俟之 上遣人諭春曰遠夷詭詐誠有之然姑從
所請以伺其變其忽都所守諸路爾可從宜撫諭若刀幹孟之
虛詐當當度其宜而處之毋自失事機○水西阿曠畢所部土
酋么不率化犂阿由那與西堡滄浪等寨長必莫者等燒劫屯
堡聚衆作亂征南將軍都督僉事顧成發兵討平之已而西堡
賊阿革傍等復糾合阿黎寨三千餘人為寇成遣安莊衛指揮
使陸秉普安衛指揮顧統等分道擊敗之其地悉平成還京師
○辛丑總兵官左軍都督揚文等奏克平古州林寬餘黨并俘
獲三十岡等處洞蠻二千九百七人惟潰入山谷者未盡勒絕
近軍士多病乞分往迤地辰溪等處就糧操練以俟秋成進取

餘寇 上以餘寇多脅從不必窮追遂詔文等還京師○漢中府通判陳敏言戶部移文令本府民夫運糧二萬七千石往寧羌衛輸納緣所屬金州及南鄭諸縣屢應徭役人民疲困况平利縣離寧羌一千三百餘里道路險隘舟車不通每夫所負僅三四斗往復艱辛有妨農務本府去寧羌衛止三百餘里宜令本衛餘丁按月赴府倉關給庶使軍民兩便勞逸得均 上命右軍都督府與戶部會議行之○甲辰都督僉事徐凱等平卜木瓦寨執叛首賈哈剌送京師誅之賈哈剌磨戡土豪也初王師克建昌授以指揮俾領其部落後與月魯帖木兒叛走據卜木瓦寨其地峻險三面斗絕下臨大江江流悍急不可行舟惟一道僅可通人行官軍至輒自上枝石遂為所托不得進及是凱等至斷其汲道以困之寇不得水日就窮促凱乃督將士直

抵其寨力攻之寇不能支遂就擒○丙午冊曹國公李景隆女
為平陽王濟熿妃○上諭左軍都督府左都督徐增壽曰曩因
碭門拒河西口道路險隘以致往來跋涉艱難市馬數以千聞
有路自碭門出枯木任場徑抵長河西口通雜道長官司道路
平坦往來徑直爾即撥所司開拓以便往來

三月戊申朔琉球國中王察度遣其臣亞蘭匏押撒都結致
每步結致撒都奴侍貢馬及玩黃胡椒等物其世子武寧貢亦
如之先是其國遣女官生姑魯林在京讀書至是謝恩來貢○
命太常寺左少卿廖昇署吏部左侍郎事○靖江王世子贊儀
徧省諸王還京師○命兵部凡故武官襲職子弟當優給者令
其讀書俟十五歲方許承襲若在外衛所來者十歲以上即令
襲職還原衛所仍俾讀書及習閱弓馬以俟比試○己酉 上

諭吏部臣曰用人之道在於隨材任使則天下無棄人矣又曰觀人之法有數等材德俱優者上也材德不及者其次也材有餘而德不足又其次也苟二者俱無此不足論矣若逐勢變移好作威福言是而行非此小人不可用也○辛亥修涇陽縣洪渠堰時涇陽縣耆民詣闕言堰東西堤岸圯壞乞修治之上命長興侯耿炳文工部主事丁富陝西布政使司叅政劉季箎督兵民修築之凡五月堰成又浚堰渠一十萬三千六百六十八丈民皆利焉○甲寅賜琉球國使臣亞蘭袍等鈔有差○丙辰上以天下學官多避貫除授有北平山西籍而選在兩廣兩廣籍而選在山東北平者語言不通難於講授命吏部悉召至改授旁近郡縣○己未晉王柵薨王上第三子孝慈皇后所生年十三歲受封又七年而之國聰明英銳受學于翰林

學士宋濂學書于錄事杜還眉目脩髯美鬚髯顧盼有威容多
智數至是以疾薨上哀慟輟朝三日賜謚冊曰朕惟先王之
典生有名殺有謚所以彰其德表其行也曩者封建諸子王爾
于晉為國藩屏于茲有年邇者因疾永逝特遵古典賜謚曰恭
嗚呼謚法者古今之公議不可廢也爾其有知服斯寵命冊寶
俱如秦王制度晉世子濟熺將葬恭王欲得民地千一百餘畝
為寢園遣使入奏上命以八百畝為限而以附近官地償民
仍量地多寡給鈔加賜之○庚申命戶部諭商人於銅鼓五開
靖州納米以湘鄉澧州鹽給之不足則給以淮浙鹽戶部定議
輸米靖州三石銅鼓二石五斗五開二石皆予湘鄉澧州鹽一
引輸米一石則與淮浙鹽並不拘次支給從之○癸亥太陰犯
氐宿○上諭五軍都督府臣曰近聞守邊將帥多不究心如五

開守禦指揮千百戶私役軍人受賄弄法以致軍伍缺少城寨不脩蠻獠竊發攻劫屯戍男女死者八百餘人皆將帥怠弛之故也自今如一衛五千六百人指揮五員則以左右前後四所分四指揮管領中所則掌印官管之凡修繕城池五千戶均分其二敵至且守且戰四千戶各守四門掌印指揮提調中所總四指揮而一其部伍如城壁不高壕塹不深屯種不勤則坐本管指揮千百戶之罪軍容不整器械不精操練不熟則罪分管之官其遣人往諭各衛一循前後處分慢令者究治之○賜琉球國中山王察度冠帶先是察度遣使來朝請中國冠帶上曰彼外夷能慕我中國禮義誠可嘉尚禮部其圖冠帶之制往示之至是遣其臣亞蘭匏等來貢謝恩復以冠帶為請命如制賜之并賜其臣下冠服○甲戌免鳳陽懷遠縣去年田租先是

耆民胡官一等詣闕言歲旱稼穡不收租稅無所出願以銀鈔布帛代輸戶部尚書郁新以為對撥官軍俸糧已定難聽折收上曰民者國之本也彼既飢殍而又責其賦稅將困踣流亡豈為人上之道哉命悉免之○旌表青州府安丘縣甯氏女貞節初甯氏幼時許嫁同里劉真兒未婚真兒死甯氏年方十六聞訃甚哀既而謂父母曰古云烈女不更二夫今雖未與之醮然聘禮既行父母之命已定矣夫不幸而死其父母老無他子女寧能忍恥再事他姓使人老父母無所依乎詣往事舅姑父母初未之許詣至三而許之甯氏至真兒家為服衰麻哭臨祭其無違禮在舅姑側恭執婦道晝夜勤女工以供奉養舅姑殫盡費其衿珥以葬歸劉氏凡五十二年六十八節行完茭鄉里稱之至是聞詔旌表之○丙子有星大如杯青赤色尾跡有

光起自翼宿西南行至迎濁沒

大明太祖聖神文武欽明睿運俊德成功統天大孝高皇帝實

錄卷之二百五十六

大明太祖高皇帝實錄卷之二百五十七

洪武三十一年夏四月丁丑朔琉球國中山王察度遣其臣鵠
勸佳穆程復貢馬及硫黃○戶部奏改鑄造鈔銅板自二十文
至五十文共六十三板并印鈔正背銅印○罷回回欽天監○
庚辰五軍都督府及兵部臣奏言朝鮮國雖奉貢不絕而疊生
釁隙請討之 上曰朕欲止朝鮮生釁者將以安民也與師伐
之固不為難得無殃其民乎但命禮部移文責之彼若不悛討
之未晚於是禮部咨其國王李旦曰曩者我 至尊即實位推
乾符統中夏君臨萬國于時遣使馳報四夷惟爾故高麗國王
遣使朝貢雖曰知奉天命實乃效順修睦以安三韓之民我
至尊奉天勤民未嘗肯以兵強四夷每諭王曰靖保爾疆毋生
邊釁自始至今切戒諭之自王當國以來假以入貢為名陰說

守邊將士啗以財賄群臣屢請與師問罪我 至尊恐傷生靈
故不忍為昔漢隋唐遼金元之特王三韓者苟有微釁即與師
致伐三韓之民受害非淺靜思兵禍孰不寒心今王疊生蒙陔
用招禍愆我朝非無敵愾之將問罪之師 至尊之德海涵春
育無所不容唐太宗不應自以為功矜其智能爾王國之資未
嘗不竭王國之兵未嘗不潰王國之民未嘗不疲也我 至尊
智並日月功邁三王聖神文武豈太宗之可及乎且古人布令
陳詞少失恭順之體不免勤兵遠征今王數生邊釁於我海岳
山川之神必昭鑒於爾已嘗諭王改圖以全一國生民之命今
王誦詐猶爾可謂明不畏朝廷幽不畏鬼神下不恤民命夫中
國距爾三韓甚通安可不責而正之乎雖責之其實教之也雖
教之其實愛之也 至尊之仁如此王之不悛何也若縱王所

為專尚詐謀是教人不臣也如王有不臣之人亦何利哉王之左右皆佻儇儉巧不務以道導王專構禍以殃民其得罪於上下神祇昭昭矣鄭總至京罪已承伏而鄭道傳者王尚信用豈非王無悛過之心乎王宜深思熟慮以保三韓毋貽後悔○壬午四川成都府仁壽縣奏石基鹽井廢宜開益興井以補其課從之○癸未陞衛知事為經歷先是內外諸衛設經歷一人從七品知事一人從八品後汰經歷惟留知事一人而印章與所署司名仍舊至是天策衛知事周璿建言宜罷知事而役經歷庶使官制有常名實不戾 上從之○乙酉降左僉都御史張春為刑部員外郎郭資為戶部主事右僉都御史王良為刑部郎中初春等由部屬官擢居臺憲後刑部員外郎溫厚等坐法下都察院獄春與厚等嘗為僚友故緩其獄久而不決為監察

御史周膺所劾故降之○勅今上曰通聞塞上烽火數警此胡虜之詐彼欲誘我師出境縱伏兵以邀我也不可墮其計中烽起之虞人莫宜近雖望遠者亦須去彼三二十里今秋或有虜騎南行不冠大寧即襲開平度其人馬不下數萬豈可不為之慮可西涼召都指揮莊德張文傑開平召劉真宋晟二都督遼東召武定侯郭英等會兵一處遼王以都司及護衛馬軍悉數而出北平山西亦然步軍須十五萬布陣而待令武定侯劉都督亦都督翼於左莊德張文傑都指揮陳用翼於右爾與代遼寧谷五王若其中彼此相護首尾相救使彼胡虜莫知端倪則無不勝矣兵法示機而實胞內猜而外死爾其察之○賜國子監琉球雲南生夏衣○丁亥旌表湖州府烏程縣民金七妻俞氏貞節○戊子陞刑部侍郎暴昭為左都御史天策衛經歷

周璿為左僉都御史璿以言事稱旨故也○己丑享太廟畢
上步出廟門徘徊顧立指桐梓謂太常寺臣曰往年昔此今不
覺成林鳳陽陵樹嘗亦似此因感愴泣下又曰昔太廟始成遷
主就室禮畢朕退而休息夢朕皇考呼曰西南有警覺即視
朝果得違報祖考神明昭臨在上無時不存爾等掌祭祀宜加
敬慎且暮中使供灑掃奉神主恐有不虔當以時省視務令齋
潔以安神靈○琉球國中山王察度遣其臣阿不耶貢馬及疏
黃○丁酉遣道政使趙彝持節往山西立晉世子濟熺為晉王
○陞龍江衛經歷黃福為工部左侍郎羽林衛經歷邊昇為占
時即俱以言事稱旨故也○壬寅詔免淮安府鹽城山陽二縣
田租時二縣大水傷稼民因負租上知之故有是命
五月丁未朔太白犯五諸侯○西平侯沐春進兵擊平緬先以

兵送思倫發于金嶺使人諭刀幹孟不從乃遣左軍都督何福
瞿能等將兵五千往討之福等諭高良公山直擣南甸大破之
殺其酋刀名孟斬獲甚衆回兵擊景罕寨寨乘高據險堅守不
下官軍糧械俱盡賊勢益盛福使告急于春春率五百騎往求
之乘夜至怒江諾旦度令騎馳躡寨下揚塵以驚之賊乘高望
見塵起敵天不意大軍卒至驚懼遂率衆降春乘勝復擊崆峒
寨賊夜潰走刀幹孟迺遣人乞降事聞朝廷以其誕詐復授春
征虜前將軍令侯變以討之春後病卒刀幹孟竟不降乃命都
督何福往討擒刀幹孟以歸思倫發思得還平緬諭牟卒○庚
戌開四川保寧府南部縣蓮花池鹽井○辛亥山東平度州昌
邑縣知縣賈貴言去年十二月大風拔木海潮泛溢侵沒官民
田三百一十餘頃牟麥不收今歲苗稼尚未可耕種恐民失所

詔戶部遣使覈實免其租。○占城國遣其臣孫子布婆晒核為
台夜皮磨貢方物詔賜子布等衣鈔有差。○甲寅 上不豫。○
丙辰四川平茶洞長官司土酋楊欣來朝貢方物。○戊午勅左
軍都督楊文曰兵法有言戡心不可以事上疑志不可以應敵
為將者可不不知是也。朕子 燕王在北平北平中國之門戶
今以爾為總兵往北平參贊 燕王以北平都司行都司并
燕谷寧三府護衛選揀精銳馬步軍士隨 燕王往開平隄備
一切號令皆出自王爾奉而行之大小軍宜悉聽節制慎毋戡
心而有疑志也。○勅武定侯郭英曰朕有天下胡虜遠遁久矣
然萌孽未殄不可不防今命爾為總兵都督劉真宋晟為之副
啓遼王知之以遼東都司并護衛各衛所步軍除城守馬軍及
原留一百守存斥候餘皆選揀精銳統領隨遼王至開平迤北

擇險要屯駐隄備一切號令悉聽 燕王節制○庚申置成都
重慶保寧三府及播州宣慰司茶倉四所命四川布政使司移
文天全六番招討司將歲輸茶課仍輸碶門茶課司餘地方就
近悉送新倉收貯聽商人交易及與西番市馬羽林右衛軍丁
以遺火燒廊房六十餘間法司請治其罪 上曰彼非故為也
釋之○癸亥壘壁陣星隸就聚○丙寅置山東都指揮使司屬
衛七曰安東曰靈山曰鰲山曰大嵩曰威海曰成山曰靖海○
暹羅國遣使來斯勿羅者貢方物賜使者鈔錠○遣監察御史
史仲成等分往北邊諸王府稽閱牛羊馬駝驢驘之數○戶部
尚書郁新言往者山西狹鄉無田之民募至山東東昌高唐境
內屯種給食今已三年請如民田例徵租 上命再復其租一
年○丁卯高郵州泰州水詔免其田租○壬申四川新設衛所

地方蠻人糾集光金堵虎寨蠻人作亂搆揮程暹等率兵討平之○乙亥勅 今上曰朕觀成周之時天下治矣周公猶告成王曰詰爾戎兵安不忘危之道也今雖海內無事然天象示戒夷狄之患豈可不防朕之諸子汝獨才智免堪其任秦晉已覺汝實為長攘外安內非汝而誰已命楊文總北平都司行都司等軍郭英總遼東都司并遼府護衛悉聽爾節制爾其總率諸王相機度勢用防邊患又安黎民以答 上天之心以副吾付托之意其敬慎之勿怠

閏五月丙子朔罷四川石狗富米二盤井開西充縣坎龍及江縣虎跳尹家盤井三處○浚常州府武進縣奔牛呂城二壩○己卯置潘陽中屯衛及安東中屯衛○乙酉 上崩于西宮二素少疾及疾作日臨朝決事不倦如平時漸劇乃焚香祝天

曰壽年久近國祚短長子孫賢否惟簡在帝心為生民福即遣
中使持符召 今上還京至淮安用事者矯詔即還 上不之
知也疾亟間左右曰第四子未言不及他聞兩降喜形于色
遂崩壽七十一遺命葬喪儀物一以儉素不用金玉孝陵山川
因其故無所改天下臣民出臨三日皆釋服無妨嫁娶○辛卯
春孝陵 上以天縱之資起自田里遂成大業當是時元政陵
夷豪傑並起大者竊據稱尊小者連數城邑皆恣為殘虐糜弊
生民天下大亂極矣 上在民間閱焉傷之已而為衆所推戴
拒之益未乃不得已起義即條法令明約束務以安輯為事故
所至撫定民咸按堵不十餘年間盪滌群穢戡定禍亂乎一天
下建混一之功雖曰天命人歸要亦神武不殺之所致也即位
之初稽古禮文制禮作樂修明典章興舉廢墜定郊祀建學校

尊孔子崇儒術育賢才註洪範叙九疇罷黜異論表章經籍正
百神之號嚴祭祀之典察天文推曆數定封建謹法律慎賞罰
撫四夷海外遠方諸國皆遣子入學南極炎徼北逾水壤東西
際日月之所出沒罔不率服昧爽臨朝日晏忘餐虛心清問從
善如流神謀睿斷昭見萬里退朝之暇即延接儒生講論經典
取古帝王嘉言善行書寘殿廡出入省觀斥侈靡絕遊幸却異
味罷膳樂泊然無所好敦行險朴以身為天下先凡詔誥命令
詞皆自製淳厚簡古洞達物情當守戒諭臣下動引經史諄切
懇至聽者感動訓勅子孫臣庶具有成書詔法萬世謹宮壺之
政嚴官寺之防杜外戚之謁而家法允正紀綱法度彰彰明倫
至於禮先代罷獻浮存高年興孝弟勵農桑蠲逋負宥死刑焚
獄具挂廉能黜貪酷摧奸暴佑良善寬仁愛人專務德化是以

身致太平三十餘年民安其業吏稱其職海內殷富諸福之物
莫不畢至功德文章巍然煥然過古遠矣傳稱唐虞禪夏后殷
周繼然成湯革夏乃資毫衆武王伐商爰賴西師至于漢高難
起徒步尚籍亭長扶縱徒集所附 上不階寸土一民呼吸響
應以有天下方冊所載未之有也於手盛哉况生而神明屢有
異徵日章天質鳳目龍姿聲如洪鐘奇骨貫頂故元時太史言
聖人生江淮按讖索之竟不能得盖天啓 大明隆盛之運實
生 聖人以舊景命夫豈偶然在位三十一年升遐之日天下
哀慕如喪考妣永樂元年六月丁巳尊謚 聖神文武欽明啓
運俊德成功統天大孝高皇帝廟號太祖
大明太祖聖神文武欽明啟運俊德成功統天大孝高皇帝一
卷之二百五十七